



ELOQUENTIÆ
PRÆLUDIA.



ELOQUENTIÆ PRÆLUDIA,

S E U

COMPENDIUM EORUM,

Quibus institui, & exerceri solent,
qui Literis Humanioribus
dant operam,
& Rhetoricæ initiantur:



*Ex Aristotele, Tullio, Quintiliano,
alijsque probatis Autho-
ribus,*

A P. D. DEMETRIO SUPENSIO
Cler. Regul. Barnabita
collectum.

*Exhibet P. R. Doctores X. y. y. D. n. e.
R. m. y. f. k. L. n. e. m. a. n. i. e. i. n. m. a. n. i. e.*

MEDIOLANI,

Typis Iosephi Pandulfi Malatestæ.
Superiorum permissu.
Anno 1720,

Handwritten text, likely a signature or name, appearing upside down. The text is written in a cursive script and is partially obscured by dark ink smudges.

**DON OCTAVIVS
VICECOMES**

Congregat. Cler. Reg. S. PAULI
Præpositus Generalis



CUm Librum, cui titulus
est: **ELOQUENTIÆ
PRÆLVDIA**, à P. D. Demetrio
Supensio Congregationis nostræ
Presbytero Professo compo-
situm, duo eiusdem Congregatio-
nis nostræ eruditi Viri, quibus
id commisimus, accurata lectio-
ne, & graui iudicio recognoue-
runt: Nos, vt Typis mandetur,
quantum in nobis est, facultatem
facimus. In quorum fidem has
fieri, sigilloque nostro muniri
iussimus. Dat. Mediolani in Col-
legio nostro SS. Pauli, & Barna-
bæ die 17. Augusti 1694.

**D. OCTAVIVS VICECOMES
PRÆPOSITVS GENERALIS.**

Nonis Martij MDCCXX.

REIMPRIMATUR

Fr. Ioseph Maria Felix Ferrarini
Ord. Præd. Sacra Theologia Magister,
ac Commiss. S. Offitij Mediol.

Carolus Franciscus Curionus pro Emi-
nentiss., & Reuerendiss. D. D. Card.
Archiep.

Federicus Cesatus pro Excellentissima
Senatu.



AMPLISSIMO PATRI

D. OCTAVIO
VICECOMITI

GENERALI PRÆPOSITO

Congregationis Cleric. Regul.

S. PAULI.

D. Demetrius Supensius

Felicitatem .



*Loquentiæ Prælu-
dia quòd offeram
Tibi , non mole-
stè , (ut arbi-
tror) feres* **AMPLISSIME**

a 4 PA-

*P A T E R . Licet enim non
satis Tuo nomine digna vi-
derentur Artis rudimenta ,
Tu tamen effecisti , ut inscri-
bere auderem , ac Tua esse
vellem , quæ Tu esse mea
constare voluisti . Prodire iam
cæperat velut orphanus liber ,
aut patre natus incerto : eru-
ditissimo quippe , & acutissi-
mo seculo nunquam tentan-
dam mihi censui communis
iudicij aleam , editis maximè
præceptis , quibus publicum
agerem Professore . At cum
à me scripta exigenterentur , quæ
secus intra domesticos recessus
contineri voluissem , nec postu-
lantibus denegari , neque iam
emissa*

emissa è manibus latere possent, optabam saltem latere Scriptorem; eo nimirum consilio, ut quidquid eueniret operi, ignoratus ipse ignoraret. Euicit, quod una poterat, vis imperij Tui, ut me profiterer Authorem, palàmque ferrem quidquid Literatorum censura de mea tenuitate statueret. Parere itaque malui, quàm mihi sapere, priuatæque prudentiæ cautionem obsequij debito anteferre. Iam verò ita confirmat animum rectè facti conscientia, ut hoc uno putem mihi satis prospexisse: nam & prodire auspicijs Tuis maxima

a 5

est

est Scriptionis merces, ac Tibi
placuisse votorum summa;
nec alia maior mihi gloria
querenda est, quam morem
gerendi. Immo quaecunque de
me alij suffragia ferant, iu-
dicium mihi Tuum præ om-
nibus est; quod cum sanciat
veneratione Religio, splendo-
re illustret Generis gloria,
grauissimo insuper calculo Doc-
trina confirmat. Nam quan-
uis altiora Te studia in Phi-
losophicis, ac Theologicis Ca-
thedris exercuerint, mites pa-
riter amasti Musas, quarum
amœnitate seueram eruditio-
nem adornasti. Atque inde
illa est vigil solertia, qua
fa-

faues ingenijs, & literarum
omnium promoues incremen-
ta: quin inter arduas regimi-
nis curas in id etiam non exi-
guam partem consiliorum Tuo-
rum impendis, ut quotquot
à prima ætate ingenuis disci-
plinis addicuntur, Nostrorum
opera erudiendi, quàm dili-
gentissima cultura instituan-
tur. Illorum itaque commodo
comparata Præludia cum Tu
probaueris, quid iam dubi-
tem, Te non modo annuente,
sed etiam iubente, vulgare?
Neque est, cur reformidem,
ne minus consona Dignitati
Tuae, parum æquis oculis respi-
ciantur: qua enim humanita-

te excitasti Authorem , operi
indulgebis ; cum præsertim eo
Tibi offeratur animo , cuius
& nouisti sinceritatem , &
deuinxisti meritis obseruan-
tiam . Hanc non tantum iure
Instituti nostri , ac peculiari-
bus alijs præterea nominibus
obstrictam dum his paginis
testor , minimum maxima de-
bentis tributum Præludijs ad-
numera . Vale .

Ex Collegio nostro S. Ale-
xandri Mediolani Calendas
Novembris 1694.



AD



A D

LECTOREM.



Ntequam hiscas, LEC-
TOR Humanissime,
tibi statim occurro,
nec vanus (vt opinor)
tuæ mentis interpret.
Illud utique primùm
à me quæres, quid affe-
ram noui? Nec te pluribus moror.
Novum titulum, novum libellum.
Papæ, inquires, rem magnam præ-
stas! Quasi verò non satis augeat
in dies huiusmodi chartacea supellex,
magno Typographorum emolumento,
nec minore tædio Lectorum, qui dum
nouitatis illicio currunt ad paginas,
è prælo recentes, antiquiora Diphtera
inueniunt. Immò tu mihi gratiam
debebis, quòd te non fefellerim *gran-*
di promissor hiatu, sincera libelli fron-
te professus, nec noua polliceri me,
nec magna. Quid verò noui de anti-
quissi-

quissima dicendi Arte depromi possit, hac nostra præsertim ætate, in quam tot veterum, ac recentiorum eruditissimæ lucubrationes, elaborata tot seculorum opera confluxere, ut iam copia laboret? At magnum est Eloquentiæ nomen, idque ipsum non mediocre inijcit expectationem. Non tibi sanè promisi *Suadæ medullam*. Præludia exhibeo. Non veteranos in puluerem duco, sed tirunculos in umbratili palæstra primis imbuo rudimentis, ac leuioribus quibusdam velitationibus exerceo, quibus iusto certamini præludant. Nec parui tamen momenti rem istam puto: ardua enim prima sunt omnia; cætera studio, usuque mollescent: atque ubi adoleuit cum annis ingenium, ubi accessit parta lectione, aliarumque ope scientiarum eruditio, iam adeo alieno ductu non eget.

Eos igitur, qui recentes ad hæc studia se conferunt, iuuare in animo est, primosque ita præmonstrare gradus; ut inde facilem inueniant ad maiora progressum. Ipsum Præludiorum nomen satis indicat, hæc esse scripta discipulis; illorum proinde utilitatem, non acutioris, vberiorisque doctrinæ gloriam spectare, quàm longè impar non ambio, à tot summis Viris

occupatam. Sed audio monentem Horatium. (a)

Quidquid præcipies esto brevis, ut citò dicta

Percipiantque animi dociles, teneantque fideles.

Audio Quintilianum docentem, operosas, fusasque præceptiones non esse incipientibus proponendas, quibus (b) *breuius, ac simplicius tradi magis conuenit*; aut enim difficultate institutionis tam numerosæ, atque perplexæ deterreri solent, aut eo tempore, quo præcipuè alenda ingēnia, atque indulgentia quadam nutrienda sunt, asperiorum tractatu rerum atteruntur: aut si hæc sola didicerint, satis se ad Eloquentiam instructos arbitrantur; aut ad certas quasdam dicendi leges alligati conatum omnem reformidant. Vnde existimant accidisse, ut qui diligentissimi Artium Scriptores extiterunt, ab Eloquentia longissimi fuerint. Via tamen opus est incipientibus, sed ea plana, & cum ad ingrediendum, tum ad demonstrandum expedita.

Hanc itaque ostendendam quærentibus aggredior, non per longa diuerticula, sed per calles compendiarior;

a *De Arte Poet.*

b *In Proœmio lib. 8.*

rios; neque secutus partium Artis ordinem, at ab ijs exorsus, quibus primum imbuuntur solent Adolescentes, cum Grammaticæ fines egressi transeunt ad Literarum Humaniorum classem. Ideo quanuis Elocutio in Rhetoricæ partibus tertium obtineat locum, pleraque tamen ad eam spectantia præmitto; veluti Tropos, & Figuras, & alia, quæ in prima Præludiorum Parte continentur; cum ab his rudimentis gradatim fiat ascensus: ut qui Latine iam, & emendate loqui didicere, discant subinde ornatè loqui; tum Periodos texere, ac dilatare, suisque vincire nexibus; hinc Orationis fecunditatem Amplificationibus alere; inde alijs huius generis exercitationibus, ut Descriptionibus, Narrationibus, Chrijs, Literisque conscribendis comparent styli facultatem. Altera Parte Compendiolum Artis Rhetoricæ complector, cui breves Tractatiunculas de Elogijs, Argutijs, & Imprefijs adijcio; ut fusæ Orationi pressa, & acuta dicendi ratio succedat.

Cæterum in Arte vetustissima novitatem non quaero; quin ut sequentes tutiori tramite deducam, nota relego maiorum vestigia, longè abhorrens ab eorum consuetudine, qui

ut

(a) *ut aliquid sui viderentur afferre ; etiam recta mutarunt .* Nihil igitur hic nouum , præter modum , & commodum : eiusdem quippe Artis eadem omnino præcepta sunt , quanuis varia sit methodus .

Præceptis lucem afferunt Exempla , quorum vtilem imitaturis copiam sufficere volui , præsertim Figuris , & Locis ; cùm hæc Eloquentiæ potiora esse arbitrer instrumenta . Exemplorum Authores probatissimos elegi . *Stultissimum quippe esse Plinius me docuit , ad imitandum non optima quaque proponere .* (b) Tullium plerunque præmitto ; quid ni enim præcedat Oratorum Antistes ? Alios deinde subijcio antiquioris æui , & notæ melioris . Quædam etiam affero ex recentiorum amœnitate selecta ; ne me putes iratum sæculo nostro , cuius & ingenia veneror , & genio , quantum liceat , sentiotribuendum : is enim demum sapere censetur , quæ temporis seruit .

Aliqua insuper è Sacris Doctõribus excerpere placuit ; qui Eloquentiæ laude claruere ; ne quis hanc totam profanæ solum vetustati adscribat . Sanè qui Sanctorum Patrum , eorum maxi-

^a *Quintil. lib. 3. cap. 1.*

^b *Lib. 1. Epist. 5.*

maximè, quorum authoritatibus vtor, ut D. D. Hieronymi, & Ambrosij, opera peruoluerit, Ethnicæ facundiæ tumorem persæpe despiciet. Quauis enim illi, ne rerum Sanctitatem læderet pompa verborum, stylum consultò compresserint, is tamen ita non potuit contineri, quin passim suas opes effuderit. Hoc de se ipso D. Hieronymus ingenuè fatetur. (a) *Multum in deijciendo sermone laborauimus; sed nescio quomodo etiam si aqua plena sit, tamen eundem odorem lagena seruat, quo dum rudis esset, imbuta est.*

Quòd autem à Poetis multa deprompserim, damnabit nemo, qui Aristotelem, Tullium, Quintilianum, præcipuos Magistros meos lectitarit; qui præterea nouerit, adstrictam numeris, & solutam Orationem plura ex his præceptis habere communia; iisdem ambas Figuris, iisdem Locis uti; atque ita simul ad vtranque Artem, Poeticam, & Oratoriam instrui Adolescentum ingenia. Neque audiendos opinor, qui studium Poësis, tanquam inutile, auersantur; qui scilicet vel parum propitias Musas habent, vel ignaui negligunt earum

gra-

a Tom. 1. Epist. 21. ad Paulum Concordiensem.

gratiam ; hinc socordiam suam trita
sententia excusant. *Poeta nascuntur ,
Oratores fiunt*. Immò si quis prorsus
auerso natus est Apolline, hunc arbi-
tratu meo , neque sat æquis oculis
respiciet Suada, vel ægrè ad Oratio-
nis dignitatem attollet.

Nonnulla proprio stylo quandoque
inferui ; non quòd meliora hæc pu-
tem ; sed quòd ad normam præsen-
tium præceptionum facta proximius
earum praxim aliquando discipulis
ostendant , quibus illa non semper
tam facilè patet in grauiorum Scrip-
torum exemplis . At neque totam
credidi officinam alienis tantùm mer-
cibus instruendam. Tuum erit ex om-
nibus magis profutura secernere .
Exempla , quencumque Authorem
habeant , ea esse volui , quæ simul
prodesse moribus possent , certè neuti-
quam obesse.

Si fortè aliqua occurrent , quæ ma-
gis explanata desideres , illud respon-
debo , quod ad Trebatium Tullius de
Topicis à se conscriptis . (a) *Sic tibi
quædam videbuntur obscuriora , cogi-
tare debebis , nullam artem literis ,
sine interprete , & sine aliqua exerci-
tatione , percipi posse . Quæ non satis
explicat mutus in libro Magister ,*
viva

Viua vox Præceptoris explicabit. Neque te insanus illorum abducatur error, qui temerè damnant obscuritatis quidquid ipsi per ignauam inscitiam non intelligunt, nihilque purum, ac sincerum esse volunt, nisi quòd prostat in triuio.

Denique si plura, & maiora cupias, quàm quæ his breuibus Præludijs continentur, habes nostri P. D. Vincentij Galli Rhetorem, cæteraque eiusdem Opuscula, quibus iampridem Scholæ nostræ plurimum debent. Nec alij desunt clarissimi Artis Magistri, qui exactiorem doctrinam posteris reliquere. Illud tamen memineris. (a) *In omnibus ferè minùs præcepta valere, quàm experimenta*: adde postremò, (b) *nihil præcepta, atque artes valere, nisi adiuvante natura*: quapropter ei, cui deerit ingenium, non magis hæc scripta sunt, quàm de agrorum cultu sterilibus terris.


Interim scito Humanissime Lector, libellum hunc inuito prope parente nasci: nihil enim vnquam minùs cogitaueram, quàm vt ad scribenda præcepta me conferrem, quæ venient sub oculos omnium; hæc præfertim

a Quintil. lib. 2. cap. 5.

b Idem in Proæmio Instit.

sertim properata , & inter alias curas
veluti carptim collecta in priuatæ in-
stitutionis vsum : neque per me pro-
diissent ex vmbriis , nisi vicisset eorum
consilium , & authoritas , qui publi-
cæ vtilitati seruire posse censuerunt .
Si tu hoc idem censes , non prorsus
aspernaberis operam meam ; secus
bonam saltem mentem non improba-
bis , vt spero . Vale ,







P A R S P R I M A

Pro Classe

L I T E R A R U M

H U M A N I O R U M.

TRACTATUS

Primæ Partis.

**De Studio Elocutionis, de illius
Virtutibus, de Verborum
copia, & delectu.**

**De his, quæ spectant ad Elocu-
tionis ornatum. De Tropis.
De Figuris Verborum, &
Sententiarum, vbi etiam de
Transitionibus. De Periodi-
ca, & numerosa Oratione.**

**De Amplificatione rerum. De
Locis Rhetoricis. Amplifi-
cationis Praxis, & Appendix
de Diminutione.**

De Descriptionibus.

De Narratione.

De Chria.

De Epistolis conscribendis.



DE STUDIO ELOCUTIONIS,

Quod Eloquentiæ primum
est Elementum.

BIBLIOTECA NAZ.
ROMA
VITTORIO. EMANUELE

*Quid sit Eloquentia, quid Elocutio,
& quæ sint huius Virtutes.*

CAPVT PRIMVM.



E laudibus Eloquentiæ
plura de more præfa-
ri, vnde quasi solen-
ni ritu exordiri plerū-
que solent benedicen-
di præcepta, (quod ad
me attinet) inanissi-

mus arbitror, & ab instituto meo lon-
gè alienum: cùm nec illa nouis istis
commendationibus egeat, merito suo
clarissima, totque tandiu celebrata cala-
mis, ac linguis; nec illius me præconem
profitear, sed indicem; cuius magis est
rectum properantibus tramitem osten-
dere, quàm optatissimum alioqui ter-
minum inutili mora commendare.

At ea est Eloquentiæ dignitas, vt
neque definiri possit sine maximo lau-

A

dis

dis argumento: est enim ex Tullio (a) *copiosè loquens Sapiencia*; atq; (vt idem alibi) (b) *maius quiddam, quàm homines opinantur, & pluribus ex artibus, studiisque collectum*. Eximia sanè facultas, quæ Sapientiæ consortium exigit, totque aliarum disciplinarum subsidia! Quantumuis tamen summum illius culmen emineat, quod nullus vnquam creditur attigisse mortalium, tentandus est ab ima radice ascensus.

Primus itaq; ad Eloquentiam gradus studium est Elocutionis, quod ipsa vis nominis docet; nam denique ab eloquendo dicta est Eloquentia; priusque loqui est, quàm copiosè, ac sapientèr loqui: atque ideo illius initium Cæsar in verborum delectu collocauit (c). Et quanuis Elocutio in texenda Oratione Inuentioni, ac Dispositioni succedat, hæc vna statim apparet, velut exterior cutis, reliquum corpus profundius latet (d). Hæc eadem pars operis, vt inter omnes Oratores conuenit, difficillima, ab ipsis exorta Latinæ Linguæ rudimentis, Humaniorum subinde Literarum opera excolitur, lectione alitur, perficitur usu: cùmque cæteræ Oratoris partes plurimum naturæ debeant, hanc nullus nisi arte assequi potest. Huc studium

a *Cic. in Part.* b *De Orat. l. 1.*

c *Apud Cic. in Bru.* d *Quint. l. 8. in Pro.*

dium adhibendum, hoc exercitatio petit, hoc imitatio, hinc omnis ætas consumitur. Quamobrem quæ ad Elocutionem attinent ijs præmonstranda censeo, qui ad Eloquentiam gradiuntur: (a) nam certè cum sit in eloquendo positum Oratoris officium, dicere ante omnia est, atque hinc initium eius artis fuisse manifestum est.

Elocutio, quam Græci Phrasim vocant, est idoneus usus verborum, & sententiarum, ad ea, quæ mente concepta sunt, explicanda. (b).

Duæ præcipuæ sunt Elocutionis virtutes, Elegantia, & Ornatus. Elegantia in Latinitate, & Perspicuitate consistit. Latinitas complectitur emendatam loquendi rationem, quæ pendet à Grammaticis institutionibus, & Puritatem, ac Proprietatem sermonis, quæ à melioribus Latinæ Linguae Authoribus quærenda est. Pura erit Elocutio, si vitij carebit: quare fugienda erunt, quæ continentur hoc disticho.

*Sordida, prisca, nova, antiquata,
poetica, dura,*

*Turpia, rara nimis, vel peregrina
caue.*

Sordida, quæ iacent, repunt, e face vulgi, ac triuijs sumpta (c). *Prisca*,

A 2

quæ

a *Quint. l. 10. c. 1.* b *Cic. l. 1. de Inuent.*
c *Iust. Lips. Instit. Epist. c. 13.*

4 *De Studio Elocutionis.*

quæ à remotiori antiquitate deriuantur: vt quædam Ennij, Pacuuij, Catonis, Plauti. *Nona*, à recentioribus excogitata, nec admissa Eruditorum suffragijs. *Antiquata*, quorum vsus obsoleuit. *Poetica*, vt Catachreses quædam, & audaciores Translationes, quæ Poetæ licent, non Oratori. *Dura*, impropria, & longiùs deducta; tum aspera omnia, immania, & sesquipedalia. *Turpia*, quæ fœdum aliquid, obscenumue significant. Hæc vel proscribantur omnino, vel si quandoque prætermitti non possint, honestioribus vocabulis explicentur, aut figuratis locutionibus ità obuelentur, vt ingenuas aures non lædant. *Rara*, quæ vix aliquando apud melioris notæ Scriptores inueniantur. *Peregrina*, barbara, & idioma externum redolentia.

Pespicuitas claram, dilucidamque Orationem efficit; qualis erit, si proprijs verbis vtatur, ijsque dicendi modis, quos Literatorum vsus probarit: si æquiucis, & amphibologijs careat: si non antiquioris eruditionis affectatione obscuretur: si naturalem rerum ordinem seruet; vt prima præcedant, subsequencia succedant, vltima postponantur. Absint longæ Parentheses: vitetur nimis concisa breuitas, quæ
ma.

mutilet sensum, nimia quoque Periodorum prolixitas, ac tumultuaria verborum congeries; qualis plerunque ijs accidit, qui Epitheta inutilia cuicumque nomini affigunt. Mirum verò est quantum Elocutionem confundat perturbata constructio, quam aliqui, dum numeros intemperantiùs quærunt, ita permiscent, ut gryphos texere videantur.

Ornatum afferunt Elocutioni Translationes, & Figuræ: tum illa, quam Author ad Herennium (a) Compositionem vocat, quæ suauem reddit Orationem apta partium collocatione, ac numero; de quibus omnibus infra seorsim agemus.

De Verborum Copia, & delectu :

CAPVT SECVNDVM.

Latinæ linguæ inopiam ex eo plurimum nasci crediderim; quòd multos annos primis rudimentis impendentes illius præcepta magis comparare plerique student, quàm vsum, neglecta Latinarum vocum notitia. Hinc euenit, ut adituri Eloquentiæ studia, sine viatico iter aggrediantur; cum vix alia Nomina, & Verba probè calleant,

A 3

leant,

leant, quàm quæ in Grammaticis regulis attriuerè; atque præpostera cura priùs, ornatè, quam propriè, dicere conati, neutrum assequantur.

Illud itaque primùm commendaue-
rim, vt ab initio pueri propria rerum
vocabula perdiscant, & aliqua quotidie
memoriæ mandent; ne, cùm his vten-
dum fuerit, in singulis hæreant, sem-
perque præsentì Nomenclatore sit opus;
qui si deficiat, elingues videantur, vel
barbari.

De varia item erudiantur significa-
tione Verborum, idemque alijs, atque
alijs modis explicare assuescant. Iuua-
bit libellus ille Calipij Poliphraستي de
vtraque verborum, ac rerum copia
(sic enim inscriptus circumfertur, sup-
presso damnati Authoris nomine) alen-
dè Latinitati perutilis: etenim tam mul-
ta, quæ Fabius attigerat, immò, ni fallor,
nimium multa, in rem istam collegit, &
explanauit, vt superuacaneum sit vel
alia quærere, vel huc eadem reuocare.

Rationes aliquot Elocutionis varian-
dæ per Casus vtriusq; numeri Nominũ,
per Modos, ac Tempora Verborum, &
eiusdem generis alias à Grammaticis
petitas habet Gallus in tractatu de
Elocutione cap. 36., & in Grammati-
cæ rudimentis. (a) Illis antea exercendi
erunt

a Consule lib. 4. de Elocut. Ludon. Carb.

erunt in inferiori Classe Humanioribus postmodum Literis operam daturi ; ne cum adollescere deberent ad Eloquentiam , adhuc teneantur infantia .

Elocutionis vbertatem , ac diuitias dabit Lectio ; non varia statim , sed accurata . *Diu non nisi optimus quisque, & qui credentem sibi minimè fallat, legendus est* (a) : non enim apud Scriptores omnes æquè incorrupta est Latine Linguae integritas ; cum hæc per varios ætatum gradus varias subierit vices ; primùm subhorrida , hinc purior , & sensim deterfa vetustatis rubigine splendescens ; mox licentia deterior , donec opprimentibus Italianam Barbaris, Latiumque miscentibus , affatim interijt, & migravit in aliam Nostratibus communem .

Quatuor ergo Latine Linguae Secula distinguuntur . Aureum florens , & illibatum : Argenteum deficiens , aliqua nouitate infectum : Æneum liberius : Ferreum deterius . Quæ succedere corruptissima vix nomen habent , nisi quo suam testentur infelicitatem , Ligneum , & Luteum , in occasum Imperij , sermonisque Romani vergentia .

Ad fontes defæcatæ Latinitatis haurien-

A 4

a Quintil. l. 10. c. 1.

riendos Authores ij legendi erunt, quæ Aureo Seculo, quo maximè viguit, clarruere. Sed horum primi, vt Ennius, Plautus, Cato de re rustica, Lucretius, antiquatis, & obsoletis verbis redundant. In Terentio etiam, ac Sallustio non nihil vetustatis aliqui deprehendunt. Nouissimi excellunt, Cicero, Cæsar, T. Liuius, Cornelius nepos, Vitruuius, Virgilius, Horatius, Tibullus, Catullus, Propertius, & Ouidius; quanuis hic, quòd pauca quædam nouauerit, non inferendus Aureis aliquibus videatur.

Tum seligantur e Seculis alijs præstantiores: vt ex Argenteo Q. Curtius, Valerius Maximus, vterq; Seneca, Rhetor, & Philosophus, Lucanus, Persius & Seneca Tragicus; cui quæ Tragediæ adscribendæ sint, quæ alium authorem habeant, quæstio est inter Criticos, non tam facilè soluenda. Et certè non eodem caractere scriptæ videntur, vt docet Frarnabius in easdem Tragedias, in Præfatione ad Lectores.

Ex Æneo Seculo Fabius Quintilianus, Plinius maior, & minor, Cornelius Tacitus, L. Florus, Martialis, Iuuenalis, Statius.

Ex Ferreo Aufonius, Claudianus, Iustinus, Latinus Pacatus. Primores aliquot, & qui sæpius habentur in manu
e lin.

e singulis Ætatibus decerpo, non dinu-
mero singulos; non enim Bibliothecæ
indicem texo.

At cùm posteriores isti, qui post Au-
reum Seculum scripsere, ad leuandam
Latini Sermonis inopiam plura noua
induxerint, si quæ apud eos offenderis,
ab Antiquis minimè vsurpata, non
statim vt barbara condemnes: quædam
enim necessariò inuenta rebus nouis in-
uentis; & quæ priùs noua fuerant, Eru-
ditorum calculis approbata, iam autho-
ritatem, & ius antiquitatis obtinuerunt.
Nec ijs assentio, qui Latinam Elocutio-
nem constare volunt puris putis Aurei
Seculi reliquijs, vt quamlibet vocem
non ea natam Ætate proscribant. Vbi
Aurea desint, Argenteis; si hæc deficient
Æneis uti licebit, & communi vsu ac-
ceptis: nam *Consuetudo, quæ doctorum
hominum consensu pendet, certissima est
loquendi magistra. Quintil. l. 1. c. 6.*

Thesaurus Linguae Latinæ, & selec-
tiora Lexica peruoluenda erunt, quæ
germanas verborum significationes, eo-
rumque Authores edocebunt. Inde pro-
derit Synonymorum Syluam colligere,
vt Sermonis copia, facultasque pare-
tur; & ne sæpiùs, si eadem de re dicen-
dum fuerit, eadem repetantur, quod
vitiū Orationis Tautologiam vo-
cant. At puerile studium fuerit, si te-

merè congeſta Synonyma ſine diſcrimine adhibeantur; non enim omnium ubique viſe adem eſt: quare ex multis idem ſignificantibus eligentur nitidiora, nobiliora, minusque vulgaria; & cum in uſum transferenda erunt, aptiora, quæque rebus iſſis conſentiant; ut lenia lenibus, grandia magnificis, triſtia triſtibus exprimantur.

Quauis autem plurimum interſit habere verborum delectum, miſerata tamen eſt eorum ſolertia, qui ſingula religioſius explorant; dumque hoc reſpuunt, illud non approbant, aliud elegantius, aliud numeroſius vellent, nullique ſatis acquieſcunt, dies perit, & opus. *Omnia verba (exceptis parum verecundis) ſunt alicubi optima; nam & humilibus interdum, & vulgaribus eſt opus.* (a) Sit ſuum itaq; vocibus pretium, ſed non ſupra meritum vocum.

(b) *Curam verborum, rerum volo eſſe ſollicitudinem.*



De

a *Quintil. l. 10. c. 1.*

b *Idem l. 8. c. 1.*

De his, quæ spectant ad Elocutionis
Ornatum, & primò
de Tropis.

*Quid sit, & quatuorplex
Tropus.*

CAPVT PRIMVM.



TROPVS (a) est verbi,
vel sermonis à propria
significatione in alie-
nam cum virtute mu-
tatio. Nihil igitur aliud
est, quàm verborum
translatio ab ijs, qui-

bus propriè conueniunt, significandis,
ad alia, quorum propria non sunt: sed
cum virtute; idest cum aliqua propor-
tione, conuenientia, & affinitate.
ex. gr. Serenitas propriè pertinet ad
Cælum, risus ad hominem: cùm ta-
men inter serenitatem, & risum quæ-
dam intercedat emicantis lætitiæ con-
uenientia, serenitatem *Cali risum* dices,
risum ipsum *vultus serenitatem*: Cæ-
terùm si quamuis vocem pro alia te-
merè ponas, erit omnino impropria,
& absurda translatio. Dicitur præte-
rea Tropus fieri debere cum virtute;

A 6

hoc

a Quintil. l. 8. c. 6.

De Tropis .

hoc est , vt vim habeat , vel supplendū propriū vocabulū ; si desit , vel maiorem habeat significationem , aut sit decentius , & elegantius proprio translātum .

Vndecim Tropi sunt . Metaphora , Synecdoche , Metonymia , Antonomasia , Onomatopœia , Catachresis , Metalepsis , Allegoria , Periphrasis , Hyperbole , & Ironia . Alios alij Tropos , plures alij numerant : nos istis contenti simus .

De Metaphora .

CAPVT SECVNDVM.

METAPHORA est vocabuli à propria significatione ad non propriam per similitudinem migratio .
Virg. 5. Æneid.

Euryalus forma insignis , viridique iuuenta .

Viror non propriè iuuentutis est , sed herbarum : hunc tamen propter quandam similitudinem ad hanc ætatem Poeta transtulit ; quòd inter cæteras plena vigoris , quasi nobile germen virescere , & vernare videatur .

Hinc Similitudines implicitas in Metaphora latere obserua , ad quas coniugiendo Metaphoricas translationes facillimè inuenies , cū sit nihil Similitu-

litudine frequentius, & ab omnibus, quæ sensibus occurrunt, possit deduci. Hac vna certè Metaphoras omnes Tullius complectitur lib. 3. de Oratore. *Quarum ego quid vobis aut inueniendi rationem, aut genera ponam? Similitudinis est ad verbum unum contracta breuitas.*

A Quintiliano, & alijs communiter ad quatuor præcipua capita reuocari Metaphora solet.

1. Deducitur à rebus animatis ad animatas: vt si conuitiatorem *latrare* dicas, loquacem *garrire*, quod propriè de auihus dicitur: *Si superbum Leonem, perfidam Vulpem* appelles. Virg. r. *Æneid.*

Institiaque dedit gentes franare superbas.

Huc eas etiam reduxerim Metaphoras, quæ à sensibus corporis transferuntur ad animum: vt cùm dicimus oculatissimum ingenium, cæcam temeritatem, gustare literas, occallescere vitijs, mores non bene olere, animo perspicere, obsurdescere aliorum consilijs, deuorare iniurias, iracundiam decoquere &c.

2. A rebus inanimatis ad inanimas: ita sæpius audies lacrymarum *imbrem*, infortuniorum *procellam*, *niueum* florem, *crystallinum* amnem Catullus.

Spi.

*Spinofas Erycina ferens in pectore
curas.*

3. Ab animatis ad inanimatas: hinc apud Tullium *mutum* forum, *elinguem* curiam, *tecta lugere*, inuenies, Ouid. 4. Fastorum.

Tota fitit tellus, praripiturque seges.

4. Ab inanimatis ad animatas, sic *adamantinum* pectus, *cor ferreum*, *tonare* eloquentia, *ardere* cupiditate dicimus. Sen. in Thieste.

*Tumet animus ira; feruet immensum
dolor.*

Aliquot Metaphoræ inueniendæ rationes colligit Gallus. (a) Ea maximè utilis est, quæ translationes ab Artibus mutuatur, vel quæ vnius Artis propriæ sunt ad alias Artes, aut Scientias transferendo: vt historiam *texere*, poema *procudere*; vel quæ per corporis sensus ab Arte fiunt, ad animum, ac mores deducendo: vt rude ingenium *dedolare*: mentem *præmunire* consilijs: impetus animi legum *retinaculis* *coerere*; vel quæ spectant ad Artes rebus naturalibus adscribendo: vt *striata* genæ: frons *arata* rugis: *pictum* flosculis pratum. Hinc petita Metaphora Plinius Conuoluoli florem nullo odore, nec crocis intus, candidum, vocat *natura rudimentum lilia facere condi-*
scen-

ſcientis(a). Iuuabit itaque noſſe Artium inuenta , inſtrumenta , opera , miniſteria ; tum propria vocabula , quæ illis explicandis conueniant ; hæc enim , translata elegantiffimas Metaphoras , & Allegorias dabunt , ad quas indagandas , vt excitentur Tironum ingenia , exemplis præibo .

Metaphorica translationes .

Ab Arte militari .

Iuriſprudentiæ nomen dare .i. *Iuriſprudentiæ ſtudio ſe addicere* . Literario Marte certare . Argumentorum telis confodere . Rebelles animos expugnare . Iram exarmare . De aliena inuidia triumphare . Bellum voluptatibus indicare . Militare pietati . Vir emerita doctrinæ . Non gregarius miles in Eloquentiæ caſtris . Philoſophorum Antefignanus . *Cic. 3. de Legibus* Doctrinam ex vmbraculis Eruditotum , otioque , non modò in Solem , atque puluerem , ſed in ipſum diſcrimen , aciemq; perduxit . *Idem pr. de Oratore* . Educenda inde dictio eſt ex hac domeſtica exercitatione , & vmbratili , medium in agmen , in puluerem , in clamorem , in caſtra , aciemque forenſem .

A Medica .

Corruptos mores ad ſanitatem perducere . Doloris vulnus pendentī manū tra-

a Lib. 21. natur. hiſt. c. 5.

tractare. Maxore tabescentem blandæ
 Orationis pharmaco recreare. In per-
 uicacia mala seueritatis antidotum
 adhibere. Languenti Patriæ mederi.
 Infecta Reip. membra ressecare. Exul-
 ceratum animum obsequijs delinire.

A Nautica.

● Velis, remisque contendere. Honori
 suo velificari. Gloriolæ auram capta-
 re. Imperij clauum tenere. Aduersæ
 fortunæ fluctibus iactari. Vario cogi-
 tationum æstu fluctuare. Tranquillæ
 vitæ malacia frui. Ad scopulos diffi-
 cultatum allidi. A primo Eloquentiæ
 litore soluere. In priuatæ quietis por-
 tum se se recipere. *Cic. ad Atticum*
l. 2. epist. 9. Malè vehi malo alio gu-
 bernante, quàm tam ingratis vectori-
 bus bene gubernare: *vectoribus* meta-
 phoricè pro *ciuibus*. Vectores propriè
 in re nautica sunt, qui naui aliena
 vehuntur.

A Piscatoria, & Venatoria.

Promissis inescare. Dolis irretire.
 Veritatem expiscari. Aucupari gra-
 tiam. Omnibus vestigijs aliquid inda-
 gare, peruestigare, odorari. In para-
 tos alijs casses incidere: .i. *In fraudes*.
alijs decipiendis instructas. Hamis au-
 reis capere: hoc est *pecunijs assequi*
optata, *vel donis aliquem sibi deuin-*
cire. Plinius iunior hamata, & visca-

ta munera vocat, quibus dator lucrum
quærit, ut referat maiora, quàm dede-
rat.

A Mercatura.

Subducere vitæ rationes. Fœnerare
beneficium amico. Mutuari laudes ab
avis. Famam vitæ impendio mercari.
Muneribus gratiam redimere. Lucrari
animorum salutem. Eruditionis cen-
sum augere. Exoticas doctrinæ merces
depromere. Se, suaque venditare.
Iura nundinari. i. *Emerere, vel vendere.*
Cic. Philipp. 3. Vna in domo omnes,
quorum intererat, totum Imperium
populi Romani nundinabantur. Ve-
nales, rabularum linguæ: Eloquentiæ
institor: hoc est *ostentator ex Quin-
tiliano lib. 8. C. 3.* Scripta redigere ad
calculos. *Cic. de Amicitia.* Hoc quidem
est nimis exigue, & exiliter ad calculos
vocare amicitiam, ut par sit ratio ac-
ceptorum, & datorum. Pluribus no-
minibus alicui obstrictum esse, .i. *plu-
rimum illi debere*: nomina hoc loco
idem, ac *debita*. Soluendo non esse,
.i. *parem gratiam referre non posse.*

Ab Agricultura.

Serere discordias: Ingenij fundum
excolere. Prauorum morum gramina
euellere, stirpes eradicare. Paginas
doctis sudoribus irrigare. Teneris men-
tibus pietatem inserere. Syluescens vi-
tius

- tijs animus. Quæstionum senticeta. Curarum vepres. Adolescentiæ noualia virtutum feminibus, bonarum artium frugibus fœcundare. Gloriæ messem, honorum segetem, laborum fructus colligere. Disciplinæ iugum. Legum sepes. Eruditionis horreum.

Auarijs Fabrûm operibus.

- Iacere fundamenta fortunæ. Opus ad fastigium, ad coronidem perducere. Supremam operi manum imponere. Rerum gestarum monumenta e ruderibus antiquitatis effodere. Architectari voluptates .i. *fruendarum voluptatum rationem comminisci*; ex Tullio 2. de Finibus. Carmina reddere incudi. Tornare periodos. Orationem limare, læuigare, colorare &c.

Omniû tandem Artium officinas percurrere; nec enim vlla est humilis adeò, quæ luculentam præbere non possit inquirenti Metaphorarum suppellectilem. Sugeret Equiso cupiditatum frænum, regiminis habenas, phaleras verborum, ad mouenda signibus ad virtutem calcaria. Ostendet Cosmeta Eloquentiæ calamistrum, cincinnos, pigmenta, & Isocraticum myrothecium, quod totum Cicero se consumpsisse in commentario Consulatus sui scribendo, affirmat, *ad Atticum l. 2. ep. pr.* Dabit etiam Cupedi-

narius lautitiem sermonis, Elocutionis condimenta, salesque sapidissimos, & argutiarum tragemata, quibus Auditorum palatum demulceas.

Hæc pauca innuere placuit ad iuandam ediscentium imbecillitatem; nec ultra progredior. Omnes .n. Metaphorarum formas, & modos illas educendi recensere velle, idem est, ac per vniuersæ Naturæ fines vagari. Vix quidem alius frequentior Tropus est, quique maiorem Elocutioni conferat dignitatem, si temperanter, & prudenter adhibeatur, cum admirationem afferant ingeniosè translata: ut enim peregrina potius, quam domestica miramur, ità nos magis aliunde ascita vocabula, quam natiua delectant. Sed vitanda Metaphorarum deformitas, & à Poetis vsurpata quidlibet audendi licentia. Cauendum, ne dissentiatur à rebus translatio, nec tumeat nimium, nec vilescat. Quis enim ferat Cæli placentiam pro Luna, hortorum Smaragdos pro caulibus? (a) Ut modicus autem atque opportunus Metaphoræ vsus illustrat Orationem, ita frequens, & obscurat, & tædio complet; continuus verò in Allegoriam, & Ænigma exit.

De Synecdoche.

CAPVT TERTIVM.

SYNECDOCHE est Tropus, quo aliud ex alio intelligitur; fitque pluribus modis.

1. Cùm totum pro parte sumitur. Virg. *Æneid.* 3. *viridemque ab humo conuellere Syluam*, totam posuit Syluam, cùm de myrto loqueretur. Sen. in *Med.* *Indus gelidum potat Araxem, Albim Persa, Rhenumque bibunt.*

2. Pars pro toto: vt *limen*, vel *tectum* pro domo: *puppis*, vel *carina* pro naui. Virg. 4. *Æneid.* *longæ sulcant vada falsa carina.* Sic dicimus *Caput* pro homine: *lepidum Caput*, inuisum, infidum. Sic *mucronem* dicimus pro gladio &c.

3. Genus pro specie: vt *ales* pro *Aquila*, *quadrupes* pro equo. Virg. 6. *Æneid.* *Saucius at quadrupes nota intra tecta refugit,*

4. Species pro genere: vt *Ornus* pro quauis arbore, *Tigris* pro quauis fera, *Lacon*, vel *Umber* pro quouis Cane venatico. Sil. Ital. lib. 3.

Venator dumeta Lacon, aut exigit Umber.

Nare Sagax è valle feras.

5. Sin-

5. Singularis numerus pro plurali Virg. 2. *Æneid. latè loca milite complent*, & alibi *Hostis habet muros*. Senec. in Tro. *Solvimus omnes lacerum multo funere crinem*. .i. crines laceros multis funeribus, & apud Liuium *Romanus praliam victor*: hoc est Romani victores.

6. Numerus pluralis pro singulari, Cic. de se ipso. *Populo imposuimus*, & *Oratores visi sumus*. idem in Pis. *O Stultos Camillos, Curios, Fabricios, Calatinos &c.* Frequentia sunt apud Poetas *ora, colla, pectora, corda, pro ore, collo &c.*

Numerus quoque determinatus non rarò pro indeterminato ponitur. Sic in quotidiano sermone dicere solemus *millies* pro sæpe, *mille* pro multis Virg. l. 5. *Æneid. de Iride. Mille trahit varios aduerso Sole colores*. Cic. 2. de Divinit. *Sexcenta licet huiusmodi proferre*. Sexcenta pro infinito numero dicere ferè vsitatum esse Donatus docet.

7. Antecedens pro Consequenti; ut *Subdere equo calcaria* pro currere: *solvere e litore* pro discedere. Sen. in Tro. *Bis pulsata Dardana Graio mœnia ferro*. i. bis eversa Troia.

8. Consequens pro Antecedenti: ut *num ponimus funera* pro morte, vel

mor-



mortem pro vulnere. Latin. Pac. in Paneg. *Isti mortes receptas in Sylvas, & flumina deferebant.*

Postrema hæc duo capita pertinere aliqui ad Metonymiam malunt: Quintilianus ad Synecdochen refert.

De Metonymia.

CAPVT QVARTVM.

METONYMIA est positio rei ali-
cuius pro alia, quasi cognata, &
vicina.

1. Cùm ponitur Causa pro Effectu, ut Inuentor pro re inuenta; ex. gr. *Ceres* pro frugibus, *Bacchus* pro vino: siue Author pro suo opere, ut *Seneca*, *Tullius*, *Horatius* pro eorum Scriptis; aut materia pro re ex ea facta; ut *pinus* pro naui, *argentum* pro pecunia, *linum* pro velo.

2. Effectus pro Causa; ut cùm dicimus *scelus* pro scelesto, *bellum* pro bel-
latoribus, *patria* *perniciem* pro ciue
patriæ pernicioso. ita Cicero Verrem
appellat *labem*, ac *perniciem* *provincia*.
Hinc ab effectibus *pigram* vocamus
hyemem, *tristem* senectam, *squalidam*
febrim. .i., quæ squalidos homines fa-
cit. Q. Curtius lib. 5. *Et calamitas*
querula est, & *superba felicitas*.

3. Id,

3. Id, quod continet pro eo, quod continetur : vt *Academia* pro *Academicis*, *Ciuitas* pro *Ciuiibus*. Cic. *Armis Italia vinci non poterat, nec Gracia disciplinis.*

4. Possessor pro re possessa. Virg. *Proximus ardet Vcalegon, .i. domus Vcalegontis,*

5. Signum pro re signata; vt *fascēs* pro *Consulatu*, *gladius* pro *bellica virtute*, *palma* pro *vic-toria*, *scep-trum*, vel *purpura* pro *Regno*. Luc. lib. 7. de Cicerone. *quius sub iure, togaquo Pacificas saeuis tremuit Catalina secures.* *Secures* pro *Consulari potestate.*

De Antonomasia.

CAPVT QVINTVM.

ANTONOMASIA est quadam nominis permutatio, qua vel nomen appellatiuum pro proprio ponitur, vel proprium pro appellatiuo. Exemplum primi generis sit *Orator* pro *Tullio*, *Satyricus* pro *Iuuenali*, *Historicus* pro *Li- uio*. Exemplum 2. generis *Crassus* pro *Diuite*, *Cato* pro *Sapiente*, *Nero* pro *Crudeli*.

Deducit autem Antonomasia nomi- na à Stirpe : vt si dicas *Æaciden* pro *Pyrrho* ab auo *Æaco*; à Patria : vt *Itha-*

cum pro Vlyſſe ab Ithaca inſula natali ; à Secta : vt *Stoicum* pro Zenone ; à Studiis, vel facultatibus, quibus aliquis excelluit : vt *Mathematicum* pro Archimede ; ab artibus : vt *Pictorum principem* pro Apelle, & viciffim *Apeliem* pro egregio pictore ; *Dadalum* pro ingenioſo artifice ; à moribus : vt *Creteſem* pro mendaci ; à factis : vt *Monſtrorum domitorem* pro Hercule ; denique à præſtantia in aliquo genere vel boni, vel mali, præſertim uſurpando eorum nomina propria, qui fuerint maximè inſignes pro appellatiuis : hinc dicimus *Achillem* pro ſtrenuo viro, *Ariſtidem* pro iuſto ; *Neforem* pro longæuo, *Therſitem* pro deformi, *Margitem* pro ſtolido, *Sinonem* pro fraudulentò.

Ad variandam Elocutionem per Anonomafias, & Hyperboles indicem non inutilem inuenies apud Calipium Poliphraftum lib. I. cap. 46.

De Onomatopœia, Catachreſi,
& Metalepſi.

CAPVT SEXTVM.

O N O M A T O P O E I A eſt ſittio vocis, qua ſit rei explicanda ſimillima. Hinc hinnitus equorum, mugitus bouum, balatus ouium, coaxatio ranarum, bombus apum.

Cucurrere ſolet gallus, gallina gracilat,
dat, iſta

ita Philomelæ Author, apud quem plurima leges huius notæ, per Onomatopoeiam ficta. Sed non omnia, quæ Poetæ audent, licent Oratori. *Tarantara* excogitavit Ennius, ad tubæ sonitum explicandum: Baubari Canes à Lucretio dicuntur: quæ tamen, si sapias, suis inuentoribus relinques.

CATACHRESIS est vocis abusus, seu durior, & licentior vocabuli translatio, vt si pro temerario *Magnanimum* dicas, pro astuto *Prudentem*, *Sperare* dolorem pro timere. Sic Apuleius agnum pinguem *incuriosum* vocat: Manilius vero lib. 5. in *Æstatis* descriptione pro humore, quo herbæ, & plantæ vigent, *viridem Sanguinem* ponit.

*Et viridis nemori Sanguis decedit,
& herbis.*

Aliquando Catachresis ad exaggerandum plus dicit, quàm res exigat: vt *parricidam* pro homicida; aliquando ad rem diminuendam minus dicit, quàm res ipsa postulet: vt *parcum* pro auaro, *facetum* pro scurra. Hinc apud Horatium paterni amoris Catachresis filiorum deformitati blanditur.

Strabonem

(a) *Appellat patum pater, & putum, male parvus*

Si cui filius est.

R

&

a Lib. 1. Serm. Stat. 3.

& apud Plutarchum notantur à recentioribus Græcis Athenienses, quòd rerum inuidiam urbanè inditis nominibus mollibus, atque mitioribus obtegere, & diminuiere solerent: cùm tributa collata in usum Reip. pecunia, præsidia custodia, carcerem domiciliij vocabulo appellarent.

METALEPSIS est alicuius dictionis usurpatio pro alia remotiori, ad cuius cognitionem quasi per gradus peruenimus. Sic Virgilius *aristas*, Ouidius *meses*, Martialis *brumas* pro annis posuit.

Tecum terdenas numeravi Posthume brumas lib. 4. epig. 40.

vbi per *brumas* hyemes, per *hyemes* annos intellexit, ad quos intelligendos per antecedentia fit gradatim ascensus; nam bruma fit quauis hyeme, hyems est quouis anno; atque ita qui ter denas numerat brumas, totidem numerat annos. Hæc autem frequentiora in carmine, rariùs in soluta Oratione adhibenda.

De Allegoria.

CAPVT SEPTIMVM.

A *LLLEGORIA* est Tropus ex aliorum frequentatione conflatus, aliud verbis significans, aliud sensu. vel breuius

uius est continuata translatio. Cum ergo plures conueniunt in integram sententiam translationes, præsertim, verò continuatæ Metaphoræ, in Allegoriam transeunt. Seditionis faces, Eloquentiæ catenula, animus effrænis. Metaphoræ sunt, quæ productæ ad sententiam fiunt Allegoriæ, si dicas. *Iam incensas ad Reip. incendium seditionis faces ab ipsis perduellium manibus ereptas extinguere. Vinclos aureis eloquentia catenulis auditorum animos in suauissimam rapere captiuitatem. Effrænam adolescentis animum iniectis disciplina senioris habenis coercere.*

Tullius in Pis. *Neque tam fui timidus, ut qui in maximis turbinibus, ac fluctibus Reip. nauim gubernassem, saluamque in portu collocassem, frontis tua nubeculam, tum Collegæ tui contaminatum spiritum pertimescerem. Alios ego vidi ventos, alias prospexi animo procellas, alijs impendentibus tempestatibus non cessi.*

Idem in Verrem 6. *Errabas Verres, & vehementer errabas, cum te maculas furtorum, ac flagitiorum tuorum, sociorum innocentium sanguine eluere arbitrabare. Præceps amentia ferebare, qui te existimares auaritia vulnera crudelitatis remedijs posse sanare.*

Elegantissimas habet Allegorias D.

Hieronymus , qualis ea est epist. i. lib. primi ad Heliodorum Monachum , quem ad solitudinem repetendam hortatur .

Quid facis in turba , qui solus es ? Et hoc ego non integris rate , vel mercibus , nec quasi ignarus fluctuum premoneo ; sed quasi nuper naufragio eiektus in litus doctus nauta timida nauigaturis voce denuntio . In illa estu Charybdis luxuria salutem vorat : ibi ore virgineo ad pudicitia perpetranda naufragia , Scylla ceurenidens , libido blanditur : hic barbarum litus , hic Diabolus pirata cum socijs portat vincula capiendis . Nolite credere , nolite esse securi . Licet in modum stagni fustum , aquor arrideat : licet vix summa iacentis elementi spiritu terga crispentur : magnus hic campus montes habet ; intus inclusum est periculum , intus est hostis , expedito rudentes , vela suspendite : crux antenna figatur in frontibus . Tranquillitas ista tempestas est .

Nihil quidem Allegoria suauius , & illustrius , temperanter , ac prudenter adhibita ; vt antea de Metaphora dixeram : at eadem assiduitate vilescit , ac satietatem affert , nihilque est Allegorici styli affectatione putidius . Illud quoque seruandum , vt quo genere coeperis translationis , hoc desinas ,

Mul-

(a) Multi enim (vt Fabij verbis vtar) cū initium à tempestate sumpserunt, incendio, aut ruina finiunt, quæ est inconsequentia rerum foedissima. Non bene itaque dixeris armorum fluctibus Europam omnem *ardere*: sed *agitari, concuti, iactari*. Nec minus vitiosa est Allegoria, si obscuritate peccet, nam vertitur in *Ænigma*; de quo plura vide, si lubet, apud Carbonem lib. pr. de Elocutione cap. 13., & apud Gal- lum lib. 3. Rhet. cap. 16.: nunc enim ad rem meam nihil Spinghes arbitror pertinere.

De Periphrasi.

CAPVT OCTAVVM.

PERIPHRAISIS (b) est oratio rem simplicem assumptam Elocutione circumscribens: dicitur à Latinis *Circumlocutio*; nam circuitu quodam verborum pluribus describit, quod paucioribus dici posset: vt cū *infidum Elementum* dicimus pro mari, *arnorum Sidera* pro floribus, *volucrum Reginam* pro Aquila. Cum Antonomasia fermè, & Allegoria conuenit, pluresque alios Tropos complecti potest, si rem per varias translationes exprimat; quibus omni-

B 3 no

a Lib.8. c.6. b Lib.4. ad Herem.

no sic careat, iam non Tropis adscribenda est, sed Figuris, ijs videlicet, quæ valent ad orationem amplificandam. Sen. in Medea per Periphrasim Orpheum ita describit.

*Ille vocali genitus camæna ,
Cuius ad chordas modulante plectro
Restitit torrens, siluere venti ;
Cui suo cantu volucris relicto
Adstitit tota comitante sylua .*

Frequens est apud Poetas hic loquendi circuitus, frequentissimus apud Ovidium; nec rarò ab Oratoribus adhibetur, sed aliquantò adstrictior. Iuvat ad ornandam, & locupletandam Orationem; ad humilia digniùs explicanda: ad turpia, & sordida, honestiori specie vestienda. Sed modus est adhibendus, ne migret in vitium, quod Perissologiam vocant, hoc est superfluum locutionem.

De Hyperbole, & Ironia.

CAPVT NONVM.

HYPERBOLE est oratio, augendo, vel minuendo fidem superans: augendo ex. gr. Tigride Crudelior, durior adamanto, ardentior igne, ipsa morositate morosior, deformitate deformior.

Ouid.

Ouid. *Asperior tribulis, foeta truculentior vrsa,*

Surdior aquoribus, calcato immitior hydro.

minuendo ex. gr. *Pygmaeo minor, pluma leuior, momento breuior, Iro pauperior, leberide inanior*, hoc est serpentis exuijs, vt veteri fertur adagio.

Sen. Mor. de hoc orbe inferiori loquens. *Punctum est istud, in quo nauigatis, in quo bellatis, in quo Regna disponitis, Festiuas ad minuendum Hyperboles adhibet Martialis in rus exiguum, quo donatus fuerat à Lupo lib. 11. ep. 19.*

Donasti Lupe rus sub urbe nobis:

Sed rus est mihi maius in fenestra.

Rus hoc dicere, rus potes vocare?

In quo ruta facit, nemus Diana.

Arguta tegit ala quod cicada,

Quod formica die comedit uno,

Clausacui folium rosa corona est? &c.

pari stylo in phialam ludit à Paulo missam lib. 8. ep. 33. Sed hæc ioci gratia: cæterum seruanda in Hyperbole mensura, illudq; maximè spectandum, quousque rem attollere deceat, vel deprimere, ne insanire videatur Orator.

IRONIA est simulata locutio, qua propriæ verborum significationi contrarium sensum habet. Aliud itaq; verbis loquitur, longè aliud, immò, & oppositum innuit sensu: maximè verò pro-

nuntiatione dignoscitur, quæ diuersam ab Oratione voluntatem ostendit : ut cum ignauum *virum fortem*, stolidum *sagacem* per contemptum vocamus .

Cic. in Cat. 2. O bellum magnoperè pertimescendum, cum hanc sit habiturus Catilina scortatorum cohortem pratoriam . Instruite nunc Quirites contra has tam præclaras Catilinae copias vestra præsidia , vestrosque exercitus .

In Pisonem triumphalis gloriæ contemptorem . Non est integrum Cn. Pompeio consilio iam uti suo : errauit enim : non gustarat istam tuam Philosophiam . Ter iam homo stultus triumphauit . Crasse pudet me tui . Quid est , quod confecto formidolosissimo bello coronam illam lauream tibi tantoperè decerni volueris à Senatu ? P. Seruili, Q. Metelle, C. Curio, P. Affricane cur non hunc audistis tam doctum hominem, tam eruditum, priusquam in istum errorem induceremini ?

& paulò inferiùs . Meditare quibus verbis incensam illius cupiditatem comprimas , atque restringas (Cæsaris scilicet triumphum cupientis) Valebis apud hominem , volitantem gloriæ cupiditate vir moderatus , & constans ; apud indoctum eruditus , apud generum socer . Dices enim , ut es homo factus , ad persuadendum concinnus , perfectus ,

fectus, politus è schola &c.

Ironiæ *Antiphrasim* Galli Rhetor annectit, quæ est dictio contrarium significans, seu vox à contrario dicta. Sic *Parca* dicitur, quòd minimè parcat; *lucus*, quòd minimè luceat &c. Differt ab Ironia; quòd non dissimulatione nititur; neq; voce pronuntiantis contrarium significat, sed suis tantum verbis, quorum est origo à contrario. *Ven. Beda in libello de Tropis.*

Ultimò Tropis additur à pluribus *Hyperbaton*, seu Transgressio, cuius est vel perturbare verborum ordinem: ut *maria omnia circum* pro circum omnia maria; vel vnum, idemque verbum aliquo alio vocabulo interiecto dimidiare: ut *Septem subiecta Trioni*, hoc est subiecta Septentrioni, quæ omnia procul dubio spectant ad Constructionis Figuras.

Sed quam diuersa de Tropis occurrent tum veterum, tum recentiorum scripta voluenti? (a) Nec mirum: nam vetustissimam esse constat ex Quintiliano circa Tropos inexplicabilem, & Grammaticis inter ipsos, & Philosophis pugnam: Quæ sint genera, quæ species, quis numerus, quis cui subijciatur. Plures alij, alij pauciores esse volunt. Sunt qui omnes vnica Metaphora con-

B 5

clu-

a *Lib. 8. Instit. Orat. cap. 6.*

cludant : Aliqui Allegoriam non esse contendunt speciem Tropi ab alijs distinctam , Onomatopœiam alijs translatis excludunt , quam inter Schemata numerant : Periphrasim quoque , & Ironiam Figuris malunt adscribi . Hæc , aliaque huiusmodi dissidia nihil te moueant . (a) Audi eiusdem Quintiliani sententiam . *Non mutatur vocabulis vis rerum , & sicut homines si aliud acceperunt , quam quod habuerant , nomen , iidem sunt tamen : ita hæc , de quibus loquimur , siue Tropi , siue Figura dicentur , idem efficient ; non enim nominibus prosunt , sed effectibus . Optimum ergo in his sequi maxime recepta , & rem ipsam quocunque appellabitur nomine , intelligi .* Illud interim certum sit , in tradendis de Arte dicendi præceptis inutiles prorsus esse cauillationes , quæ nihil proficiunt ad instituendum Oratorem . Quod si te morantur Criticorum nugæ , aut acutæ Quæstiones oblectant , adi Ludouicum Carbonem , qui totam Artem Oratoriam prolixis disputationibus examinavit .

DE

a Lib. 6. cap. pr.

CAPVT PRIMVM.



FIGVRA (Græcè Schema) est dicendi forma arte nouata, siue sermo à communi vsu remotus. Differt à Tropo, quòd translationes necessariò non exigit.

Duplex est Figurarum genus. Aliæ sunt Figuræ verborum, aliæ sententiarum.

FIGVRA VERBORVM est, quæ in varia dictionum, aptaque collocatione consistit, qua collocatione sublata tollitur, aut mutatur Figura. ex. gr. & venit, & vidit, & vicit, Figura est **CONIVNCTIONIS**. Tolle particulas connectentes: iam si dicas venit, vidit, vicit, erit **DISSOLVTIO**.

FIGVRA SENTENTIÆ est in absoluta sententia totius Orationis conformatio, vel est qua totam sententiam aliquo animi motu afficit, & exponit: hæc itaque non à verbis pendet, sed à sensu; illis enim immutatis, suam adhuc vim seruat.

Verborum Figuræ sunt Orationis colores, pigmenta, cincinni; Figuræ sententiarum nerui, tori, vires. At neque istarum, neque illarum certus est

numerus, immò neque certa appellatio, & methodus ; adeò vt rem hanc infinitam Tullius (a) appellarit . Et quidè, cùm varia sint hominùm ingenia , diuersique affectus, à quibus diuersæ , nouaq; continuò produci Figuræ possunt, quis earum summam subducatur ? Nostrium tamen non est omnes indagare, sed insigniores . In his præterea distribuendis plerique Authores dissentiunt ; eandem enim Figuram alij collocant inter ornamenta verborum , alij collocant inter Schemata sententiarum . Verùm non repugnat vnā , eandemq; Figuram ob diuersas rationes ad vtrumq; genus referri posse . Ita *GRADATIO* ex. gr. , vt ornamentum Orationis est , consistens in certa verborum colloca-tione se se gradatim nectentium, est verborum Figura : vt vim habet exaggerandæ rei, & Orationis amplificandæ , spectat ad sententiarum Figuras . Amphibia tamen hæc Schemata , quæ vtriusque generis esse possunt , ad alterum tantum genus reducam , ne bis redeant in paginas . Adde nihil referre , quomodo appellentur , aut vbi collocentur , si quid Orationi profit apparet . Iam aggrediamur verborum Figuras , è quibus afferam Eloquentiæ studiosis vtiliores , ijs posthabitis , quæ solent à Grammaticis tradi .

Fi.

a In Topicis .

Figura Verborum.

CAPVT SECVNDVM.

REPETITIO est resumptio eiusdem verbi in principio Incisorum, vel Membrorum Cic. in Cat. Nihil ne te nocturnum praesidium palatij, Nihil Urbis vigilia, Nihil timor populi, Nihil consensus bonorum omnium, Nihil hic munitissimus habendi Senatus locus, Nihil horum ora, vultusque mouerunt?

CONVERSIO est iteratio eiusdem verbi in fine, ex. gr. Panos Populus Romanus vicit, victoria vicit, armis vicit, liberalitate vicit.

COMPLEXIO est, quae eandem dictionem repetit in principio, & fine, in diuersis sententijs. Cic. de lege Agr. Quis legem tulit? Rullus. Quis tribus sortitus est? Rullus. Quis decemuiros creauit? Rullus.

CONDVPLICATIO est, quae idem verbum geminat proximè: vt Me me adsum, qui feci. Cic. in Cat. Viuis, & viuis, non ad deponendam, sed ad confirmandam audaciam. Hor. O Ciues ciues quarenda pecunia primum est, Virtus post numos: vel post aliqua interiecta, intra eandem sententiam: Cic. in Verrem. Multi, & grani dolores inueni

*ti parentibus , & propinquis multi :
vel in fine sententiæ , & subsequentis
initio : Virg. Eccl. 9. Pierides vos hac
facietis maxima Gallo ;*

*Gallo , cuius amor tantum mihi
crescit in horas .*

*Paucis ; quocunque modo idem ver-
bum , vel plura verba iterentur , Figura
est Repetitionis ; cuius plurimæ species
ab aliquibus distinguuntur . Sed in tot
distinctionibus nihil notandum inue-
nio , præter nomina , immò Græcorum
nominum monstra : nec operæ pre-
tium puto circa hæc leuioris momenti
Schemata proluxiori cura detineri .*

CONIVNCTIO græcè *Polysyndeton* ,
est frequens coniunctionum iteratio . Cic.
in Verrem . Neque privati , neque
publici , neque profani , neque sacri tota
in Sicilia quidquam reliquisse . Virg. 8.
Æneid. Brontesque , Steropesque , &
nudus membra Pyracmon .

DISSOLVTIO , græcè *Afyndeton* , est
soluta coniunctionibus oratio ; ex. gr.
Urbem cade , rapinis , incendio vasta-
nit . Cic. pro M. Marcello . Constituen-
da iudicia , reuocanda fides , compri-
menda libidines , propaganda soboles .
Martialis l. 2. Frange thoros , pete vina ,
rosas cape , tingere nardo .

TRAJECTIO , seu *TRADVCTIO* , est
repetitio eiusdem dictionis cum aliqua
immixta

immutatione casus numeri, generis, modi, vel temporis. Cic. pro Roscio. Sua queng; fraus, suus error maxime vexat: suum quengue scelus agitat. Idem pro Archia. Pleni sunt omnes libri, plena sapientum voces, plena exemplorum vetustas. Virg. 2. Æneid.

Apparet domus intus, & atria longa patefcunt.

Apparent Priami, & veterum penetralia Regum.

ANNOMINATIO, seu **PARANOMASIA** est lusio in verbis, literarum similitudine convenientibus diuersam tamen habentibus significationem: ex.gr. *Fama, & fame laborans. Tumidus idem, ac timidus. Ferus, ac planè ferreus. Cic. pro Roscio Amerino. T. Roscius terret etiam nos, ac minatur tribus prædijs, hoc est præmijs sceleris ornatus.*

In Fœminam nomine Furiam ludens Ouidius. Cur ego non dicam Furia te Furiam?

Acuta est apud Suetonium Annominatio, qua Tiberij Cæsaris ebrietatem milites carpebant, non Claudium Tiberium Neronem, sed Calidium Biberium Neronem illum appellantes.

Festiuæ, & opportuna iocis Figura, neque contemnenda in Elogijs, si non tantùm in verbis, sed etiam in rebus ludat, ac sobriè adhibeatur. Cæterùm
si sit

Si sit frequentior, ac sine pondere sententiarum, nugatoria est, ac puerilis.

SIMILITER CADENS est, cum plura nomina iisdem casibus, & numeris, vel plura verba iisdem modis, temporibus, ac personis conueniunt. Cic. in Cat. Ad hanc te amentiam natura peperit, voluntas exercuit, fortuna seruauit.

SIMILITER DESINENS est, cum partes Orationis iisdem ferè syllabis desinunt. Cic. pro lege Manil. Ciuēs assenserunt, Socij obtemperauerunt; hostes obedierunt. Ferè semper uniuntur hæ duæ Figuræ, immò nomine tenus à Scaligero distinguuntur.

COMPAR, seu *ISOCOLON*, est Oratio ex membris pari propè numero syllabarum constantibus. Cic. pro Mil. fecit iratus, fecit inimicus, fecit ultor iniuria, punitor doloris sui. Idem pro lege Manil. de Pompeio. Plura bella gessit, quàm ceteri legerunt, plures provincias confecit, quàm alij concupierunt.

Antithesim, seu Contrapositum, Congeriem, Interpretationem, Synonymiam, Gradationem, quas aliqui huc referunt, in Figuris Sententiarum inuenies.

Leuior quidem hæc est Eloquentiæ supellex, at neque spernenda, cum ad Orationis ornatum pertineat: venustatem quippè, & concisionem affe-

runt hæc lumina verborum. Nec progressus vi sua carent: nam ipsa Repetitio, quæ tenuis alioqui Figura videtur, Energiam habet, utilisque est ad vrgendum aduersarium, & affectiones animi exprimendas. Verùm sicut hæc Figura ornant Orationem opportunè posita, ita ineptissimas esse adiicit Fabius lib. 9. c. 3. cum immodicè petuntur. Sciendum verò in primis, quid quisque in orando postulet locus, quid persona, quid tempus. Maior enim pars harum Figurarum posita est in delectatione. Vbi verò atrocitate, inuidia, miseratione, pugnandum est, quis ferat contrapositis, & pariter cadentibus, & consimilibus irascentem, flentem, rogantem? Sapiat igitur Orator, ne tractet calamistrum, cum vibrandus est mucro.

DE FIGURIS SENTENTIARUM

IN tres Ordines diuido Schemata Sententiarum. Primus Figuras complectitur, quæ in Contentione valent ad confirmandum, & confutandum. Secundus, quæ ad rem explicandam, exaggerandam, & amplificandam. Tertius, quæ ad effectus exprimendos, vel mouendos. Aduerte verò in hac figurarum distributione earum tantum vim præcipuam, non omnem usum,

usum, omnemque virtutem spectari;
 cum illæ ad omnia valeant aptè adhi-
 bitæ. Cæterùm Oratoris est in quouis
 Orationis munere Figuras eligere, quas
 viderit ad suum finem obtinendum
 magis idoneas, ex quocunque sint Or-
 dine.

Figura primi Ordinis.

CAPVT TERTIVM.

INTERROGATIO *Figura est, quæ
 non ad sciscitandum, sed ad instan-
 dum, arguendum, commouendum, aut
 ad alium huiusmodi finem adhibetur. Si
 tantùm fiat ad sciscitandum, non est
 Figura.*

Cic. in Cat. pr. Quæ nota domesticæ
 turpitudinis non iniusta vitæ tuæ est?
 Quod priuatarum rerum dedecus non
 hæret infamiæ? Quæ libido ab oculis,
 quod facinus à manibus vnquam tuis,
 quod flagitium à toto corpore abfuit?
 Quid est Catilina? Ecquid attendis?
 Ecquid animaduertis horum silentium?
 Patiuntur, tacent: quid expectas autho-
 ritatem loquentium, quorum volunta-
 tem tacitorum perspicis?

Vbinam gentium sumus? Quam
 Remp. habemus? In qua vrbe viuimus?

Idem pro sexto Roscio. Quid vis
 am-

amplius? Quid insequeris? Quid op-
pugnas? Qua in re tuam voluntatem
lædi à me putas? Vbi tuis commodis
officio? Quid tibi obſto?

SUBIECTIONE est figura qua idem in-
terrogat, suæque interrogationi respondet.

Cic. in Cat. pr. Quid tandem impe-
dit te? Mos ne maiorum? At perſæpè
etiam priuati in hac Rep. perniciosos
ciues morte multarunt. An leges, quæ
de ciuium Romanorum supplicio ro-
gatæ sunt? At nunquam in hac vrbe ij,
qui à Rep. defecerunt, ciuium iura
tenuerunt.

Idem in Verrem. Qui sibi hoc ſump-
ſit, vt corrigat mores aliorum, & pec-
cata reprehendat, quis hunc ferat, ſi qua
ipſe in re ab religione officij declina-
rit? Furem aliquem, aut rapacem,
accuſaris? Vitanda tibi ſemper erit
omnis auaritiæ ſuſpicio. Maleficum
quenquam adduxeris, aut crudelem?
Cauendum erit ſemper, ne qua in re
aſperior, aut inhumanior fuiſſe vi-
deare. Corruptorem, adulterum?
Prouidendum diligentèr, ne quod in
vita veſtigium libidinis appareat. Om-
nia poſtremò, quæ vindicariſ in altero,
tibi ipſi vehementer fugienda ſunt.

Grauiſſimam Subiectionem, ple-
namque affectibus, at prolixam vide
apud eundem in Oratione pro Murena
circa

circa finem ab illis verbis. Si (quod Iuppiter auertat) hunc vestris sententijs afflixeritis , quo se miser vertet ? Domum ne ? &c.

Seneca de Tranquillitate. Inueniat aliquid studiosus virtutis , in quo utilis ciuitati sit. Militare non licet ? Honores spectet. Priuato viuendum est ? Sit orator . Silentium indictum est ? Tacita aduocatione ciues iuuet. Periculolum etiam ingressu forum est ? In domibus , in spectaculis , in conuiujs bonum contubernalem , amicum fidelem , temperantem conuiuiam agat . Officia si ciuis amiserit , hominis exerceat .

D. Hieronymus ad Heliodorum, querens ad solitudinem inuitat . Paupertatem times ? Sed beatos Christus pauperes appellat. Labore terreris ? At nemo Athleta sine sudore coronatur. De cibo cogitas ? Sed fides famem non timet. Super nudam metuis humum exesa ieiunijs membra collidere ? Sed Dominus tecum iacet. Squalidi capitis horret inculta caesaries ? Sed caput tuum Christus est. Infinita Eremita vaestas te terret ? Sed tu paradysum mente deambula. Quotiescunque illuc conscenderis, toties in Eremita non eris. Scabra sine balneis attrahitur cutis ? Sed qui in Christo semel lotus est , non illi

illi necesse est iterum lauari.

Imperfectam quoque *SVBIECTIONE* Meam voco, quæ suppressit Interrogationem, cuius tantum notam si suis locis addideris, erit perfecta Subiectio: vt in sequentibus exemplis.

Cic. Parad. 5. de viro, cui mulier imperat. Vocat: veniendum. Poscit: dandum. Eijcit: abeundum. Minatur: extimescendum.

Idem pro Roscio. Prædia mea tu possides: ego aliena misericordia viuo. Concedo, & quod animus æquus est, & quod necesse est. Mea domus tibi patet: mihi clausa est. Fero. Familia mea maxima vteris: ego seruum habeo nullum. Patior, & ferendum puto.

Senec. epist. 88. Doces me quomodo inter se acutæ, ac graues voces consonent, & quomodo neruorum disparem reddentium sonitum fiat concordia. Fac potiùs, quomodo animus secum meus consonet, nec consilia mea discrepent. Monstras mihi, qui sint modi flebiles. Monstra potiùs quomodo inter aduersa non emittam flebilem vocem. Metiri me Geometres docet latifundia. Potiùs doceat, quomodo metiar, quantum homini sit satis. Numerare me docet Arithmetica, & auaritiæ accommodare digitos. Potiùs doceat, nihil ad rem pertinere
istas

istas computationes &c.

SVSTENTATIO est figura , quæ prius auditorum animos suspendit, deinde nouum aliquid, aut inexpectatum subiungit . Plerunq; cum Subiectione miscetur.

Cic. 3. in Verrem. Cognitorem adscribit Sthenio . Quem ? Cognatum aliquem , aut propinquum ? Non . Thermitanum aliquem honestum hominem , ac nobilem ? Ne id quidem , Quid igitur ? Ciuem Romanum, ipsius *Schenij inimicum* .

Idem 7. in eundem Verrem, qui *Leonidæ* seruos coniurationis damnatos accepta pecunia dimiserat . Etiamnum mihi expectare videmini Iudices, quid deinde factum sit ? Quod iste nihil vnquam facit sine aliquo quæstu, atque præda . Quid in eiusmodi re fieri potuit ? Quod commodum est ? Expectate facinus, quàm vultis, improbum, vincam tamen expectationem omnium . Nomine sceleris , coniurationisq; damnati, ad supplicium traducti, ad palum alligati , repentè multis milibus hominum inspectantibus soluti sunt, & *Leonidæ* illi domino redditi .

Latinus Pacatus in Paneg. Theodosij Patrem laudaturus . Sed quid faciam ? Nouam quandam patior ex copia difficultatem . Quid inquam faciam ? Quæ *Rhenus* , aut *Vacalis* vidit aggre-

grediar ? Iam se mihi Sarmatica cæde sanguineus Ister obijciat. Attritam pedestribus prælijs Batavianam referam ? Saxo consumptus bellis navalibus offeretur. Redactum ad paludes suas Scotum loquar ? Compulsus in solitudines auias omnis Alemanus, & vterque Maurus occurret. Cum igitur impediatur turba delectum, atque tam præstet gesta in summam referre, quam enumerando tenuari, dixisse sufficiat, vnum illum diuinitus extitisse; in quo virtutes simul omnes vigerent, quæ singulæ in omnibus prædicantur.

DVBITATIO est, cum velut in arripiti pendentes querimus, quid dicendum, aut agendum.

Cic. pro P. Quint. Quid agendum est ? Quis Deus appellandus est ? Cuius hominis fides imploranda est ? Qui denique questus, qui mæror dignus inueniri in calamitate tanta potest ?

Scipio apud Liniū seditiosos milites alloquens. Apud vos quemadmodum loquar nec consilium, nec oratio suppeditat, quos nec quo nomine quidem appellare debeam scio. Ciues ? qui à Patria vestra desciiuistis. An milites ? Qui imperium, auspiciūque abnuistis, Sacramenti religionem rupistis. Hostes ? Corpora, ora, vestitum, habitum ciuium agnosco: facta, dicta,

dicta, consilia, animos hostium video?

Plinius in Paneg. Traiani. Tuam verò magnanimitatem, an modestiam, an benignitatem priùs mirer?

Apud Senecam Andromacha, Filij vita, & Viri cineribus metuens.

Quid agimus? Animum distrahit geminus timor:

Hinc gnatus, illinc coniugis chari cinis.

Pars vtra vincet? &c.

Patheticam dubitationem vide in Tro.

Act. 3.

COMMUNICATIO est Figura, qua vel Auditores, vel Aduersarios, vel Indices consulere videmur.

Cic. ult. in Verrem. Quid agam Iudices? Quo accusationis meae rationem conferam? Quo me vertam?

Idem pro A. Cecinna. Quæro, si te hodie domum tuam redeuntem coacti homines, & armati, non modò limite, rectoque ædium tuarum, sed primo aditu, vestibuloque prohibuerint, quid acturus sis?

Pro C. Rabirio. Quid tandem C. Rabirio faciendum fuit? De te, inquam, Labiene quæro: Cùm ad arma Consules ex S. C. concurrissent, quid tandem C. Rabirio facere conuenit?

Latinus Pac. in Paneg. Theod. in integro itaque rem totam esse faciamus,

mus, & in quodam orbis comitio quæri
 putemus, quis nam sit ille, qui debeat
 tantam molem subire, & nutantia Ro-
 manæ rei fata suscipere. Nonne is om-
 nium suffragijs hominum tributim,
 centuriatimque legeretur, cui felix Pa-
 tria, cui domus clara, cui forma diui-
 na, cui ætas integræ, cui militarium,
 ciuiliūque rerum vsus contigisset?

CONCESSIO est, cū aliquid cause
 nostra fiducia concedimus.

Cic. pro Flacco. Tribuo Græcis lite-
 ras, do multarum artium disciplinam,
 non adimo sermonis leporem, inge-
 niorum acumen, dicendi copiam: de-
 nique etiam si qua sibi alia sumunt, non
 repugno; testimoniorum religionem,
 & fidem nunquam ista natio coluit.

*Idem pro Murena ad Catonem, quem
 ipsi Murena confert.* Sed hæc sanè sint
 paria omnia. Sit par forensis opera
 militari; sit par militari suffragatio vr-
 bana. Sit idem magnificentissimos,
 & nullos vnquam fuisse ludos. Quid
 in ipsa Prætura? Nihil ne existimas
 inter tuam, & istius sortem inter-
 fuisse?

Exprimitur hæc Figura huiusmodi
 verbis. *Do. Concedo. Non inficior.*
Scio &c. Sæpius etiam modis per-
 missiuis. *Esso, Sit ita &c.* Non rarò
 ad deterrendum, dissuadendum, vel

arguendum adhibetur; tuncque dissimulationis plena esse solet.

Cic. pro Flacco. Litemus ergo Lentulo, parentemus Cerhego, reuocemus eiectiones; nimis pietatis, & summi amoris in Patriam vicissim nos poenas, si ita diis placet, demus.

In Verrem 4. Verum esto. Eripe hereditatem propinquis, da palæstritis. Prædare in alienis bonis nomine ciuitatis: euertere leges, monumenta, voluntates mortuorum, iura viuorum. Num etiam Heraclium bonis exturbare oportuit?

Apud Virgil. lib. 7. Æneid. Alecto, Turnum alloquens.

I nunc, ingratis offer te irrisu periculis;

Tyrrenas inferne acies, tege pace Latinos.

CORRECTIO est Figura, qua superius dicta vel redarguit, vel immutando emendat.

Cic. in Cat. pr. Cum prius exilium Catilinæ suasset communis in eum odij exaggeratione, hanc subdit Correctionem.

Quanquam quid loquor? Te ut vlla res frangat? Tu ut vnquam te corrigas? Tu ut vllam fugam meditere? Ut vllum tu exilium cogites?

Ibidem. Secerne te à bonis: infer
Pa-

Patriæ bellum : exulta impio latrocinio, ut à me non eiectus ad alienos, sed inuitatus ad tuos isse videaris. Quanquam quid ego te inuitem, à quo iam sciam esse præmissos, qui tibi ad forum Aurelium præstolarentur armati?

In Verrem 3. Non enim furem, sed raptorem: non adulterum, sed expugnatorem pudicitie: non sacrilegum, sed hostem sacrorum, religionumque: non ficarium, sed crudelissimum carnificem ciuium, sociorumque in vestrum iudicium adduximus.

Ad Atticum. In hoc ferendus meus error: ferendus inquam? Immo etiam adiuuandus.

Philipp. 14. Nunquam in ciuili bello supplicatio decreta est. Decretam dico? Ne victoris quidem literis postulari est.

LICENTIA est maior quadam, non tamen sine causa, & modo, loquendi libertas. Seu est liberiùs pronuntiata sententia, monendi, obiurgandi, aut etiam laudandi causa. Hac Orator auctoritatem, fiduciam, vel sinceritatem ostendit.

Cic. pro Lig. Non deest consilium. Reip., neque auctoritas huius ordinis. Nos nos dico aperte Consules desumus.

Cic. pro Roscia. Et forsitan in suscipienda causa temerè impulsus adolescentia fecerim; quoniam quidem semel suscepi, licet hercule vndique omnes in me terrores, minæ, periculaque impendeant omnia, succurram, atque subibo. Certum est, deliberatumque quæ ad causam pertinere arbitror, omnia non modo dicere; verùm etiam libenter, audacter, liberè dicere. Nulla res tanta existat, Iudices; ut possit vim mihi maiorem adhibere metus, quàm fides.

Scipio Africanus apud Livium. Equidem haud dissimulo me tuas. Q. Fabi laudes non assequi solùm velle; sed (bona venia dixerim) si possim, exuperare.

At huius Figuræ usus quandam requirit in dicente gravitatem. Cauendum quoque, nè nimia, & importuna loquendi libertas offensiones pariat. Quamobrem opus est, locum, tempus, ac personas considerare; ac si quid gravius dicturi sumus, tutius est insinuationem præmittere, aut aliqua excusatione, seu mitiori loquendi modo temperare Licentiam.

Hac arte utitur Cicero pro Ligario, summa calliditate Casarem delinicens, cuius clementiam primùm extollit; ut odiosam aliqui veritatem liberè fa-

fateatur : se videlicet aduersa quondam illi arma secutum fuisse .

Cuius ego causam (scilicet *Q. Ligarij*) animaduerte quæso , qua fide defendam , cum prodo meam . O clementiam admirabilem , atque omni laude , prædicatione , literis , monumentisque decorandam ! M. Cicero apud te defendit alium in eâ voluntate non fuisse , in qua se ipsum confiteretur fuisse ; nec tuas tacitas cogitationes extimescit , nec quid tibi de alio audienti , de se ipso occurrat , reformidat . Vide , quàm non reformidem . Vide , quanta lux liberalitatis , & sapientiæ tuæ mihi apud te dicenti oboriatur . Quantum potero voce contendam ; ut hoc Populus Romanus exaudiat . Suscepto bello , Cæsar , gesto etiam magna ex parte , nulla vi coactus , iudicio meo , ac voluntate ad ea arma profectus sum , quæ erant sumpta contra te .

PRÆOCCUPATIO est Figura , qua præneminus , ac diluimus , quod nobis obijci posset . Prius ergo , quod causæ nostræ aduersatur , exponendum ; immò quandoque (si pro nobis validiora cernant argumenta) amplificandum , hinc refellendum ; vel negando , vel infirmando , vel rei rationem reddendo .

Cic. 2. in Catilinam . Cum superius exultrasset eo in exilium pulso , qui po-

tiùs vt Patriæ proditor capite plectendus videbatur, hoc, quod obijci poterat, ita præoccupat, ac dissoluit.

At si quis est talis, quales esse omnes oportebat, qui in hoc ipso, in quo exultat, & triumphat oratio mea, me vehementer accuset, quòd tam capitale hostem non comprehenderim potius quàm emiserim, non est ista mea culpa Quirites, sed temporum &c.

Pro Archia Poeta. Quæret quispiam. Quid? Illi ipsi summi viri, quorum virtutes literis proditæ sunt, ista ne doctrina, quam tu laudibus effers, eruditi fuerunt? Difficile est hoc de omnibus affirmare, sed tamen est certum, quid respondeam. Ego multos homines excellenti animo, ac virtute fuisse, & sine doctrina, naturæ ipsius habitu propè diuino, per se ipsos, & moderatos, & graues extitisse fateor; Etiam illud adiungo, sæpiùs ad laudem, atque virtutem, naturam sine doctrina, quàm sine natura valuisse doctrinam. Atque id ego contendo, cum ad naturam eximiam, atque illustrem, accesserit ratio quædam, conformatioque doctrinæ, tum illud nescio quid præclarum, ac singulare solere existere.

In Verrem 3. Dicit aliquis. Quid ergo in hoc Verrem reprehendis, qui non modo ipse fur non est, sed ne alium qui-

quidem passus est esse ? Attendite : iam intelligetis hanc pecuniam , qua viam modò visa est exire ab isto , eadem semita reuertisse .

Ibidem. Ergo inquiet aliquis , donauit populo Syracusano illam hæreditatem . Primum , si id confiteri velim , tamen istum condemnatis necesse est ; neque enim permissum est , vt impunè nobis liceat , quod alicui eripuerimus , id alteri tradere &c.

Figura secundi Ordinis .

DESCRPTIO est Figura , qua ita res exprimit , vt subiicere oculis videatur . Subijci oculis res videntur , cùm earum partes , causæ , effectus , adiuncta explicantur . De his agam inferiùs in tractatu de Locis Topicis , à quibus hauriuntur Descriptiones : quamobrem post eorum explanationem de varijs Descriptionum speciebus plura opportuniùs tradam .

Frequentissimus est huius Figuræ vsus non solùm apud Oratores , ac Poetas , verùm etiam apud Historicos .

Cic. 2. de lege Agraria Rullum Trib. plebis ita describit . Iam designatus alio vultu , alio vocis sono , alio incessu esse meditabatur ; vestitu obsoletiore , corpore inculto , & horrido , capilla-

tior, quàm manta, barbaque maiore; ut oculis, & aspectu denuntiare vim Tribunitiam, & minitari Reip. videretur.

Latinus Pacatus in Paneg. Theod. eadem exercitus ita subiicit oculis.
Datur debito rebelle agmen exitio: voluntur impia in sanguine suo turmæ: tegit totos strages vna campos, continuisque funeribus cuncta latè operiuntur. Iam quia ad muros differenda morte properauerant, aut fossas cadaueribus æquabant, aut obuijs sudibus induebantur, aut portas, quas eruptione patefecerant, morte claudebant. At quorum se fugæ imperuius ripis amnis obiecit, trepidando collecti, & alterum quisque complexi per abrupta glomerantur. Spumat decolor cruore fluuius, & cunctantes meatus vix eluctatis cadaueribus euoluit.

Q. Curtius Marsiam amnem describit lib. 3. Fons eius ex summo montis cacumine excurrens in subiectam petram magno strepitu aquarum cadit: inde diffusus circumiectos rigat campos liquidus, & suas duntaxat vndas trahens. Itaque color eius placido mari similis locum Poetarum mendacio fecit: quippe traditum est Nymphas amore amnis retentas in illa rupe confidere. Cæterum quandiu intra mu-

ros fluit , nomen suum retinet ; at cū
extra munimenta se euoluit , maiore
vi , ac mole agentem vndas Lycum
appellant .

*Claudianus de nuptijs Honorij , &
Maria , Augusta Sponsa formam ita
describendo commendat*

Quauis aliena fuisses
Principibus , regnum poteras hoc
ore mereri .

Quæ propior sceptris facies ? Quis
dignior aula .

Vultus erit ? Non labra rosæ , non
colla pruinæ ,

Non crines æquant violæ , non lu-
mina flammæ .

Quàm vincto leuiter se se discrimine
confert

Vmbra supercilij ? Miscet quàm iusta
pudorem

Temperies , nimio nec sanguine
candor abundat !

Auroræ vincis digitos , humerosque
Dianæ .

Ipsam iam superas matrem &c.

Valet Descriptio ad res explicandas ,
ad ornandam , ac dilatandam Oratio-
nem ; laudemque habet , si non frustra ,
si non intempestiuè , si non passim ex
ingenij libidine inducatur .

*INTERPRETATIO est verborum ,
vel sententiarum rem eandem incul-*

cantium multiplicatio. Fit ergo aut pluribus tantum verbis; ut *Cic. in Cat. 2.* Abijt, excessit, erupit, euasit. Aut pluribus sententijs, seu clausulis. *Idem pro Mil.* est enim hæc Iudices non scripta, sed nata lex: quam non didicimus, accepimus, legimus; verum ex natura ipsa arripuimus, hausimus, expressimus: ad quam non docti, sed facti; non instituti, sed imbuti sumus.

Duplex apud Carbonem *INTERPRETATIO* est. Alia, quæ multa similis significationis adhibens idem dicit; ut in superioribus exemplis. *SYNONYMIAM*, vel *EPEXEGETISIM* Græci appellant, atque hanc unam Interpretationis speciem memorat Author ad Herennium lib. 4.

Alia est, quæ dictum aliquod explicat, illius sensum euoluendo. Exegesis, & Hermenia Græcè vocatur. (a)

Ausonius Gratiani epistolam, quàm is illi scripserat Consulatum deferens, egregie interpretatur, singula verba expendendo.

Verba sunt literarum tuarum, quibus apud me authoritatem summi Numinis, & tuæ voluntatis amplificas: Sic enim loqueris &c. *Cum de Consulibus in annum creandis.* Erudita vox;

&

a Carbo lib. pr. de eloc. Orat. disp. 3.

& cura solennis ! *Solus mecum voluntarem* . O profundi altitudo secreti ! Habes ergo consiliatorem , & non metuis proditorem , *Vt me nosti* . Quid familiarius ? *Vt facere debui* . Quid constantius ? *Vt velle te scini* . Quid dici blandius potest ? *Consilium meum ad Deum retuli* . Et quemadmodum solus , cui præstò est tam grande consilium ? An plenius cum Senatu , cum Equestri Ordine , cum Plebe Romana , cum Exercitu tuo , & Prouincijs omnibus deliberasses ? *Consilium meum ad Deum retuli* . Non vt (credo) nouum sumeres , sed vt sanctius fieret , quod volebas &c.

Hæc tamen *INTERPRETATIO* , siue *EXEGESIS* , cum *EXPOLITIONE* conuenit . Synonymia leuis admodum Figura est , si verbis tantum mutatis idem omnino dicat ; nec frustra in Oratione adhibenda , nisi vim habeat rei magis explicandæ , augendæ , vel ornandæ . Tum verò si prolixior sit , & sententiarum , Figurarumq ; varietate illustretur , migrat pariter in *EXPOLITIONEM* , de qua postmodum agam
Quauis nescio , an hæc peculiaris , quædam Figura dici debeat , cum sit potius species Amplificationis elegantissima , qua rem eandem variè versamus , Oratori perutilis , ac ex Tullio necessaria .

Hanc alij Suffigurationem , alij Com-
morationem , Immorationem , Ener-
giam vocant. Equidem Interpretatio-
nem Expolitionis , Expolitionem ple-
næ , absolutæque Amplificationis rudi-
mentum appellauerim.

*EXPOLITIO est Oratio , unam ,
eandemque rem varijs Figuris , dicendi-
que modis explicans , & exornans .*

*Cic.clementiam Caesaris erga M.Mar-
cellum commendans . At huius gloriæ
C. Caesar , quam es paulò ante adeptus ,
socium habes nullum . Totum hoc ,
quantuncunque est , quod certè maxi-
mum est , totum est , inquam , tuum .
Nihil sibi ex ista laude Centurio , nihil
Præfectus , nihil Cohors , nihil Turma
decerpit . Quin etiam illa ipsa rerum
humanarum domina Fortuna in istius
se societatem gloriæ non offert : tibi
cedit : tuam esse totam , & propriam
fatetur .*

*Ecce quàm variè hoc vnum Cicero
explicat . Tota huius facti gloria Caesar
tua est .*

*Idem pro Sexto Roscia huic Sententia
expolienda immoratur .*

*Quisque conscientia sui sceleris torque-
tur .*

Nolite enim putare , quemadmo-
dum in Fabulis sæpenumero vidistis ,
eos , qui aliquid impiè , sceleratèque
com-

commiserunt , agitari , & perterriti
Furiarum tædis ardentibus . Sua quen-
que fraus , & suus error maximè vexat :
suum quæque scelus agitat , amentia-
que afficit : suæ malæ cogitationes , con-
scientiæque animi terrent . Hæ sunt
impijs assidua , domesticæque Furia , quæ
dies , noctesque parentum pœnas à con-
sceleratissimis filijs repetunt &c.

*Plinius in Paneg. Traiani pluribus
modis hanc sententiam exornat .*

Facile mouemur Principis exemplo .
Flexibiles quancunque in partem
ducimur à Principe , atque (vt ita di-
cam) sequaces sumus : huic enim cha-
ri , huic probati esse cupimus , quod
frustra sperauerunt dissimiles ; eoque
obsequij continuatione peruenimus , vt
propè omnes homines vnius moribus
viuamus .

Nam vita Principis censura est , caque
perpetua : ad hanc dirigimur , ad hanc
conuertimur , nec tam imperio nobis
opus est , quam exemplo . Quippe infi-
delis recti magister est metus : melius
homines exemplis docentur , quæ in-
primis hoc in se habent boni , quòd ap-
probant , quæ præcipiunt , fieri posse .

*Idem mansuram Principis gloriam
non splendidis monumentis , at Virtute
firmari ostendit per Expolitionem .*

Scis enim , vbi vera Principis , vbi
sem-

Sempiterna sit gloria, ubi sint honores, in quos nihil flammis, nihil se-
nectuti, nihil successoribus liceat; Ar-
cus enim, & statuas, aras etiam, tem-
plaque demolitur, & obscurat obliuio,
negligit, carpitque posteritas. Contra
contemptor ambitionis, & infinitæ
potestatis domitor, ac frænator animus
ipsa vetustate florescit, nec ab ullis ma-
gis laudatur, quàm quibus minimè
necesse est. Præterea, ut quisque factus
est Princeps, extemplò fama eius, in-
certum bona, an mala, cæterum æterna
est. Non ergo perpetua Principi fama,
quæ inuitum manet, sed bona concu-
piscenda est. Ea porrò non imaginibus,
& statuis, sed virtute, ac meritis pro-
rogatur.

INCREMENTVM est Figura, quæ
semper Oratio crescit ab infimo ad sum-
mum. Cic. pro Milone. Capere eius
amentiam Ciuitas, Italia, Prouinciæ,
Regna non poterant.

Idem in Verrem 9. Facinus est vincere
ciuem Romanum, scelus verberare,
parricidium neare, quid dicam in-
crucem tollere?

GRADATIO est Figura, quasi per
gradus procedens ab uno ad aliud, ita
ut semper aliquid ex precedentibus repe-
tat.

Cic. pro Sexto Roscio. In vrbe luxu-
ria

Sia creatur, ex luxuria existat auaritia necesse est, ex auaritia erumpat audacia: inde omnia scelera, & maleficia gignuntur.

Idem pro Mil. Neque verò se Populo solum, sed etiam Senatui commisit; nec Senatui modò, sed etiam publicis præsidijs, & armis; neque his tantum, sed etiam eius potestati, cui Senatus totam Remp. commisit.

Idem pro Quint. Si debuisssem Sexte, petisses statim; si non statim, paulò quidem post; si non paulò post, at aliquando.

CONGERIES est plurimum rerum collectio, qua quasi uno impetu Orationis conuolantur, nullo seruato ordine dignitatis, aut significationis. Grauem, & vehementem facit Orationem, & maximè iuuat, cum pluribus iam dictis adhuc plura dicenda remanent, nec præstat ire per singula; per Congeriem enim multa, & varia paucis colliguntur.

Cic. pro Mil. Tu Clodij cruentum cadauer eiecisti domo, tu in publicum eiecisti, tu spoliatum imaginibus, exequijs, pompa, laudatione, infelicissimis lignis semiustulatum nocturnis canibus dilaniandum reliquisti.

Idem pro M. Calio de Clodio loquens.
Hominem sine re, sine fide, sine spe,
sine

sine fortunis, ore, lingua, manu, vita
omni inquinatum.

Pro Sex. Roscio. Pater occisus nefarie: domus obsessa: ab inimicis bona adempta: possessio direpta: filij vita infesta; sæpe ferro, atque insidijs appetita.

DISTRIBVTIO est *Figura*, pluribus rebus, aut personis quidquam peculiare, ac proprium impertiens.

Cic. pro lege Manil. de Pompeio.

Non auaritia ab instituto cursu ad prædam aliquam reuocauit, non libido ad voluptatem, non amœnitas ad delectationem, non nobilitas vrbis ad cognitionem, non denique labor ipse ad quietem.

Ibidem. Non enim illæ sunt solæ virtutes Imperatoriæ, quæ vulgò existimantur, labor in negotio, fortitudo in periculis, industria in agendo, celeritas in conficiendo, consilium in prouidendo.

Plin. in Paneg. Tra. Reddita est amicis fides, liberis pietas, obsequium seruis: verentur, & parent, & dominos habent.

Ibidem de publico gaudio in Traiani aduentu. Te paruuli noscere, ostentare iuuenes, mirari senes: ægri quoque neglecto medentium imperio ad conspectum tui, quasi ad salutem, fan-

nitatemque properare. Inde alij se satis vixisse te viso, te recepto: alij nunc magis esse viuendum prædicabant. Fœminas etiam tunc fœcunditatis suæ maxima voluntas subiit, cùm cerne-
rent, cui Principi ciues, cui Imperatori milites peperissent.

Aliqui Distributionem sumunt pro simplici diuisione totius in partes: At si tantùm hac ratione sumatur, non differt à Loco Enumerationis partium.

PRÆTERITIO est simulata reticentia, qua fingimus nos omittere velle, quæ tunc maxime dicimus.

Cic. in Cat. pr. Prætermitto ruinas fortunarum tuarum, quas impenderet tibi proximis Idibus senties.

Pro lege Mamilia. Sinite hoc loco Quirites, sicuti Poetæ solent, qui res Romanas scribunt, præterire me nostram calamitatem.

De Provincijs Consularibus Pisonis vitia per Præteritionem recenset.

Itaque omnia illa, quæ & sæpe audistis, & tenetis animis, etiamsi non audiatis, prætermitto. Nihil de hac eius urbana, quam ille præsens in oculis vestris, mentibusque defixit, audacia loquor; nihil de superbia, nihil de contumacia, nihil de crudelitate disputo. Lateant libidines eius illæ tenebrosæ, quas fronte, & supercilio,
non

non pudore, & temperantia contegebatur.

In Verrem 3. Omnia præteribo, quæ mihi turpia dictu videbuntur; neque solum, quid istum audire, verum etiam, quid me dicere deceat considerabo. Vos quæso date hoc, & concedite pudori meo, ut aliquam partem de istius impudentia reticere possim. Omne illud tempus, quod fuit antequam iste ad magistratus, Remque publicam accessit, habeat per me solum, ac liberum. Sileatur de nocturnis eius bacchationibus, ac vigilijs lenonum, aleatorum, productorum, nulla mentio fiat. Damna, dedecora, quæ res Patris eius, ætas ipsius pertulit, prætereantur: lucretur indicia veteris infamiæ: patriatur eius vita reliqua, me hanc tantam iacturam criminum facere.

Scipio apud Liviū. Horret animus referre, quid crediderint homines, quid sperauerint, quid optauerint. Auferat omnia irrita obliuio, si potest; si non, utcunque tegat silentium.

Aliquos habet dicendi modos Præteritio, quibus variari solet. Ex. gr. *Taceo. Prætereo, Omitto. Nil dicam, Missa faciam, Silentio inuoluam. Dicere pudet. Quid me attinet dicere? Nolite expectare, dum singula reuoluam.*

luam. Per me lateant illa. Nolo dolorem commemorando augere. Pudet referre. Horreo in memoriam reuocare. Nollem recordari. Nondum commemoro. Quid est cur dicam? Quid si nunc ea repeterem? Quot, & quanta reuoluerem, si liceret? Me dies, vox, latera deficient, si omnia persequi velim &c.

Hanc Figuram Tullius Reticentiam vocat; sed à vera Reticentia differt, quòd hæc suppressit, quæ dicere vellet: Præteritio tantò plus dicit, quantò magis dicere nolle se fingit, quare simulata Reticentia est.

CONTRAPOSITVM, Græcè **AN-
TITHESIS**, est oppositorum contentio: Fit autem aut verba verbis, aut sententias sententijs opponendo.

Cic. pro Clu. Vicit pudorem libido, timorem audacia, rationem amentia.

In Verrem 6. Conferte hanc pacem cum illo bello; huius Prætoris aduentum cum illius Imperatoris victoria; huius cohortem impuram cum illius exercitu inuicto; huius libidines cum illius continentia. Ab illo, qui cepit, conditas, ab hoc, qui constitutas accepit, captas dicetis Syracusas.

Author ad Herennium. Ego Reges eieci: vos Tyrannos introducitis. Ego libertatem, quæ non erat, peperit; vos
par-

partam seruare non vultis. Ego capitis mei periculo Patriam liberaui: vos liberi sine periculo esse non curatis.

Iust. histor. lib. 9. Philippum, & Alexandrum comparans. Huic Alexander successit & virtute, & vitijs Pater maior. Itaque vincendi ratio utriusque diuersa. Hic aperta vi; ille artibus bella tractabat. Deceptis ille gaudere hostibus; hic palam fuit. Prudentior ille consilio; hic animo magnificentior. Iram Pater dissimulare, plerumque & vincere; hic ubi exarsisset, nec dilatio ultionis, nec modus erat. Vinum nimis uterque auidus, sed ebrietatis diuersa vitia. Patri mos erat, & de conuiuio in hostem procurrere, manum conferere, periculis se temerè offerre. Alexander non in hostem, sed in suos saeuiebat: quamobrem Philippum sæpè vulneratum praelia remisere; hic amicorum interfector conuiuio frequenter excessit. Regnare ille cum amicis volebat; hic in amicos regna exercebat; amari Pater malle; hic metui &c.

IMPOSSIBILE est comparatio eorum, qua fieri non possunt cum ijs, qua fieri non posse, vel non debere censemus.

Cic. Philipp. 13. Prius vndæ, & flammæ in gratiam redeant, quàm cum Antonio Resp.

Sæpius à Poetis, quàm ab Oratoribus
adhibetur.

Virg. Ecl. pr. Ante leues ergo pascen-
tur in æthere cerui.

Et freta destituent nudos in litore
piscēs;

Quàm nostro illius labatur pectore
vultus.

Ovidius in Ibin.

Desinet esse prius contrarius ignibus
humor,

Iunctaq; cū Luna lumina Solis erunt,
Et Ver Autumno, Brumæ miscebitur
Æstas,

Atq; eadem regio vesper, & ortus erit,
Quàm mihi sit tecum positis, quæ
sumpsimus, armis,

Gratia, cōmissis improbe rupta tuis.

Impossibile vox minimè recepta ab
aurea Latinitatis Patribus, adeò, ut
Cicero Græcè potius dixerit *Adynaton*.
Eam tamen adhibet Quintilianus. *Lib.*
5. cap. 10. Inst. Orat. Ego tantum eadem
utor, cum vim habet nominis proprii,
seu Figuræ, seu Argumenti ab Impo-
ssibili; nè Latinæ loquens duriori cir-
cū locutione utar: ab ea, quod fieri non
potest.

PARADOXVM est dictum mirabile
præter communem opinionem. Huius-
modi sunt illa. Regnum nihil aliud
est, quàm splendida servitus. Plures

occidit gula, quàm gladius.

Sen. Mor. Nusquam est, qui vbiq̃ue est. Non qui parum habet; sed qui plus cupit, pauper est.

EMPHASIS est Figura, plus significans, quàm dicit.

Sen. Trag. in Medea de Argonautarum navigatione loquens.

Quod fuit huius

Pretium cursus? Aurea pellis,
Maiusque mari Medea malum,
Merces prima digna carina.

Quæ si explicare velis, mirum est, quot, & quanta paucis significant: hoc est adeo barbaram, sceleratam, impiam fuisse Medeam, ut ipso mari, quo nihil magis infidum, ac immane, totque navigationis malis peiore esset, naui temerariæ non impar foemina.

Plinius in Paneg. Tam velox Cæsar potentia tua est, tamque in omnia pariter intenta bonitas, & accincta: ut tristius aliquid seculo tuo passis ad remedium, salutemque sufficiat, ut scias.

Latinus Pac. de Theodosio. Angustè Imperator fortunam tuam expendit quisquis id de te tantum, quod fieri potest, credit.

Idem per Emphases ostendit, quàm inuisa esset priscis Romanis dominantium superbia.

Nam cum indiscreta felicitum pedi-
sequa

sequa sit superbia, vix cuiquam contigit & abundare fortuna, & indigere arrogantia. Cuius quidem ita maiores nostros semper pertæsum est, ut grauiorem semper putauerint *seruitute contemptum*; eiusque impatientia sint coacti post bellatores Tullos, Numasque sacrificos, & Romulos conditores, Regnum usque ad nomen odisse. Denique ipsum illum Tarquinium execratione postrema hoc damnauerunt maledicto; & hominem libidine præcipitem, auaritia cæcum, immanem crudelitate, furore vecordem, vocauerunt *superbum*, & putauerunt sufficere *conuictum*.

Vim Emphasis maximam habent pronomina, & nomina propria.

Ouidius 4. de Ponto. Ille lugurthinus clarus, Cymbroque triumpho,

Quo victrix toties Consule
Roma fuit.

Et Medea apud Senecam. Hæc facere Iason potuit? Medea fugiam?

EPIPHONEMA est rei narratio, vel probata subiecta sententia.

Cicero, ubi multis exaggerauit mitem in ipsa victoria Cæsaris animum, & clementiam erga M. Marcellum, ita concludit.

Rectè igitur vnus inuentus es, à quo etiam ipsius victoriae conditio, visque deuicta est.

La.

Latinus Pacatus post laudatam Theodosij modestiam, ac temperantiam, quibus virtutibus, absque metu legum, suorum mores correxerat, hanc subdit sententiam.

Sic enim, sic est. Exasperat homines imperata correctio: blandissimè iubetur exemplo.

Virgilius 3. *Georg.*, ubi equos cursu certantes descripsit.

Tantus amor laudum, tantæ est victoria curæ.

Idem Aeneid. prænarratis Troianorum arumbris.

Tantæ molis erat Romanam condere gentem.

Figura tertij Ordinis.

APOSTROPHE est conuersio sermonis ad aliquem. Notissima Figura, efficax quidem, & affectibus aptissima. Hac Deum, superos, homines mortuos etiam, & ratione, sensuque carentia compellamus.

Cic. pro *M. Cato* sermonem vertit ad Deos: Proh Dij immortales, cur interdum in hominum sceleribus maximis, aut conuiuetis, aut præsentis fraudis pœnas in dies reseruatis?

Pro M. Marcello ad Casarem. Te verò, quem præsentem intuemur; cuius

cuius mentem, sensusque, & os cernimus, ut quidquid belli fortuna reliquum Reip. fecerit, id esse saluum velis, quibus laudibus efferemus? quibus studiis prosequemur; qua benevolentia complectemur? Parietes, medius fidius, C. Cæsar, ut mihi videtur, huius curiæ tibi gratias agere gestiunt, quod breui tempore futura sit illa autoritas in his maiorum suorum, & suis sedibus &c.

Pro Sextio ad adolescentes, quos excitat maiorum exemplo ad rectè gerendâ Reip. studium. Hæc imitamini per Deos Immortales, qui dignitatem, qui laudem, qui gloriam quæritis. Hæc ampla sunt, hæc diuina, hæc immortalia. Hæc fama celebrantur, monumentis annalium mandantur, posteritati propagantur.

In Cat. pr. ad Iouem. Tum tu Iuppiter, qui iisdem, quibus hæc Vrbs, auspicijs à Rumulo es constitutus, quem Statorem huius Urbis, atque Imperij verè nominamus, hunc, & huius socios à tuis aris, cæterisque templis; à tectis Urbis, ac moenibus; à vita, fortunisque Ciuium omnium arcebis &c.

Idem ad Milites Legionis Martia strenuè pro Rep. vita defunctos grauissimam habet Apostrophem, Philippica ultima circa finem.

Virgilius post narratam Euryali, & Nisi mortem vtrunq; Apostrophe compellat. (a) Apud eundem Æneas Patris cineres, (b) Mezentius equum, (c) Dido suas vestes alloquuntur. (d)

Elegantissimè Latinus Pacatus laudata Theodosij clementia in victos, post Maximum debellatum, ad Urbem Romam ita se vertit.

Spectabas hæc à tuis collibus Roma,
& septena arce sublimis celsior gaudia
ferebaris. Tu, quæ experta Cinnanos,
furores, & Marium post exilia crude-
lem, & Syllam tua clade felicem, &
Cæsarem in mortuos misericordem, ad
omne ciuile motus classicum tremisce-
bas. Quæ, præter stragem militum,
vtraque parte tibi pereuntium, extinc-
ta domi Senatus tui lumina, suffixa
pilo Consulum capita, Catones in
mortem coactos, truncoſque Cicerones,
& Pompeios fleueras insepultos. Cui
damna grauiora scissus in partes ciuium
furor, quàm portis imminens Pœnus,
aut receptus muris Gallus intulerat:
cui Alliensis die Æmathia funestior,
Cannis Collina feralior tam altas olim
reliquerunt cicatrices; vt grauius sem-
per tuam, quàm alienam experta vir-
tutem nihil tibi magis, quàm te time-
res. Vidisti ciuile bellum hostium
cæde,

a Lib. 9. Æne. b Lib. 5. c Lib. 10. d Lib. 4.

cæde, militum pace, Italiæ recuperatione, tua libertate finitum. Vidisti inquam finitum ciuile bellum, cui decernere posses triumphum.

EXCLAMATIO est *vehementioris affectus expressio, per alicuius persona, vel rei compellationem.* Fit autem vel interiectione adhibita, vel absque vlla interiectione.

Cic. in Pis. O scelus, o pestis, o labes!

Pro Calio. O magna vis veritatis, quæ contra hominum ingenia, calliditatem, solertiam, contraque fictas omnium insidias facile se per se ipsa defendit!

Philipp. 14. O Solem ipsum beatissimum, qui, antequam se abderet, stratis cadaueribus parricidarum, cum paucis fugientem vidit Antonium!

Virg. Ecl. 2. Fortunate Senex! Ergo tua rura manebunt.

In usu huius Figuræ hæc animaduertenda rectè admonet Carbo *De eloc. Orat. l. pr. disp. 20.* Tunc adhiberi debet, cum rei magnitudo postulat, cum rem maioris momenti probaueris, & Auditorum animos commoueris: quare in Amplificationibus, & Epilogis locum habet. Sed in re frigida exclamare, leuiora quæque ab exclamatione exordiri dementium est. Denique huius

Figuræ vsus nec frequens esse debet, nec diuturnus.

DEPRECATIO est supplex postulatio, qua utimur ad alienam opem implorandam.

Cic. pro Ligario ad Casarem. Ad Iudicem sic agi solet: sed ego ad Parentem loquor. Erravi, temerè feci: poenitet; ad clementiam confugio; ut ignoscas oro.

Medea apud Sen.

Adeste, adeste sceleris vltrices
Deæ,

Crinem solutis squalidæ serpenti-
bus:

Atram cruentis manibus amplexæ
facem &c.

Eadem Creontem alloquens.

Per ego inauspicatos Regij thala-
mi thoros,

Per spes futuras, perque Regnorum
status,

Fortuna varia dubia quos agitat
vice,

Precor, breuem largire fugienti
moram.

IMPRECATIO est execratio quædam, qua malum alicui precamur: ex. gr. ex *Cic. pro Deiotara*. Di te perdant fugitiue. Dispereas hominum scelestissime &c. Exempla non deerunt apud *Ovidium in Ibin.*

Terra

Terra tibi fruges, amnis tibi deneget vndas;

Deneget afflatus ventus, & aura suos.

Absit ut à cordibus, ita & à calamis, & linguis nostris hæc Figura; nisi forte illius usum alicuius facinoris atrocitas in scelestissimos, & impios extorqueat, vel sceleribus ipsis irascamur.

Gallus huc etiam faustas preces refert. *Æneid. pr. Æneas ad Didonem.*

Dij tibi (si qua pios respectant numina, si quid

Usquam iustitiæ est, & mens sibi conscia recti)

Præmia digna ferant &c.

Sed Optationem potius, & Votum Orationem eam appellauerim, qua vel nobis, vel alijs bene precamur.

OMINATIO est Figura, qua ventura vel bona, vel mala, quasi vaticinando, prædicimus.

Cic. pro M. Marcello ad Casarem: Obstupeſcent poſteri certè, Imperia, Prouincias, Rhenum, Oceanum, Nilum, pugnas innumerabiles, incredibiles victorias, monumenta, munera, triumphos audientes, & legentes tuos. Sed nisi hæc Vrbs stabilita tuis consilijs, & institutis erit, vagabitur modò nomen tuum longè, atque latè; sedem quidem stabilem, & domicilium cer-

tum non habebit . Erit inter eos etiam qui nascentur , sicut inter nos fuit , magna dissensio ; cùm alij laudibus ad Cælum res tuas gestas efferent : alij fortasse aliquid requirerent , idque vel maximum , nisi belli ciuilis incendium salute Patriæ restinxeris ; vt illud fati fuisse videatur , hoc consilij .

Plinius in Paneg. ad Traianum . Veniet ergo tempus , quo posteri visere , visendum tradere minoribus gestient , quis sudores tuos hauserit campus , quæ refectiones tuas arbores , quæ somnum saxa prætexerint , quod denique tectum magnus hospes impleueris &c.

RETICENTIA est Figura , qua præcidimus Orationem , & supprimimus quod dicturi videbamur . Adhibetur hæc Orationis abruptio in grauioribus maximè commotionibus .

Cic. ad Att. O celeritatem incredibilem ! huius autem nostri . Sed non possum sine dolore accusare eum , de quo angor , & crucior .

Mnestheus apud Virg. lib. 5. Æneid. in nautico certamine .

Non iam prima peto Mnestheus ,
neque vincere certo .

(Quamquam ô!) sed superent , quibus hoc Neptune dediti .

PROSOPOPOEIA est personarum ficta inductio , qua vita , vel ratione

carentibus sensus, affectus, & sermo datur. Hac Superos, & Inferos excitare concessum est. Hac Vrbes, & populi, saxa quoque, & parietes vocem accipiunt. Illud verò seruandum, vt sermonem personis, quas loquentes effingimus, conuenientem aptemus.

Author ad Herennium l. 4. Quòd si nunc hæc Vrbs inuictissima vocem emittat, non hoc pacto loquatur? Ego illa plurimis trophæis ornata; triumphis ditata certissimis, clarissimis locupletata victorijs, nunc vestris seditionibus o ciues vexor. Quam dolis malitiosa Chartago, viribus probata Numantia, disciplinis erudita Corinthus labefactare non potuit, eam patiementi nunc ab homunculis deterrimis protegi, atque conculcari?

Cic. Diuinat. in Verrem. Sicilia tota, si vna voce loqueretur, hæc diceret. Quod auri, quod argenti, quod ornamentorum in meis vrbibus, sedibus, delubris; quod in vnaquaque re beneficio Senatus, Populique Romani iuris habui, id mihi tu Verres eripuisti, atque abstulisti.

Apud *Latinum Pacatum* Romana Resp. Theodosium abnuentem imperium sic alloquitur.

Expostulari hoc loco tectum Reip. verbis necesse est, quæ in summa tua

cunctatione in formidinem à media spe relapsa, tali te aliqua profectò, sed quam solus audires, voce conuenit. Parumne me, Theodosi, hæcenus distulere fata, vt insuper tentes moras augere factorum? An nescis rem tuam per momenta consumi? Nescis me tibi, tuisque decrescere? Quidquid atterit Gothus, quidquid rapit Hunnus, quidquid aufert Alanus, id olim desiderabit Arcadius. Perdidi infortunata Pannonias, lugeo funus Illyricum, specto excidium Galliarum. Principum senior in tanta bella non sufficit; alter, & si futurus sit aliquando fortissimus, adhuc tamen paruus est. Tu dubitas excipere collapsam, & vt nihil differas, serò reparandam? Hanc mihi gratiam refers, quòd te etiam felix desiderauì? Quando me Nerua tranquillus, amor generis humani Titus, pietate memorabilis Antoninus teneret: cùm mœnibus Augustus ornaret, legibus Hadrianus imbueret, finibus Traianus augeret, parum mihi videbar beata, quia non eram tua &c.

Nec minus illustris est apud eundem Prosopopœia, qua Fortuna, & Virtutes Theodosij contendunt.

Fortuna tua, si vocem demus, & iudicem, non ne prolixè suam enumerabit operam? Et vt Virtutibus tuis mul-

ta concedat ; sibi aliqua vendicabit ?
 Et cur quæso non demus, vt accipiamus
 vtriusque partis asserta, cùm sit, quæ
 vinceret, tua ? Audio Constantiam
 dicere ; Bellum atrox, periculosumque
 suscepi : memorare Patientiam : Im-
 mentum iter, tempus anni graue sem-
 per armata, semper ieiuna toleraui :
 tenere Prudentiam ; Partita sum mili-
 tem, & multiplicaui arte terrorem :
 asserere Fortitudinem ; Bis conflixi
 cum hoste, bis vici ; omnes postremo
 clamare : Quid tibi debemus Fortuna,
 quam fecimus ? Sed si illa dicat ; Pro-
 perationem militum ego iuui, ego fu-
 gam hostium præpediui, ego Maxi-
 mum in muros coegi, & quem vos co-
 gebatis mori, viuum domino reserua-
 ui : non video, quod possit esse iudi-
 cium ; quin, cùm ista pars imputet Ty-
 ranni fugam, illa custodiam Reip.,
 quæ vtrique pariter obnoxia est, ita
 vtranque coniungat, vt fateatur vni se-
 met victoriam, alteri debere vindictam.

Quandoque Prosopopœia non solum
 sermonem, sed etiam corpora effingit
 per Somatopœiam, quam habes infra in
 Descriptionibus, vbi etiam Octopœiam
 inuenies.

SERMOCINATIO est Figura, qua
 vel aliquem secum loquentem, vel
 plures mutuo colloquentes inducimus,

vel ipsi ab alijs dicta referimus.

Primi generis est illa Maximi apud
Latinum Pacatum.

Quoties sibi ipsum putamus dixisse.
Quò fugio? Bellum ne tentabo, ut quem
viribus totis ferre non potui, parte
sustineam? Alpes Cottias obserabo, quia
Iuliæ profuerunt? Peto Africam, quam
exhausi? Repeto Britanniam quam re-
liqui? Credo me Galliæ? Sed inuisus
sum. Hispaniæ committo? Sed notus
sum. Quid ergo faciam inter arma, &
odia medius? A tergo premor hostibus,
à fronte criminibus. Si morerer, euase-
ram. Sed ecce nec animum sequitur
manus, nec manum gladius: labitur
ferrum, tremit dextera, mens fatiscit. O
quàm difficile est miseris etiam perire!

Secundi generis ea est *lib. 2. Q. Curtij.*
Huc loci venire legati à cæteris Da-
nubij accolis, à Syrmio Triballorum
Rege, atque Germanis ad Alexan-
dram; ut cum eo amicitiae fœdus ini-
rent. Quibus in fidem, & amicitiam
acceptis, è Germanis quæsiuit. Quid-
nam in humanis rebus præ cæteris ex-
timescerent, ratus nominis sui magni-
tudinem ante omnia ipsis formidolo-
sam videri. Illi hoc se in primis timere
responderunt, nè fortè in se se ali-
quando Cælum rueret. Alexander ni-
hil motus responsi superbia tantum
adie-

adiecit: Germanos superbos esse, eosque domum remisit.

Altera eiusdem generis *lib. 4.*, ubi cum Alexandro Parmenio colloquitur. Multa lux, inquit, est. Instructam aciem hostis admouit: tuus miles inermis adhuc expectat imperium. Vbi est vigor ille animi tui? Nempe excitare vigiles soles. Ad hæc Alexander: Credis ne me prius somnum capere potuisse, quam exonerarem animum sollicitudine, quæ quietem morabatur? &c.

Tertij generis est illa *Cic. in Pis.*

Mihi verò ipsi coram genero meo propinquo tuo quæ dicere ausus es? egere. foris esse Gabinium; sine Provincia stare non posse; spem habere à Tribuno plebis, si tua consilia cum illo coniunxisses, à Senatu quidem desperasse.

Huc spectant obliquæ Orationes, quæ sepius ab Historicis afferuntur. Talis illa est *l. 2. Decad. p. T. Lini.*

Hic verò Populus Romanus tollere in Cælum Fabiam gentem: irent faustis auibus in hostes Imperij: opponerent se alex, & periculo omni: gererent bella Reip. Si plures tales familiæ existerent, nullos breui Romanis hostes futuros.

Illustrat maximè Narrationes hæc Figura. Frequenter adhibetur ab Hi-

storicis, Comicis, alijsque Poetis, cùm personas loquentes inducunt. Quintilianus Prosopopœiam à Sermocinatione non distinguit, & vtrunque eodem modo, iam recepto (vt ait) more appellat. Hanc alij Dialogum, vel Dialogismum vocant, atque à superiori Figura differre volunt, quòd illa non solum sermonem, sed etiam personas effingit.

Nec pluribus Figuris te moror, quarum quidem centurias aliqui collegere; at si reuocentur ad examen, quædam vix merentur inter Schemata numerari, plurimæ solis nominibus differunt; nec minutiores, acutioresque distinctiones probo: etenim, vt egregiè Seneca *epist. 89. idem virij habet nimia, quod nulla diuisio. Simile confuso est, quidquid vsque in puluerem sectum est.* Ne verò tibi tenebras offundant, qui (cum Fabio loquor *lib. 9. c. 3.*) nullum prope finem fecerunt exquirendis nominibus, hunc Indicem addo.



I N D E X

*Quo varia Troporum , ac Figurarum
vocabula recensentur :*

HOc tanquam auctarium habeto ;
nec inutile ; saltem ne stupeas ad
nominum , præsertim Græcorum , ter-
ricula . Vsu notiora præmitto , siue
Græca sint , siue Latina , vt minùs nota
faciliùs inuenias .

ALLEGORIA . Inuersio , Permu-
tatio , Immutatio . Fabius quasi Diuer-
siloquium vertit .

ANNO MINATIO . Agnominatio .
Paranomasia , Paronymia , Paragram-
ma .

ANTI PHRASIS . Contraria dictio .

ANTONOMASIA . Pronominatio .

APOSTROPHE . Auersio .

CATACHRESIS . Abusus .

COMMUNICATIO . Anacænosis .

COMPAR . Isocolon , Isocolia .

COMPLEXIO . Symploce , Epana-
lepis , Cænote .

CONCESSIO . Permissio . Epitrope ,
Synchorema , Synchoresis .

CONDUPPLICATIO . Combinatio ,
Subiunctio . Epizeusis , Palilogia .

Anadiplosis .

CONIUNCTIO . Polysindeton .

CON.

CONTRAPOSITVM. Contrarium, Contentio. Antithesis, Antitheton.

CONVERSIO. Reuersio. Antistrophe, Epistrophe, Epiphora.

CORRECTIO. Epanorthosis.

DEPRECATIO. Supplicatio. Deesis.

DESCRIPTIO. Demonstratio, Notatio, Illustratio, Effectio, Euidencia.

Hypotyposis.

DISTRIBVTIO. Partitio. Merismos.

DISSOLVTIO. Articulus. Asyndeton, Dialysis, Diallyton.

DVBITATIO. Addubitatio. Aporia, Aporesis.

EPIPHONEMA. Acclamatio.

EXCLAMATIO. Ecphonesis.

EXPOLITIO. Immoratio, Commoratio, Suffiguratio, Tractatio.

Energia, Exergasia, Epexergasia.

FIGURA. Shema.

GRADATIO. Ascensus. Climax.

HYPERBATON. Transgressio.

HYPERBOLE. Superlatio, Excessus, Eminencia, Eminens Superiectio.

IMPOSSIBILE. Nefas. Adynaton.

INCREMENTVM. Auxesis.

INTERPRETATIO. Quæ idem pluribus modis dicit, Synonymia, Epegegesis; quæ verò sententiam interpretatur, Exegegesis, Hermenia.

INTERROGATIO. Erotema, Erotesis, Peusis.

IRO-

IRONIA. Simulatio, Dissimulatio, Illusio, Irrisio.

LICENTIA. Parrhesia.

METALEPSIS. Transumptio, Transpositio.

METAPHORA. Translatio.

METONYMIA. Hyppalage. Transnominatio, Transmutatio.

OMINATIO. Præsagium, Divinatio, Prædictio.

ONOMATOPOEIA. Nominis fictio.

PARADOXVM. Inopinatum.

PERIPHRAESIS. Circuitio, Circunlocutio, loquendi circuitus.

PRÆOCCVPATIO. Occupatio, Præsumptio, Præmunitio, Anticipatio. Prolepsis. Procatalepsis.

PRÆTERITIO. Omissio. Paralepsis, Apophasis.

PROSOPOPOEIA. Personæ fictio, Conformatio.

REPETITIO. Resumptio. Anaphora, Epanaphora. Plures huius species, miraue nomina vide apud Carbonem de Elocutione Orat. l. pr. disp. 18.

RETICENTIA. Obtinentia, Interruptio. Apostrophe.

SERMOCINATIO. Dialogus, Dialogismus.

SIMILITER CADENS. Verborum similitudo, & æqualitas. Homœop-

Interptoton, **Paromœosis**:

SIMILITER DESINENS, **Homœoteleuton**.

SUBIECTIO. **Oppositio**, **Obiectio**, **Hypophora**, **Antipophora**.

SYSTENTATIO. **Paradoxon**.

SYNECDOCHE. **Intellectio**, **Comprehensio**.

TRAIECTIO. **Traductio**. **Polyptoton**.

TROPVS. **Commutatio**, **Transmigrationis**.



DE TRANSITIONIBVS.

INter Schemata Transitionem quoque inuenio plerumque referri. Metastasis, vel Metabasis Græci vocant. Quintilianus Interfationem appellat. Quauis propriè certa quædam Figuræ species dici non possit, at potiùs Figurarum vsus ad Orationis partes connectendas. Cùm his tamen finitima sit, quæ ad illam spectant hinc expediam, licet aliqua sint à Locis Rhetoricis deriuata.

*Quid sit, & quotuplex Transitio,
& vnde sumi possit.*

CAPVT VNICVM.



TRANSITIO est brevis Oratio, quæ dictis dicenda connectit.

Duplex est: alia perfecta, alia imperfecta.

Transitio perfecta illa est, quæ duplici parte constat, quarum prima superius dicta complectitur, altera dicenda breuiter attingit. ex. gr. Cic. pro lege Manil. Quoniam de genere belli diximus, de magnitudine pauca dicam. Transitio im-

imperfecta est, quæ vnica parte constat; nam vel tantum dicta recolligit: ex. gr. *Cic. pro Deiot. En crimen, en causa, cur Regem fugitiuus, Dominum seruus accuset*: vel tantum dicenda proponit, ex. gr. *Cic. pro Flacco. Venio ad Lysaniam eiusdem Ciuitatis, peculiarem tuum, Deciane, testem*.

Formula Transitionum huiusmodi esse solent.

Iam verò erigite animos Auditores. Iam illud ad se vocat orationem meam. Venio nunc ad alteram partem. Redeo, vnde diuerteram. Reliquum est, vt videamus. Reuocate quæso in memoriam: Rem aliquantò altius repetamus. Fortasse dices. Quæret hic aliquis. Huc reuocare possem. Huc illud pertinet. Tale illud fuit. Non absimile venit in mentem. Memini legisse me. Quid, quod ille? Age nunc diligentius exploremus. Ad illa iam descendendo. Sinite me hoc loco illa memorare. At longè aliter maiores nostri. Non ita sensit ille. Vtinam rediret vetus ea consuetudo. Quid si reuiuisceret morum censor? Non diutius abutar patientia vestra. Non longius aberro. Hic iam plura non dicam. Multa prætereo consultò. Longum esset ire per singula.

Transitiones illæ maximè commendandæ.

dantur, quæ aliquid habent acuminis, & quasi non sentientem Auditorem ab una re deducunt ad aliam. Sed tam variæ sunt, quàm varia eorum materia; quamobrem Oratoris erit ex rebus ipsis opportunos educere partium nexus: idque opus ingenij est, nec tam arte, quàm observatione discitur, & usu. Interim ad inveniendas Transitiones ad Locos Rhetoricos, Figurasque confugies; & facillimè quidem à Locis illis hauries, qui aliquam relationem, seu connexionem inter se habent: ut à Toto ad partes, à Genere ad Species, à Simili, à Dissimili &c. Aliqua subdo **Exempla Tullij, Plinij, & Latini Pacati.**

A Simili.

Faciam ergo, quod facere præstantes scientia medicos sæpe vidi. Altorum vulnerum cicatrices pendente manu tractabo.

Sed quod facere magnas Vrbes ingressi solemus, ut primùm sacras ædes, & dicata Numini summo delubra visamus, tum fora, atque gymnasia &c. ita in laudibus tuis sanctos Palatij ritus, & priscis æquanda ceremonijs instituta venerati, gradum ad illa proferimus, quæ in medio constituta &c.

Quàm dissimilis nuper alterius Principis transitus!

Age nunc iter expediti latronis cum Milonis impedimentis comparate.

Ab Antecedentibus.

Fuit hoc quondam, fuit proprium Populi Romani.

Olim hæc experientia iuventutis, hæc voluptas erat.

Ab Antecedentibus, &

Consequentibus.

Verùm hæc olim: in præsentia quidem &c.

Res ipsas interrogemus, &, quæ certissima coniectatio est, colligamus gerenda gestis.

A Pari.

Sic aggreſtes Curij, ſic veteres Coruncani; ſic nomina reuerenda Fabricij, cum induciæ bella ſuſpendebant, inter aratra viuebant.

A Minori ad Maius.

Ingens hoc meritum; maius illud, quòd &c.

Hæc tibi apud hoſtes veneratio: quid apud milites?

A Toto ad partes.

Iam vniuerſa iſtorum cognita cupiditate, accedam ad ſingulas querelas, criminationeſque Græcorum.

A Contrario .

• Illa fuit Oratio necessaria : hæc erit voluntaria .

• Haftenus tristia : nunc lætiora videamus .

• Per Figuras verò venustiores , & occultiores fiunt Transitiones . Ex. gr.

Per Interrogationem .

• Et quis terror efficere valuisset , quod reuerentia tui effecit ?

• Vnde igitur exordiar , nisi à tuis Gallia malis ? &c

Per Apostrophem .

• Recordare igitur illum , M. Antoni , diem , quo Dictaturam sustulisti .

• Mandate hoc memoriæ Iudices . Spero multa vos , liberosque vestros in Rep. esse visuros .

• Te nunc appello P. Scipio , te Melle .

• Date oculos , qui haftenus aures præbuiſtis .

• Audite hoc publici parricide , qui &c .

Per Dubitationem .

• Initium laboris mirer , an finem ?

• Quid faciam ? nouam quandam patior ex copia difficultatem ; quid inquam faciam ?

Per Congeriem .

• Adde casus , adde incertos exitus pugnarum , adde inscitiam oscitantis ducis ,

Per

Sed quid singula confector, & colligo?

Nimis urgeo: commoueri videtur adolescens: ad me reuertor.

Sed quid ego ineptus de Roscio apud Pisonem dico?

Per Concessionem.

Verum concedo tibi, ut ea prætereas, quæ, cum taces, nulla esse concedis.

Esto: causam proferre non potes. Tamen si statim vicisse debeo, de meo iure decedam.

Per Communicationem.

Nunc ego Iudices iam vos consulo, quid mihi faciendum putetis?

Ego pro te nunc consulo post tempus in aliena re, quod tu in tua re, cum tempus erat, consulere oblitus es.

Quæro abs te C. Aquili &c.

Per Deprecationem.

Quid restat, nisi, ut orem, obtesterque vos Iudices, ut eam misericordiam tribuatis fortissimo viro.

Oro vos, atque obsecro, Iudices, ut attentè, bonaque cum venia verba mea audiat.

Per Exclamationem.

O Dij immortales! rem miseram atque calamitosam!

O singularem Sapientiam Iudices!
Proh

Proh Deum, hominumque fidem!
O præclarum testem, Iudices! o gra-
uitatem dignam estimatione!

Per Praeoccupationem.

At credo hæc homo inconsultus,
& temerarius non videbat. Quis con-
siderator illo? quis tectior?

Dices. Quid postea? Si Romæ assi-
duus fui? respondebo &c.

Requireretur fortasse nunc, quemad-
modum, cum hæc ita sint, reliquum
possit esse magnum bellum. Cogno-
scite Quirites.

Per Præteritionem.

Vt de his taceam, quos tibi primus
ille nascentis Imperij dies obtulit tantis
virtutibus præditos.

Verum hæc ita prætereamus, ut ta-
men intuentes, & respectantes relin-
quamus.

Qua in re prætereo illud, quod mihi
maximo argumento esse potest.

Verum ut hæc missa faciam, quæ iam
facta sunt &c.



DE PERIODICA, ET NUMEROSA ORATIONE.

PRæcipuas Elocutionis dotes duplici Virtute ab initio complexus, Elegantia scilicet, ac Ornatu, ad hunc eam quoque reduxeram, quam Herennianus Author Compositionem vocat; cuius est efficere, ut partibus inter se aptè coherentibus leniter fluat Oratio, & quandam quasi modulationem habeat, audienti pariter, dicentique suauem. Absolutis igitur Troporum, ac Figurarum ornamentis, ea subijcio, quæ numerosam Elocutionem reddunt. Cùm verò numerus Oratorius in Periodis, earumque partibus rectè dispositis consistat, ideo Periodi tractationem prius aggredior.

Quid sit Periodus, & quæ illius partes.

CAPVT PRIMVM.



PERIODVS est Orationis continuatio, perfectam, absolutamq; sententiam ambitu suo comprehendens. Vel, ut Herenniano Rhetori placet, est densa, & continens frequentatio verborum cum absolute sententiarum.

Varijs

Varijs nominibus appellatur, Comprehensio, Complexio, Continuatio, Clausula, Conuersio, Circumscriptio. At si Græci vocabuli significatio spectetur, Periodus idem est, ac Latine Circuitus, vel Ambitus, indito per Metaphoram nomine: quod in ea Oratio in quodam quasi orbe inclusa procurrat, ut inquit Romanus Orator.

PERIODI partes sunt *MEMBRA*, & *INCISA*, quæ plures pariter habent appellationes. Membrum alij Interualum, Intermisionem alij vocant, Græci Colon. Incisum ab aliquibus Interfissio, Segmentum, Articulus dicitur, à Græcis Comma.

MEMBRVM est Periodi pars proxima, siue maior, integram quidem sententiam, adhuc tamen pendentem comprehendens, quam totam non nisi cum alijs Membris absoluit. Duplex est: Aliud Integrum, seu Continuum, sine vlla Incisorum distinctione: aliud Incisum distinctum. Exemplum primi sit. Cum in omnibus causis grauioribus commoueri soleam vehementius. Ex secundi. Si veritate amicitia, fide societas, pietate propinquitas colitur.

Incisum est pars proxima Membri, & remota, siue minor Periodi, quæ sententiam inchoat, non perficit. Quamobrem quasi mutilato sensu nihil absoluti

significat, ex. gr. *Amor Patria, custodia legum, Numinis reuerentia*; immò singulis etiam vocibus Incisa sunt: vt. *Consilio, labore, constantia*. Membra itaque in Periodo sunt velut digiti in manu, & Incisa tanquam digitorum articuli.

Extra Periodum tamen & Membra, & Incisa perfectum sensum habere possunt, vbi nihil aliud expectant ad absolue dam sententiam: vt cùm sine Periodico ambitu membratim, & cæsum fertur Oratio. ex.gr. *Species insipientia est ultra modum sapere velle. Ne quid nimis. Hac summa sapientia nosse se ipsum. Hoc opus: hic labor.*

Scriptæ Periodi partes his notis distinguui solent. Incisum flexa in læuam lincola signatur, quam Virgulam vocant, & Græco vocabulo *Comma*. Membrum in Periodo duobus Interpunctis notatur: quòd si sensum imperfectiorem habeat, Interpuncto, & Commate; immò quandoque, si breuissimum sit, & maximè pendens, solo Commate distinguitur. Absolutæ Periodi signum Interpunctum est, quod punctum firmum ideo Nostrates appellant; quia clauso iam ambitu ibi sententia consistit. Atque hæc parcè delibata in rem istam sufficiant. Nam plures alioqui notas habet scripta Oratio:

tio : plura de Interpunctione ; ac varia præscribuntur , nec satis convenientibus Ortographorum sententijs ; quorum magisterio te hac doctrina plenius erudiendum libentissimè remitto.

Iam verò , vt subijciam oculis hætenus dicta , Ciceronianam Periodum , eamque perbreuem , tibi propono expendendam , ex Oratione pro Roscio Comælo .

Quemadmodum turpe est scribere , quod non debeat ;

Sic improbum est non referre , quod debeas .

Hæc Periodus duobus componitur Membris , quorum vtrunque duobus constat Incisis . In istis tantùm sententiæ fragmenta vides : in illis integram sententiam , sed adhuc hærentem ; donec postrema Periodi clausula totum ambitum , ac sensum absoluat .

Quotuplex sit Periodus , qua illius mensura , qua perfectio .

CAPVT SECVNDVM.

DVo sunt Periodorum Genera :
 (a) Simplex , & Compositum .
PERIODVS SIMPLEX est , qua sensum
 E 2
 a Quintil. lib. 9. c. 4.

sum unum longiore ambitu circumducit, uno constans Membro.

PERIODVS COMPOSITA est, quæ pluribus constat Membris; quorum spectato numero in varias diuiditur species. Alia enim dicitur Bimembris, alia Trimembris, alia Quadrimembris.

Moderatam Periodi mensuram quatuor membris Tullius (a) definit. Aristoteles (b) eam magnitudinem præscribit, quæ faciliè osculis perlustrari possit: D. Augustinus (c) spiritu Oratoris metitur. Ea certè fit, quæ lecta legentem non lassat, audita nec audientem fatiget, nec dicentem. Ideo non solum numeri, sed etiam quantitatis Membrorum habenda est ratio, ne nimia prolixitate monstrosum Periodi corpus efficiant. Vltimum quidem Membrum cæteris longius laudatur, tanquam continens, & amplectens alia. Etenim vt (ait Cicero) si Membra in extremo breuiora sint, infringitur ille verborum quasi ambitus: quare aut paria esse debent postrema superioribus, aut, quod etiam est melius, & iucundius, longiora.

Quod attinet ad numerum Membrorum, vt vnico effici Periodus potest, ita non solum quatuor, sed quinque,

a 3. de Orat. b 3. Rhet. c. 9.

c L. 4. de Doct. Christ. c. 7.

que, pluribusque componi. Apud ipsum Tullium inuenies sex Membris constantem in exordio Orationis *pro P. Sextio*, & septem *pro Archia Poeta*. Sed nos laudem mediocritatis quærimus, quæ omnium consensu his finibus clauditur: ut ambitus nec breuior sit Bimembri, nec longior Quadrimembri. Periodus Simplex, siue Membri vnus Græcè dicitur *Monocolos*, Bimembris *Dicolos*, Trimembris *Tricolos*, Quadrimembris *Tetracos*.

Perfecta PERIODVS Oratoria illa est, quæ pendentem *Protasim* habet, illique respondentem *Apodosim*.

PROTASIS est prima pars Periodi, quæ suspensam tenet sententiam. *Apodosis* est altera pars, quæ sententia suspensionem tollit, eamque complet. Nasci-
tur ea Suspendio à vocibus, quæ sensus relatiuos habent: cuiusmodi sunt particulae quædam, quæ positæ in vna parte Orationis aliam respiciunt: ex. gr. *Cum*. *Postquam*. *Si*. *Dum*. vel quæ ita mutuò connectuntur, ut vna expectet alteram. ex. gr. *Tam*: *Quam*. *Sicut*: *Ita*. *Quò magis*: *eò magis*. *Quauis*: *Tamen* &c. (a) Harum vsu facile Periodos Oratorias conficies, maximè si Ciceronianas obseruabis,

E 3

in

a Vide Godescalcum Srenuechium l. 1.
De lingua Latina particulis.

in quibus hanc artem deprehendes.

Neque excluditur ab hac laude Simplex Periodus; quannus vnico tantum constet Membro, nec habeat illas geminas partes explicitas, Protasim, & Apodosim: non enim Suspensione caret, si sensum vnum, vt diximus, longiore ambitu circunducit, ac tantum in fine absoluit. Hinc Phaleræus. (a) *Quando Membrum longitudinem habuerit, & flexionem in extremo, tunc vnius Membri Periodus fiet.* Hanc vero longitudinem afferunt congesta Incisa, quæ suppleant Membrorum defectum.

Omniū pulcherrima Periodus ea censetur, quæ quatuor Membris paribus intexitur ita dispositis, vt sine detrimento sensus, numeri, & elegantiae, illorum ordo inuerti possit, duoque postrema primis præposita idem prorsus efficiant. Hæc vocatur Periodus Quadrata, seu Rotunda; quia, quacunque ex parte illam spectes, eadem est; ceu Cubus ex omni latere æqualis, vel Orbis vndique teres, & similis sibi; atque ideo dicitur etiam Tornata. Harum omnium Periodorum Species Tullianis exemplis ostendo.

PE-

a *Demetrius de Elocutione.*

**PERIODVS SIMPLEX, SIVE VNVS
MEMBR1.**

Pro M. Marcello ad Casarem.

SOleo sæpe ante oculos ponere, idque libentè crebris vsurpare sermonibus, omnes nostrorum Imperatorum, omnes exterarum gentium, potentissimorumque populorum, omnes clarissimorum Regum res gestas, cum tuis nec contentione magnitudinis, nec numero præliorum, nec varietate regionum, nec celeritate conficiendi, nec dissimilitudine bellorum posse conferri.

ALTERA SIMPLEX.

In Catilinam tertia.

Remp. Quirites, vitamque omnium vestrum, bona, fortunas, coniuges, liberosque vestros, atque hoc domicilium clarissimi Imperij, fortunatissimam, pulcherrimamque Urbem, hodierno die Deorum immortalium summo erga nos amore, laboribus, consilijs, periculisque meis, ex flamma, atque ferro, ac penè ex faucibus fati ereptam, & vobis conseruatam, ac restitutam videtis.

B I M E M B R I S.

Pro Archia Poeta.

In qua Vrbe Imperatores propè armati Poetarum nomen, & Musarum delubra coluerunt; In ea non debent rogati Iudices à Musarum honore, & à Poetarum salute abhorrere.

ALTERA BIMEMBRIS.

Pro lege Manilia.

Quanquam mihi semper frequens conspectus vester multò iucundissimus, hic autem locus ad agendum amplissimus, ad dicendum ornatissimus est visus, Quirites: tamen hoc aditu laudis, qui semper optimo cuique maximè patuit, non mea me voluntas, sed meæ vitæ rationes ab incunte ætate susceptæ prohibuerunt.

T R I M E M B R I S.

Pro lege Manilia.

Tantane vnus hominis incredibilis, ac prope diuina Virtus, tam breui tempore lucem afferre Reipublicæ potuit:

tuit : ut vos , qui modò ante ostium Tiberinum classem hostium videbatis ; hi nunc nullam intra Oceani ostium prædonum nauim esse audiatis ?

ALTERA TRIMEMBRIS .

Ibidem .

Vtinam , Quirites , Virorum fortium , atque innocentium copiam tantam haberetis ; ut hæc vobis deliberatio difficilis esset ; quemnam potissimum tantis rebus , ac tanto bello præficiendum putaretis .

QUADRIMEMBRIS .

Pro Milone .

Esti vereor Iudices , ne turpe sit , pro fortissimo viro dicere incipientem timere ; minimèque deceat , cum T. Annius Milo ipse magis de Reip. salute , quàm de sua perturbetur , me ad eius causam parem animi magnitudinem afferre non posse : tamen hæc noui iudicij noua forma terret oculos ; qui quocunque inciderint , veterem consuetudinem fori , & pristinum morem iudiciorum requirunt .

*QVADRATA, seu Rotunda.**Pro A. Cecinna.*

Si quantùm in agro ; locisque deser-
tis audacia potest ; tantùm in foro , at-
que in iudicijs impudentia valeret ; non
minùs in causa cederet A. Cecinna
Sexti Ebutij impudentiæ ; quàm tum
in vi facienda cessit audaciæ .

*De implenda, seu amplificanda
Periodo.*

CAPVT TERTIVM.

QVæcunque de Periodi artificio , ac
præstantia diximus , parùm ad
summam illius dignitatem pro-
ficient , nisi plenitudo quædam , &
vbertas accedat, qua deficiente, si fuerit
inanis, arida, strigosa , vix numerum
habere potest , ac volubilis ambitus
gratiam . Impletur Periodus non
tam multiplicatis Membris , quàm
Membrorum Incisis, quod fiet illorum
sententias dilatando . Ne verò putes
peculiarem artem hic esse. Eadem ra-
tio est , quæ in cæteris amplificandis ;
hoc est , vt pluribus explicetur , quod
paucioribus dici posset ; idque vel per
Tro-

Tropos illustriores, vt per Metaphoras, Allegorias, Antonomafias, Periphrases: vel per Figuras ad amplificandum idoneas; vt per Expolitionem, per Synonyma, per Distributionem, per Congeriem &c. his adde Partium Enumerationem, Adiuncta, Definitiones, aliosque Locos Rhetoricos, veræ Amplificationis fontes, vt postmodum videbimus.

At memineris in Oratione implendam esse, cùm opus fuerit, non inflandam Periodum, vndique ingestis inutilibus verborum ampullis: non enim minùs egregij corporis venustatem vitiat sagina enormis, quàm deformis gracilitas. Nec semper ea plenitudo in Periodo quærenda, præsertim, si rerum tenuitas repugnet. Laudem meretur, si modum seruet, si sit rebus accommodata, si varia; ne Periodi omnes vno quasi typo videantur excusæ.

Huius dilatationis artem suis exemplis expressam Tullius docebit.

In Catilinam secunda hoc vnicum Membrum *Catilinam Patria infensum expulimus* ita in plura diuidit Incisa; vsus Adiunctis, Metaphoris, & Synonymis.

Tandem aliquando, Quirites, L. Catilinam, furem audacia, scelus

anhelantem, pestem Patriæ nefarîe molientem, vobis, atque huic Vrbi ferrum, flammamque minitantem, ex Vrbe vel eiecimus, vel emisimus, vel ipsum egredientem Vrbe persecuti sumus.

In Catilinam quarta hanc sententiam *Patria se vobis commendat* per Enumerationem partium latius fundit:

Vobis supplex manus tendit Patria communis: vobis se, vobis vitam omnium ciuium, vobis Arcem, & Capitolium, vobis aras Penatium, vobis illum ignem Vestæ perpetuum, ac sempiternum, vobis omnia templa Deorum, atque delubra, vobis muros, atque Urbis tecta commendat.

Pro L. Murena tria hæc verba *Catilina Patriam inuadet* per Distributionem dilatat:

Illa Pestis immanis, importuna, prorumpet, quâ poterit; & iam Populo Romano minitur. In agros suburbanos repenti aduolabit: versabitur in castris furor, in Curia timor, in foro coniuratio, in Campo exercitus, in agris vastitas; omnia autem in sede, ac loco ferrum, flammamque metuemus.

Pro Sextio breuibus dicere poterat *Non ignorabam oppetendam esse pro*
Pa-

Patria mortem : hoc idem per Expositionem eleganter amplificat .

Tam eram rudis , tam ignarus , tam expers consilij , aut ingenij ? nihil audieram , nihil videram , nihil ipse legendo , quærendoque cognoueram ? nesciebam breuem esse vitæ cursum , gloriæ sempiternum ?

Pro Calio hæc duo membra Pauci Eloquentia student : quòd eiusdem studium inania oblectamenta excludit , ita per Congeriem extendit .

An vos aliam causam esse vllam putatis , cur in tantis præmijs Eloquentiæ , tanta voluptate dicendi , tanta laude , tanta gloria , tanto honore , tam pauci sint , semperque fuerint , qui in hoc labore versantur ? omittendæ sunt omnes voluptates , relinquenda studia delectationis , ludus , iocus , conuiuium , sermo etiam penè omnium familiarium deserendus .

Post reditum in Senatu , per plura Synonyma hoc plenius expressit , quod paucioribus verbis absoluisset *Nequeo vestra beneficia referre* .

Quæ tanta potest existere vbertas ingenij , quæ tanta dicendi copia , quod tam diuinum atq; incredibile genus orationis , quo quisquam possit vestra in nos vniuersa promerita , non dicam complecti orando , sed percurrere numerando ?

Vti

Vtitur felicissimè Tullius ad Periodum dilatandam Definitionibus , Appositis ad nomen , Epithetis , nec rarò Superlatiuis ; quanuis hæc non temerè frequentanda .

In Pisonem . Ergo his fundamentis positis à P. Clodio , fatali portento , prodigioque Reip. , lex Ælia , & Fusia eversæ , propugnacula , muri que tranquillitatis , atque otij . *Et ibidem* , Vetus illa magistra pudoris , atque modestiæ , severitas Censoria .

Pro Milone . Curiam , templum sanctitatis , amplitudinis , mentis , consilij publici , caput orbis , aram Sociorum , portum omnium gentium . *In quibus exemplis vide , quàm granibus translatis Definitiones illustrentur* .

In Cat. secunda . Deos , Quirites , precari , venerari , atque implorare debetis , ut quàm Urbem pulcherrimam , florentissimam , potentissimamque esse voluerunt , hanc omnibus hostium copiis terra , mari que superatis , à perditissimorum civium nefario scelere defendant .

Adhibet alibi Tullius ad amplificationem Periodi Negationem , vel solam , vel Affirmatione mistam .

In Cat. quarta . Ego sum ille Consul P. C. , cui non forum , in quo omnis æquitas continetur , non Campus Consu-

fularibus auspicijs consecratus, non Curia summum auxilium omnium gentium, non domus commune perfugium, non lectus ad quietem datus, non denique hæc sedes honoris, Sella Curulis vnquam vacua mortis periculo, atque insidijs fuit.

Pressius dixisset. *Vbiq̃ parata in me insidia.* Sed hoc idem per negationem fusiùs explicat, enumerando locos, in quibus illi nulla securitas fuit.

Pro C. Rabirio. Negationi Affirmationem miscet.

Non enim. C. Rabirium culpa delicti, non inuidia, vitæque turpitude, non denique veteres, iustæ, grauesque inimicitiae ciuium in discrimen capitis vocauerunt. Sed vt illud summum auxilium Maiestatis, atque Imperij, quod nobis à maioribus est traditum, de Rep. tolleretur; vt nihil posthac authoritas Senatus, nihil Consulare Imperium, nihil consensio bonorum contra pestem, ac perniciem Ciuitatis valeret, idcirco in his rebus euertendis vnus hominis senectus, infirmitas, solitudoque tentata est.

Quid tandem hæc omnia? id vnum dicunt. *Non alia de causa Rabirium insectantur Aduersarij, nisi vt Reip. authoritatem oppugnent.*

At quorsum hic plura? vide quæ
in.

Inferiùs de Amplificatione traduntur.

*Quid sit Numerus Oratorius, & qua
Periodum numerosam
efficiant.*

CAPVT QVARTVM.

Soluta Metri legibus Oratio quamuis ab omni specie carminis abhorreat, si tamen prorsus Numero careat, inæqualis erit, atque auribus insuavis.

Numerus Oratorius est occulta quædam Elocutionis harmonia, ex apta verborum connexionem; certaque dimensione proveniens.

Primò itaque spectanda est verborum iunctura, ne quid asperum habeat, ne quid hiulcum. Quare vitanda durioris literæ frequentia: vt *Duxit Xerxes exercitum. Stridenti strepitu stravit.* Declinandus hians vocalium occursum, vt. *Arma Alexandri inuicta.*

Secundò mensura vocum, & syllabarum quantitas obseruanda; non tamen rigore metrico, sed aurium sensu, cuius tantum est de pedum magnitudine, vel paruitate, de celeritate, vel tarditate, in Oratione soluta iudicare.

Principio Periodi graues, procerique pedes maximè conueniunt. In-

me-

medio Tullius admonet permistos esse debere. Velociiores, qui scilicet penultimam corripunt, lentis temperandi, prolixiores breuioribus, ne vel nimis hæreat, vel præceptus feratur Oratio. Tandem Periodus eleganter Polysyllabo clauditur, eoque potius Verbo, quàm Nomine, si compositio patiatur, & pes antecedens bene cum postremo conueniat. Certè in fine maiore est vis Numeri; cum in Periodis, non secus ac in musicis modulationibus, vltimam clausulam sensus attentior expectet.

Non tamen affectata sit Numerorum obseruatio, ne Orationem defleat in Metrum, ne vitiosa verborum traiectione sententias perturbet, ne superstitiosè Syllabas metiatur, vtrumque sonum spectet potius, quàm sensum; atque ideo Periodum inani- bus impleat cantilenis. Non eadem, præterea seruanda semper Membro- rum mensura, eadem ratio pedum, præsertim in fine; alioquin Odarum Strophas imitari Periodi videbuntur; neque, vt numerosius cadant, illis as- suenda sformata longissimarum dictio- num, quas aliqui prauo studio in hunc usum diligentius inquirunt; quasi mul- tum decoris habeant portentosa laci- riæ.

Vt

Vt verò totam numerosæ Orationis artem quàm breuissimè absoluam ; hanc meliùs lectio docebit , & exercitatione auris erudita , quàm cura morosior . Interim satis erit habere præ oculis exempla ; ideoque clausulas aliquas subijciam , è Tullianis Periodis excerptas . At priùs illam afferam , C. Carbonis , quam idem Tullius in *Oratore* affirmat fuisse maximæ admirationi , & audientium plausus meruisse .

*Patris dictum sapiens temeritas
filij comprobauit .*

hìc tantus (inquit Cicero) clamor concionis excitatus est (*audita scilicet hac Periodi clausula*) vt admirabile esset . Quæro nonne id Numerus effecerit ? Verborum ordinem immutatis fac sic : *comprobauit filij temeritas* . iam nihil erit . Hactenus ille . Hinc itaque intelliges , quæ , & quanta sit Numeri vis . *Quadam , & sententiæ parua , & elocutione modica virtus hæc sola commendat . Quintil. l. 9. c. 4.*

CLAVSVLÆ CICERONIANÆ .

Pro L. Mur. Diligentissimè perpendenti momenta officiorum meorum de officio meo respondebo .

Sicut huius Imperij dignitas in
summo

summo periculo ciuium postulabat .

Pro A. Cec. Sed neque si quis vobis error in tanta re sit obiectus , omnes potius me arbitrentur causæ , quàm vos religioni vestræ defuisse .

Pro lege Man. Et meus labor in priuatorum periculis castè , integrèque versatus , ex vestro iudicio fructum est amplissimum consecutus .

Multæ sunt artes eximiæ , huius administræ , comitesque virtutis .

Opinione non minus famæ , quàm aliqua certa ratione commoueri .

Dolori suo maluit , quàm authoritati vestræ , obtemperare .

Post reditum in Sen. Tantus vester consensus de salute mea fuit , vt licet corpus abesset meum , dignitas iam in Patriam reuertisset .

Pro Q. Ligario. Nihil habet nec fortuna tua maius , quàm vt possis , nec natura tua melius , quàm vt velis , conseruare quamplurimos .

Ad Quirites. Incredibili quadam , & penè diuina , qua nunc vestro beneficio fruor , letitiæ voluptate caruissem .

In Verrem prima. Vt quoniam criminum vim subterfugere nullo modo poterat , procellam temporis deuitaret .

Se avarissimi hominis cupiditati satisfacere posse , nocentissimæ victoriæ non posse .

Quid-

Quiduis esse perperi satius, quàm in tanta vi, atque acerbitate versari.

Pro M. Marcello. Te auctoritatem huius Ordinis, dignitatemque Reip. tuis, vel doloribus, vel suspicionibus anteferre.

Vide quæso, ne tua Diuina Virtus admirationis plus sit habitura, quàm gloriæ.

Clausulas hic habes cum varietate numerosas. Nec plures addo, cùm Tullianas paginas vel oscitanter voluentialia, atque alia confertim occurrant.

Periodi Numerum non modò adiutant, sed penè sine industria efficiunt Concinnitates verborum: sic Tullius vocat Figuras quasdam suapte natura numerosas, quæ ideò harmonicæ dicuntur; cuiusmodi sunt Similiter Cadens, & Desinens, Compar, & Contrapositum. En exempla.

Similiter Cadens.

Pro L. Murena. Sin autem fuga laboris desidiâ, repudiatio supplicum superbiam, amicorum neglectio improbitatem coarguit: nimirum hæc causa est huiusmodi, quam nec industrius, nec misericors, nec officiosus deferere possit.

Similiter desinens.

Pro Q. Sextia. Senatum obsideret? ciues indemnatos expelleret? bona diriperet? ædes incenderet? tecta disturbarer? Tempia deorum immortalium inflammaret?

Compar.

Ibidem. Qui auctoritate, qui fide, qui constantia, qui magnitudine animi, consilijs audacium restiterunt, ij graues, ij Principes, ij Duces, ij authores huius dignitatis, atque Imperij semper habiti sunt.

Contrapositum.

Ibidem. Sed mihi omnis ratio est cum Virtute, non cum desidia; cum dignitate, non cum voluptate; cum ijs, qui se Patriæ, qui suis ciuibus, qui laudi, qui gloriæ; non qui somno, & conuiuijs, & delectationi natos arbitrantur.

Hæc autem sobriè, ac prudenter adhibenda; nam eandem, quam afferunt, quandoque vsurpata, voluptatem, frequentia perdunt, ac redolent leuitatem.

Plura

Plura de Periodico Numero Tullius, præcipuè in Oratore, Quintilianus, & alij exactissimè scripserunt; adeò, ut non solum obseruauerint, qui pedes cui loco sint aptiores; at præter syllabarum dimensionem, elementorum etiam naturam examinauerint: quæ sit vis Consonantium, qui Vocalium sonus. Omnes tamen denique statuunt, rem istam esse potiùs aurium consilio committendam; quæ nisi agrestes omnino sint, ac inhumanæ, concentu gaudent, & si quid in eo peccatur, sagacissimè sentiunt; maximè cum fiant vsu delicates, alioquin fastidiosæ, atque (ut ait Orator) superbissimi iudicij.

Permagni verò interest, quod iidem docent, habendam quidem in tota Oratione Numeri curam; at dissimulandam hanc artem; & quandoque negligentiam magis placere, quàm sollicitudinem apertam; demum virtutes etiam ipsas tædium parere, nisi gratia varietatis adiutas. Quod ut scias, quàm verum sit, ipse Isocrates, ille Græcæ Eloquentiæ Pater, Attica illa Siren, quòd concurrentium Vocalium hiatus, & Literarum asperitates, & quidquid officit suauitati, religiosè deuitaret, Numerumque, & Concinnitatem studiosissimè sectaretur, censura
non

non caruit : ideo duplici scommate notatus ; quasi à paternis tibijs modulari Orationem didicisset . Vide grauissimam de hac dicendi ratione Quintiliani sententiam lib. 9. cap. 4. circa finem . *In uniuersum autem, si sit necesse duram potius , atque asperam compositionem malim esse , quam effœminatam , & eneruam , qualis est apud multos . Ac ne tam bona quidem ulla erit , ut debeat esse continua &c.*

*Quando nam Periodicè, quando membra-
tim , casimque dicen-
dum.*

CAPVT QVINTVM.

Periodica Oratio , quæ aures tantopere demulcet , nihilominus assiduitate vilescit , suaque dulcedine satiat , nisi instar musici concentus quibusdam interuallis temperetur . Nec eandem ubique laudem habet volubili ambitu circumducta modulatio ; immò , si sit frequentior , permouendis affectibus obest , fideiq; faciendæ , ac vim Orationis eneruat : quare videndum est quibus potissimum locis , & quandiu adhibenda .

Hac itaque in Exordijs , præcipuè Demonstratiui Generis , in grauioribus Amplificationibus , magisque ornatis Lau-

Laudationibus utemur. In reliquis Orationis partibus transferenda tota dictio ad Membra, & Incisa. Membratim plerunque narrabimus; exceptis ijs, quæ non docendi gratia, sed ornandi narrantur; hæc enim lenis, & fluens contextus decet. Cùm verò acriter pugnandum, brevioribus telis res agetur. Tullius quidem optimus Eloquentiæ Magister, cùm vrget aduersarium, vel affectus excitat, non circinat ambitus, at membratim, & cæsim styli aciem vibrat.

In Catil. prima. Quæ cùm ita sint, Catilina, perge quò cœpisti: egredere aliquando ex Vrbe: patent portæ: proficiscere. Nimiùm diu te Imperatorem illa tua Manliana Castra desiderant. Educ tecum etiam omnes tuos, si minùs, quàm plurimos. Purga Urbem. Magno me metu liberabis; dummodo inter me, atque te murus interfuit. Nobiscum versari iam diutiùs non potes. Non feram, non patiar, non finam.

In Pisonem. Quis enim te aditu, quis vllò honore, quis communi salutatione dignum putet? Omnes memoriam Consulatus tui, facta, mores, faciem denique, ac nomen à Rep. detestantur. Legati, qui vnà fuere, alienati: Tribuni militum inimici; Centuriones,

nes, & si qui ex tanto exercitu reliqui milites existunt, non dimissi abs te, sed dissipati, te oderunt &c.

In Q. Cæciliū Verrinā primā Quid illa Cæcili? contemnenda tibi videntur esse, sine quibus causa sustineri, præsertim tanta, nullo modo potest? aliqua facultas agendi, aliqua dicendi consuetudo, aliqua in foro, iudicijs, legibus aut ratio, aut exercitatio? Putas ne te posse de maximis, acerbissimisque rebus, cum causam sociorum, fortunæque Prouinciæ, ius Pop. Rom., grauitatem iudicij, legumque susceperis; tot res, tam graues, tam varias voce, memoria, consilio, ingenio, sustinere? Putas ne te posse, quæ C. Verres in Quæstura, quæ in Legatione, quæ in Prætura, quæ Romæ, quæ in Italia, quæ in Achaia, Asia, Pamphiliæque patrarit, ea quemadmodum locis, temporibusque diuisa sint, sic criminibus, atque Oratione distinguere? Putasne &c.

Is vtique idem est, quem alibi miraris tam scitè Periodos tornantem: vt in Exordijs Orationum pro L. Murena, pro Milone, pro M. Marcello, pro Lege Manilia, post reditum in Senatu, & ad Quirites. At siue Periodico circuitu Orationem voluat, siue ab eo cursu moretur, & Membris, incisisque

distinguat, nunquam abijcit Numeri curam : immò exemplis confirmat, quod præceptionibus docet ; nihil tam numerosum esse debere, quàm hoc, quod minimè apparet ; & quæ Incisim, aut Membratim efferuntur, ea vel aptissimè cadere oportere.

Ast huius Periodicæ, ac Numerosæ Orationis operosiore studio ne tempus absumas, iterum, iterumque moneo, certio rem eiusdem Iudicem aurem esse, vsu læuigatam. Hæc docebit Periodorum mensuram, si nec earum breuitate fraudari se sentiet, nec redundantia obtundi. Hæc dabit Numeris modum, si nec eorum nimia volubilitate, nec lentitudine, nulla que compositionis, duritie lædetur.



DE AMPLIFICATIONE.

Maximum hoc opus Oratoris, quo suas Eloquentia vires exercet : hic thesaurus vnde suas largiùs opes effundit. Sed non eadem est apud omnes Amplificationis tractatio. Hanc enim aliqui prorsus cum Argumentatione confundunt. Alij forensibus tantùm Causis, alij excitandis affectibus accommodasse videntur. Et Cicero quidem in Partitionibus Oratorijs sic illam definit. *Est igitur Amplificatio grauior quãdam affirmatio, quæ motu animorum conciliat in dicendo fidem.* De hac Pathetica modò non agimus, quæ præcipuè in Perorationibus adhibetur. Agimus de Amplificatione, quæ spectat Orationis copiam in quolibet genere Causæ; quanuis hæc pariter ab ijsdem fontibus deriuetur, fidemque conciliet, non pressis rationibus rem confirmando, quod proprium Argumentationis est, sed fusè, ac ornatè oculis subiijciendo; mouere quoque, ac flectere possit, si vehementioribus, quibus illa, Figuris vtatur. Interim tamen clariorem, aptioremque ad rem nostram definitionem afferimus, vt liquidiùs pateat inquirenti.

Quid sit Amplificatio.

CAPVT PRIMVM.



AMPLIFICATIO est

*Oratio, quæ in aliqua re
latius explicanda immo-
ratur idoneis Locis, &
Figuris.*

Primò itaque res am-
plificanda ea esse debet,
quæ possit latius explicari, ne frustra
quærat^{ur} humor a pumice: neque
supra meritum res augenda; quod pe-
rinde est, ac aptare Pumilioni Her-
culis calceos, aut facere, ad vete-
rem parcemiam, Elephantem è Mus-
ca. Secundò cauendum, ne tumultua-
ria, inanique verborum congerie Ora-
tionem infarciamus; cùm copiam qui-
dem Amplificatio requirat, non re-
dundantiam, nec tota sit illius laus
multa dicere sed ad rem; euoluendo,
quæ sunt in re, vel ad ipsam spectant.
Cæterùm dignam circumforaneis præ-
stigiatoribus artem exercent, qui exag-
gerationibus immodicis, tanquam
Microscopijs vtuntur, in quibus vel
Atomi assurgere videantur in montes.
In addiscentibus quidem superfluen-
s potius vbertas, quàm inopia ferenda;
dum

dum tamen ad Orationis maturitatem, annis, usuque adolecant. (a)

Vt verò Amplificationem contexas, duo tibi quærenda sunt: Materia, ex qua ipsam conficias, & forma, qua perficias. Materiam dabunt Loci Oratorii: ex his enim desumitur copia rerum, seu rationum, quibus ea, quæ amplificanda sunt, probantur, & explicantur. Formam dabunt Figuræ, quarum usu elegantius res ipsæ tractantur, illustrantur, & ornantur.

Præter hæc vix quidquam aliud inuenies, quod ad res amplificandas multum afferrat momenti. Nam quanuis Herennianus Rhetor, Quintilianus, Aphthonius, & veteres alij varias amplificandi rationes tradiderint, aliquæ tanquam Iudicialibus solum Contentionibus præscriptæ minùs pertinent ad institutum hoc nostrum; quædam plus obscuritatis habent, quàm utilitatis, aut quæ in illis commodiora sunt, huc tandem omnia referuntur.

Author libelli de vtraque Verborum, ac Rerum copia, & Carbo lib. 4 de Elocutione plurimos explicant dilatandæ Orationis modos, per formulas quasdam Grammaticales, variando casus, tempora modos &c. per Epithera, Adiectiua, Substantiua, Syno-

F 3

ny-

a Cic. 1. de Orat. Quintil. l. 2. c. 4.

nyma &c. Verùm aliud est idem dicere pluribus modis, aliud plura dicere de eadem re. Vtile quidem illud Sermonis facultati comparandæ, sed ad varian-
dam Elocutionem pertinet: hoc ad rem amplificandam.

Aliqui Verborum Amplificationem afferunt, quasi Speciem à rerum Amplificatione distinctam, fortasse Tullij authoritate nitentes; qui docet in Partitionibus Oratorijs Amplificationem, & Verborum genere confici, & Rerum: cùm ibi Tullius, non tam Amplificationis Species distinguat, quàm Partes. Nam certè omnis Oratio, & rebus constare debet, quæ dicantur, & idoneis verbis, quibus res ipsæ dicantur. Quæ autem ad amplificandum idonea Verba sint recenset: nempè graua, plena, sonantia, quòd hæc maiestatem quandam addant Orationi; & quæ vim habent augendi: vt Composita, Superlatiua, Translata, Hyperboles, ac sublimiores Metaphoræ: tum Repetitiones, Gradationes, Incrementa. Sed hæc Verborum lumina ad formam denique, ac ornatum Amplificationis reuocantur. Aliud præterea est rem verbis augere, aliud amplificare, ac dilatare. Illud vel vni-
co verbo fieri potest, quod maiorem habeat significationem: vt si *Calum-*
nia-

niatorem dicas pro Accusatore, *Periurum* pro Mendaci. Hoc verò fieri nequit nisi pluribus verbis, ac sententijs, rerumque pariter copiam desiderat, ac Elocutionis vbertatem.

Vtunque igitur præclara, ingeniosa, vtilia etiam Orationi sint, quæ de varijs amplificandi modis fusè scribuntur, vnus est qui cæteris præstat, qui, si qui sunt alij, omnes complectitur; immò qui solus, ni fallor, ad veram rerum Amplificationem valet, Locorum scilicet vsus cum apta Figurarum tractatione: quæ si quis probè calleat, næ ille totius Eloquentiæ, nedum Amplificationis præstantissima tenet instrumenta.

Explicatis igitur iam antea Figuris, Locos aggredior; in quorum explicatione subiecta singulis exempla proponam: tum in fine rationem ostendam, qua ex varijs Locis fusæ Amplificationes texantur, ac Figuris illustrentur.

Locorum Definitio, ac Diuisio.

CAPVT SECVNDVM.

LOCI sunt sedes argumentorum: (a) atque ideo Loci dicuntur, quasi loculamenta quædam, in quibus re-

F 4

po.

a Cic. in Top.

posita latent argumenta ; hoc est rationes , quæ vim dicendi præbent , resque propositas probabiles reddunt : quare ad inueniendam non solum Amplificationis , sed etiam Argumentationis materiam patent adeuntibus hæc inexhausta Orationis promptuaria . Quid sit Argumentum ; quid Argumentatio clariùs alibi videbimus .

Diuiduntur in duo genera Loci. Alij dicuntur *INSITI*, alij *REMOTI*: siue (vt communioribus vocabulis utar , quanuis non ita Latinis) alij *INTRINSECI*, alij *EXTRINSECI*. *INTRINSECI* sunt, qui hærent in eo ipso, de quo agitur : vt Genus, Species, Partes , quæ sunt in re. *EXTRINSECI* sunt , qui assumuntur extrinsecùs ; quare dicuntur etiam *Assumpti*: vt carmina Poetarum , Sententiæ Historicorum , quibus utimur ad rem probandam, & illustrandam ; hæc enim non sunt in ipsa re, sed aliunde sumuntur .

INTRINSECI Sexdecim numerantur : Definitio, Notatio, Coniugata , Partium Enumeratio, Genus, Species, Similitudo, Dissimilitudo, Opposita, Adiuncta , Antecedentia , Consequentia , Repugnantia , Causæ , Effectus , Comparatio .

Sex verò sunt Loci *EXTRINSECI*: Præiudicia, Fama, Tabulæ, Iusiurandum, Tormenta, Testes .

De

De Definitione.

CAPVT TERTIVM.

DEFINITIO est Oratio explicans,
quid sit res definita.

Duplex Definitio est: alia Dialectica, alia Oratoria. Dialectica rem definit per Genus, & Differentiam. Genus in Definitione est id, quod commune habet res definita cum pluribus alijs. Differentia est quæ ita conuenit rei definitæ, vt nulli alteri conueniat, ipsamque distinguit à cæteris. Hac ratione Dialectici definiunt hominem *Homo est animal rationale*, vbi *Animal* est Genus, quia commune homini, & omnibus alijs animantibus. *Rationale* est Differentia, quia vni conuenit homini, ipsumque distinguit à brutis.

Definitio Oratoria non tam definit, quàm describit; non enim solam exprimit rerum naturam, sed excurrit in Partes, Adiuncta, Causas, omnesque Locos; per Tropos etiam, & Figuras latè vagatur. En vt hominem Oratoria vbertate Tullius definit. *Lib. primo de legibus.*

Homo est animal prouidum, memor, sagax, plenum consilij, atque rationis, præclara quadam ratione ge-

neratum à Deo. Solum est enim ex tot animantium generibus, atque naturis particeps rationis, cum cætera omnia sint expertia. Quid enim est, non dicam in homine, sed in omni Cælo, atque terra ratione diuinius?

Vides hîc non à Genere solùm, ac Differentia, sed insuper ab Adiunctis animi, à Causa procreante, à Dissimili, à Comparatione hominem definiri. Vide nunc eundem ab Adiunctis Corporis, fragilique materia miserandam in speciem à Seneca descriptum. *In Consolat. ad Marciam.*

Quid est homo? quodlibet quassum vas, & quodlibet fragile. Iactatu, non tempestate magna, vt dissiperis, opus est. Vbicunque arietaueris, solueris. Quid est homo? imbecillum corpus, & fragile, nudum, suapte natura inerme, alienæ opis indigens, ad omnem fortunæ contumeliam proiectum: cum bene lacertos exercuit, cuiuslibet feræ pabulum, cuiuslibet victima: ex infirmis, fluidisque contextum, & lineamentis exterioribus nitidum; frigoris, æstus, laboris impatiens, ipso rursum situ, & otio iturum in tabem: alimenta metuens sua, quorum modò inopia, modò copia rumpitur: anxie, sollicitæque tutelæ, precarij spiritus, & malè in hærentis &c.

Ap-

Aptissima est Amplificationibus Definitio per Negationem, & Affirmationem; cum ostendimus primò, quid non sit res definita; tum subdimus, quid illa sit. Insigne huius exemplum illud est Ciceronis *in Pisonem*, quem ex Definitione Consulatus ostendit nunquam Consulem fuisse.

Tu etiam mentionem facies Consulatus tui? aut te fuisse Romæ Consulem dicere audebis? Quid? tu in lictoribus, in toga, & prætexta esse Consulatum putas, quæ ornamenta etiam in Sexto Clodio te Consule esse voluisti? Huius tu Clodiani canis insignibus Consulatum declarari putas? Animo Consulem esse oportet, consilio, fide, gravitate, vigilantia, toto denique munere Consulatus.

Hac eadem definiendi ratione utitur D. Io: Chrisostomus, ut veram hominis virtutem definiat. *tomo 5. in Orat. quòd nemo laeditur nisi à se ipso.*

Quæ ergo est Virtus hominis? non diuitiæ, ne timeas paupertatem; nec sanitas corporis, ne languorem metuas; nec fama, & existimatio humana; ne te hominum maledicta terreant; nec vita hæc communis, ne fortè metuas mortem; nec libertas, ne servitutem perhorrescas. Sed quæ est Virtus animi? Rectè sentire de Deo, & rectè

inter homines agere.

Aliquando Definitio per solam Negationem effertur. *Cic. pro P. Sextio* de Optimatibus loquens.

Omnes Optimates sunt, qui neque nocentes sunt, nec natura improbi, nec furiosi, nec malis domesticis impediti &c.

Hac Definitione per Negationem opportunè utemur, cùm maxima occurrent, quæ dicendo æquare non possumus: ut si de Deo sit sermo, de quo (ut egregiè D. Ambrosius) (a) *Et cùm dicitur non potest dici, cùm æstimatur non potest æstimari, cùm definitur ipsa sua definitione crescit.* Et Romanus Orator, ipse Eloquentiæ Pater, tantæ impar Maiestati exprimendæ. (b) *Quid non sit Deus* (inquit) *quàm quid sit dixerim.* Neque enim est creatæ cuicunque formæ comparanda species, non circumscripta potentia, non comprehensibilis bonitas, non finita sapientia, non certis inclusa terminis magnitudo, quam assequi valeat humanæ mentis acies, ne dum explicare facundia.

Eundem etiam definiendi modum adhibebis, cùm in rem incidēs parvam admodum, & exilem, *de qua quis visa dicere possit ubi est?* Accidit enim

quan-

a *De fide contra Arrianos lib. 6.*

b *Lib. p. de Nat. Deorum.*

quandoque, ut ingeniorum contentio
stylum circa nebulas occupet; ut si
Callicrateam formicam describendam
suscipias, vel atomum volitantem, cuius
neque metiri quantitatem potes, neque
partes distinguere, neque dispicere co-
lorem.

Maximè valent ad amplificandum
Definitiones conglobatæ; cum scilicet
plures colliguntur eiusdem rei pressæ
Definitiones. Celebres sunt illæ Tullij
lib. 2. de Oratore.

Historia est testis temporum, lux ve-
ritatis, vita memoriæ, magistra vitæ,
nuntia vetustatis.

Eleganter D. Ambrosius os huma-
num Definitionibus conglobatis com-
mendat *lib. 6. Hexam. c. 9.*

Quid est igitur os hominis, nisi
quoddam sermonis adytum, fons dis-
putationis, aula verborum, promp-
tuarium voluntatis?

Sed in his Definitionibus congeren-
dis earum delectus habeatur, ut rei de-
finitæ conueniant; neque semper eæ-
dem recurrant, aliæ ad laudem, aliæ ad
vituperationem paratæ: aut generales
quædam earum formulæ in promptu
habeantur, ad omnia versatiles. At
neque nimis multæ acervatim glome-
tentur, aut sint nimis in Oratione fre-
quentes; nihil enim est harum copia,
&

& frequentatione leuius, ac molestius.

De Notatione, & Coniugatis.

CAPVT QVARTVM.

NOTATIO, Græcè *ETYMOLOGIA*, est vocabuli explicatio. Hæc itaque verborum interpretem agit, eorumque originem scrutatur.

Seneca de Tranquillitate. *Liber* non ob licentiam lingue dictus est inuentor vini, sed quia *liberat* seruitio curarum animum.

Ouidius 5. Fastorum *A Senibus* nomen mite *Senatus* habet.

Et si plerunque non multum habet momenti ad fidem faciendam hic Locus; aliquando tamen haud spernenda suggerit argumenta, tum laudis, tum vituperationis. Si spectes hæc nomina *LAVRENTIUS*, *VINCENTIUS*, *AMBROSIUS*, *MARGARITA*, *ROSALIA*, statim eorum Notatio tibi offeret Lauream, Victoriæ Nectar, Vnionem, Rosam, quæ in Diuorum commendationem vertere poteris, dignas cuiusque nomine virtutes explicando; si enim conueniant præclaris nominibus mores, tum ne nomen quidem vacuum est laudis.

Quòd

Quòd si nomina minùs idonea significatione repugnare laudi videantur ; cuiusmodi sunt ista *BARBARA, LUPVS, SATYRVS, BASILISCVS* &c. ad Antiphrasim confugies, vel aliunde nominum originem aptius ad rem tuam deriuabis : atque ita ostendes *Barbaram* non à sua, sed à paterna indole denominatam : eundem parentem nactam, & carnificem, illius *barbarie* triumphata fecisse nomen illustre. Sanctum Antistitem *Lupum* commissi gregis Pastorem amantissimum totum sui nominis terrorem in Tartareum prædonem vertisse : pium verè *Lupum*, qui ex ipsis *Erebi* faucibus raperet oues &c.

Ex eadem quoque nominum pharetra spicula educuntur, quæ acutissimè feriant. Cicero in *Verrem* hoc ipsum nomen in probrum torquet, à *Verre* fordidissimo bruto deriuatum ; vt cum ludit in improbas leges ab eo latas. *Mirandum non est, ius Verrinum tam esse nequam*. Alibi à verrendo, carpens illius rapacitatem, qua populorum opes euerrebat. *Quod unquam Indices huiusmodi enerriculum vlla in Prouincia fuit?*

Speciosa prauorum nomina vel vt præposterè imposita traducantur, vel in deteriora mutantur, quæ magis personæ

sonæ conueniant. Sic D. Hieronymus *Vigilantium* hæreticum veriùs *Dormitantium* vocandum censuit, vt qui stultissimam doctrinam somniaret. D. Io: Chrisostomus Iulianum *Idolianum* appellauit, quòd sinceræ pietatis desertor Idolorum cultum restituere conaretur.

Huc referuntur Alliterationes, quæ ludunt circa nomen, cum aliqua litterarum immutatione, vel additione, vel detractiõne, siue inuersione; neque est, cur hæc minutiora singillatim explicemus. Pauca sufficiant ad exemplum.

Titum Labienum dicacissimum hominem, non Labienum, sed *Rabienum* Romani vocauere.

Bibacissimus Imperator Bonosus *Vinosus* audiit; *bibere* dictus, non viuere.

Pupillus Orbilius Gramaticus destitutus memoria, Pupillus *Oblinius* à Bibaculo nuncupatus.

Quærenti quid est Iuuentus? *Ventus* mutilato nomine respondit Echo.

His adduntur Anagrammata, maxime quæ à Nominum elementis eductantur, vt *ROMA Amor. VRSULA Laurus*.

Interrogat Iesum Pilatus: *QVID EST VERITAS?* obmutescit mitissimus

mus Agnus, at Anagramma respondet :
Est Vir , qui adest .

Nota sunt illa. *ARISTOTELES*. Sol
 erat iste. *DIVVS MARCVS EVAN-*
GELIST A. Sum vigil ad Venetas curas.
MARTINVS LVTERVS . Ter ma-
 tris vulnus . *CALVINVS* . *Lucianus* .

Plura non subnectam ; cum horum
 artifices non desint ; qui noua cudant
 in dies , siue à literis , siue à numeris
 deprompta . Horum artificium alibi
 quære , cui per me alij dent operam ;
 nam quanuis Anagrammata non ca-
 reant laude , si excellant , plerunque
 tamen excellent , quæ facilius nascun-
 tur : at illis operosius inquirendis in-
 herere , otiosi hominis est , & in leuif-
 simis occupati Martial. l. 2. Epigr. 61.

Turpe est difficiles habere nugas :

Et stultus labor est ineptiarum .

Per se quidem Notatio haud mul-
 tum est Amplificationis fecunda ; sed
 illius inopiam eruditio supplebit. Iuua-
 bit itaque nosse nominum originem,
 eorumque significationem , & quæ in
 his imponendis à veteribus obseruata :
 respicere quoque Maiores , qui eodem
 nomine , in cuius Notatione versamur ,
 vel virtute , & gloria claruerint ad lau-
 dem , vel qui vitijs , & fama laboraue-
 rint , ad vituperationem ; atque alia id
 genus . Vt autem videas nihil esse adeo
 steri-

sterile, vnde materiam non hauriat ingenij fecunditas, lege tria Martialis elegantissima Epigrammata, à sola Notatione deducta, eaque sunt 8. 9., & 10. libri 9. in Earini nomen, deriuatum à Vere.

Cæterùm aptissimus facetijs, & argutijs hic Locus; quibus tamen cum delectu, ac prudenter vtendum, ne nugemur in serijs, neue salibus ineptissimis in spargatur Oratio, in quibus frustra quærat micæ salis.

CONIUGATA *Asunt ea, quæ ab uno deriuata variè commutantur, vt à Prudentia prudens, prudenter.*

Cicero Quæst. Tuscul. 4. Qui enim potest, in quo libido cupiditasque sit, non cupidus, non libidinosus esse; in quo ira non iracundus; in quo amor, non anxius; in quo timor, non timidus?

Ad hæc illa spectant, quæ licet nomine differant, re tamen conueniunt: vt Probitas, Innocentia, Integritas. Qui enim innocens, idem probus, idem vitæ integritate præstat.

Minorem adhuc, quàm Notatio, copiam afferunt Coniugata, Argumentationi, quàm Amplificationi aptiora; pariter tamen ad iocos, & acumina valent; hinc illud Ciceronis *Att. 3. in Verrem*, quem vbique vel acerbè, vel

vel iocosè pestringit.

Quæ iste cum cognouisset nouus Astrologus, qui non tam *cali* rationem quàm *calati* argenti duceret.

Argutè Ouidius. *Aurea* nunc verè sunt secula, plurimus *auro* Venit honos: *auro* conciliatur amor.

De Partium Enumeratione.

CAPVT QVINTVM.

PARTIVM ENUMERATIO est rei in suas partes distributio. Partes sunt, quæ aliquod Totum quoquomodo componunt. Sic Puppis, Prora, Carina sunt partes Nauis. Infantia, Pueritia, Adolescentia &c. sunt Vitæ partes. Senatus, Equester Ordo, Populus sunt partes Ciuitatis: vt, Urbis Arces, Moenia, Tempia &c. Exactiores partium distinctiones modò ne quære; has enim Philosophis relinquo.

Reuocari quoque huc solet diuisio Totius Metaphysici in sua inferiora; vt Generis in Species, Speciei in Individua. Sed hæc infra peculiarem habent sedem. Certè si amplissima spectetur Enumerationis latitudo, ad illam omnia referuntur, quæ diuidi aliqua ratione possunt, vel re ipsa, vel mente distincta. Atque ita hic Locus

cæteros quosque complectitur, cum
siant Enumerationes Definitionum,
Specierum, Adiunctorum, Similiū &c.

Plurimum habet vbertatis Partium
Enumeratio, Amplificationibus, ac
Descriptionibus apprimè utilis. Illu-
stre huius exemplum præbet, facilemq;
methodum amplificandi ab hoc loco
Quintilianus lib. 8. cap. 3.

Sine dubio (inquit) qui dicit *captam
esse Cinitatem*, complectitur omnia,
quæ talis fortuna recipit; sed in affec-
tus minus penetrat brevis hic velut
nuntius. At si aperias hæc, quæ verbo
vno inclusa erant, apparebunt, & fusæ
per domos, ac templa flammæ, &
ruentium tectorum fragor, & ex di-
uersis clamoribus vnus quidam sonus.
Aliorum fuga incerta, alij in extremo
complexu suorum cohærentes, & in-
fantium, sceminarumque ploratus, &
malè vsque in illum diem seruati senes.
Tum profanorum, sacrorumque direp-
tio, efferentium prædam, repetentium-
que discursus; & acti ante suum quique
prædonem catenati, & conata retinere
infantem suum mater; & sicubi maius
lucrum est, pugna inter victores.

Ecce quàm vberem dicendi copiam
affert partium distributio; cum secus
hoc tribus constet verbis. *Vrbs capta
est.*

La-

Latinus Pacatus Gallia suæ calamitatem grauiſſimè per partes exprimit in *Pan. Theod.*

Quis se nobis calamitate contulerit? quid ego referam vacuatas municipibus suis Ciuitates, impletas fugitiuis nobilibus solitudines? quid perfunctorum honoribus summis virorum bona publicata? capita diminuta? vitam ære taxatam? Vidimus redactas in numerum dignitates, & exutos trabeis consulares, & senes fortunarum superstites, & infantium sub ipso lictore ludentium flendam securitatem; cum interim miseri vetabamur agere miseros, immò omnes cogebamur mentiri beatos. Audires dicere delatorem; quid ille tristis incedit? an quia pauper ex diuite est? non enim se viuere gratulatur. Quid ita hic publicum atratus inceſtat? luget credo fratrem; sed habet filium. Ita flere non licebat amissa metu reliquorum. Serenos ergo nubilis mentibus vultus induebamus, & ad illorum vicem, qui gustato Sardorum graminum succo feruntur in morte ridere, imitabamur læta mærentes.

D. Hieronymus vegetum senem, integrisque sensibus valentem à partibus enumeratis egregiè describit, *Epistola 8. lib. pr. ad Paulum Concordiensem.*

Ecce iam centenus ætatis circulus

voluitur, & tu semper præcepta Domini custodiens futuræ beatitudinem vitæ per præsentia exempla meditaris. Oculi puro lumine vigent: pedes imprimunt certa vestigia: auditus penetrabilis, dentes candidi, vox sonora, corpus solidum, & succi plenum. Cani cum rubore discrepant, vires cum ætate dissentiunt. Non memoriæ tenacitatem (quod in plerisque cernimus) antiquior senectâ dissoluit: non calidi acumen ingenij, frigidus sanguis obtundit: non contractam rugis faciem arata frons exasperat: non denique tremula manus per curuos ceræ tramites errantem stylum ducit. Futuræ nobis resurrectionis virorem in te Dominus ostendit; ut peccati sciamus esse, quod cæteri adhuc viuentes præmoriuntur in carne; iustitiæ, quod tu adolescentiam in aliena ætate mentiris.

De Genere, & Specie.

CAPVT SEXTVM.

GENVS est id, quod conuenit pluribus, Specie differentibus. Sic Arbor est Genus, quia conuenit Cedro, Platano, Abieti, alijsque Arboribus, quæ inter se Specie differunt.

SPECIES, seu FORMA est, quæ pluribus
ra.

ra sub se continet, solo numero distincta.
 Sic *Vitis* est Species, sub se continens
Vites omnes, quæ numero tantum in-
 uicem distinguuntur.

Licentiùs tamen Rhetores nomen
 Generis usurpant, quàm Dialectici.
 Genus enim vocant quidquid de pluri-
 bus dici potest, siue numero tantum,
 siue Specie distinctis; & Cicero qui-
 dem nomine Generis intelligit quod-
 cunque commune vocabulum, etiamsi
 tantum Indiuidua complectatur.

Habet vim maximam ad ampli-
 ficandum hic Locus; quod duobus mo-
 dis fieri potest: primò descendendo
 à Genere ad Species, vel ab aliquo vni-
 uersali capite ad ea, quæ sub ipso con-
 tinentur: vt si ad probandum exitiale
 humani generi Vitium esse, Ambi-
 tionis, Auaritiæ, Iracundiæ damna re-
 censeas. Secundò excurrente in Ge-
 nus, cum de aliqua tantum illius parte
 agitur: vt si ad extollendam Pruden-
 tiam, Virtutem priùs generatim com-
 mendes. Ita latissimus Amplificationis
 campus aperitur: latiùs enim de Gene-
 re, quàm de parte disceptare licet, vt
 docet Cicero de Oratore; vbi etiam
 refert Aristotelem adolescentes exercere
 solitum huiusmodi Orationibus ad vni-
 uersum Genus traductis, vt vberio-
 rem dicendi facultatem compararent.

Idem

Idem *pro Archia Poeta* de *Artis Poëticæ* laudibus dicturus has primùm desumit à *Genere*; hinc descendit ad *Speciem*.

A Genere.

Etenim omnes Artes, quæ ad Humanitatem pertinent, habent quoddam commune vinculum, & quasi cognatione quadam inter se continentur.

Hæc studia adolescentiam alunt, senectutem oblectant, secundas res ornant, adversis perfugium, ac solatium præbent; delectant domi, non impediunt foris, pernoctant nobiscum, peregrinantur, rusticantur.

Hinc fertur ad Speciem.

Atqui sic à summis hominibus, eruditissimisq; accepimus, cæterarum rerum studia & doctrina, & præceptis, & arte constare; Poetam natura ipsa valere, & mentis viribus excitari, & quasi diuino quodâ spiritu afflari. Quare suo iure noster ille Ennius sanctos appellat Poetas, quod quasi Deorû aliquo dono, atq; munere commendati nobis esse videantur.

Idem *pro Sexto Roscio*, ut ostendat incredibile esse Patrem ab ipso fuisse interfectum, priùs atrocitatem Parricidij generatim amplificat, ab illis verbis. *De Parricidio causa dicitur &c.*

Profectò res tam scelestæ, tam atrox, tam nefaria credi non potest. Magna
est

est enim vis humanitatis, multum valet communio sanguinis, reclamitat istiusmodi suspicionibus ipsa natura. Portentum, atque monstrum certissimum est, esse aliquem humana specie, & figura, qui tantum immanitate bestias vicerit; ut propter quos hanc suavissimam lucem aspexerit, eos indignissimè luce priuarit; cum etiam feras inter se partus, atque educatio, & natura ipsa conciliet &c.

Hæc magnitudo maleficij facit, ut nisi penè manifestum parricidium proferatur, credibile non sit; nisi turpis adolescentia, nisi omnibus flagitijs vita inquinata, nisi sumptus effusi, cum probro, atque dedecore, nisi prorupta audacia, nisi tanta temeritas; ut non procul abhorreat ab infania &c.

Seneca *de Beneficijs lib. 7. cap. 26.*, ut doceat non esse expectandam fidem, & gratiam ab hominibus; cum tot vitijs laborent, à grati animi virtute alienis, in eorundem vitiorum Species dilabuntur.

Quis est istorum tam firmæ mentis, ac solidæ, ut tutò apud eum beneficia deponas? alius libidine insanit, alius abdomini seruit, alius lucri totus est, cuius summam non vinctes: alius invidia laborat, alius cæca ambitione, & in gladios ruente. Adijce torporem

mentis, ac senium, & huic contrariam inquieti pectoris agitationem, tumultusque perpetuos: adijce æstimationem sui nimiam, & tumorem, ob quæ contemnendus est, insolentem. Quid contumaciam in peruersa nitentium, quid leuitatem semper aliò transilientem loquar? Huc accedat temeritas præceptis, & nunquam fidele consilium daturus timor, & mille errores, quibus volumur: audacia timidissimorum, discordia familiarissimorum, & publicum malum incertissimis fidere, fastidire possessa, optare, quæ consequi posse spes non fuit. Inter affectus inquietissimos, rem quietissimam, fidem quæris?

De Similitudine, & Dissimilitudine.

CAPVT SEPTIMUM.

SIMILITUDO est diuersarum rerum collatio, qua in aliquo conueniunt, licet aliunde differant. ex. gr. *Tempus*, & *Flumen* duo sunt valde diuersa: in eo tamen conueniunt, quòd vtrunque ocysimè difluit, atque ideò tempus Flumini per similitudinem comparatur.

Ouidius l. 15. *Metam.*

Ipsa quoque assiduo labuntur tempora motu

Non

Non secus ac flumen : neque enim consistere flumen,

Nec levis hora potest &c.

Duplex est Similitudo : alia perfecta ; alia imperfecta . Perfecta est , quæ constat duabus partibus ; quarum prima dicitur Propositio , seu Protasis , quæ præferre solet huiusmodi particulas : *Vt , Quemadmodum , Sicut , Veluti &c.* Secunda dicitur Redditio , seu Assumptio , vel Apodosis , quæ notatur his particulis *Ita , similiter , non secus , non aliter &c.*

Cic. Philipp. 2. Vt quidam morbo aliquo , & sensus stupore suauitatem cibi non sentiunt : sic libidinosi , auari , facinorosi veræ laudis gustum non habent .

Similitudo imperfecta est , quæ geminas partes explicitas non habet ; nec vtranque suis particulis distinguit :

D. Hieronymus. Ad Letam de Institutione Filia. Difficulus eraditur , quod rudes animi perbiberunt . Lanarum conchylia quis in pristinum candorem reuocet ? recens testa diu , & saporem retinet , & odorem , quo primum imbuta est .

Quod si breuius , ac pressius effertur Similitudo , migrat in Metaphoram , quæ , vt alibi ex Tullio docui , est Similitudinis ad verbum vnum contracta .

brevitas. Cùm enim dicis ex. gr. *Adolescentia florem*, non ne vnico illo verbo (*florem*) Similitudinem istam contrahis: *Adolescentia similis est flori*?

Quò longiùs petita Similitudo est, minùsq; vulgaris, vt plus nouitatis, plus laudis habet; atque hinc etiam Metaphoræ pretium: quanuis illud etiam custodiendum; ne quod Similitudinis gratia asciuius, aut obscurum sit, aut prorsus ignotum. *Quintil. l. 8. cap. 3.*

Oblectant plurimùm Similitudines, & Orationem ornant, ac illustrant. Varius est eas tractandi modus. Aliquando ad rem magis declarandam vtraque pars Similitudinis explicatur; aliquando ingeniosa breuitate corripitur, vt plus intelligendum relinquat quàm dicat. Talis est illa Ciceronis in Clodium. *Quo ex iudicio, velut incendio nudus aufugit*; atque huiusmodi sunt omnes imperfectæ Similitudines, quæ quasi cursim attinguntur, ac vim habent plura circuncisè, atque velociter ante oculos ponendi.

Ad amplificandum aut plures conglobatæ nectuntur, aut vna fusiùs, & ornatius extenditur; dilatando scilicet Protasim, & Apodosim: ad quod vtilis erunt Descriptiones, Distributiones, Expolitiones, aliæque huiusmodi Figuræ pertinentes ad copiam.

Conglobatas Similitudines adhibet
Latinus Pacatus in *Pan. Theod.*

Gaudent profectò diuina perpetuo
motu, & iugi agitatione se vegetat
æternitas, & quidquid homines voca-
mus laborem, vestra natura est. Vt
indefessa vertigo Cœlum rotat: vt Ma-
ria æstibus inquieta sunt, & stare Sol
nescit: ita tu Imperator continuatis
negotijs, & in se quodam orbe redeun-
tibus semper exercitus es.

Diffusa Similitudine vtitur egregiè
Seneca lib. 1. de *Ira* cap. 5.

Protasis.

Nempe Medicus primò in leuibus
vitijs tentat non multum ex quotidia-
na consuetudine inflectere; & cibis,
portionibus, exercitationibus ordinem
ponere; ac valetudinem, tantùm mu-
tata vitæ dispositione, firmare. Proxi-
mum est, vt modus proficiat. Si mo-
dus, & ordo non proficit, subducit
aliqua, & circuncidit. Si ne adhuc
quidem respondet, interdicit cibis, &
abstinentia corpus exoncrat. Si frustra
molliora cesserunt, ferit venam, mem-
brisque, si adhærentia nocent, & mor-
bum diffundunt, manus affert: nec
vlla dura videtur curatio, cuius saluta-
ris effectus est.

Apodosis.

Ita legum Præsidem, ciuitatisque rec-

torem decet, quandiu potest, verbis, & his mollioribus, ingenia curare; vt facienda suadeat, cupiditatemque honesti, & æqui conciliet animis, faciatque vitiorum odium, pretium virtutum; transeat deinde ad tristiores Orationem, qua moneat adhuc, & exprobet; nouissimè ad pœnas, & has adhuc leues, & reuocabiles, decurrat; vltima supplicia sceleribus vltimis ponat; vt nemo pereat, nisi quem perire etiam pereuntis interfit.

Familiares Poetis sunt Similitudines, quarum copia præ cæteris Ouidius redundat: sic *Eleg. pr. l. pr. de Ponto*.

Estur vt occulta vitiata teredine
nauis,

Æquoreos scopulos vt cauat vnda
Sali;

Roditur vt scabra positum rubigine
ferrum,

Conditus vt tineæ carpitur ore
liber:

Sic mea perpetuos curarum pectora
morsus,

Fine quibus nullo conficiantur,
habent.

DISSIMILITUDO est diuersarum rerum dissimilis affectio. Hæc itaque Similitudini opposita est, & sicut illa in diuersis rebus inter se collatis conuenientiam aliquam, hæc differentiam

spe-

ſpectat ; quare à Tullio in Partitionibus Oratorijs Differentia vocatur .

Seneca *Epist.* 61. Taurus pauciſſimorum iugerum pascuis impletur : vna ſylua Elephantis pluribus ſufficit : Homo , & terra pascitur , & mari .

Cicero *pro L. Murena* Sulpicium ſe ſe Iuriſperitia efferentem cum eodem virtute bellica præſtante viro à diſſimili confert .

Vigilas tu de nocte , vt tuis conſultoribus respondeas : ille , vt eò , quò intendit , maturè cum exercitu perueniat . Te gallorum , illum buccinarum cantus exſuscitat . Tu actionem inſtituis ; ille aciem inſtruit . Tu caues , ne tui conſultores ; ille ne Vrbes , aut caſtra capiantur . Ille tenet , & ſcit , vt hoſtium copix ; tu vt aquæ pluuiæ arceantur . Ille exercitatus eſt in propagandis finibus ; tu in regendis .

Plinius *in Paneg. Traiani*. Ante te Principes ſaſtidio noſtri , & quodam æqualitatis metu uſum pedum amiſerant . Illos ergo humeri , ceruiſesque ſeruorum ſuper ora noſtra ; te fama , te gloria , te ciuium pietas ſuper ipſos Principes vehunt ; te ad ſidera tollit humus : ita communia , & confuſa Principis veſtigia &c.

Fuſæ Diſſimilitudines .

Latinus Pacatus *in Paneg. Theod.* At

quàm alter illorum Principum mos fuit, (quos loquar notum est) qui Maiestatem Regiam imminui, & vulgari putabant, nisi eos intra repositum Palatinæ ædis inclusos, tanquam aliquod Vestale secretum, veneratio occulta consulisset: nisi intra domesticam umbram iacentes solitudo prouisa, & silentia latè conciliata vallassent. Quin si quando in lucem venire, & diem ferre potuissent, lecticis, thensisque subuecti, & densissima circum, supraque cooperti virorum, armorumque testudine, sensim, atque ad numerum mouebantur: tum longè populus abigebatur, nec otiosa Viatoris manus plebem verberare submouebat, vt secretum esset in publico.

At noster hic omnibus spectandus affertur; nec magis communem hunc diem, atque Solem, quàm nostrum Imperatorem videri licet.

Idem Theodosij frugalitatem cum veterum Imperatorum luxu à dissimili comparat.

Nam delicati illi, ac fluentes, & quales tulit sæpe Respublica, parum se lautos putabant, nisi luxuria vertisset annum, nisi hybernæ poculis rosæ innataissent, nisi æstiuam in gemmis capacibus glaciem Falerna fregissent. Horum gulæ angustus erat noster orbis:

bis : namque appositas dapes non sapore iudicabant , sed sumptu . Illis demum cibis acquiescebant , quos extremus Oriens , aut positus extra Romanum Colchus Imperium , aut famosa naufragijs maria misissent ; quos inuitæ quodammodo , reluctantiq̃ue naturæ hominum pericula rapuissent . Vt taceam infami sæpe delectu scriptos in Prouincijs aucupes , ductasque sub signis venatorum cohortes militasse conuiuijs : nonne cognouimus cuiusdam retro Principis non prandia sæpe , sed fercula , S. H. millies æstimata patrimoniorum equestrium pretia traxisse ?

Tuæ Imperator epulæ mensis communibus pareiores , locorum , ac temporum fructibus instruuntur &c.

D. Hieronymus vitam Pauli Anachoretæ claudens grauissimè hoc loco vtitur , pauperi , sed sancta paupertate ditissimo Viro Superbos conferens , qui sua tumentes opulentia , dum tantum peritura sectantur , amittunt æterna .

Libet in fine opusculi eos interrogare , qui sua patrimonia ignorant , qui domos marmoribus vestiunt , qui vno filo villarum insuunt pretia , huic Seni nudo quid vnquam defuit ? Vos gemma bibitis : ille naturæ concavis manibus satisfecit . Vos in tunicis aurum

textis: ille ne vilissimum quidem indumentum habuit mancipij vestri. Sed è contrario illi quidem pauperculo Paradisus patet: vos auratos Gehenna suscipiet. Ille vestem Christi nudus licet tamen seruauit: vos vestiti sericis indumentum Christi perdidistis. Paulus vilissimo puluere coopertus iacet resurrecturus in gloriam: vos operosa saxi sepulchra premunt cum vestris opibus arsueros.

Plura Dissimilitudinis hìc habes exempla, quæ te docent, qua ratione tractari, & amplificari possit; scilicet aut illam in plura membra distribuendo, & singula singulis conferendo; aut illius partes dilatando, vt antea de Similitudine dictum est.

De Oppositis.

CAPVT OCTAVVM.

OPPOSITA sunt illa, quæ ita inter se pugnant, vt neutrum illorum cum alio tertio eadem ratione pugnet: vt Virtus, & vitium.

In quatuor genera Opposita diuiduntur: Contraria, seu Aduersa Priuantia, Relatiua, & Contradicentia, seu Negantia.

CONTRARIA sunt, quæ sub eodem
ge-

genere posita maxime discrepant, & se mutuo expellunt. Vt Calor, & Frigus: cum enim contineantur sub eodem genere primarum qualitatuum, ita inter se dissident implacabiles hostes, ut alter alterum pellat.

PRIVANTIA sunt, quorum alterum est habitus, siue res habita: alterum eiusdem rei priuatio. Vt lux, & tenebra: Morbus, & Sanitas.

RELATIVA sunt, quorum unum refertur ad aliud: vel quæ se inuicem respiciunt. Vt Seruus, & Dominus. Pater & Filius. Pater enim respicit Filium, & Filius Patrem.

CONTRADICENTIA sunt, quorum unum affirmat, quod aliud negat. Vt iustus, iniustus, Verecundus, Inuerecundus. Senectus est optanda. Senectus non est optanda.

In his autem definiendis, distinguendis, ac tractandis Philosophica libella Rhetores non vtuntur. Quæcunque aliquo ex prædictis modis inter se pugnant, Opposita nomine communi vocamus; & ex quouis horum genere desumptam Amplificationem dicimus ab Oppositis.

Talis est illa Ciceronis in *Catilinam* 2. vbi Romanum exercitum opponit Perduellium Copijs.

Ex hac enim parte pudor pugnat,
G 6 illinc

illinc petulantia : hinc pudicitia , illinc stuprum : hinc fides , illinc fraudatio : hinc pietas , illinc scelus : hinc constantia , illinc furor : hinc honestas , illinc turpitudine : hinc continentia , illinc libido : denique æquitas , temperantia , fortitudo , prudentia , Virtutes omnes certant cum iniquitate , cum luxuria , cum ignavia , cum temeritate , cum vitijs omnibus : postremo copiæ cum egestate , bona ratio cum perdita , mens sana cum amentia , bona denique spes cum omnium rerum desperatione confligit .

Huic non absimilem adhibet Latinus Pacatus , Maximum Tyrannum conferens cum Theodosio Augusto .

An sustinere te coram , & solum oculorum tuorum ferre coniectum illo quondam domus tuæ negligentissimus vernula , mensularumque seruilium statarius lixa potuisset ? non statim subiisset hominem præterita sui , tuique reputatio ? non ipse sibi obiecisset , te esse triumphalis Viri filium , se Patris incertum ? te hæredem nobilissimæ familiæ , se clientem ? te retro omni tempore Romani exercitus ducem , libertatis patronum ; se Orbis extorrem , patriæque fugitium ? iam verò te Principem in medio Reipublicæ sinu omnium suffragio militum , consensu Pro-

uin-

uinciarum, ipsius denique ambitu Imperatoris optatum: se in ultimo terrarum recessu legionibus nescijs, aduersis Prouinciarum studijs, nullis denique auspicijs in id Tyrannici nominis adspirasse furtum? postremò tecum fidem, tecum perfidiam, tecum fas, tecum nefas; tecum ius, tecum iniuriam; tecum clementiam, pudicitiam, religionem; tecum impietatem, libidinem, crudelitatem, & omnium scelerum, postremorumque vitiorum stare collegium?

Seneca *de beata vita cap. 7.*, quantum Virtus à Voluptate dissideat, alteram alteri opponens, egregiè ostendit.

Quid dissimilia, immò diuersa componitis? Altum quidam est Virtus, excelsum, regale, inuictum, infatigabile: Voluptas humile, seruale, imbecillum, caducum; cuius statio, ac domicilium fornices, & popinæ sunt. Virtutem in templo inuenies, in foro, in curia, pro muris stantem, puluerulentam, coloratam, callosas habentem manus: Voluptatem latitantem, sæpius, ac tenebras captantem, circa balnea, ac sudatoria, ac loca Ædilem metuentia, mollem, eneruem, mero, atque vnguento madentem, pallidam, fucatam, & medicamentis pollutam.

Seuerinus Boetius *de Consolat. Phil. lib. 2. prosa 8.* probat plus hominibus aduersam, quàm prosperam prodesse fortunam, vtranque per opposita comparando.

Illa enim semper specie felicitatis, cùm videtur blanda, mentitur. Hæc semper vera est, cùm se instabilem mutatione demonstrat. Illa fallit: hæc instruit. Illa mendax specie bonorum mentes fruentium ligat: hæc cognitione fragilis felicitatis absoluit. Itaque illam videas ventosam, fluentem, siueque semper ignaram: hanc sobriam, succinctamque, & ipsius aduersitatis exercitatione prudentem. Postremò felix à vero bono deuos blanditijs trahit: aduersa plerunque ad vera bona reducens vnco trahit.

De Adiunctis.

CAPVT NONVM.

ADIVNCTA dicuntur, quæ ita rebus coniuncta sunt, vt illis necessario non hæreant: vt color vultus, rugæ frontis, crinis rubor, vel canities &c.

Hæc in septem capita diuiduntur notissimo carmine.

*Quis, Quid, Vbi, Quibus auxilijs,
Cur,*

Cur, Quomodo, Quando.

QVIS personam spectat, in qua considerantur adiuncta Corporis, Animi, & Fortunæ.

Corporis: vt robur, vel imbecillitas; pulchritudo, vel deformitas; ægritudo, vel sanitas; & quæ attinent ad ipsius Corporis cultum.

Animi: vt Virtutes, & Vitia, ingenium, artes, mores, doctrina, vel ignorantia.

Fortunæ: vt Genus, Patria, dignitates, copia, vel inopia rerum.

QVID expendit adiuncta facti: an facile, an difficile; an honestum, an turpe; an insolitum, mirabile &c. siue rei attributa: vt si agatur de supellectile, sit ne sacra, an profana; elegans, an sordida; parui, an magni pretij.

UBI designat loci differentias; cuiusmodi sunt amœnitas, fertilitas, amplitudo, religio; vel contra sterilitas, horror, angustia, solitudo &c.

AVXILIA complectuntur socios; ministros, instrumenta, quæ ad rem gerendam adhibentur.

CUR explorat finem, propter quem res gesta est: ad priuatum ne potiùs, an ad publicum bonum; an spe lucri, an gloriæ cupiditate.

QVOMODO explicat rei gestæ modum:

dum: quo tumultu, qua violentia, quæ celeritate, qua pompa &c. totam etiam facti seriem euoluit; ad quam pertinent Præcedentia, Concomitantia, & Subsequentia, quæ ab alijs dicuntur Adiuncta *Ante rem, Cum re, & Post rem.* Prima sunt, quæ rem antecedunt; ut belli apparatus ante prælium. Secunda, quæ rem concomitantur: ut concursus militum, vulnera, & cædes in ipso prælio. Tertia, quæ rem subsequuntur: ut hostium fuga, captiuitas, clades, relataque ab illis præda post prælium.

QUANDO temporis partes, ac discrimina ostendit; noctem, meridiem, hyemem, æstatem: varias quoque illius vices; ut pluuiam, vel serenitatem, & fortuitos euentus; ut celebrata Sacrorum, natalium, nuptiarum, ludorumue solennia.

Mirum est quantæ sit fœcunditatis hic Locus ad amplificandum, arguendum, exornandum, ac describendum. Sanè vix alius est, qui frequentius in usum Orationis veniat; quare maximè Oratorius à Tullio vocatur in Topicis.

Idem Tullius *Orat. 2. in Catilinam* huius effœminatos commilitones ab Adiunctis corporis, & animi describit.

Postremum autem genus est non solum numero, verum etiam genere ipso, atque vita, quod proprium est Catilinæ, de eius delectu, immò verò de eius complexu, ac sinu. Quos pexo capillo nitidos, aut imberbes, aut barbatos videtis, manicatis, & talaribus, ac tritis tunicis, velis vestitos, non togis: quorum omnis industria vitæ, & vigilandi labor in antelucanis cœnis exprimitur. In his gregibus omnes aleatores, omnes adulteri, omnes impuri, impudicique versantur.

Idem *pro Roscio Comædo*, quasi Physiognomum agens, C. Fannij Chærxæ mores ab exteriori specie coniecit.

Nonne ipsum caput, & supercilia illa penitus abrafa, olere malitiam, & clamitare calliditatem videntur? nonne ab imis vnguibus ad verticem summum (si quam coniecturam affert hominis tacita corporis figura) ex fraude, fallacijs, mendacijs constare totus videtur; qui idcirco capite, & supercilijs semper est rasis, ne vllum pilum boni viri habere dicatur?

Idem *Actione* 3. ab Auxilijs elegantissimè exaggerat Verris rapacitatem, cui quò plures ministros, plures manus adhibebat.

Nego tibi ipsi vllum numum esse

numeratum. Sed cùm ob tua decreta, ob imperata, ob iudicata pecuniæ dabantur, non erat quærendum, cuius manu numerarentur, sed cuius iniuria cogerentur. Comites illi tui delecti manus erant tuæ. Præfecti, Seribæ, Medici, Accensi, Haruspices, Præcones manus erant tuæ. Quò quisque te maximè cognatione, affinitate, necessitudine aliqua attingebat, ita maximè manus tua putabatur. Cohors tota illa tua, quæ plus mali Siciliæ dedit, quàm si centum Cohortes fugitiuorum fuissent, tua manus sine controuersia fuit. Quidquid ab horum quopiam captum est, id non modò tibi datum, sed tua manu numeratum iudicari necesse est.

Plinius *in Paneg. Traiani* huius bellicam virtutem ab adiuncto temporis extollit.

Largimur, negamus (*hostibus*) vtrunque ex Imperij maiestate. Agunt gratias, qui impetrauerunt: non audent queri, quibus negatum est. An audeant, qui sciant te assedisse ferocissimis populis eo ipso tempore, quod amicissimum illis, difficillimum nobis; cùm Danubius ripas gelu iungit, duratusque glacie ingentia tergo bella transportat, cùm feræ gentes non telis magis, quàm suo Cœlo, suo fide-
re

re armantur? Sed ubi in proximo tu, non secus, ac si mutatae temporum vices essent, illi quidem latibulis suis clausi tenebantur; nostra agmina percurrere ripas, & aliena occasione, si permitteres, uti; ultroque hyemem suam barbaris inferre gaudebant.

Idem ab Adiunctis animi, & Corporis eundem Traianum commendat.

At Principi nostro quanta concordia, quantusque concentus omnium laudum, omnisque gloriæ contingit: ut nihil severitati eius hilaritate, nihil gravitati simplicitate, nihil maiestati humanitate detrahatur. Iam firmitas, iam proceritas corporis, iam honor capitis, & dignitas oris; ad hoc ætatis inflexa maturitas, nec sine quodam munere Deorum festinatis Iunctutis insignibus ad augendam maiestatem ornata cæsaries, nonne longè latèque Principem ostentant?

D. Hieronymus Sabiniani scelus ab Adiuncto loci vehementer augeat *como pr. epist. 48.*

Infelicissime mortalium tu Speluncam illam, in qua Dei Filius natus est, & veritas de terra orta est, & terra dedit fructum suum, de stupro condicturus ingrederis? non times, ne de Præsepi infans vagiat, ne puerpera Virgo te videat, ne Mater Domini
con.

contempletur? Angeli clamant, Pastores currunt, Stella desuper rutilat, Magi adorant, Herodes terretur, Hierosolyma conturbatur, & tu in cubiculum Virginis decepturus virginem irrepis? paueo miser; & tam mente, quàm corpore perhorresco, ponere tibi volens ante oculos tuos opus tuum. Tota Ecclesia nocturnis vigilijs Christum Dominum personabat, & in diuersarum gentium linguis vnus in laudibus Dei spiritus concinebat. Tu inter ostia quondam Præsepis Domini, nunc Altaris, amatorias epistolas fulciabas, quas postea illa miserabilis, quasi flexo adoratura genu, inueniret, & legeret &c.

De Antecedentibus, & Consequentibus.

CAPVT DECIMVM.

ANTECEDENTIA sunt illa, quibus positis Consequentia succedunt. Quare vtraque necessaria ea connexione cohærent; vt illa præcedant, hæc sequantur. Necessitatem ordinis Boetius hanc vocat. *Lib. 2. in Topica Cicer.* Sic ver æstatem, flos fructum, conceptus partum præcedit.

CONSEQUENTIA sunt illa, quæ
cum

cum posita fuerint Antecedentia, sequuntur. Sic poena culpam, victoria pugnam, mors vitam subsequitur.

Cicero in *Topicis* Antecedentia, & Consequentia, sicut etiam Repugnantia, propria Dialecticorum appellat. Et certe deductio Consequentis ab Antecedenti videtur potius argumentandi forma, quæ in omnibus Locis versari potest, quàm distinctus aliquis à cæteris Locus, ut sentit Rodolphus Agricola. Quintilianus lib. 4. cap. 10., & alij Antecedentia, & Consequentia miscuere Adiunctis; quanvis Cicero dissentiat; quòd Adiuncta non semper eueniant, proinde non afferant Argumentationi ex sua natura necessitatem Conclusionis, sicut Antecedentia, & Consequentia. Hoc itaque discrimine distingui possunt: cæterum quasi finitima Adiunctis à Seuerino vocantur. De differentijs *Topicis* lib. 3. Hac de re plura vide apud Carbonem lib. 3. de *Inventionem* cap. 22. Nos verò vsum Amplificationis nunc potius à Locis quærimus, quàm vim Argumentationis, de qua erit alibi agendum.

Cicero *Philippica* 7. ab Antecedentibus ostendit Antonium iam hostem à Senatu esse iudicatum, proinde turpe esse cum eodem pacem inire.

Quid porro inconstantius, quàm quem

quem modò hostem non verbo, sed re multis decretis iudicauistis, cum hoc subitò velle pace coniungi? nisi verò cùm C. Cæsari meritos illi quidem honores, & debitos, sed tamen singulares, & immortales decreuistis vnā ob causam, quòd contrà M. Antonium exercitum comparauisset, non hostem Antonium iudicauistis: nec tum hostis est à vobis iudicatus; cùm laudati auctoritate vestra veterani milites, qui Cæsarem secuti essent: nec tum hostem Antonium iudicauistis; cùm fortissimis legionibus, quòd illum, qui Consul appellabatur, cùm esset hostis, reliquissent, vacationes, pecunias, agros spopondistis. Quid? cum Brutum, omine quodam istius generis, & nominis, natum ad Remp. liberandam, exercitumque eius pro libertate Populi Romani bellum gerentem cum Antonio, prouinciāque fidelissimā, atque optimā, Galliam laudibus amplissimis affecistis, tum non hostem iudicastis Antonium? Quid? cum decreuistis, vt Consul alter, amboe ad bellum proficiscerentur, quod erat bellum, si hostis Antonius non erat? &c.

Hinc paulò inferius ab Antecedentibus, & Consequentibus Senatum deterret, ventura mala pramonstrando: si cum suis in Urbem recipiatur Antonius

ius nomine pacis, qua tuta esse non possit.

Poteritis igitur exploratam habere pacem, cum in ciuitate Antonium videbitis, vel potius Antonios?

Qui familiarem ingularit, quid hic occasione data faciet inimico? & qui illud animi causa fecerit, hunc prædæ causa quid facturum putatis? non rursus improbos decuriabit? non sollicitabit rursus agrarios, non queretur expulsos?

Et Philippica 13.

Illis locus si in hac Vrbe fuerit, Vrbi ipsi locus non erit. Ora vobis eorum ponite ante oculos, & maximè Antoniorum, incessum, aspectum, vultum, spiritum: latera regentes alios, sequentes alios, alios prægredientes, amicos. Quam vim anhelitus, quas contumelias fore censetis, minasque verborum? nisi fortè eos pax ipsa leniet, maximèque cum in hunc Ordinem venerint, salutabunt benignè, comiter appellabunt vnumquemque nostrum. Non recordamini per Deos immortales, quas in eos sententias dixeritis? acta M. Antonij rescidistis, leges refixistis, per vim, & contra auspicia latas decreuistis; totius Italiae delectus excitauistis; Collegam, & socium scelerum omnium, hostem iudicauistis. Cum hoc quæ pax esse potest?

La.

Latinus Pacatus Theodosij beneficentiam ab Antecedentibus eximiè commendat; à pravijs scilicet promissionibus, quibus tanta inerat humanitas, & fides, ut iam pro summis essent beneficijs.

Nihil ita primoribus labris polliceris, quin promisso fidem subdas, & verba re fancias. Nemo iam nemo beneficia, quæ dederis, ab eo credit tempore computanda, quo dederis: quia tam certa sint, quæ spondes, ut tum videantur accepta; cum spondes. Iam id ipsum, quod antè promittis, nonne de summo purissimæ mentis candore proficiscitur? Nam cuius est animi nec vota hominum fatigare, nec adhibere muneribus artem difficultatis, sed denuntiare præstanda; ut & prolixior sit sensus bonorum; nec repentina felicitas attonitos, & similes reddat ingratis? Animos enim nostros subitis affectibus impares perindè lætitia, ac dolor, si deprehendat, externat. An non illa Romana pietatis notissimæ mater, nuntio mali Cannensis exterrita, filio reduce, quem flebat, dirigit in mortem; nec par esse gaudio potuit, quæ superfuerat orbitati? Conscius igitur Cælestis arcani, & naturalium depositorum, maius hominibus sperata procedere, quàm insperata.

superuenire beneficia: nec immerito; nanque fugitiua successuum repentiorum voluptas, vt occupat, sic relinquit: felicitas longior est, expectare securum. Itaque cum haecenus natura esset statutum, vt bona sua homines nescirent, & tum primum inciperent felicitate gaudere, cum coepissent esse felices; tu promittendo praestanda inuenisti tempus, quod nobis natura subtraxerat; vt quos adepta solum iuuabant, etiam adipiscenda delectarent.

D. Ambrosius Protoparentis culpam à Consequentibus malis exaggerat. *De uocatione Gentium l. pr. c. 3.*

Omnes naturae nostrae incolumitatem *primi* hominis prauaricatione perdidimus. Inde tracta mortalitas, inde multiplex animi, corporisque corruptio; inde ignorantia, & difficultas, curae inutiles; illicitae cupiditates, sacrilegi errores, timor vanus, amor anxius, iniusta gaudia, poenitenda consilia, & non minor miseriorum multitudo, quam criminum.

Saepe aliquantò latius Antecedentia, & Consequentia sumuntur pro ijs omnibus, quae rem praecedunt, vel subsequuntur; atque haec frequentissima sunt in Amplificationibus, ac Descriptionibus. Quid enim visitatius, quam

In varijs rerum humanarum vicibus exprimendis præteritorum cum præsentibus collatio, aut ex his coniectura futurorum?

Cicero *pro L. Murena circa finem Orationis*, illius præsentem calamitatem deplorat præcedenti dignitati comparatam.

Modò maximo beneficio Populi Romani ornatus fortunatus videbatur, quod primus in familiam veterem, primus in municipium antiquissimum, consulatum attulisset: nunc idem squalore sordidus, confectus morbo, lacrymis, ac mærore perditus, vester est supplex Iudices, vestram fidem obtestatur, misericordiam implorat &c.

Latinus Pacatus *in Paneg. Theod. circa finem exordij*.

Quin illud me impulit ad dicendum; quòd vt dicerem nullus adigebat: non enim iam coacta laudatio, & expressæ metu voces periculum silentij redimunt. Fuerit, abieritque tristis illa facundiæ ancillantis necessitas; cùm trucem dominum auras omnes plausuum publicorum ventosa popularitate captantem mendax assentatio titillabat; cùm gratias agebant dolentes, & Tyrannum non prædicasse Tyrannidis accusatio vocabatur. Nunc
par

par dicendi, tacendiq; libertas, & quàm promptum laudare Principem, tam tutum filuisse de Principe. Libet igitur redditam postliminio securitatem loquendo experiri: libet inquam, quia neminem magis laudari Imperatorem decet, quàm quem minùs necesse est.

Ovidius *lib. pr. Metam.* in descriptione diluviij.

Occupat hic collem, cymba fedet
alter adunca;

Et ducit remos illic, vbi nuper
ararat.

Et modò quà graciles gramen
carpsere capellæ,

Nunc ibi deformes ponunt sua
corpora phocæ.

Consequentia Ominationibus, ac futurorum Descriptionibus aptissima sunt. Ex hoc loco Tullius *in Cat. 4.* subiicit oculis excidium, quod futurum præuidet, nisi perduellium furor comprimatur.

Videor enim mihi hanc Urbem videre, lucem orbis terrarum, atque arcem omnium gentium, subito vno incendio concidentem. Cerno animo sepultam Patriam, atque insepultos acervos ciuium. Versatur mihi ante oculos aspectus Cethegi, & furor in vestra cæde bacchantis. Cùm verò mihi proposui regnantem Lentulum,

sicut ipse se ex factis sperasse confessus est, purpuratum hunc esse Gabinium, cum exercitu venisse Catilinam, tum lamentationem matrum familias, tum fugam virginum, atque puerorum, ac vexationem Virginum Vestalium perhorresco.

De Repugnantibus.

CAPVT VNDECIMVM.

REPUGNANTIA sunt ea, quæ neque certa lege, neque certo numero inter se dissident, at simul stare non possunt; ut amare, & nocere. A Boetio definiuntur Contrariorum consequentia: quare toties fiunt Repugnantia, quoties vni Contrariorum opponuntur, quæ alteri conueniunt. Ut si edendi auaritia, & mensarum luxus, quæ intemperantiæ conueniunt, cum temperantia conferantur.

Aliqui huc omnia referunt, quæ sunt inter se diuersa, ac disparata. Et ita innumera certè sunt Repugnantia; cum res quælibet cæteris repugnet, quæ non sunt ipsa: lapis enim ex.gr. repugnat arbori, pisci, volucris, & cuicumque rei, quæ sit aliquid aliud, quam idem lapis.

Cicero pro Sexto Roscio colligit à
Re-

Repugnantibus illius innocentiam, & confictum ab Erucio crimen refellit. Ipsum accusatorem alloquitur.

Et simul tibi in mentem veniat facito, quemadmodum vitam huiusce depinxeris. Hunc hominem ferum, atque agrestem fuisse; nunquam cum homine quoquam collocutum esse, nunquam in oppido constitisse. Qua in re prætereo illud, quod mihi maximo argumento ad huius innocentiam poterat esse, in rusticis moribus, in victu arido, in hac horrida, incultaque vita huiusmodi maleficia gigni non solere.

Illud quæro; is homo, qui (vt tu te dicis) nunquam inter homines fuerit, per quos homines hoc tantum facinus, tam occultum, absens præsertim conficere potuit?

Pro P. Sylla eundem tuetur ex hoc loco à suspicione coniurationis.

In hoc vos pudore iudicii, & in hac vita, tanto sceleri locum fuisse creditis? aspiciate ipsum; contuemini os; conferte crimen cum vita, usque ad hoc tempus explicata: tum crimen recognoscite. Mitto Remp., quæ fuit semper Syllæ carissima; hos ne amicos, tales viros, tam cupidos sui, per quos res eius secundæ quondam erant ornatae, nunc subleuantur aduersæ, cru-

delissimè perire voluit; ut cum Lentulo, & Catilina, & Cethego foedissimam vitam, ac miserrimam turpissima morte proposita degeret? Non, inquam, cadit in hos mores, non in hunc pudorem, non in hanc vitam, non in hunc hominem ista suspicio.

Idem *pro L. Murena* saltatoris conuitium, quod in eum Cato coniecerat, à Repugnantibus diluit.

Saltatorem appellat L. Murenam. Cato, maledictum est, si verè obijcitur, vehementis accusatoris, sin falsò, maledici conuitiatoris. Quare, cùm illa sit autoritate, non debes M. Cato arripere maledictum ex triuio, aut ex scurrarum aliquo conuitio, neq; temerè Consulem populi Romani saltatorem vocare; sed conspicere, quibus præterea vitij affectum esse necesse sit eum, cui verè illud obijci possit. Nemo enim ferè saltat sobrius, nisi fortè insanit, neque in solitudine, neque in conuiuio moderato, atque honesto. Intempestiui conuiuij, amoeni loci, multarum deliciarum comes est extrema saltatio. Tu mihi arripis id, quod necesse est omnium vitiorum esse postremum, relinquis illa, quibus remotis hoc vitium omnino esse non potest? Nullum turpe conuiuium, non amor, non comestatio, non libido, non sumptus ostendi-

ditur ; & cùm ea non reperiantur , quæ voluptatis nomen habent , quæque vitiosa sunt ; in quo ipso luxuriam reperire non potes , in eo te umbram luxuriæ reperturum putas ?

De Causis.

CAPVT DVODECIMVM.

CAUSA est ; quæ per se producit effectum : Ita Deus prima est rerum creatarum Causa , quas omnes infinita sua virtute producit .

Quatuor sunt Causæ , **EFFICIENS** , **MATERIALIS** , **FORMALIS** , & **FINALIS** .

CAUSA EFFICIENS est , à qua res fit . Sic Pictor est Causa Efficiens picturæ . Huic subduntur Causæ adiuuantes , seu instrumentales ; cuiusmodi sunt instrumenta , quibus vititur Efficiens ad producendum effectum . Huc etiam referuntur Causæ interimentes , seu destruentes : vt morbi , qui sanitatem , seditiones , quæ publicam quietem euertunt .

CAUSA MATERIALIS completitur omnem materiam . **MATERIA** est id , ex quo , vel in quo res fiunt , vel circa quod efficientis actio versatur . Ita colores sunt materia , ex qua fit

pictura; tabula est materia, in qua pictura exprimitur; res pingendæ sunt materia, circa quam Pictor artem suam exercet.

CAUSA FORMALIS omnes rerum formas complectitur. *FORMA* est, per quam re se est id, quod est, & distinguitur à cæteris. Diuiditur in intimam, & externam. Forma, intima est, quam Philosophi *essentialem* vocant, pertinens ad rei substantiam. Sic anima rationalis est hominis forma.

Externa est subiecta sensibus rerum species, siue sit à natura, siue ab arte proueniat; & consistit in certa quadam figura, partium dispositione, & colore. Ita corporis pulchritudo externa hominis forma est; elegantia, & proportio membrorum forma simulacri.

CAUSA FINALIS est finis, propter quem aliquid fit. Sic præda referenda est Causa Finalis, seu finis venationis, lucrum mercaturæ, præmium laboris.

A Causis Efficientibus illud est Ciceronis in *Verrem Act. 2.*

Multa & in Deos, & in homines impiè, nefarièque commisit, quorum scelerum poenis agitatur, & à mente, consilioque deducitur. Agunt eum præ-

Gipitem pœnæ ciuium Romanorum, quos partim securi percussit, partim in vinculis necauit; partim implorantes iura libertatis, & ciuitatis in crucem sustulit. Rapiunt eum ad supplicium Diypatrij: quòd iste inuentus est, qui è complexu parentum abreptos filios ad necem duceret, & parentes pretium pro sepultura liberum posceret. Religionem verò, cæremoniæque omnium sacrorum, fanorumque violatæ, simulacraque Deorum, quæ non modò ex suis templis ablata sunt, sed etiam iacent in tenebris ab isto retrusa, atque abdita, consistere eius animum sine furore, atque amentia non sinunt.

Ex hoc eodem loco illud est Senecæ *epist.* 78. *ad Lucillum*, vbi de instaurata bona valetudine loquitur.

Quæ mihi tunc fuerit solatio dicam, si prius hoc dixero, ea, quibus acquiescebam, vim medicinæ habuisse. In remedium cedunt honesta solatia, & quidquid animum erexit etiam corpori prodest. Studia mihi nostra salutis fuerunt. Philosophiæ acceptum fero, quòd surrexi, quòd conualui: illi vitam debeo, & nihil minus debeo. Multum mihi contulerunt ad bonam valetudinem amici, quorum adhortationibus, vigilijs, sermonibus alleuabar. Nihil æquè Lucili virorum opti-

me ægrum reficit, atque adiuuat, quàm amicorum affectus &c.

Idem à Causa Materiali, & Formali splendidam suppellectilem describens elegantissimè carpit profusi luxus insaniam *Lib. 7. de Beneficijs cap. 90.*

Video elaboratam scrupulosa distinctione testudinem, & foedissimorum; pigerrimorumque animalium testas ingentibus pretijs emptas; in quibus ipsa illa, quæ placet, varietas subditis medicamentis in similitudinem veri coloratur. Video istic mensas; & æstimatum lignum Senatoris censu, eò pretiosius, quò illud in plures nodos arboris infelicitas torfit. Video istic crySTALLINA, quorum accendit fragilitas pretium. Omnium enim rerum voluptas apud imperitos ipso, quo fugare debet, periculo crescit. Video murrhina pocula: parùm scilicet luxuria magno fuerat; nisi quod vomant, capacibus gemmis inter se propinarent. Video vniones non singulos singulis auribus comparatos: iam enim exercitatae aures oneri ferendo sunt. Iunguntur inter se, & insuper alij binis supponuntur. Non satis muliebri infania viros subiecerat, nisi bina, ac terna patrimonia auribus singulis pependissent. Video sericas vestes, si vestes vocandæ sunt, in quibus

bus nihil est, quo defendi aut corpus, aut denique pudor possit.

Lactantius Firmianus à Causa Efficiente, Formali, & Finali hominem commendat.

De Opificio Dei cap. 8.

Cùm igitur statuisset Deus ex omnibus animalibus solum hominem facere Cælestem, cætera vniuersa terrena, hunc ad Cœli contemplationem rigidum erexit, bipedemque constituit; scilicet ut eadem spectaret, vnde illi & origo est. Illa verò depressit ad terram, ut quia nulla his immortalitatis expectatio est, toto corpore in humum proiecto ventri, pabuloque seruirent. Hominis itaque solius recta ratio, & sublimis status, & vultus Deo Patri communis, ac proximus, originem suam, fictoremque testatur.

D. Ambrosius humanæ vitæ infelicitatem exaggerat, à Causis, quæ miseram illam efficiunt. *Tom. 5. Orat. 8.*

Nunquid ergo; quod viuimus in hoc Mundo, dicere vitam possumus; quam humores corrumpunt, dolores extenuant, ardores exsiccant, aeris inclementia morbis reddit obnoxiam, escæ inflant, ieiunia macerant, ioci dissoluunt, tristitiæ consumunt, solitudo coarctat, securitas hebetat, diuitiæ iactant, paupertas deijcit, iuuentus ex-

tollit, senectus incuruat, infirmitas frangit, mæror deprimit, & his omnibus malis mors furibunda succedit?

Idem hominem definit à Forma intima, & substantiali *lib. 6. Hexam. c. 7.*

Aliud sumus nos, aliud sunt nostra, aliud, quæ circa nos sunt. Nos sumus; hoc est anima, & mens. Nostra sunt corporis membra, & sensus eius. Circa nos pecunia est, serui sunt, & vitæ istius apparatus. Tibi ergo attende, & te ipsum scito; hoc est, non quales lacertos habeas, non quantam corporis fortitudinem, non quantas possessiones, quantam potentiam, sed qualem animum, ac mentem; unde omnia consilia proficiscuntur, ad quam operum tuorum fructus refertur.

Cicero *pro Archia Poeta* Virtutis finem esse gloriam ostendit.

Nullam enim Virtus aliam mercedem laborum, periculorumque desiderat, præter hanc laudis, & gloriæ. Qua quidem detracta, ludices, quid est quod in hoc tam exiguo vitæ curriculo, & tam breui tantis nos in laboribus exerceamus? Certè, si nihil animus præsentiret in posterum, & si quibus regionibus vitæ spatium circumscriptum est, eisdem omnes cogitationes terminaret suas, nec tantis se laboribus

bus frangeret, neque tot curis, vigilijsque angeretur, neque toties de vita ipsa dimicaret.

De Effectis.

CAPVT DECIMVM TERTIVM.

EFFECTA dicuntur à Tullio, quæ sunt orta de Causis. Tot eorum sunt species, quot Causarum: nam quælibet Causa suum habet Effectum; immò & in vnum omnes concurrunt. Sic ad Frænum ex.gr. faciendum concurrunt Faber, vt Causa Efficiens; Ferrum, vt Materia; Figura Fræni, vt Forma externa; Causa regendi equi, vt Finis, propter quem fit Frænum. Quanuis autem Finis prius Causam Efficientem ad agendum moueat, antequam suum producat Effectum, nonnisi post Effectum obtinetur. Hinc illud est Philosophorum axioma. *Quod primum est in intentione, ultimum est in executione.*

Cùm igitur effecta sint orta de Causis, ita inuicem connectuntur, vt ex duobus Locis vnus propemodum fiat, nam cùm agimus de Effectis, inquirimus eorum Causas; cùm de Causis, confugimus ad Effecta. Sed cùm hæc illis notiora sint, facilius Oratori occurrunt, & maximam præbent Oratoriæ

tioni fecunditatem.

Cicero *lib. pr. Tusc. Questionum :*
Philosophiam ab Effectis laudat.

Philosophia verò omnium mater artium, quid est aliud, nisi, ut Plato ait, donum, ut ego, inuentum Deorum? hæc nos primùm ad illorum cultum, deinde ad ius hominùm, quod situm est in generis humani societate, tum ad modestiam, magnitudinemque animi erudiuit; eademque ab animo tanquam ab oculis caliginem dispulit; ut omnia supera, infera, prima, ultima, media, videremus. Prorsus hæc diuina mihi videtur vis, quæ tot res efficiat, & tantas.

Idem *lib. 2. de Natura Deorum* Eloquentiam commendans.

Iam verò domina rerum eloquendæ vis quàm est præclara, quàmque diuina! quæ primum efficit, ut quæ ignoramus discere, & ea quæ scimus, alios docere possimus. Deinde hac cohortamur, hac persuademus, hac consolamur afflictos, hac deducimus perterritos à timore, hac gestientes comprimimus, hac cupiditates, iracundiasque restringimus. Hæc nos iuris, legum, urbium societate deuinxit. Hæc à vita immani, & fera segregauit &c.

Seneca *de consolatione ad Marciam*
cap. 30. optabilem esse potius, quàm

hor-

horrendam mortem ostendere conatur, luculentum illi ab Effectis præconium texens.

O ignaros malorum suorum, quibus non mors, ut optimum inuentum Naturæ laudatur: quæ siue felicitatem includit; siue calamitatem repellit, siue satietatem, aut lassitudinem senis terminat, siue inuenile ætatem, dum meliora sperantur; in flore deducit, siue pueritiam ante duriores gradus reuocat, omnibus finis, multis remedium, quibusdam votum, de nullis melius merita, quàm de his, ad quos venit, antequam inuocaretur. Hæc seruitutem inuito Domino remittit. Hæc captiuorum catenas leuat; hæc è carcere educit, quos exire imperium impotens vetuerat. Hæc exulibus, in patriam semper animum, oculosque tendentibus ostendit, nihil interesse inter quos quisque iaceat. Hæc ubi res fortuna malè diuisit, & æquo iure genitos alium alij donauit, exæquat omnia. Hæc est, quæ nihil quicquam alieno fecit arbitrio: hæc est, in qua nemo humilitatem suam sensit: hæc est, quæ nulli paruit &c.



De Comparatione.

CAPVT DECIMVMQVARTVM.

COMPARATIO est, quæ duo, vel plura conferuntur, spectata eorum quantitate; atque ideo à Similitudine differt, quæ tantum considerat rerum qualitatem; ut scilicet quale est vnum Simile, tale sit alterum in ea ratione, quæ inter se conferuntur. At Comparatio æqualitatem, vel inæqualitatem spectat: hoc est, ut comparata vel paria sint, vel maiora, vel minora.

Paria sunt, quæ eiusdem sunt quantitatis, seu quæ nec elationem habent, nec submissionem; sunt enim inter se æqualia. (a)

Maiora dicuntur, quæ maioris momenti, ac ponderis in comparatione sunt: Minora, quæ minoris; nec aliter sentire videtur Tullius in *Topicis*, & Quintilianus *lib. 5. cap. 10.* De his tamen plures, diuersasque valde Scriptorum sententias vide apud Carbonem *lib. 4. de Inuentione cap. 4.*

Tripliciter ergo Comparatio tractatur: à Pari: à Maiori ad Minus: à Minori ad Maius.

A Pari; cùm Paria Paribus conferuntur.

à Senec. Rhet. de diff. Topicis.

runtur. ex. gr. Quotquot adhuc vixere mortales aliqua calamitas exercuit. Nos quoque, dum viuimus, prement aduersa.

A Maiori ad Minus; cùm Minus deducitur ex Maiori. ex. gr. Fortis, & impiger animus ægrè luctatur in vitia. Hæc ne vincet ignauus, & mollis? *Minus utique poterit ignauus, quod fortis vix potest.*

A Minori ad Maius; cùm Maius colligitur ex minori. ex. gr. Si plectendus est, qui læsit verbo; an non ille puniendus, qui cedit ferro? *Graviorem certe meretur poenam grauior culpa.*

Vtitur sæpe Comparatione Cicero, præsertim à Minori ad Maius, quæ frequentior est. Sic *pro Archia Poeta.*

Homerum Colophonij Ciuem esse dicunt suum, Chij suum vindicant, Salaminij repetunt, Smirnæi verò suum esse confirmant. Itaque etiam delubrum eius in Oppido dedicauerunt: permulti alij pugnant inter se, atque contendunt. Ergo illi alienum, quia Poeta fuit, post mortem etiam expetunt: nos hunc viuum, qui & voluntate, & legibus noster est, repudiabimus?

A Maiori ad Minus, illa est *in Diuinatione contra Q. Cæcilium.*

Quòd si ego hæc propter magnitudinem rerum, ac difficultatem assequi non

non potui, qui in omni vita nihil aliud
egi; quàm longè tute ab his rebus abesse
arbitrare, quas non modò nunquam
antea cogitasti; sed ne nunc quidem,
cùm in eas ingrederis, quæ, & quantæ
sint suspicari potes?

A Pari pro L. Sylla.

Neque verò quid mihi irascere in-
telligere possum. Si quòd eum defen-
do, quem tu accusas; cur tibi quoque
ipse non succenseo, qui accusas eum,
quem ego defendo? Inimicum, inquis,
accuso meum: & amicum ego defendo
meum.

At præter vim Argumentationis,
maximam quoque Amplificandæ, &
illustrandæ Orationi vtilitatem affert
Comparatio, tam ad laudem, quàm ad
vituperationem aptissima; cùm æquè
virtutes, ac vitia magis comparata elu-
cescant.

Latinus Pacatus Theodosij tyroci-
nium eximiè commendat, eundem
clarissimis bellatoribus conferendo, ac
præferendo.

Et priùs quidem, quàm ad illa ve-
niam, quæ æui maturus egisti, summa-
tim tuum illud attingam cum Patre
diuino Castrense Collegium; actas sub
pellibus hyemes, ætates inter bella su-
datas; dies, noctesque præliando, aut vi-
gilando consumptas, grauissimas pu-
gnas

gnas terra , marique pugnatas . Non tam patiens Africanus rudimenta militiæ sub Paulo Patre tolerauit , nec pari indole Annibal puer in tentoria Hispana successit , nec futurarum spe certiore virtutum Philippæa castra Alexander nondum Magnus impleuit . Quos cæsi plurima laude donauerit amplificatrix veri Vetustas , nihil tamen plus blanda prestitit , quàm , vt eos his annis secutos Regum , aut Ducum Castra vulgaret ; in quibus tu ita fortiter multa gessisti , vt ea non tantùm Alexander , aut Africanus , aut Annibal videre , dum discerent , sed parentes , atque institutores eorum optassent facere , dum docerent .

Paulo inferius eundem quandoque rusticantem à Pari laudat .

Iam si placuisset Oppida rure mutare , vt tu vitæ oblitus vrbane exequabar agricolam ! audio Imperator , & credo , sæpe aliqua laborum tibi iniunxisse ; & ne contraheres corporis veterum , huiuscemodi semper opere insidiantis otij terfisse rubiginem . Sic agrestes Curiij , sic veteres Coruncani , sic nomina reuerenda Fabricij , cùm induciæ bella suspendebant , inter aratra vivebant ; & ne virtus quiete languesceret , depositis in gremio Capitolini Iouis laureis triumphales viri rusticabantur .

Gra-

Graues, moratasque Comparationes dabit abundè Plutarchus in Paralellis Illustrium Virorum Vitis, in quibus Græcos, ac Latinos Heroes, quasi reuocans ad examen, singulos singulis ita confert, vt qua Virtutum laude, qua labe Vitiorum alter alteri præstiterit, ipsa contentione clariùs ostendat.

Frequentissima sunt in Comparationibus Exempla, vt ex his, quæ superiùs attuli, cognoscere potes: quare à multis ad hunc Locum, nec immeritò, reuocantur. Hæc Tullij suffragio *Act. 5. in Verrem* plurimum solent authoritatis habere ad probandum, & iucunditatis ad audiendum.

EXEMPLVM Est alicuius facti, aut dicti præteriti, cum certi Authoris nomine, propositio. Ad Herennium lib. 4., vt si ad bellicam Ducis virtutem commendandam illum Coclitæ conferas, qui solus impetum hostium sustinuit. Nec plura subijcio; cum & præmissa sufficere hoc loco possint, horumque copia sit à Scriptorum, præsertim Historicorum, paginis haurienda. Nec desunt, qui Exemplorum Sylvas collegerint, vt Valerius Max., Baptista Fulgosi, Officina Textoris &c.

In seligendis Exemplis primùm spectanda est Scriptoris fides; ne inania commenta, vel fabulæ aniles violata

Ora-

Orationis grauitate vendantur pro certis. Et quidem audisse memini ab Oratore fabulosa Heroum portenta; quæ à soluto Poemate curiosus lector deprompserat, pro historicis factis afferri. Antiqua plus fortasse authoritatis habebunt: recentiora plus gratiæ; maximè à Patriæ, vel Gentis Annalibus petita.

Tractantur Exempla, vel per congeriem, plura pressius colligendo; in quibus tamen enumerandis modus adhibeatur; nec tam multa quærantur, quàm apta: vel vnum præstantius dilatatur, ac Figuris illustratur. Quæ ratione factum dilatari, illustrari, subijciue oculis possit inferius docebo.

Quintilianus *libro 5. cap. 11.* Exempla cum Fabulis, ac Poëticis Narrationibus confundit. At Exempla propriè illa dicimus, quæ à veris hominum Factis desumuntur. Idem Comparationi Fictionem subijcit, qua sæpius Oratores vtuntur. Est autem Fictio, *Græcè Hypothesis*, ficti Exempli species cum aliqua conditione proposita, qua data quærimus, quid futurum esset, si res ita se haberent; aut inde aliquid aliud ad rem nostram deducimus.

Cicero in *Catilinam* pr.

Si te parentes timerent, atque odissent tui, neque eos vlla ratione placare pos-

posses; ut opinor, ab eorum oculis aliquò concederes. Nunc te Patria, quæ communis est omnium nostrum parens, odit, ac metuit, & iamdiu te nihil iudicat, nisi de parricidio suo, cogitare. Huius tu, neque auctoritatem verebere, neque iudicium sequere, neque vim pertimesces?

De Locis extrinsecis.

CAPVT DECIMVMQVINTVM.

QUæcumque Locis extrinsecis continentur, vnica possem Auctoritate cum Tullio complecti. Cum tamen in plura capita, quæ antea numerauimus, à Fabio *lib. 5. cap. pr.* diuidantur, singula breuissima explicatione percurram; nec enim diligentior rem à nobis curam exposcunt, ad Forenses magna ex parte Causas pertinentia, à quibus nostra hæc Eloquentia recessit.

PRÆIUDICIA sunt iudicia, seu sententia iam pronuntiata de presenti, vel simili causa.

FAMA, seu *RV MOR*, est sermo vulgatus, multitudinis consensu confirmatus.

TORMENTA, quæ etiam *Quæstiones* dicuntur, sunt *Cruciatus*, quibus

ve-

veritas extorquetur à reo.

IVS IVRANDVM est affirmatio, vel negatio alicuius rei, religioso ritu facta.

TABULÆ sunt ad rei fidem prolata scripta, siue publica sint, siue priuata.

TESTES sunt, qui rem testimonio suo confirmant. Duplex testimonium est; Diuinum, & humanum. Diuinum, cuius est author ipse Deus, vel per se statim, vel per alios; & complectitur quæ à Religione auctoritatem habent; cuiusmodi erant apud priscæ superstitionis cultores Oracula, Auspicia, Vaticinia, Sacerdotum, & Haruspicum responsa; quibus adde monstra, portenta; seruata de Cælo, somniorumque interpretationes inanissimas, immò, & Soricum occentus, quæ cæca Vetustas ridenda obseruatione consecrauit. Vide Alexandrum ab Alexandro *lib. 5. cap. 13.* & Plinium *lib. 8. cap. 57.*

Apud nos Diuini verè testimonij vim habent Sacræ Literæ, Diuinitus reuelata Mysteria, & Ecclesiæ auctoritas.

Testimonium humanum dicitur, cuius author est homo. Addunt aliqui Angelicum, tanquam à duobus alijs distinctum.

Huc præterea referuntur Leges Diuinæ, & Humanæ, Sententiæ Sapientium, Prouerbia, Symbola, & quæcumq; ad rem ornandam, exaggerandam, con-

confirmandam extrinsecus assumuntur; quæ omnia non excogitantur à nobis, sed aliorum doctrina, & erudita lectione quaeruntur.

Ex his omnibus Extrinsecis Locis vnicum nobis vltimum seruauimus, reliquis in tribumalia dimissis. Ab vnico tamen illo non leue subsidium est, quæuis aduentitias tantum suppetias ferat; immò externa quandoq; auxilia plus roboris habent, quàm rerum intimæ vires, aut sanè harum tenuitati succurrunt. Et Maiorem quidem auctoritas Orationi fidem affert, ac ornatum. Accersenda itaque ad rem nostram Veterum testimonia; atque hæc, vel ab ipsis Authorum fontibus, quod tutius est, haurienda, vel ab eorum Collectoribus. Adi Poliantheam nouissimam, Flores Poetarum, Andreæ Eborensis, Apophtegmata veterum, aliaq; huiusmodi sententiarum promptuaria. Sed memineris non tam harum copiam, quàm delectum laudari, nec optimas eas cenferi, quæ verbis redundant; at quæ sensu excellunt, suntque magis rebus accommodatæ. In citandis Authoribus, eorumq; sententijs, huiusmodi formulas poteris adhibere.

Virtus Liuius teste *maturescit*, *senescentibus virijs*. Vel : vt cum Liuius loquar, vt Liuij verbis vtar, vt est apud

Liuium, ex Liuiio. Accedit Plinij authoritas. Non dissentit Plautus. Consonat Ouidij carmen. Subscribit, suffragatur, assentitur Plato. In eandem sententiam iuit Aristoteles. Hoc idem calculo suo Boetius confirmat. Te nunc testem voco, te appello Philosophorum antistes. Vt me terres grauitate sententiae tuae Gentium Doctor! Sentio me tuis vocibus excitari eximie Veritatis præco. Quis non totis artibus contremiscat ad illa Pauli fulmina veriùs, quàm verba? Doctrinae austeritatem mellea condit sententia Bernardus. Addit rei pretium aurea sanè authoritate Chrysostomus Audio Saluiani minas. Audire videor tonantem è suggestu Saluianum. Superuacuas hominum curas ridebat Sapientissimus Regum. Indignabatur, dolebat, ferre non poterat Diogenes, *maiozem temperandis fidibus, quàm moribus componendis, operam dari*. Mirari se Socrates dicebat. Mirabatur Socrates. Socratem eos mirari solitum ferunt, *qui hominem ex lapide fingere maximo studio niterentur, at neglecto animi cultu vix differrent à lapide*.

Indiuiduam malitia comitem esse miseriam docuit Augustinus.

Diuitias laqueos esse Diaboli monet sapientissimus Præsul Ambrosius.

Bonorum salutem custodit (si Lactantio credis) qui malos punit .

Quot vitia , tot animæ tormenta invenies . Ita grauissimè Hieronymus .

Si me non audis , audi quid sentiat dignitate , sanctitate , doctrina ter Maximus , ne dum Magnus Gregorius , *Pluit , inquit , vitium , ubi pluit aurum .*

Consule Ambrosium . Dicet &c. Quære ab Augustino . Docebit &c. Roga Hieronymum . Respondebit &c.

Hoc est quod voluebas animo seuerissime morum magister Seneca ; cùm diceres : *Marcere sine aduersario virtutem .*

Semper timere malos author Plutarchus est .

O te miserum ! (exclamaret Agefilus) *qui in rebus malis tam fortis es .*

Rem acu tetigit Iuuenalis , cùm cecinit , *Probitas laudatur , & alget .*

Virtutem intra eos fines clausit Horatius . *Quos ultra , citraque nequit consistere rectum .*

Instar oraçuli fuit vox ea Thaletis , cùm interrogati , quid esset maximè difficile ,

Seipsum nosse , respondit

Aurum indice lapide ; bonorum malorumq ; mentes auro probari voluit Chilo .

Venit in mentem festiuum Petronij carmen . *Quiduis numis presentibus opta ,*

Et veniet &c .

Am.

Amplificationis Praxis.

*Qua ratione rerum Copia possit à Locis
oratorijs ad Amplificationem
deduci.*

CAPVT DECIMVMSEXTVM.



T habenti otiosa est quantumuis luculenta supellex, quæ ad nullos usus promatur ex arca, ita nihil prodest seposita in Locis rerum copia, nisi hanc ex eorum sinu ad Amplificationem edu- cas. Quæris quomodo id fiat? primò non nisi labore, ac studio: neque in- incipientibus eam diligentiam impro- bauerim, quam in prouectioribus tan- quam lentam, ac miseram Quintilia- nus damnat. *Lib. 5. cap. 10.*, vt scili- cet singillatim Locos explorent, ac ve- lut ostiatim pulsant; non vt dicendi materiam ab omnibus extorqueant, sed à commodioribus hauriant. Cæ- terùm sensim exercitatio curam hanc minuit; vt denique Loci vel non quæ- siti se se vltro scribentibus offerant. At quoniam aliqua magis distincta ratio principijs tradenda est, quæ hac de re

vttiliora , obseruatione , ac præstantiorum Authorum lectione collegi , quàm breuissimè potero , exponam .

Cùm tibi propositum fuerit Amplificationis Thema ; singulas illius partes expende , ac vide , quinam singulis Loci conueniant , ex ijs maximè , quos diximus esse vberiores ; quanuis nullus adeò sit infœcundus , quin aliquam interdum opem Amplificationi possit afferre . Si rei naturam respexeris , occurret Definitio , eaq; siue per Descriptionem latius fundetur , siue pluribus conglobatis Orationem augebit ; si nomen respexeris . Notatio ; si proprietates , occurrent Adiuncta . Cùm agitur de aliqua determinata rerum Specie , illam reuocabis ad Genus , vt inde vberior fluat oratio ; cùm de Genere , aderunt Species , in quas diuidas ; cùm de Toto , Partes ; cùm de Causa , Effecta ; cùm de Effectis , eorum Causas inquires . Quod si spectes rei conuenientiam cum alijs , vel differentiam vel pugnam ; aderunt Similitudines , Dissimilitudines , Comparationes . Contraria , Repugnantia . Non tamen semper hæc omnia in vnum conuenient , nec omnium vbique vsus erit ; at ex his , quæ res feret , seligentur aptiora .

Hæc vbi selecta fuerint , parata iam
ORATIO

erunt stamina, quibus Amplificationem intexas. Quæ verò magis conueniant operi subtegmina Figurarum, qui colores, iudicium decernet; nec enim illarum vsus certas præceptiones habet, sed imitatione, & exercitatione discitur, nec aliter ostendi vtilius, quàm exemplis, potest. Quamobrem & quæ singulis Locis antè subiecimus, & quæ sequuntur, obseruabis. Vt autem videas, quanta vel ab vnico Loco in singulis verbis esse possit vbertas, breue hoc dictum amplificandum propono.

*OMNES FELICITATEM
DESIDERANT.*

Examina singulas huius Propositionis particulas; inuenies vnamquamque aliquod Genus inuoluere: cum Genus (vt monui) sit apud Rhetores quodcunque vocabulum pluribus commune. *Omnes* generale vocabulum est, commune pluribus, qui felicitatem exoptant. Qui nam sunt ij? homines cuiuscunque ætatis, & ordinis: puer, & senior, pauper, & diues, aulicus, miles, mercator &c. *Felicitatem* nomen esse vides diuersis felicitatum speciebus commune, quas homines sibi statuunt, earumque cupiditate rapiuntur.

tur. Huiusmodi sunt otia, commoda vires, firma valetudo, voluptates, honores, imperia &c. *Desiderant.* Hoc verbum pluribus desiderijs commune est, varijsque desiderandi modis, ardentè, assiduè, impatienter, solerter; aut si desiderium felicitatis respicias, vt Causam eorum, quæ homines agunt, ad hunc finem obtinendum, considerabis illius Effecta; cuiusmodi sunt curæ, labores, artes, studia, conatus, pericula, quæ subeunt auidi felicitatis, ad eam inquirendam, & si fieri possit, inueniendam. Iam singulas partes explicemus.

O M N E S.

Vllum ne vnquam in tota hominum natione inueneris, qui non felicitatem exoptet? Omnes cupimus, quam amissimus, & in violatæ innocentiae poenam illius auiditate laboramus. Hanc, si liceat interpretem agere, statim inuocant primi vagitus infantium. Hanc puerorum lacrymæ, adolescentum voces, virorum querelæ, senum suspiria implorant. Hanc petunt supplicum preces, hanc pauperum gemitus rogant, hanc ambiunt vota potentum, hanc Principum conatus inquireunt. Quære, quid speret ab aratro Colonus,

nus, à malleo Faber, ab ense Miles; quid ab æstu fori Causidicus, quid Aulicus à lentæ seruitutis patientia, quid à turbidis commerciorum fluctibus Nun-dinator? vna spes omnium est, vt fortunam sibi propitient, & ad aliquem amatae felicitatis gradum aliquando n-
tantur.

FELICITATEM.

At quam (Deus immortalis!) felicitatem sibi fingunt expetendam? cas-
sam, irritam, vanam. Alius felicem se fore putat, si procul negotijs leni perfruens otio vtcunque obscuram, vtcunque segnem, dum placidam vi-
tam inconcussa tranquillitate compo-
nat. Alius bonorum summam in cor-
poris firmitate locat, vt sit vegetum, robustum, Athleticum, & ægritudi-
nis, ætatis, mortis etiam, si licet, mi-
nas irrideat. Hic si delicijs affluat, voluptatibus innatet, si gulam, ven-
trem, oculos, aures, omnesque sensus oblectamenti demulceat, adijisse cre-
det Elysium. Ille Cræsos prædicat, & Crassos, Midæque manus inuidet om-
nia vertentes in aurum. O si Ganges, Tagus, Pactolus, & quidquid vsquam terrarum est diuitis venæ deriuare posset in arcam! ò vt clausum posside-

re se Iouem gloriaretur. Longè aliter sentiunt, quos vrget ambitus, ac dominandi libido. Horum felicitas in apice stetit, nec vlla est eorum opinione sublimior, quàm, quæ hominum capitibus imminet, penè adoranda Superbia.

DESIDERANT.

Inania quidem, fallacia, turbulenta sunt ista. Sed neminem non allicit vel imaginariæ felicitatis dulcedo. Hac vna trahuntur esca mortales: hæc votorum summa est, hæc meta consiliorum, & expetita operum merces. Quid quæso est, quod vel ardentius ament, vel assidua cogitatione impensius animo reuoluant, vel impatientius expectent, aut solertiùs inquirant? Quæ tanta vis eos impellit; vt durissimis artium laboribus insudent, vt prolixis literarum studijs ætatem, ac vires conterant, vt cruentam subeant Martis aleam, vt posthabitis carissimis penatibus ad ignota litora fragili rate traiciant, & Vlysseis erroribus vagi tot ausis ingentibus noua quotidie pericula perscrutentur? Quid tandem tot improbis curis vitam addicit, nisi parandæ alicuius felicitatis cupido?

Sed

Sed fortassè dices, non omnes tam amplas esse cuiusque argumenti amplificandi partes; nec proinde tam facile dilatarì singulas posse. Ita quidem est: at neque ab omnibus par copia quærenda; immò si fortè in rem omnino sterilem incideris, moneo, ne frustra atandum suscipias; nec enim operam ludas velim, vel arte abutaris. Attamen vix vllum erit propositum Argumentum, cuius aliqua pars Amplificationi, non pateat, dum aliquam speciem Distributionis ferre possit, quæ ad res dilatandas apprimè valet, ut nunc docebo.

*De varijs Distributionum Speciebus,
illarumque ad Ampli-
ficationem, usu.*

CAPVT DECIMVMSEPTIMVM.

DISTRIBUTIO est veluti quædam rerum Anatome, quæ omnes illarum articulos discriminat; quare ceu corpora, quæ contracta minùs apparebant, explicatis membris, quanta sunt ostendit. Atque, ut Sileni Alcibiadis in se conuoluti larvas præferebant informes, aperti Simulacra Numinum exhibebant, ita euenit, ut quod summum dictum parui momenti videbatur,

per Distributionem euolutum, in maiorem, melioremque speciem erumpat.

Tres sunt DISTRIBUTIONIS Species, DIVISIO, PARTITIO, & ENUMERATIO. (a)

DIVISIO est, qua Genus aliquod in suas Species diuiditur.

PARTITIO est, qua Totum in suas Partes diducitur.

ENUMERATIO est, cùm ad rem explicandam illius Causas, Antecedentia, Concomitantia, Consequentia, Effecta singillatim numerando recensemus.

Vbi ergo propositionem aliquam amplificandam susceperis, obseruabis, qua sui parte quam ex his Distributionibus admittat; nam quæuis illarum copiam affert, quæ nulli promptius affluit, quàm qui hac arte anatomica scit idem in plura membra diuidere. At nemo rectè diuidendæ rei rationem inueniet, quin eiusdem naturam perspectam habeat. Quamobrem non sufficit Locorum notitia, nisi etiam accedat cognitio rerum, quam vel usu, vel studio, vel saltem auditu, alijs tradentibus, comparabis. Interim Distributionis usum exemplis disce.

Per Diuisionem sententiam istam amplificat Seneca. *Homines vitam suam*

a Carbo. de eloc. lib. 4. disp. 6,

suam prodigunt, illam prauis cupiditatibus, ac studijs inanibus impendentes. His igitur in plures Species diuisis, quod Sententiæ vnus compendio compressum latuerat, ita distributum extendit.

De Breuitate Vitæ cap. 2.

Non accepimus breuem vitam, sed fecimus; nec inopes eius, sed prodigi sumus.

Alium insatiabilis tenet auaritia : alium in superuacuis laboribus operosa sedulitas : alius vino madet : alius inertia torpet : alium defatigat ex alienis iudicijs suspensa semper ambitio, alium mercandi præceptus cupiditas circa omnes terras, omnia maria spe lucri ducit. Quosdam torquet cupido militiæ, nunquam non aut alienis periculis intentos, aut suis anxios. Sunt, quos ingratus Superiorum cultus voluntaria seruitute consumat. Multos aut affectatio alienæ fortunæ, aut suæ odium detinuit : plerosque nihil certum sequentes vaga, & inconstans, & sibi displicens leuitas per noua consilia iactauit. Quibusdam nihil, quò cursum dirigant, placet ; sed marcentes, oscitantesque fata deprehendunt : adeò vt, quod apud maximum Poetarum more oraculi dictum est, verum esse non dubitem.

Exigua est pars vitæ, quam nos vivimus.

Aspice illos ad quorum felicitatem concurritur : bonis suis effocantur . Quàm multis graues sunt diuitiæ ? quàm multorum eloquentia quotidiano ostentandi ingenij spatio sanguinem educit ? quàm multi continuis voluptatibus pallent ? quàm multis nihil liberi relinquit circumfusus clientum populus ? omnes denique istos ab infimis vsque ad summos pererra. Hic aduocat, hic adest, ille periclitatur, ille defendit, ille iudicat . Nemo se sibi vindicat : alius in alium consumitur . Interroga de istis , quorum nomina ediscuntur, his illos dignosci videbis notis . Hic illius cultor est , ille illius, suus nemo .

Vitam unusquisque quàm multis distribuit .

Hinc sententiam eandem Partitione dilatat, reuocando ad calculos exactæ vitæ partes , & Enumeratione Antecedentium , quibus absumpta est longæui etiam hominis vita ; vt proinde immaturus mori dici possit. *Ibidem cap. 3.*

Licet itaque ex seniorum turba comprehendere aliquem . Preuenisse te ad vltimum ætatis humanæ videmus ; censeamus tibi, vel supra ; premitur annus ;

Reus : agendum ad computationem
 ætatem tuam reuoca. Dic quantum ex
 isto tempore Creditor, quantum Ami-
 ca, quantum Reus, quantum Cliens
 abstulerit: quantum lis vxoria, quan-
 tum seruorum coercitio, quantum offi-
 ciosa per urbem discursatio. Adijce
 morbos, quos manus fecimus: adijce
 quod & sine usu iacuit: videbis te pau-
 ciores annos habere, quàm numeras.
 Repete memoria tecum, quando certus
 consilij fueris, quotusquisque dies, vt
 destinaueras, recesserit, qui tibi usus
 tui fuerit, quando in statu suo vultus,
 quando animus intrepidus; quid tibi
 in tam longo æuo facti operis sit; quàm
 multi vitam tuam diripuerint, te non
 sentiente, quid perderes; quantum
 vanus dolor, stulta lætitia, auida cu-
 piditas, blanda conuersatio abstulerit;
 quàm exiguum tibi de tuo relictum sit:
 intelliges te immaturum mori.

Ad vberiore verò Propositionis
 Amplificationem iuuabit plures in ea
 Distributiones inuenire; vel vnius Di-
 stributionis membra Distributionibus
 alijs dilatare. Do exemplum. Ampli-
 ficanda sit hæc Propositio. *Quodlibet*
Elementum gula importunitas vexat.
 Primò Diuisione vteris, *Elementum*
in Terram, Aquam, Aerem, Ignem
 di-

diuidendo. Hinc per Partitionem *Terram* in Campos, Vineas, Sylvas diduces; *Aquam* in Maria, Lacus, Flumina, per quæ gula bacchatur; *Aerem* in varias regiones; *Ignem* in officinas, pluraque ministeria distribues, quibus cogitur gulæ seruire. Tum per enumerationem recensabis Adiuncta modi, quibus gula singula vexat Elementa: *Terram* frugum, fructuum, ac animantium populatione, *Aerem* tot excogitatis ad stragem Avium insidijs, *Aquam* tot piscationum generibus, *Ignem* tam varijs vsibus, quibus illum diu, noctuque exercet ad suas cupiditates explendas. Ex quibus omnibus en quàm ampla confici Amplificatio possit.

**QVODLIBET
ELEMENTVM GVLA
IMPORTVNITAS
VEXAT.**

I. TERRAM.

Quænam impotentior Tyrannis, quàm quæ vniuersum rerum naturam immanissimis exactionibus insatiata perturbat? Cernis lacerum terræ finum, quem assidue dura cultorum manus vomeribus discindit, bipalijs enisce-
rat,

rat; ligonibus fodit, irpicibus carminat? Quorsum tam operosam, & nunquam intermissa laniena, nisi ut alendæ non solum, sed explendæ gulæ fecunditatem extorqueat? At quæ tanta vbertas intemperantiæ fatis esse videatur, quæ, nisi lautissimè luxuriet, annonæ charitate laborat? Parum est quidquid metit ex aruo feracior Ætas, quidquid ex vinetis legit felicior Autumnus, quidquid ex pomarijs, & hortis diues annus largitur. Quantunvis affluentissimo rerum prouentu, & horrea, & cellaria redundant, vix plebeæ fami tanta copia sufficiet. Superbiùs adhuc, & crudeliùs elurit profusa ingluuies, cui desipiunt hæc vulgaria terræ munera, nisi cæterarum animantium cladibus opsonetur. Non satis itaque frugibus, ac vino colitur Deus Venter; maioribus victimis placandus est. Ad profanas huius aras armenta rapiuntur, & greges; quin exhaustis iam, aut vilescuntibus bubili, & caula, sylua tentatur; ut præter minora illa Numina Bacchum, Cererem, Pomonam, Palem, familiares videlicet vernulas, pharetrata quoque Diana gulæ præstet obsequium. Quis numeret vel instructas Venatorum phalanges, vel coactos ad classicum Vertagorum manipulos, vel tot venabula, plagas, tela,

tor;

tormenta ; vt minori apparatu bella tractentur ? Quis miserandas recenseat imbellium bestiolarum strages , quibus illarum penè species luxus humani furor extinxit ? quis quæstas non horreat per vulnera , & mortes hominum , feras , ac metuenda sæpius hostibus pectora vnius apri dente discissa ? Sed tantum est parare gulæ delicias , & periculo capitis indagare , quod sapiat palato . Quin etiam belluarum spolia pro clarissimis trophæis habentur , præfixique foribus rictus , & adhuc metuendæ vnguium minæ , & identidem ostentata in vestibus pellium gestamina ; vt , si redeat monstrorum domitor Alcides , iam videat gregariam esse hanc laudem . Quid profuit naturæ alias armasse terroribus feras , quasdam defendisse latibulis , alijs velocitate , alijs astu consuluisse , omnes remquisse ab hominum conspectu , nemorum umbris , asperis cauitibus , anfractibus , antris , foueisque protectas ? Nihil inausum gulæ , nihil imperuium ; quin auidius appetit prædam , quæ ardua magis indagine commendatur , ipsaque censetur difficultate fapidior .

AQUA

2. *AQVAM.**Per Apostrophem ad gulam.*

Iam per omnes bacchata es terrarum angulos improba gula. Pone hic tuis cupiditatibus modum, teque tuis finibus coerce. Terræ liquidum succedit Elementum, cuius inquilinum esse noluit hominem, qui hunc eduxit ex humo. O frustra præscriptum rebus terminum, ò violata iura, limitesque confusos! è natali solo Tyrannidem tuam transfers in aquas, & Quadrupedum adipe saginata nunc alias expiscaris à Natantium sedibus voluptates. Hic sanè feracissimum inuenisti genus, in quod abundè sæuies. Nec enim vna sæuiendi ratio est. Hos vnco trahis, illos missili fuscina transuerberas, hos irretis, illos illaqueas, quosdam venenas, alios hamis, nallis, tragulis, euerriculis deprehendis incautos. Quam tam rapidi torrentes, quæ tam profunda flumina, qui sinuosi lacus, quæ stagna, quæ paludes, quæ maria, quæ scopuli naufragijs infames, quæ tam remota litora, quæ non adeas, à quibus non repetas epulas vectigales?

AEREM

3. *A E R E M.*

Hæc olim spectabat propè sublimitate sua securus Aer; & imæ quidem regionis partem, finitimam terris, vltro gulæ concesserat. Quid ni enim domesticas arriperet chortis alites, & quas apud se natas in caueis, gallinarijs, columbarijs atiles ad mensarum lautitiem seruaret; vt demum fraudata hospitij fide crudelem repeteret pro alimentis vsuram? Quid autem iuris haberet, siue quid posset in peregrinas aues, à communibus hominum tectis longè remotas, quæ Cœlo liberiores fruuntur? Vtuncque ingeniosa sit gula, nondum alas inuenit. Audite plusquam Dædaleas artes. Cùm volatilis fieri non posset hæc Harpia, quò non poterat vnguibus, peruenit inuentis, & pennas fraude suppluit. Simpliciores auiculas ad pabulum volitantes escarum illicio in decipula traxit: callidiores quasdam sibilo, natium earum idioma imitante, fefellit: captiuas alias sollicitauit ad cantum, vt nota voce gentiles accirent, quæ tristes querelas pro inuitamenti habentes in eiusdem laberentur captiuitatis consortium. Taceo noctuarum mimos, & immissas nidis mustellas, & crudi-

tos

tos ad prædam accipitres. Illitas tenacissimo glutine virgas, crepitacula, terricula, pedicas, laqueos, milleque retium genera referre si velim, me vox prius deficiet, ac dies. Vbinam verò vobis erit certa securitas miserrimæ volucres, cum vestros etiam volatus vibratæ balistis, fistulisque mortes abrumpan? Nusquam tutum animantibus asylum esse patitur gula, quarum se pascit excidijs, & gustus elementa per omnia quarit. *Iuven. sat. 11.*

4. IG N E M.

Idem per Prosopopœiam loquens inducitur.

An etiam ab Igne quæret? nemo sanè quidquam eripuit nihil habenti. Quod vnquam tributum à sterilissimo extorquebit Elemento? Hoc vnum superest, vt Salamandras etiam esuriant, vel adipem exigat à Pyraustis. Ita mecum iocabar, hic saltem arbitratus elusæ voracitati posse me tandem insultare; cum mihi sum visus Ignem ipsum audire stridentibus flammis in hos fermè questus erumpentem. O te nulli parcentem naturæ importunissimam gulam! O inexplibilem aviditatem, cui vni saturandæ cuncta

la-

laborant Elementa! Cùm nihil à me
succi, nihil saporis elicere posses, ope-
ram tibi meam mancipasti, tuarum
libidinum ministram. Ignis ille, pu-
rus, nitidusq; lucis germanus, qui Cælo
acceptam refert originem; fortissimus
ille rerum domitor, & scitissimus arti-
fex; ille ingenuus Heros, nulli clari-
tate secundus, cui finitimum astris,
debetur natale solium, tam indigno
famulatui damnatur, vt diu, noctuque
saginando ventri deseruiat? Neque
munera illa detrecto, vt quidquid in
me virtutis est, non fouendæ solum
humanæ vitæ, sed etiam alendæ lubens
impendam. Sed quandiu torqueor, vt
sordidissimis cupiditatibus indulgeam?
Hoc ne igitur præclarum est, vt qui
thura superis adoleo, quotidie gulam
ganearum nidore propitiem, & dignas
altaribus flammæ condiendis illi victi-
mis exerceam? Hoc ne præclarum, vt
acrius in popinis, quàm in artium offi-
cinis defudem; & cùm animandis
præstem ad mansuram gloriam metal-
lis, calorem potiùs ebullientibus ahenis
vilissimus lixa sufficiam? Video ante
me positas, cæsarum animantium
aceruis, non sine stomacho Larium,
onustas, fluentesque mensas, quæ carni-
ficinam vix deceant. Olida circumstat
ministrorum turba, nescio an haruspi-
ces

ces , an pollinctores vocem , euiscerandis cadaueribus intentos . Nec ijs condiendis exotica defunt aromata (nam & Indus , & Arabs gulæ vectigal persoluunt) vt splendido funeri pyram adornari putes , vel apotheosim parari . Terrestria , aquatilia , volatilia nunc elixare iubeor , nunc assare . Hæc feruens liquato adipe fartago frigit : illa versatili transfixa veru subiecta pruna torrentur : alia minutatim concisa , varioque mersa intinctu sensim in alium saporem tepente fauilla soluuntur : quædam lectioribus medicamentis imbuta clibanis , ollulisq; ad multam noctem coquenda traduntur . Fastidiente siquidem stomacho ciborum argutias excogitauit ars edendi , farta , intrita , embammata , iuscula , pulpamenta , dignaque Deorum Symposijs fercula ; quorum sapidissimis commentationibus Cupedinarij , Structores , Crustularij , Coqui non segniter ingenium , operamque impendunt . His lucubrandis persæpe vigilant ultra Cleanthem Apicij , meque diligentius in foculo seruant , quam Vestæ Sacerdos in ara . Mitto me crapulæ laternarium addici , & inter pernoctantes parasitos inuitas in triclinijs excubias agere , auersante plerunque luce dignissimas tenebris cœnas . Ita si rem exigas ad

cal-

calculos, minus mihi negotij faceffit
 Vulcani labor, quàm cura luxuriæ,
 Dispeream (vt mihi pessimè precer) nisi
 malim insaniienti Chymix seruire. Ite
 nunc auidissimi heluones, meque voraci-
 tatis accusate. Quid gula vestra vo-
 racius, quæ vt satiet ingluuiem suam,
 aut exhaurit, aut lassat, omnia certè
 vexat Elementa?

Prolixius exemplum dedi, vt omnes
 illas Distributionis species vna videres
 Amplificatione collectas. Et multò
 vtrique vberius fundi hæc poterat, si li-
 buisset ferarum, piscium, volucrumq;
 species distinguere: hinc immorari
 describendis venationibus, aucupijs,
 piscationibus &c. at quorsum hæc om-
 nia, aut quandonam finis? Immo id
 maximè seruandum, vt quæ ampli-
 ficanda sunt, diuidantur quidem, non
 conterantur, nec eorum Distributio
 ad infima quæque, ac minuta descen-
 dat. Nec adeò affectanda copia, vt re-
 dundet, cùm & virtus, vbi modus
 defuerit, etiam bonorum excessu di-
 labatur in vitium.

Præter ea, quæ sunt in re, vel circa
 ipsam, illa etiam, quæ rei desunt, quan-
 doq; proderit obseruare: horum enim
 Distributione facilè fiet Amplificatio
 per negationem. Sic illud Tragici *Pe-
 stora*

Flora pauper secura gerit facillimè dilatabis enumerando, & negando de paupere fortunæ bona, quibus caret, & animi mala, quibus minimè cruciatur Sic.

**PECTORA PAUPER SECVRA
GERIT.**

Pauper es? gratias age fortunæ, quæ nulli ferè minùs timenda est, quàm cui minus benefica. Exiguus natum pe-
natibus hominem non circumfluit re-
rum vbertas; at neque premit moles
curarum. Non latè possidet; at ne-
que angitur iacturæ formidine. Non
illum eximit vulgo splendidum patri-
monium; sed non torquet *miseræ ma-
gni custodia sensus*. (a) Arca vacat ar-
gento? Non cruciat animum suspecta
rapacitas. Auro non splendent laquea-
ria? humili tecto non timet invidiam.
Non tegitur ostro, neque mollibus cu-
bat in plumis? viliùs dormientis quie-
tem turbidis cogitationibus non inter-
pellat ambitio. Gemma non bibit?
sincera paupertatis pocula prægusta-
tore non egent. Ille non agris hostes,
non mercibus naufragia, non hæredi-
tatibus lites, non dignitatibus æmulos,
non vitæ imminentem diuitum capiti-
bus

bus maiorum potentiam reformidat ;
& qui iacet in imo , de nullo casu sollicitus , hanc habet in sua calamitate securitatem , quòd nihil videt inferius , quò cadat .

*Amplificatio sententiæ per argumenta ,
seu rationes .*

CAPVT DECIMVMOCTAVVM.

PRæstantissimus dilatandæ sententiæ modus est , vt plures inueniantur ad eam probandam rationes : ipsæ enim quibus vtimur ad probandum , vtimur ad amplificandum , immò nulla rerum Amplificatio est , quæ aliquibus non innitatur argumentis ; atque hæc ab ipsis Locis eruuntur . Propono tibi ex. gr. dilatandam hanc è Seneca sententiam .

*Ira vitium est , maximè ex omnibus
tetrum , ac rabidum . (a)*

Quære rationes , seu causas , cur hoc vitium sit ~~omnium~~ teterrimum . Prima ratio ducetur ab ~~Ira~~ Definitione , quæ brevis furor est ; quod confirmabitur comparatione furentis , & irati , quorum eadem species est , idem habitus ; idque Descriptione vtriusque illustrabitur . Secunda ratio desumetur
à Com-

à Comparatione Iræ cum alijs vitijs, quia tegi cætera facilius possunt; ira verò, vt præceptus affectus, furiosius erumpit, seque ipso aspectu, & corporis deformatione profitetur; qualem in brutis etiam animantibus videmus. Tertia ratio succedet ab Effectis Iræ desumpta; hæc enim tot hominum cædes, tot Urbium, ac Prouinciarum peperit excidia. His rationibus ita sententiam idem Seneca dilatat, ac probat.

**IRA VITIORVM OMNIVM
TETERRIMVM.**

*Prima ratio à Definitione,
seu Descriptione
Ira.*

Cæteris affectibus aliquid quieti, placidique inest; hic totus concitatus, & in impetu doloris est, armorum, sanguinis, suppliciorum minimè humana feruens cupiditate: dum alteri noceat, sui negligens, in ipsa irruens tela, & ultionis secum multa tracturæ audus. Quidam itaque è sapientibus viris iram dixerunt breuem insaniam; æquè enim impotens sui est, decoris oblita, necessitudinum immemor, in quod cœpit pertinax, & intenta; rationi, consilijque præclusa, vanis agitata

tata causis, ad dispectum æqui, verique inhabilis; ruinis simillima, quæ super id, quod opprèssere, franguntur.

Confirmatio rationis à Comparatione furentium, & irascentium, per eorundem Descriptionem.

Vt autem scias non esse sanos, quos ira possedit, ipsum illorum habitum intueri. Nam vt furentium certa indicia sunt, audax, & minax vultus, tristis frons, torua facies, citatus gradus, inquietæ manus, color verfus, crebra, & vehementius acta suspiria: ita irascentium eadem signa sunt. Flagrant, & micant oculi; multus ore toto rubor, exæltante ab imis præcordijs sanguine; labia quatiuntur, dentes comprimuntur, horrent, ac subriguntur capilli, spiritus coactus, ac stridens, articulorum se ipsos torquentium sonus, gemitus, mugitusque, & parum explanatis vocibus sermo præruptus, & complosæ sæpius manus, & pulsata humus pedibus, & totum concitum corpus, magnasque minas agens, fœda visu, & horrenda facies deprauantium se, atque intumescantium. Nescias, vtrum magis detestabile vitium sit, an deforme.



*Secunda ratio à Comparatione Ira,
qua bruta etiam, ne dum homi-
nes, exasperat, cum alijs
vitijs, quorum mitior
impetus est.*

Cetera licet abscondere, & in abdit-
o alere: Ira se profert, & in faciem
exit; quantòque maior est, hoc effe-
uescit manifestiùs. Non vides, vt om-
nium animalium, simul ac ad nocen-
dum insurrexerunt, procurrant notæ,
ac tota corpora solitum, quietumque
egrediantur habitum, & feritatem
suam exasperent? Spumant apris ora,
dentes acuuntur attritu: taurorum
cornua iactantur in vacuum, & arena
pulsu pedum spargitur: leones fre-
munt: instantur iratis colla serpenti-
bus: rabidarum canum tristior aspec-
tus est. Nullum est animal, tam hor-
rendum, tanquam perniciosum natura,
vt non appareat in illo, vbi ira inua-
sit, noua feritatis accessio. Nec ignoro
ceteros quoque affectus vix occultari:
libidinem, metumque, & audaciam
dare sui signa, & posse prænosci: ne-
que enim vlla vehementior intra cogi-
tatio est, quæ nihil moueat in vultu.
Quid ergo interest? quòd alij affectus
apparent, hic eminet.

Tertia ratio ab effectis Ira.

(a) Iam verò, si effectus, damnaque intueri velis, nulla pestis humano generi pluris fletit. Videbis cædes, ac venena, & reorum mutuas sordes, & vrbium clades, & totarum exitia gentium, & Principum sub ciuili hasta capita venalia, & subiectas tectis faces, nec intra mœnia coercitos ignes; sed ingentia spatia regionum hostili flamma relucentia. Aspice nobilissimarum ciuitatum fundamenta vix notabilia: has ira deiecit. Aspice solitudines per multa millia sine habitatione desertas: has ira exhaustit. Aspice tot memoriæ proditos duces mali exempla fati. Alium ira in cubili suo confodit; alium inter sacra mensæ ira percussit; alium inter leges, celebrisque spectaculum fori lancinavit; alium filij parricidio dare sanguinem iussit; alium seruili manu regale aperire iugulum; alium in cruces membra diuidere &c.



Amplificatio Facti.

CAPVT DECIMVMNONVM.

AD factum amplificandum spectanda erunt Præcedentia, Concomitantia, Subsequentia: paucis, Adiuncta omnia, quæ trito carmine celebrantur, *Quis, Quid, Vbi &c.* ex his enim omnis ferè dilatatio, & exornatio Facti desumitur. Vnicum affero exemplum, alibi plura daturus, cum de Factis narrandis, ac describendis agemus.

Exaggerandum, & exprobandum: sumamus illud Leonis Quarti Byzantij Imperatoris facinus; cum gemmatam Coronam; quam Mauritius olim Augustus Diuæ Sophiæ dicarat, ex huius Templo ereptam capiti suo imposuit. Quauis non impunè; postmodum enim superbum, scelestumque caput erumpens carbunculus digna morte multauit. Acritè Apostrophe ad ipsum Leonem utemur, singula Adiuncta, percurrendo.

QV I S.

Tu ne Cæsar, tu Orientis Imperator,
tu, cuius nutu, & exemplo tot Prouin-

K 3

cia

cix pendent, ac Regna; cuius est Religionis venerationem asserere, iuratu-
tueri, scelera profligare; tu inquam
in augustissimi solij fastigio collocatus,
vt quantum gradu, tantumdem virtute
ceteris antecellas, Imperatoriam maie-
statem sacrilego latrocinio dehone-
stas?

Q V I D.

Coronam Cælite dignam obtulerat
Sophiæ Mauritius, qualem Sanctissi-
mæ huius Urbis tutelæ deberi censue-
rat, auro gemmis, materia, & arte
spectandam, cuius pretium, & opus
deceret Cæsaris obsequium, nec illius
meritum dedeceret, quæ siderum
stemma coronatur. Æmuli profectò
sideribus lapilli sic auro micabant in
orbe, vt hebesceret auri fulgor, &
præstantius alioqui metallum iam so-
lius opificij commendatione placeret.
Hoc insigne pietatis donarium tu latro-
purpuratus inuadis, & Cæsareæ olim
munificentix monumentum arripis ad
argumentum sacrilegij.

V B I.

Neque verò in alicuius ignobilis
pagi recessu; sed in Urbis Regiæ medi-
cul-

tullio, non in priuati lararij latebris ;
at in primario, celebrique templo facinus
admissum . Hoc tu sanctitatis
domicilium impia profanas auaritia ,
& vbi frequentissimi Ciues propitiano
Numini student , hinc tu Cœlum
iniuria laceffis ; hinc aram illam , supplicum
perfugium , rapina violas , publicæque
venerationis contemptor , nil
Dei , nil Diuæ oculos veritus, velut inspectantibus
insultes, audacissimus verè
Leo rapaces vngues extendis ad prædam .

QVIBVS AUXILIIS.

Quos tu habuisti tanti sceleris adiutores,
ac Ministros? An tu secretum aliquem
expilatorem subornasti, qui execrandæ
auuiditati seruiret? Vt nemo nesciret
authorem latrocinij Principem esse,
tu cum armata satellitum cohorte
velut in hosticum vallum irrupisti, ut
gloriosum videlicet inde spoliū referres .
O præclarum facinus , & Cæsare
dignum, quod vniuersa posteritas admiretur!
Hoc tu sicariorum præsidio stipatus
in commune scilicet armatus odium
Tyrannus, accessisti ad aras, & nefario
improbiorum hominum ministerio
eximium illud sacræ supellectilis
ornamentum abstulisti .

C V R.

Nunc abs te quaero, laureate praedonum antesignane, cur venerabile ferrum impijs manibus attrectes? Quem tu destinaras ad usum, cum te rapiendi cupido incessit? Cognoscite furem hominis insaniam. Detraxit Sophiae coronam; futurum se ratus humano fastigio maiorem, ubi sceleratissimum caput furto radiaret. Miror non statim exarsisse in fulmina gemmarum ignes, & iam sceleris horrore pallescens aurum non se protinus in vindicem laqueum intorsisse, ad noxiae cervicis exitium. Quanam immanior audacia, quam spoliare Sanctitatem, ut vestias fastum? Depraedari Superum manubias, ut inde, quasi re bene gesta, triumphantis raptoris tempora coronentur?

QVOMODO.

Qua exultatione, quo tripudio illum egisti coronatae nequitiae triumphum! Plaudere ipse tibi, tuorumque plausus captare, arridere, gestire, teque palam praebere spectandum, usurpato diademate coruscantem; & quasi nova dignitatis accessione, hoc latrocinij

nij fructu, atque ignominia nota super-
bire. Audio præterea, & credo
(noui enim quàm sis pius in Superos,
& acutus) ausum te in Sophiam argu-
tari: dixisse quippe aut Cæsari, aut
nulli deberi Sapientia coronam: sa-
crum illud gestamen omnino Impera-
toriae dignitati convenire: nusquam
decentius flagrare carbunculos, quàm
in capite purpurato. O te miserum,
qui dum exultas pretiosiore flagitio,
gemma designas incautus tuæ calami-
tatis præsagium. Interim tamen frue-
ris nocituro thesauro, tuæque testimo-
nium impietatis, futurum subinde sup-
plicium, impudentissimè circumfers
ad pompam. An tu subactis Barbaris,
profligatis hostibus Imperij, parta
trophæa tanta celebritate iactasses,
quanta raptam à sacrario prædam
ostentasti?

QUANDO.

Qui non prorsus amisere mentem,
aut non affatim peccandi pudorem
exuere, tenebras amant, petunt ab
vmbreis velamina sceleri, noctem,
silentium, secretum inquirunt. Tu
verò securior impunitate potentia, qui
neque conscientiam vereris, neque
famam, clarissimam diem ad facinus

elegisti. Cùm amplissima in Vrbe compita, fora, viæque omnes densissima, euntium, & redeuntium frequentia feruent, cùm turmatim populus ad spectacula confluit, cùm pij cultores adeunt Sophiam suam, tunc illam violenter aggredieris; tunc recens Dionysius, Religionis irrisor, adimis Diuæ Coronam, tunc, auersantibus impium nefas innumeris testibus, deuota Diris tempora præcingis. Quid hoc aliud est, quàm gloriam improbitate aucupari? Si vel te Iudice furta plectuntur, quid huius rapinæ impudentia non mereat?

Amplificatio Laudis, & Vituperationis.

CAPVT VIGESIMVM.

EX iisdem fontibus, è quibus reliquæ Amplificationes, Laus etiam, & Vituperatio dimanant. Et omnes quidem Loci vtrique materiam præbent; frequentius tamen Definitiones conglobatæ, Enumerationes partium, Causæ, Effecta, Comparationes, Contraria; sed præ cæteris Adiuncta Rerum, & Personarum; hæc enim plerumque tam in Laudationibus, quàm in Vituperationibus vtranque paginam faciunt.

Aphro

Aphthonius in Progymnasmatibus cap. 8. quandam texendam Laudationis formam præscribit in speciem Oratiunculæ, quam Encomium vocat. Nos verò de Oratione Panegyrica, quæ Rhetorum est, in secunda parte agemus. Interim contenti erimus huiusmodi laudatiunculis, quæ tanquam Orationis partes, à toto corpore seiunctæ, inter hæc Præludia exercendo stylo adhibentur. Alij distinctas, valdeque diffusas cuiusque rei laudandæ præceptiones tradidere: sed proposita breuitas me non patitur in tam ampla spatia vagari. Quanquam si diligenter excusseris, quæ his de rebus Aphthonius, alijque complures congestere, illaque omnia ad summa capita reuocaueris, paucis illis contineri deprehendes, quæ statim præmissi, vnde Laudum, ac Vituperationum copia depromitur. Vide in Epitome Artis Rhetoricæ caput 19. de Genere Demonstratio.

Hoc in Laude seruandum, ne immerenti, vel supra meritum impendatur; nisi fortè ad ingenij ludum, vel pompam abuti Encomio libuerit: nam & Phauorinus febrim laudauit, sanus videlicet, si bene sanus; & eximiè Lucianus extulit muscam: dignus utique illius Encomia-

stes ipse musca procacior.

Ex his infimis audet etiam laudatrix Eloquentia se supra mortalium, immò & creatarum rerum ordinem attollere, Deum ipsum laudando, cui quavis debeantur omnium linguarum obsequia, nihil tantæ par Maiestatì moliri potest facundiæ nostræ tenuitas. Immensa profectò illius attributa vberriam laudum materiam suggerunt; veluti summa perfectio, bonitas, sapientia, potentia, prouidentia: tum miranda illius opera, rerum omnium creatio, & conseruatio, ac reparatio generis humani. A notis præterea speciebus, tanquam vmbri illius lucem longè metiri conamur, confugiendo ad nobiliores Similitudines, atque illi quidquid cognoscimus illustrius, & augustius adscribendo: sic illum Soli, Animæ, Oculo, Regi comparamus. At potius laudare illum possumus per negationem, vt monui cap. 3. de Definitione.

Hinc Arnobius eundem commendare aggressus ita per Apostrophem alloquitur. *Lib. pr. aduersus Gentes.*

Prima tu causa es, locus rerum, ac spatium, fundamentum cunctorum, quæcunque sunt; infinitus, ingenitus, immortalis, perpetuus, solus; quem nulla delineat forma corporalis; nulla de-

determinat circumscriptio, qualitatis
expers, ac quantitatis; sine situ, motu,
& habitu; de quo nihil dici potest, &
exprimi mortalium significatione ver-
borum; qui ut intelligaris, tacendum
est; atque ut per umbram te possit
errans inuestigare suspicio, nihil est
omnino mutiendum.

Proximas quoque Deo mentes, An-
gelos inquam laudamus à purissima eo-
rum substantia, ab eximijs naturæ do-
tibus, & gratiæ donis, quibus eos di-
uina munificentia cumulauit; hinc à
præclarissimis muneribus, quibus fun-
guntur Cælestis aulæ ministri. Sæpe ad
eorum laudes utimur negatione, de illis
negando nostræ mortalitatis mala. Ex
his fermè capitibus corpore solutas,
beatasque animas commendamus.

Frequentiùs tamen Laudatio circa
homines versatur, quorum sunt virtu-
tes, & bene gesta, veræ argumenta
Laudis. In his ea spectanda, quæ dicun-
tur Adiuncta Fortunæ, Corporis, &
Animi; tum rectè facta, ex quibus
omnibus colligitur Laudum seges.

Succedunt Virtutum, Artium, Scien-
tiarumque commendationes, ab iisdem
Locis, quos primò recensui, deductæ.
Hinc Tullius Dialecticam laudat in
Bruto, Philosophiam moralem lib. p.
Tusc. Quæst., Iustitiam lib. 2, officio-
rum,

rum, Eloquentiam lib. p., & 2. de Oratore, & alibi. Exempla superiùs habes cap. 13. de Effectis.

Sed neque bruta commendationibus carent, & res inanimatæ, vt Simulacra, Ædificia, Montes, Vrbes, Regiones, de quibus plura in Descriptionibus afferemus; nam vnde horum Descriptiones, illinc etiam Laudationes educuntur.

Vituperationis eadem ratio, ac Laudis est; nisi quòd illa in vitia potiùs verti debet, quàm in Personas. Vtriusque dabo exemplum; nec multa subijciam, cùm frequentissima hæc sint in paginis Oratorum, Historicorum, ac Poetarum.

Personæ Laudatio præcedat, cuius argumentum hoc erit. D. Victoria illustris in Africa Fœmina, ab Hunico Arrianorum Rege variè vexata, vt à Catholica Religione deficeret, non promissis, non minis, non cruciatibus, non igne, non Coniugis desertoris exemplo, & precibus, non filiorum lacrymis potuit à fidei firmitate deflecti. (a)

Ad commendandam Sacræ huius Heroinæ constantiam, Laudum capita desumentur à Notatione Nominis, ab Adiunctis Personarum, & à Relatis.

Diua

a Ex *Annal. Baronij ann. Christi 484.*

Diua quippe Victoria suo se dignissimam nomine præstitit, quæ foemina sexu imbecillis, educatione delicata, in potentem, barbarumque Tyrannum, blandientem, sæuientem, inuicta pugnavit: pœnis omnibus fortior extremi vicit atrocitatem supplicij. Denique Vxor, Viri, Mater Filiorum amorem, constantissimè vicit.

*D. VICTORIÆ MARTYRIS
LAUDATIO.*

Huc palmas, huc lauros, huc illustriora emeritarum frontium ornamenta conferte: plenis date lilia manibus, festiuisque plausibus acclamate. Celebranda Victoria est, non vno titulo victrix, quæ fidem nomini fecit inuicta, & ostendit vinci non posse Victoriam. O quot vna triumphales meretur adoras, quæ vicit sexum virtute, constantia Tyrannum, tolerantia pœnas, Religione naturam!

Neque hæc ad gelidum Tanaim ingentem hauserat à Patrij Coeli rigore ferociam. Amazonem istam Africa dedit, non Scythia. Neque fortuna deterior sensus patientiam malorum, usu durauerat: quin clarissimis edita natalibus, liberali educata laudibus, vita delicatiore adoleuerat, & splendore

ore generis, rerum copia, coniugij, sobolisque gloria florebat.

Hanc igitur nobilem, delicatam, hanc foeminam, utcumque generosae indolis, magnique animi, denique foeminam, aggreditur Hunericus; Tyrannus ille genio truculentus, impietate ferox, potentia immanis, Regno superbus; ut à Religionis integritate deterreat. Quanta primum simulatione humanitatis, quot lenocinijs verborum, quantis Regiae munificentiae promissis inuitat? Fraudulenti hostis vincit artes Victoria. Quae deinde toruitas oris, quae supercilij grauitas, quae vocum tonitrua, quae fulgura minarum? Tyrannicae indignationis horrores vincit Victoria. Quam dira tandem cruciatuum supellex depromitur, quam atrox carnificum manus adoritur insontem? Lictorum saeuitiam, poenarum acerbicatem vincit Victoria.

Pendet publicae spectaculum miserationis, ludibrium tortorum, victima crudelitatis, & subiectis ignibus torretur. Iam disfluunt artus, iam saeuit ardor in viscera, & propè vitae fontes absorbet. Illa mori parata, sed vincere, suos usque dolores fatigat, aestuque altiore incalescens vincit elementi violentiam.

Quid

Quid nunc ages Victoria, quid ages? Vtunque hactenus viceris hostilis odij vires, an ita vinces dulcissimos impetus amoris? Heu grauior, quò humanior pugna! Ecce amantissimus Coniux te per mutuam fidem, per sacra thalami fœdera, per affinitatis charitatem, enixè rogat, vt parcas tibi, parcas generi; neque in tuum, tuorumque exitium implacabilem Tyrannidis iram importunè laceffas. Quod si non satis est, efficacissimo suadet argumento, exemplo inquam suo, non esse cum Regia barbarie certandum; præstareque sponte vinci, quàm violenter perire. At perstas adhuc, eaque firmitus inhæret animo sententia, vt Viro fortior cadere malis, quàm cedere? Si non meministi te Coniugem, memineris Matrem. Semiustalata, seminiua, mæstissimos, vdosque fletibus laniens tuæ spectatores filios tu siccis oculis intueris? Hos tu contumaci agone sensim exanimas? Hos tu pateris commori tecum, vel nisi vitam, & angores vna morte corripiant, superesse diuturni luctus, prolixæ calamitatis hæredes? Nil te pallentia mouent innocentium ora, nil Matrem inclamantium voces, nil validiores vocibus lacrymæ, quæ miserandam natorum orbitatem facundissimè deprecantur? ○

for-

fortiorem quouis conflictu Victoriā! Magnum est foemineam vicisse infirmitatem, magnum vicisse blanda, maius aspera, maximum vicisse te ipsam, lentasque mortes attonita immanitate superasse. Quæ verò adamantini pectoris fortitudo vincere potuit inditam cordi humanitatem, atque in vim Sanguinis, in suauissima Coniugij, prolisque nomina, intus animo luctante, ita certare, vt sanctitas integra triumpharet? Hæc summa vtique victoria est, maternam pietatem Christiana pietate vicisse.

Diffusa Personarum Encomia suggerent sacri, & profani Authores, qui vel panegyricas Orationes, vel illustrium Virorum, ac Fœminarum vitas, & facta scripsere.

Supereſt Vituperationis exemplum, quæ, vt monui, damnandis vitijs, non carpendis hominibus adhibenda est. Nunc itaq; stylum acuemus in Aleam, Vituperationem texentes à Definitionibus conglobatis, à Comparatione eum alijs Ludis, & ab Effectis. Accedet, ad subiicienda oculis illius damna, Ludi, & ludentium aleis Descriptio. Tandem graui Apostrophe Aleatorem vrgentes, illum conabimur ad meliorem frugem reuocare.

ALEÆ

ALEÆ VITUPERATIO .

Abutitur sanè vocabulo quisquis Aleam, rerum, & morum perniciem blandiori ludi nomine non tam honestat, quàm velat. An ergo numerabimus in ludis fraudum officinam, flagitiorum magisterium, Dirarum scholam, dissidiorum seminarium, fortunarum voraginem, familiarum exirium? Ita hostiles etiam direptiones, & incendia, & naufragia licuerit in posterum ludos appellare. Profectò non aliter alea ludit, quàm Arena, quæ gladiatores instruit ad mutuam cladem, vt alter in postremum alterius discrimen funesta voluptate decertet.

Ludos eos voco, quos ad innocens, honestumque oblectamentum indulgentia maiorum inuenit, nunquam à Virtute alienos: quorum alij membrorum agilitatem exercent, alij solertiam acuunt, nec fortunæ debent, sed ingenio victoriam, alij, ceu blanda quædam artium rudimenta, ludicra imagine ad seria mentem erudiunt; omnes firmandis corporibus animisque letandis perutiles, ac viribus ad grauiora capeSSenda suauiter instaurandis; neque captioso alienæ rei aucupio, sed ingenua iucunditate fruuntur.

His

Histuludis Aleam inferes, quæ incerti quæstus illicio auida sollicitat ludentium vota; quæ pecuniam, supellectilem, census, fundos, patrimonia temerariæ sortis committit arbitrio; quæ affluentissimam quanvis opulentiam exhaurit; quæ domibus vastitatem affert, coniugibus, ac liberis egestatem, gentibus notam? Quæ leges æquitatis, & necessitudinis iura pessundat, quæ per summum nefas, quàm iniusta hominibus, tam iniuria Deo, non horret in venerandam illius Maiestatem execranda dictæria vibrare, quasi Titanio furore Cælo etiam bellum indicat?

Sed, vehemens, inquires, voluptatis libido Aleatorum animos violentissimè rapit adeò illecebrosa dulcedine, ut eam præstet vel tanti mercari. Magna nimirum voluptas mancipatam abacolumitorio vitam voluntario supplicio damnare, Ixionijs aleæ rotatibus continuò torquendam. Superstitiosi Fortunæ cultores dies illi ieiunas, noctes deuouent insomnes. Arcana illius mysteria scrutaturi consulant fatale volu-men: pagellas videlicet, varijs figurarum ambagibus inscriptas, tam altacogitatione defixi voluunt, reuoluunt, inspectant; ut latentem credas in obscuris Ægyptiorum notis profundior-

rem

rem Sapientiam indagare. Quid quòd mortibus ludunt, & frigida manibus ossa iactantes ipsa mortalitatis monumenta vsurpant ad sortium ministerium? Sortilegos ne, an maleficos putem ab ossuarijs fata quærentes? Triste quidem silentium, & propè funereus pallor commercium decet umbrarum. Dubio suspensi, expectatione solliciti, suspicionibus anxij, spe impatientes, metu exanimati, mærore tabescentes, marcentes invidia, indignatione frementes, ludicri Vertumni ad Alex vires quot affectus, totidem ora permutant: ignei, plumbei, subfusci, flauentes, albidi an non vincunt Iridem mille trahentem colores? Quid ni hos Polypos, veriùs Chamæleontes appellem in omnem speciem versatiles? Et quidem impasti captant auram fortunæ. Nunc in fornicem erecto, nunc demisso in pavimentum supercilio, nunc altero cubito innitentes labia diducunt, ungues mordent, perfricant barbam, vellicant aurem, occiput scalpunt, quatiunt pedes. Mitiùs torminosi agitantur; minùs inhorrescunt lymphati. Hoc motu corporum, hoc fluctu animorum somno, inedia, siti, æstu, algore confecti plusquam Spartana patientia diem, noctemque diuidunt inter curas, & vitia. Tantæ igitur

tur licitatione torturæ tentare places
 ancipitem Aleæ fauorem, quæ, si quan-
 do prosperè cesserit, infidis muneribus
 inescat, ut rapiat? Quid si vnico iactu
 deuoret ananiam? Quid si antiquas
 opes momento sorbeat, æsque domesti-
 cum redigat ad assem? Tum scilicet
 satis fuerit insanis vociferationibus exe-
 crari tesseras, comminuere fritillum,
 profcindere chartulas, impiisque supe-
 ram criminationibus consolari iactu-
 ram. Pessum abeat exitialis hæc ludæ
 voluptas, quæ ludentes ita deludit,
 immò ludit, ut lædat.

*APOSTROPHE AD ALEA-
 TOREM.*

Nunc te compello strenue Aleator,
 oblite generis tui adolescens, qui aurum
 prodigis, ac ætatem. Nil ne aliorum
 pericula, nil te tua deterrent? Non
 amicorum consilia, non monita maio-
 rum, non Aurum exempla; totque
 domesticæ Virtutis imagines reuocant
 ad mentem? Si quis è triduo, si quis de
 tenebris gurgustij, de gurgustio ganeonum,
 aut recens à licentia castrensi verna-
 procacior, cum perditorum hominum
 facie turpissima hæc alearum commer-
 cia quotidie misceret, non ne publica
 vapularet infamia, digitoque notatus
 à pro-

à proborum Ciuum consuetudine arceretur? Attamen in genium abiecti sanguinis, in prauam indolem nulla disciplina correctam, vel in haustam malorum contubernio nequitiam culpa verteretur. Quos verò de te spargi suffuros, quàm malè apud æquales tuos olere te putas, qui clarissimis ortus natalibus, optimis institutionibus ad vitæ integritatem formatus, cum ingenuis, ac probè moratis adolescentibus educatus, enutritus lacte Musarum, bonarumque Artium cultu lauigatus, à tuorum splendore, à te ipso degener, improborum Aleatorum Collegio nomen dedisti? Has ne tu acies, huiusmodi Academias frequentasse arbitraris gentiles tuos, qui sago, vel toga illustres gloriæ verticem attigere? Illos Patriæ charitas, & laudis amor in solem, ac puluerem, arduumque belli discrimen exciuit. Te aleatoria palæstra umbratilem pugilem exercet; idque gloriosum putas, si segni facinore vincas sedendo. Illi militari- bus præfecturis, grauissimis expeditionibus, & strenuè gestis insignes in supellectilem auiti honoris palmas, & laureas intulere. Tu papyracei ductor agminis, præda sapius, quàm prædator, in pictum militem pugnans inglorius. Alij, qui pacis artibus clariores excellere doctrina, magno publicæ rei emolu-
mento

mento prima tenere dignatum sub-
sellia, ut iura tuerentur, & æqua lance-
librarent momenta causarum. Tu in
grægalium congerronum curia sedens
ad lusorium tribunal, ut seras lites,
non dirimas, à Sortis, non à iuris urna,
suffragia exquiris. Illis gratius nihil,
quàm peruoluendis eruditorum paginis
impendere studiorum vigilas, & è
veterum monumentis haurire docu-
menta Sapientiæ. Tu solutiores codi-
ces versas, licentioris vitæ magistros,
& Crassæ Mineræ redolentibus oleum
chartulis impalleleis.

Mitto frequentia rei familiaris de-
trimenta, & suffecturam in annos pe-
cuniam breui ludo profusam. Sileo
violatas iniurijs amicitias, exorta im-
manissima dissidia, mistisque Aleis,
& armis, versum persæpe ludum in-
pugnam. Prætereo domesticorum, hanc
tuæ turpitudinis maculam non feren-
tium, indignationem, quæ te ut spec-
tatissimæ cognationis dedecus auer-
santur. Finge tibi, non indecoram
Aleam, non familiæ noxiam, immò
constanti fortunæ gratia felicem: quo
samen vnquam pretio redimes ætatis,
ingenijque dispendium? Ita ne verò
mentem illam negligis, eximium na-
turæ munus, ad omnia flexilem, miro
acumine, mira celeritate præstantem,
qua

qua poteras aliquandò inter literarias Reip. Proceres occupare honoris fastigia? Vbinam primus ille discendi ardor, & æmulatio virtutis? Vbi promittentes maturioris Eloquentiæ suauissimos fructus flosculi Orationis? Vbi dextero Apollinæ vena fluens, quæ iam pleniori se se alueo efferebat? Quid hoc laudabile Tirocinium, spesque de te conceptas tam importunè abruptisti? Præstat igitur iugulare ingenium ad aras Alexæ, hanc præ Suada, præ Caliope venerari, præferre abacum Parnasso, & Latinæ linguæ delicias vernaculis contumelijs posthabere?

Nemo non queritur de vitæ brevioris pernicitate, quæ magna persæpe cœpta proscindit, nec metiri finitamplissima scientiarum spatia; cùm latius discendi fines pateant, quàm viuendi. Quid tu prodigus temporis naturæ auaritiam accusas? Perge dies, noctesque conterere, ludoque largiri hoc ver annorum, spargendis virtutum feminibus datum, quorum messem colligat virilis maturitas: tum vbi decoxeris, bonæ frugis experts, & expes factum vitio tuo damnum imputa, si quidquam proderit, mortalitatis angustijs. Veniet profectò, quæ tacito pede properat, grauior ætas; tumque fera, sed inutili pœnitentia lugebis an-

norum iacturam : tum imminuta fortunæ, animique bona sine fructu doleris. At aurum, quod Alea rapuit, fortasse aliquando rependet fertilitas agri, vel alia rerum felicitas instaurabit : quam verò perdideris vitæ partem frustra speraueris instaurandam.

De Diminutione, seu Extenuatione.

APPENDIX.

MIrabatur olim Satyrus apud Æsopum, ex eiusdem hominis faucibus calentem, frigentemque auram exhalari. Non aliam quippe nouerat semiferus hospes multò magis mirandam vim oris humani, cuius anceps, & se se fundens in diuersa spiritus penè rerum species immutat ; modò enim exiguas augendo maiori mole constat ; modò minuendo prope difflat ingentes. Hinc Isocrates ex hac mirabili vtrunque virtute Rhetoricam definiuit *Artem, qua ex paruis magna fieri possunt, ex magnis parua.* Quæ Definitio non satis quidem explicat Rhetoricæ naturam, duo tamen attingit eximia. Eloquentiæ munera, quibus pro rerum opportunitate præstare debet Orator ; & quanuis maior plerunque sit apparatus in primo, in secundo fortasse plus
artis.

artis est . Cùm itaque de rebus per Amplificationem augendis tam multa scribantur , cur de minuendis tam pauca , vel nulla ? Nos igitur vnicam saltem Appendicem de Diminutione Amplificationi subdamus ; ne cùm vtraque sæpius vtendum sit , hac satis cognita , illa penitus omissa ignoretur .

*Quid sit Diminutio; unde sumatur;
quis eius usus .*

DIMINUTIO est Oratio , qua rebus vel vera , vel apparens magnitudo detrahatur . Illa ergo minuuntur , quæ vel in se sunt magna ; vt cùm belli pericula , & mala dicendo lenimus , ad ciuium animos erigendos : vel quæ magna videntur ; vt cùm exaggeratum ab Aduersarijs crimen , quod ideo videtur atrocius , ita extenuamus , vt nullius momenti , aut multò leuius appareat .

Ab iisdem locis Diminutio desumitur , à quibus Amplificatio . Quibuscunque enim additis res crescit , eorum rursus oportet detractione decreseat . (a) Ita si Goliath aliquis virtutem suam amplificet à gigantea corporis proceritate , quasi hominibus præstet , qui al-

L 2

tiori

2. Rodolphus Agr. lib. 3. cap. 3.

tlori vertice proximius accedit ad Superos, pusillus David argumentum Diminutionis ab eodem corporis Adiuncto desumet, ostendendo communem esse hanc laudem longurijs, villoribus etiam hortorum oleribus, nedum nemorum plantis; nec in homine, sed in iumentis immania membra spectari.

In Verbis quoque vis minuendi est. Hinc utimur Diminutivis, cum dicimus *ingeniolum*, *homunculum*, *doctorculum*, *magistellum*, *munusculum*, *agellum*; vel pro vocabulis proprijs alia leniora, minusque aliquid significantia substituimus. Ita seniores hominem *seuerum* vocamus, ignavum *mitem*, dicacem *argutum*, timidum *cautum*; vide quæ de Catachresi, & Hyberpole minuente attigimus in Tropis. Quandoque verbis deteriorem sensum habentibus res explicamus ad contemptum: ut cum *Philosophaster* pro Philosopho dicitur, *garrulus* pro Eloquenti, *gurgustium* pro domo; pro Caudico *Rabula*, *leguleius* quidam oantus, & *acutus*, *præco actionum*, *cantor formularum*, *auceps syllabarum*. Cicero in Oratore.

Utilis Diminutio est ad vitandam arrogantiae suspensionem. Quare commune hoc est modestiæ idioma; ut propria,

pria, quanuis egregia, & digna laude, aliqua dicendi ratione attenuet. Hinc toto notus in orbe Martialis angustissima sua carmina passim nugas appellat, perditasque papyros. *Lib. 13. ep. pr.*

*Ne toga Cordylis, & penula desit
oliuis;*

*Aut inopem metuat sordida blatta
famem.*

Alciatus quoque doctissima Emblemata ad Chonradum Peutingerum missa *chartacea munera* vocat. *In prefatione libri Emblem.*

Hæc in proprijs extenuandis Oratorum, Scriptorumque modestia, cum pertineat ad laudem morum, non minus pertinet ad sani famam ingenij, nec enim multum sapere censetur arrogans ostentator: immò sæpius euenire videmus, quod Plinius iunior aduertit, *ut recta ingenia verecundia debilitet, peruersa confirmet audacia.* *Lib. 4. epist. 7. Lepido.*

Vtuntur Diminutione Oratores ad amoliendam inuidiam, & beneuolentiam conciliandam. Quamobrem Tullius ipse, gloriosus alioqui rerum suarum buccinator, hanc adhibet aliquando. Sic Orationem pro Archia Poeta exorditur ab ingenij sui extenuatione. *Si quid est in me ingenij Iudices, quod*

sentio, quàm sit exiguum &c. alibi se nouum hominem, & Arpinatem meminit, omnemque suam dignitatem, se profitetur Quiritum beneficentiæ debere.

Valet plurimum in Suasionibus Diminutio, cum in rebus arduis difficultates, quæ animos deterrent, extenuamus. Hac utitur apud Lium Annibal, Pœnos alloquens, de transitu Alpium sollicitos. *Decadis 3. lib. pr.*

Mirari se (inquit) quinam pectora semper impauida repens terror inuaserit: postquam multò maiorem partem itineris emensam cernant: cum in conspectu Alpes habeant, quarum alterum latus Italia sit, in ipsis portis hostium fatigatos subsistere, quid aliud Alpes esse credentes, quam montium altitudines? Fingerent altiore Pyreneis iugis; nullas profectò terras Cœlum contingere, neque insuperabiles humano generi esse. Alpes quidem habitari, coli, gignere, atque alere animantes. Peruias paucis esse? Exercitibus inuias? Eos ipsos, quos cernant, Legatos non pennis sublimè elatos Alpes transgressos. Nec maiores quidem eorum indigenas, sed aduenas Italiæ cultores, has ipsas Alpes ingentibus saepe agminibus cum liberis, ac coniugibus migrantium modo tutò transmississe.

fisse . Militi quidem armato , nihil secum præter instrumenta belli portanti , quid inuium , aut insuperabile esse ?

Seneca Philosophica Extenuatione suadet malorum omnium , ipsiusque mortis terrorem esse contemnendum .
Epist. 24. ad Lucilium .

Illud ante omnia memento demere rebus tumultum , ac videre , quid in quaque re sit : scies nihil esse in istis terribile , nisi ipsum timorem . Quod vides accidere pueris , hoc nobis quoque maiusculis pueris euenit . Illi , quos amant , quibus assueuerunt , cum quibus ludunt , si personatos vident , expauescunt . Non hominibus tantum , sed & rebus persona demenda est , & reddenda facies sua . Quid mihi gladios , & ignes ostendis , & turbam carnificum circa te frementium ? Tolle istam pompam , sub qua lates , & stultos territas . Mors es , quam nuper seruus meus , quam ancilla contempsit . Quid tu rursus mihi flagella , & equuleos magno apparatu explicas ? Quid singulis articulis singula machinamenta , quibus extorqueantur , aptata , & mille alia instrumenta excarnificandi particulatim hominis ? Pone ista , quæ nos obstupefaciunt : iube conticescere gemitus , & exclamationes , & vocum

L 4

inter

inter lacerationem elisarum acerbitem. Nempe dolor est, quem podagricus ille contemnit, quem stomachicus ille in ipsis delicijs perfert, quem in puerperio puella perpetitur &c. *Tota epistola eandem Sententiam probat.*

In Defensionibus quoque ad Crimina elehanda Diminutio adhibetur. Hac Cicero *pro Q. Ligario* huius, aliorumque causam, qui contra Cæsarem Pompeio adhæserant, in Tuberone accusatorem tuetur.

Scelus tu illud vocas Tubero? Cur? Isto enim nomine illa adhuc causa caruit. Alij errorem appellant, alij timorem, qui durius spem, cupiditatem, odium, pertinaciam, qui grauissimè temeritatem: scelus præter te adhuc nemo. Ac mihi quidem si proprium, & verum nomen nostri mali quærat, fatalis quædam calamitas incidisse videtur, & improuidas hominum mentes occupauisse, vt nemo mirari debeat humana consilia diuina necessitate esse superata.

Idem *pro M. Calio* in tota fermè Oratione ita obiecta illius adolescentiæ crimina diminuit, vt ostendat esse potius communia pluribus conuitia, quàm crimina, & iuueniles errores aliqua ipsius ætatis venia excusari.

Nec minus utilitatis habet Extenuatio

tie ad infringendam Aduersariorum iactantiam, vel ad superbum aliorum tumorem deprimendum.

Cicero *pro L. Murena* Iurisprudentiam, quam Sulpicius in petitione Consulatus ostentabat, extenuando penè ad contemptum deducit.

Et quoniam mihi videris istam scientiam Iuris, tamquam filiolam osculari tuam, non patiar te in tanto errore versari; vt istud nescio quid, quod tantopere didicisti, præclarum aliquid esse arbitrere. Alijs ergo te virtutibus continentiae, grauitatis, iustitiae, fidei, cæterisque omnibus, Consulatu, & omni honore semper dignissimum iudicauì. Quòd quidem Ius ciuile didicisti, non dicam operam perdidisti, sed illud dicam, nullam esse in illa disciplina munitam ad Consulatum viam.

Primum dignitas in tanta scientia quæ potest esse? Res enim sunt paruae in singulis literis, atque interpunctionibus occupatae. Deinde, si quid etiam apud maiores nostros fuit in isto studio admirationis, id enuntiatis vestris mysterijs totum est contemptum, & abiectum &c.

Ibidem Stoicæ Philosophiæ grauitatem, quam Cato sequebatur, eleuat ad cò, ac festiuissimè traducit, vt ipse

qui aderat accusator, natura, & institutione seuerus, cum risum cohibere non posset, dixisse feratur. *Dij boni quam ridiculum Consulem habemus!* Totam hanc Orationem peruolue, nam plurimum in Extenuatione versatur.

Seneca bona Corporis, quibus homines perperam sæpè gloriuntur egregiè diminuit per Comparationem cum cæteris animantibus. *Epistola 79.*

Ratio perfecta proprium hominis bonum est; cætera illi cum animalibus, satisque communia sunt. Valet? & Leones. Formosus est? & Pauones. Velox est? & Equi. Non dico in his omnibus vincitur: non quæro, quid in se maximum habeat, sed quid suum. Corpus habet? & Arbores. Habet impetum, & motum voluntarium? & Bestiæ, & Vermes. Habet vocem? sed quanto clariorem Canes, acutiorem Aquilæ, grauiorem Tauri, gratiorem, mobilioremque Luscinia?



DE DESCRIPTIONIBVS.

*Quid sit Descriptio, qua illius materia,
qua forma, quis vsus, quotque
sint illius spe-
cies.*

CAPVT PRIMVM.



Inquam Picturæ lau-
dem ita æmulatur, vt
vincat; Eloquentia,
tunc sanè maximè;
cùm descriptas exhi-
bet imagines rerum,
quasi pictas in tabula,
oculisque spectandas. Omnem quippe
superat artem colorum vis illa, quæ
non corporum tantùm, sed animorum
lineamenta, mores, affectusque homi-
num exprimit, & voces; vt longè ab-
sentes, immò, & vita iam pridem
exutos præsentis intueri videaris, &
loquentes audire. Quauis autem in
Figuris Descriptionem attigerim, illam
diligentius examinandam huc distuli,
post Locorum, & Amplificationis ex-
plicationem; cuius hæc pariter quæ-
dam forma est, ab iisdem Locis ema-
nans.

*Est ergo DESCRIPTIO picta Oratio-
nis coloribus rerum imago. Varia, &
mul-*

multiplex est, siue illius materiam, siue formam, siue vsum respicias.

Si Materiam quæris, per omnem spatiatum rerum Naturam; quin & ultra illius terminos quandoque progreditur; non solum enim ea, quæ sunt, præsentia, præterita item, & futura, sed illa insuper, quæ repugnat esse, conflata ex diuersis, & contrarijs monstra, & somniantium in bicipiti Parnasso portenta describit.

Forma tam varia est, quam materia, cui stylus conuenire debet, aptusque verborum, & Figurarum vsus; vt seria grauitate, amœna festiuè, leniter blanda, magna splendidè, parua submisè, quæque pro sua ratione tractentur. Alia insuper Descriptio est breuis, & expedita per Definitionem, quam suo loco tradidimus; alia, de qua nunc agimus, diffusa, & explanata per plures Locos, ac Figuras.

Vsum quoque multiplicem habet Descriptio apud Poetas, Historicos, & Oratores. A Poetis ad voluptatem, ac pompam; ab Historicis ad notitiam rerum; ab Oratoribus ad ornandum, docendum, delectandum, mouendum adhibetur. Sed fugienda eorum siue intemperantia, siue leuitas, qui Eloquentiæ laudem perperam aucupantes, accersitis in quolibet Orationis par-

partem Descriptiunculis multum ludunt, nihil probant. Cæterum exercendis Adolescentium ingenijs aptissima Descriptio est: quamobrem quavis inter Figuras plerunque referatur, illam Aphthonius inter Progymnasmata non immeritò collocavit.

Ad rectam rerum Descriptionem duo maximè necessaria sunt. Primum, ut earum natura cognita sit describenti. Secundum, ut propria suppetant earum vocabula, quibus tanquam suis coloribus exprimantur: hinc admonet Rodolphus *libro 2. cap. 28.* notiora utilius ab his describi, qui primam huic curæ afferunt manum.

Descriptionum Species omnes ne numerandas quidem susceperim, si velimus intimas quasque sectari, propè innumeras; totidem scilicet, quot rerum, quæ vel animo fingi possunt, vel stylo pingi. Sed ne sine certis limitibus tam latè vagemur, celebriores colligam, à Scriptoribus usurpatas, quæ sunt veluti summa Capita cæterarum. (a)

Prima est Descriptio Personarum, Secunda Locorum, Tertia Temporum, Quarta Rerum. Ad primam pertinent Protopographia, Æthopœia, & So-

a Carbo de Elocut. lib. 1. disp. 24. & lib. 4. disp. 7. Galli Rhetor. lib. 3: c. 28.

& Somatopœia : Ad secundam Topographia , & Topothesia : Ad tertiam Chronographia : Ad quartam Pragmatographia .

Harum finibus contentus non altiora scrutabor , Deum , & Diuina , sublimioresque substantias silentio veneratus . Quòd si tamen de Deo , de Angelis , & solutis corpore mentibus agendum sit , reuocare iuuabit in memoriam pauca illa , quæ de illorum laudibus diximus Capite ultimo de Amplificatione . Nihil præterea nobis est cum abstrusis Philosophiæ , aliarumque Scientiarum , & Artium arcanis : nondum enim profundiora rimamur : immò potiùs obuiam sensibus rerum superficiem spectamus , quàm intima earum penetralia . In his interim Descriptionum Speciebus explicandis nec te multis præceptionibus morabor , nec paginas onerabo exemplis , cùm horum Syluæ per omnium manuseant aliorum industria collectæ .

DE PROSOPOGRAPHIA .

CAPVT SECVNDVM .

PROSOPOGRAPHIA est vera Personæ descriptio ab exteriori Corporis Specie . Vtitur maximè Distributione .

tione partium, & Adiunctis ipsius Corporis. Huius est exprimere oris lineamenta, colorem, dignitatem, toruitatem, deformitatem, membrorum elegantiam, vel vitia; staturam, obesitatem, vel gracilitatem, crinem, obtutum, vocem, incessum, firmam, vel infirmam valetudinem: vestium præterea munditiam, & luxum; vel negligentiam, & sordes.

Huc eas quoque reuoco Descriptiones, quæ structuram totius humani Corporis explicant, vel circa singula membra versantur; ut caput, oculos, manus; mirabile illorum opificium, variaque munera demonstrando; quod egregiè præstitit D. Ambrosius *lib. 6. Hexameri* c. 9., & Cicero *lib. 2. de Natura Deorum*; ut omittam Galenum, aliosque artis Anatomicæ Scriptores.

Pari modo cæterorum quoque animalium corpora describuntur per Partes, & Adiuncta, spectando peculiare eorum formas, & naturæ proprietates; rictus vel ad terrorem feros, vel ad spectantium voluptatem festiuos, ac ridiculos; villos, iubas, & distinctas maculis pelles: tum eorum vsus ad humanæ vitæ commoda, diuersasque indoles, astus, agilitatem, cursum, robur, ferociam. In Avibus pictam plumarum pompam, cristata capita, in-

stru-

strumenta rapinæ rostra, & ungues: in alijs maiorem volatus pernicitatem, gratiorem in alijs suauitatem cantus, qua mulcent hominum aures pennatæ Sylvarum Sirenulæ. In Piscibus multiformes eorum species, nitentes argento squamarum loricas, & interlitos aureos colores; miramque illam, & mutam sub vndis natantium vitam &c. Plures animalium Descriptiones offeret Naturæ indagator Plinius, & è recentioribus Vlysses Aldrouandus, qui naturalem Historiam omnigena eruditione illustrauit. Has autem irrationalium animalium Descriptiones Prosopographiæ subijcio, quod pariter spectent ad exprimendas Corporum formas: Cæterum non ideò *PROSOPOGRAPHIAS* eas vocauerim, cum Personæ ratio brutis non conueniat, sed potius *THEROGRAPHIAS*, hoc est Ferarum Descriptiones, vel communiori voce *ICONOGRAPHIAS*.

Prosopographiæ exempla.

Literati, studiosique Viri effigies.
Is fuit eruditissimus Carolus Maria
Maddius, Græcis, Latinisque literis,
& Italica Poesi clarissimus.

Sedebat solitarius ad pluteum Vir
 nunquam feriatu à studijs; immò nunquam

quam ideo solus, quo cum literæ omnes versantur assidue. Sedebat, inquam, ad pluteum, & calamum suspenderat manu; tam alta cogitatione defixus, ut signum hominis opinarer, scribenda meditantis. Cum enim secretioribus fruitur Musarum suarum colloquijs, aliquando & mentem, & sensus in Heliconem transmittit. Si tunc fractus illabatur orbis, non sentientem, ne dum impavidum, ferient ruinæ: donec veluti Numine concepto redit ad paginas, & aureæ venæ diuitias mira felicitate profundit. Fauet ingenio habitudo corporis, & idonea literis atræ, flauæque bilis temperatio: ideo subfuscus in ore color, interdum pallore suffusus, qui studiosis à mortuorum consortio venit. Accedit firma valetudo, quam & si podagra quandoque pertinet, attamen disfluens in pedes morbus non mentis otia perturbat. Ea frontis, vultusque gravitas, quæ hominem deceat seria cogitantem; neque tamen à comitate dissentiat; quam æquè Charites ament, & Camœnæ. Statura supra mediocrem mensuram; ut scias, par esse magnæ menti habitaculum; quanuis ea non desit membrorum gracilitas, quæ plerunque comitatur ingenia. Ætas maturiori Sapientia valens, sed integris viribus, & nondum

dum tota hyeme in crinem sparsa :
 nulla verò texerit hyems æternos flo-
 res, quibus auxit Parnasi delicias.

PRINCEPS BELLATOR.

Grauiſſimus, idemque gratiſſimus
 decor, & emicans in vultu ſpecies
 generoſæ virtutis Principem ſtatim
 inter bellatores oſtendunt. Viuidus
 oculorum fulgor, & arcana vis in-
 animos: ut enim aut mitius, aut ſe-
 uerius aſpexit, vel excitat, vel terret.
 Nec adeò frontem aſperauit acies, quin
 ſpiret ingenitam ſuauitatem, amore,
 & obſequio dignam. Sonora vox,
 quam ſiue diſpenſet imperia, ſiue con-
 tineat in officio militem; ſeu erigat ad
 prælium, naturæ, artiſque beneficio
 feliciter exercet: ut qui loricatam ſe-
 cum Mineruam habet, ac fœderatam
 Marti Suadam. Validum cum virili
 vigore corpus, & cum elegantiâ ro-
 buſtum, prorsus factum ad bella;
 quod non laboribus, non vigilijs, tem-
 porumue iniurijs fatiſcit, in ſole ſem-
 per, ac puluere, in aſſidujs expeditio-
 nibus nunquam diligentius curatum;
 nec enim Aulæ commoda, & lauti-
 tiem quærit in caſtris Flaua, decenſque
 cæſaries, quanuis non licentiùs effuſa,
 neque molliùs culta. Eadem in veſtibus
 ratio, quibus ita conſulit dignitati, ut
 militari negligentia luxum contem-
 nat.

nat. Castrensi quippe disciplina primis ab annis instructus omnes assuevit aspernari delicias. Cum sedit in equo, ducturus agmen, ensemque distrinxit, maior illi quædam maiestas accedit, quæ suis fiduciam affert, hostibus terrorem.

**FOEMINA RECENTIORI LVXV
ORNATA.**

Ad multam diem versata cum speculo, & iam lassatis ancillarum ministerijs, ex intimo penetroali onerata verius, quàm ornata, suoque luxu laborans mulier prodit. Mulier inquam? immò pictura mulieris totaque ex arte imago. Equidem Cleopatram aliquam, aut Semiramidem amoto sipario induci credideram. Et parem profectò Regiæ personæ cultum induerat, insuper adedò splendide cothurnata, ut gemmatis pedibus vilesceret nobilius metallum. Nec deerat larua: liberalem enim alioqui formam siue auxerat fuco, siue infecerat, nouum omnino sibi finxerat vultum. Inter cætera muliebris plasticæ artificia mirabar & maculas inter munditias acciri. Studiosè sparguntur in frontem, ac genas nigriores labeculae, quæ impressæ nascentibus emendarentur, ut vitia. Ita quæ sponte lentiginosam cutim pati non possent, ascititia stigmata

mata nunc habent in pretio ; & quasi se de damnata stirpe glorientur , præfixum Eux nigrum Theta consultò reuocant in faciem , pluribus notis ambitiosè rescriptum . At nitidissimi terrarum Soles laudant *inpersos egregio in corpore nauos* . (a) Ne oculos intuentium perstringant , his puto nubeculis temperandum censuere sincerum oris fulgorem . Quorsum plura ? Quid ista sint , à Gynæcei vocabularijs disce . Muscas vocant ; ad dulcissima videlicet capita conuolantes . Laudo vocis proprietatem pariter , ac modestiam ; & miror ab eloquentibus impendiò Fœminis relictas Platoni suas apes : quanuis fortè timuere delicatis genarum rosas aculeos . Bene est : habeant sibi suas muscas , Heliogabali suffragio , domesticas apes , vrbaniissimis dignas apiarijs . Hæc mecum tacitus argutabar ; cum gradatim mulier , veluti pompæ ferculum , procedit ad fores . Et amplæ quidem patuerant ; sed diuidendi fuerant muri , vt recta exiret hæc machina , (b) nec enim equo Troiano vel minor , vel melior . Dum ergo superbam ceruicem inflectit , immanissimam ex recentiorum licentia cristam aduerti , simulque profusam sylvæ caudam intuitus ; vnde nam (inquo)

a *Hor. p. Serm. Sat. 6.* b *Virg. 2. Æneid.*

quo) tam grandes ætate nostra gale-
ritæ? Quid ni pollicear huic seculo Se-
mideorum sobolem fecundissimam, si
conijcere licet ex turrito vertice tot
Cybeles matres? Quousque surget mu-
liebris fastus, qui minax in cælum iam
Phlægram transtulit in caput, & supra
stelliferum frontis olympum (a) iunxit
frondenti Pelion Ossa? (b) Ita sanè cri-
nes crinibus aggerantur, plumæ, lem-
nisci, vt impositos credas montibus
montes, Cænesis Iuppiter, ne quod
Gigantibus olim non cessit, Amazones
nostræ obtineant, vt te de solio protur-
bent. An ferreum hoc æuum quisquàm
neget, quod molliorem etiam sexum
inter delicias armat ad bella? Certè
quocunque oculos verto, galeatas vi-
deo Penthesileas. O quanta gliscit sub
comanti casside ferocia! Putasne de-
mitti posse ad Virorum obsequium,
quæ tam altè cristas attollunt? Hoc
denique mulierum fatum est, vt vel
acephalæ sint, vel enormiter capitatæ.
Plura mussitantem amicus interpellat:
Sciscitatur lepidus homo, cuias ista sit,
insigniter adeò mitrata, demissis in
humeros redimiculis? An ex Persia re-
cens aduenerit? Tum ego. Nostras
hæc Persa est; sed esse vbique Persiam
hodie scito, latissimè diffusa huius ge-
sta-

flaminis corruptela. Crescit in dies
 vetus Fœminarum ambitio. Auidæ ve-
 nerationis, olim circumornata, ut *Simi-
 litudo templi*, (a) nunc etiam similitudi-
 nē sacri apicis induere. Scis ne quo no-
 mine istas vocem? Antistitas vanitatis.

*ICONES ANIMANTIVM
 RATIONE CARENTIVM.*

ELEPHAS.

Ex lo. Barclai Argenide lib. 4.

Immensum, & informe animal plenè
 omnibus membris vna mole confusis.
 Mersum caput inter humeros, nec à
 globo multum dispar, nisi quā probo-
 scis in terram descendit, scedè promissa
 à naribus; & si color absit, instar longi,
 & tumidi anguis, neruorum circulis ita
 articulatim nexa, vt contrahi, laxariq;
 flecti etiam possit, & esse pro manu. Pa-
 tulæ aures vtrunq; tempus tegunt. Oculi
 exiguo orbe sub tumida fronte recon-
 diti. Ebur, quo pretiosissimi sunt, lon-
 gè ex ore eminet, penè instar lituorum;
 nisi quòd debiliori parte inflectitur.

SIMIVS.

Sannionem tibi de nemore fisto: ri-
 diculum animal, at præcæteris huma-
 no

a Psalm. 143.

no corpori simillimum. Ambiges, an inchoatum hominem error naturæ deformauerit in brutum, an superinduerit homine conceptam antea feram. Monstrum utique dices ex utroque mistum, iamque minus miraberis, & Satyros, & Centauros fabulantium libidine concinnatos. Simæ nares, unde illi nomen, villosæque genæ, mimicusque rictus turpem referunt ad risum, personam; qualem ori prætendunt in Fabulis Comædi, siue laruati in Liberalibus ludiones. Quod si, ut nauiter cætera, mentiri etiam loquelam posset, viliori theatra starent; minori quippe sumptu absolutissimam ageret histrioniam. Quis enim Actor alienos mores accuratius imitetur? Quis Pantomimus vultum, ac membra in festiuiores gestus inflectat? Quæ Saltatrix maiori agilitate se vibret? Si prodeat in scenam, non ne spectatoribus imponet, plausumque merebitur, tanquam Scurra pilosus? Cæterum nares, aures, dentes, & cum palpebris oculos, & quinos in manibus digitos, & ungues, brachiaque, & crura intueri; vel syluestrem homuncionem iudicabis, vel ridiculè deprauatum. Simium domi si alas, gratuitum alioqui morionem habebis, nec emes in pompa Citeriam.

CARDUELIS.

In musico auicularum choro, quas nostrarum voluptas aurium carceri damnat, vix vlla est Carduele venustior. Sic eam appellamus à Carduis; quorum femina tam avidè pabulatur, vt eorum illicio fiat aucupum præda. Aliquantò minor Luscinia est, quam & si cantus argutia non æquat, vincit constantia, forma longissimè antecellit. Nigricat summus vertex, & circa radices rostrum. Pars capitis anterior purpura vestitur, quam alba vtrinque tempora definiunt, acrius ex vicinia rubentem. Idem ostrum guttur colorat: humeros ferrugineum regit amiculum, subalbescente sensim colore, quæ descendit in ventrem. Nigras alarum, caudæque plumas distinguit candor; sed remiges pennas ambit luteus margo, velut auro fimbriatas. Nulla citius dediscit libertatem, moresque silvarum; nam postmodum carcerem suum amat, facileque familiaribus assuescit. Iam non impatientius mordere cancellos; non trersari hominum conspectum; quin etiam ludente rostello colludentium digitos leuiter vellicare: ad notam heri vocem referata cauea euolare in caput, in humeros, in sinum: nunc suspensio

volatu plaudentibus alis gestire : nunc se dimittere ad nutus, cibosque sumere de manu ; tum bona hospitij fide sponte redire in claustra, & quasi è suggestu gratias modulari.

Carduelem, qualem vidi, expressi. Caterum varias illius formas describit Vlysses Aldrouandus lib. 18. Ornithologia cap. 11.

DE ETHOPOEIA.

CAPVT TERTIVM.

ETHOPOEIA est morum, & affectuum expressio, qua certis indicijs cuiusque indolem, animique motus describit. Quare sicuti Prosopographia exteriorem Personæ speciem, hæc interioris hominis effigiem repræsentat. Eadem Notatio, Figuratio, Imitatio, Characterismus, Ethologia nominatur.

Distinguunt aliqui *ETHOPOEIAM* à *PATHOPOEIA*; quòd hæc vehementiores perturbationes exprimat, illa mitiores motus, & mores. Nos vnico *ETHOPOEIÆ* nomine quaslibet affectuum Descriptiones complectimur.

Desumitur pariter hæc Descriptio à Partium enumeratione, & ab Adiunctis

tis Corporis, ac Animi, atque ab Effectis. Prosopographiam sæpe inuoluit, nec rarò Sermocinationem, seu Prosopopœiam admiscet: cùm exterior aspectus, & sermo sint indices mentis.

Huius quidem summa laus est; ut species, cultusque Corporis, motus, actio, & oratio Personæ descriptæ moribus, & conditioni conueniant. Alia quippe est sobrii, cordatique hominis facies, alia temulenti: dispar utriusque gestus, & sermo; quæ ita discrepant, ut dissentiunt affectus.

Verecundi facilè rubent, erumpente illico in genas purpura, & ægrè ferentes aliorum intuitus vultum demittunt. Audaces contrà ruborem nesciunt; quin perfricta, solidaque fronte inconniuentes pupillas in obuium quenque coniiciunt, neminem reuerentes. Irati micantibus oculis, toruo aspectu, spumantibus labris, crebra manuum, pedumque suppletionem inhorrescunt. Meticulosi decolores, quasi concreto in venis sanguine, arrectis comis, hærente in faucibus voce, ad auræ sibilum, ad moræ frondis umbram totis artibus contremiscunt. Inuidi limis obtutibus, ore plumbeo, liuidi, macie confecti, alienis gestiunt malis, bonis contabescunt. Delicatu-

li, ac molles nitida, & bene curata cute, læues, glabelli, cirrati, fluentes vnguentis, ad omnem elegantiam compositi muliebrem luxum æmulantur. Qui varijs animi motibus exæstant, vario quoque corporis motu agitantur, & intimos perturbationum fluctus mutato subinde colore testantur. At grauem, sapientemque virum dignitas oris commendat, quæ amari possit, ac timeri; & in lætis æquè, ac tristibus, vt animi, sic frontis constans malacia.

Habet præterea quisque Sexus, quæuis Ætas, quæuis hominum Fortuna, quælibet Natio mores suos, quos imitari Ethopœia debet. Varias Ætatum Gentium; & Ingeniorum indoles expressit egregiè Ioannes Barclaius in *Icone animorum*: describendis verò morum characteribus Theophrastus excelluit.

Cùm in Ethopœia Sermocinatione vtendum est, spectetur loquentis conditio, vt digna se verba faciat: hinc Horatius in *Arte Poetica*.

Intererit multum, Dauus, ne
loquatur, an Heros;

Maturusne senex, an adhuc flo-
rente iuuenta

Feruidus, an matrona potens, an
sedula nutrix,

M 2

Mer-

Mercatorne vagus, cultorne virentis agelli;

Colchus, an Assyrius, Thebis nutritus, an Argis.

Nullum porrò magis ingeniosum Descriptionis genus est; cùm in imitandis Personis proprietatem, & Decorum requirat, in quo summa laus Poetarum est, nec minor ars Oratorum.

Iam verò ut Exemplum Ethopœiæ præbeam, cum Prosopographia, & Prosopopœia coniunctæ, festivum argumentum propono, ludente stylo tractandum, qualem exigit persona.

*ACCO AD SPECVLVM
INSANIENS.*

Notissima est deformis Anus infania, sed forma opinione delirantis, qua cum se turpiusculam videret in speculo, illud indignata confregit.

Videtis bellam puppam, superstitem sedulo, bis puellam, annosior cornicibus, corvis concolorem, porrigine foedam, fulcata fronte, striato vultu, lippis oculis, salivosis labris, purulentis naribus, mucidam, rancidam, marcentem, strumofam, incurviam? cernitis animatam ossium struem, spirantem umbram, semivivum aridæ cutis centonem, pallidam senij larvam, strigosam Hecaten, tumulo,

tha-

thalamoque Ditis propediem inferendam ? Hæc tamen Hecuba repuerascens, (quippe post centesimum annum redordiri cœpit ætatem,) nulli cesserit Helenæ: ita sibi placet, ut se iudice suffragia Paridis mereatur. Iam itaque de formæ integritate secura studet insuper elegantia; atque ut longo usu muliebres callet argutias, omnes conuocat ad ornatum; ut scilicet festiua die, pompa lautiore plausibilis, oculos rapiat intuentium. Nec deest mundissima Synthesis, ex Auia hæreditate superstes, adhuc scæmineo spectabilis mundo, quanuis tandiu rixata cum blattis. At quæ deceat selem crocota? Digito inserit pronubum annulum; sed ridente Hymenæo annulatam Harpiam. Lacinosum ex humeris mammillare demittit in pectus; at inanis alutæ velamen. Ambiunt cololum vniones; verum non tam annorum liuent iniuria, quam strumæ fuligine. Pendent ex auribus nitidiores gemmæ; at quæ notant Æthiopicam Sagam, & admonent intuentes, hoc esse monstrum, licet nihil noui, ex Africa. Demum, ut specioso cætera corpori etiam staturæ maiestas accedat, proceritatem mutuatur à foccis. At quis, oro, Simiam in grallis non rideat? Ipsa certè, sed vna, scit, se

non pulcherrimam non esse; idque solum restat ad eximie venustatis coronidem, ut supremam comendo capiti manum imponat. Ergo, non tam ut videat, quid sibi desit, quam quid miretur, & aliquando fruatur spectaculo sui, cum toto Colmetæ apparatu speculum depromit ex arca: iamdudum enim declinauerat illius occursum, verita fatum Narcisi. Ut verò in conspectum venit, & mentiri nescia crystalli synceritas ipsam ipsissimam reddidit capularis anus imaginem, parum abfuit, quin veluti visa Gorgone rigeret. Hinc ubi horrorem indignatio excussit. O superum fidem! (exclamat) Accone ista est, an aliqua præstigmatix, ac tericulum puellarum? Illane ego, quæ ludcbam nuper in sinu matris, quæ inter domesticorum blanditias audiebam corculum, amor, delictum, quæ mille nuperrimè petita proci, Atalanta felicior, flammeolo nuptiali spectatissimum caput obnupseram? Vbinam frontis ebur? vbi rosæ genarum? vbi labiorum corallia? vbi dentium margaritæ? Ita secum obliuiosa delirat; non enim meminit annos; & fortasse nunc primum dentire se putat; cum è tribus dentibus, quos ad molendam pultem ætas deuexa serua-
uerat, vnum arroserit caries, alterum
tussis

tussis excusserit, tertius verò superstes
paralyti laboret. At bene est, inquit;
sentio quid istud sit rei. Mecum ludit
blandè irata Venus, atque hac teterri-
ma specie per iocum plectit proluxio-
rem formæ negligentiam. Si culpam
hanc deleam, corrigam illico speculi
errorem, & placata Dea utar puriore
crystallo. Applicat itaque ori volsel-
lam, ut è molliculis nimirum genis pri-
mam lanuginem metat. Expedit purpu-
rissimum, cinnabarim, stibium, cerussam,
& mille commiscet fucorum venena-
versuta Circe, quibus vitia cutis emen-
det, seque transformet in aliam. La-
miam credideris veneficis artus medi-
camentis ungentem. Operditum cum
opera unguentum! O infelicem pig-
mentorum iacturam, per hiantes ri-
mas inaniter fluentium! Qua unquam
argilla rugarum scrobes æquentur? quæ
fidelia fumosas malarum parietinas
dealbet? quibus lituris aut labes naturæ
sanentur, aut cicatrices ætatis? Non
ita sentit pulchella mulier; quin per-
git vultum tergere, inficere, colorare;
ut si reuiuiscat Xeuxis, atque hanc ta-
bulam videat, fateri possit in pingenda
vetula se minus artis habuisse. Iam ar-
ripit pectinem, & calamistrum, ut co-
mas discriminet, ac torqueat in cirros;
nec operosum est implexos in ordinem

crines digerere; cū totidem ferme albente calua dinumeret, quot Veturina Martialis. (a) Vbi ergo profusi licentiam capillamenti purpurea tētia coercuit, addito insuper phalerarum suggestu, floreo stemmate coronat; vt hoc etiam portentum accedat, quod cana cum bruma vernet amoenissima Chloris. Ita sibi visa omnes elegantiae numeros impleuisse iam speculum fidentiū explorat, sēpiusque deterfa oculorum amurca hebescentem aciem colligit perspicillis, quibus totam se hauriat, & expiatam omni menda puram putam Accus effigiem, formæ scilicet apicem, ambītiosis oculis ostentet. Oh pertinacem crysalli fidem! Ornata fatetur, non pulchram: immō turpiorem, quod ornamenta deturpet, Dabis tamen, dabis profectō pœnas veritas inurbana, quæ officiosa nescis adulatione dominam demereri. Crinali acu manum obarmat anus lymphata, & in speculum ruens, quasi Thessalicis artibus fascinatum, spectrum illud informe, quod horrens videt, hoc est se ipsam, prouocat ad certamen. Quicumque es, ait, improbe ludio, quem malus aliquis genius vitro inclusit, non effugies læsæ pulchritudinis iustissimas iras. Quid lates in insidijs æmule liuor?

uor? Ignauia est furtim insultare, vi-
treo fidere vallo dementia. Vel aperto
Marte congregere, vel imbellem cum
fragili munimento confodiam. Sic illa:
nec minus, quàm voce, manu ferox,
dum pugnat in turpitudinem suam,
plectit innocentem crySTALLUM, & mi-
nutatim effringit. Denique vbi defer-
buit furoris impetus, vltione satiata
motos componit fluctus placidissima
Iuno, & efferatas indignatione frontis
gratias pristinae reddit serenitati, se-
cumque canit vindicatae formae victo-
riam. Vtique adeò constanter insanit
proxima silicernio vespillonis amasia,
dignissima suauis Libitinæ.

*INCONSTANTIS INGENII
HOMINES.*

Ex Icone Animorum Io: Barclai.

Est aliud ingeniorum genus, penè
cæterorum omnium discrimina mira
quidem, sed illaudabili varietate com-
plectens: tamen in primis egregium,
si quàm illi impetum, tam frænum na-
tura addidisset. Illud est hominum,
vt quique affectus impulerint, ad ex-
trema ruentium. Si pietas seriò illis
placet, & Numinis cultus, quasi nulla
hilaritas intercedere tam sanctis offi-

cijs possit, fronte deiecta, & ad omnem remissionem irascente, supercilium inducunt non duraturæ Sanctitatis; alienæ etiam vitæ superbi censores cæterorum probitatem ex sua extemporanea seueritate metiuntur. Tunc priorum amicitiarum delicias solent abijcere, etiamque innocentem iucunditatem non ferunt, quæ in sapientium vita ad obliuionem, vel patientiam laborum solet interferi. Mox nimia intentione fractum animi robur, vbi odisse incipit hanc ipsam, cui inconsultè incubuit, pietatem, non per gradus, & reciprocantis æstus vices, sed in contrarium acto torrente repetit, quem omiserat, luxum. Tunc verò tam immodicè in voluptates solui, quàm eas ineptè refugerant: tunc etiam ipsum nomen seueritatis odisse, iocisque, & omni libertate cultoribus subhorridæ illius pietatis, quam modò reliquerant, illudere. Dum hæc agunt, ecce tibi reuocata pietas adest, tristisque pœnitentia lasciuiam rursus expellit, donec etiam illius pœnitentiæ incæperit pœnitere. Nec in Numinis tantùm cultu frequens illa, atque immodica mutatio; vbique pari impetu errant. A summæ amoris consuetudine eos in extrema odij velut aliquis turbo agit. Nunc assiduus labor placet; statimq; sine neruis

uis segnities : iam mite literarum studium iam amorum exultans cupiditas, & quæcunque præterea in contrarios motus mortalium mentes agunt. Loquendi etiam, tacendique studium non satis adgubernant. Si incitantur feruore dicendi, quencunque cœtum iniuerint, sermonem vniuersis præripiunt, soli; audiuntur : mox hilaritate destituti, quæ in verborum luxuriam diffuderat mentem, ægro silentio contabescunt, secumque velut ad internum colloquium collecti ita lumina defigunt, vt vix præsentem agnoscere, aut rogati audire videantur; pari vtrobique flagitio in humani consortij venustatem, in quo & commodè loqui, & tantum per spatia tacere conceditur.

*PHILIPPVS MACEDO INDOLE
FRAVDULENTA.*

Ex Iustino lib. 9.

Fuit Rex armorum, quàm conuiuiorum apparatus studiosior, cui maximæ opes erant instrumenta bellorum; diuitiarum quæstu, quàm custodia solertior. Itaque inter quotidianas rapinas semper inops erat. Misericordia in eo, & perfidia pari iure dilectæ; nulla apud eum turpis ratio vincendi:

blandus pariter, & in gratia offensam
 simulare; insidiosus alloquio, qui plura
 promitteret, quàm præstaret: in seria,
 & iocos artifex. Amicitias vtilitate,
 non fide, colebat: gratiam fingere in
 odio, apud vtrunque gratiam quærere
 solennis illi consuetudo. Inter hæc Elo-
 quentia, & insignis Oratio, acuminis,
 & solertiæ plena; vt nec ornatui facili-
 tas, nec facilitati inuentionum deesset
 ornatus.

*Similes illustrium Virorum Ethopæias
 plurimas dabit Iouius in Elogijs.*

*EVCLIO TENACISSIMVS
 AVARVS.*

Ex Plauto in Aulularia Scena 5.

Pumex non æquè est aridus, atque
 hic est senex.

tute existima

Suam rem perijsse, seque eradicarier,
 Quin Diuum, atque hominum cla-
 mat continuò fidem,

De suo tigilio fumus si quà exit foras.
 Quin cùm it dormitum, follem
 obstringit ob gulam,

Ne quid animæ foras amittat dor-
 miens.

Aquam herclè plorat, cum lauat,
 profundere.

Fa.

Famem herclè vtendam si roges nunquam dabit.

Quin ipsi pridem tonsor vngues dempserat :

Collegit , omnia abstulit præsegmina.

Pulmentum pridem ei eripuit miluius :

Homo ad Prætorem plorabundus deuenit.

Infit ibi postulare plorans , ciulans ,

Vt sibi liceret miluium vadarier.

DE SOMATOPOEIA.

CAPVT QVARTVM.

S*SOMATOPOEIA est ficta Persona descriptio.* Hæc rerum visibili forma carentium Corpora effingit: Virtutes, & vitia, montes, fluuios, Vrbes, vmbras humanis, aut monstrosis artibus, & vestibus induit. Prosopœiam quandoque adhibet, cùm fictas Personas loquentes inducit, & mutis, ac inanimis dat vitam, & vocem; idoneos quoque mores per Ethopœiam, describit. Argutum sanè commentum, Poesi perutile, atque alijs insuper Artibus, quæ versantur circa rerum imagines, vt Plasticæ, Picturæ, Sculpturæ.

Ab

Ab iisdem fermè Locis, à quibus Prosopographia, deducitur. In id maximè niti debet, ut aptas rebus formas accomodet, abiectis humiles, illustribus egregias, lætis amabiles, noxijs horridas. Denique

Fitta voluptatis causa sint proxima veris. Horatius de Arte Poet.

Sic Plutarchus de *Fortuna Romanorum* Virtutem describit incessu mittem, aspectu decoram, mista cum authoritate verecundia, Heroum caterua, trophæa gestantium, stipatam. Contrà verò Fortunam, motu velocem, spe, ac fiducia ferocientem effingit, Terræ, ac Maris opes ex Amalthææ cornu profundentem, comitante Regum, & Imperatorum sequacium corona.

Rariùs ab Oratoribus adhibentur Somatopœiæ, frequentius à Poetis, à quibus exempla petes. Hæc interim habeto.

PHILOSOPHIA.

Ex Sener. Boet. de Consolat.

Philos. Prosa 1.

Adstitisse mihi supra verticem visa est mulier reuerendi admodum vultus, oculis ardentibus, & ultra communem homi-

hominum *valentiam* (a) perspicacibus, colore viuido, atque inexhausti vigoris; quanuis ita æui plena foret, vt nullo modo nostræ crederetur ætatis. Statura discretionis ambiguae; nam nunc quidem ad communem sese hominum mensuram cohibebat; nunc verò ptilfare Cœlum summi verticis cacumine videbatur. Quæ, cum caput altiùs extulisset, ipsum etiam Cœlum penetrabat, respicientiumque hominum frustrabatur intuitum. Vestes erant tenuissimis filis, subtili artificio; indissolubilique materia perfectæ, quas (vti post eadem prodente cognoui) suis manibus ipsa texuerat; quarum speciem, veluti fumosas imagines solet, caligo quædam neglectæ vetustatis obduxerat. *Paulò inferiùs ita loquens inducitur.*

Tum verò totis in me intenta luminibus. Tu ne es ille (ait) qui nostro quondam lacte nutritus, nostris educatus alimentis in virilis animi robur euaseras? Atqui talia contuleramus arma, quæ, nisi priùs abiecisses, inuicta te firmitate tuerentur. Agnoscis ne me? quid taces? pudore, an stupore siluisti? mallem pudore; sed (vt video) stupor oppressit.

Virtutem, ac Voluptatem per So-
ma-

a *Hoc est potentiam, sine aciem.*

matopœiam describit Seneca *de beata vita* c. 7. Valerius Maximus Cruditatem *lib. 9. c. 2.* Tertullianus Patientiam in fine tractatus de eadem Virtute. Notissima est Virgilij Fama *lib. 4. Æneid.*

F A M E S.

Ex Ouidio lib. 8. Metam. Fab. 11.

Hirtus erat crinis, caua lumina,
pallor in ore:

Labra incana situ, scabri rubigine
dentes.

Dura cutis, per quam spectari viscera
possent.

Ossa sub incuruis extabant arida
lumbis.

Ventris erat pro ventre locus: pen-
dere putares

Pectus, & à spinæ tantummodo crate
teneri.

Auxerat articulos macies, genuum-
quæ tumebat

Orbis, & immodico prodibant tu-
bere tali.

T I B E R I S.

Ex Claudiano in Paneg. Olib. ac Prob.

Illi glauca nitent hirsuto lumina
vultu,

Cæruleis infecta notis, reddentia
patrem

Ocea-

Oceanum : crispo densantur gramine
colla .

Vertice luxuriat toto crinalis ha-
rundo ,

Quam neque fas Zephyris frangi ,
nec sole perustam

Æstiuo candore mori ; sed viuida
frondet

Æquæum complexa caput . Taurina
leuantur

Cornua , temporibus raucos sudantia
riuos .

Distillant per pectus aquæ : frons
hispida manat

Imbribus ; in liquidos fontes se barba
repectit .

Palla graues humeros velat , quam
neuerat vxor

Illi percurrens vitreas sub gurgite
telas .

Ad Somatopœiam pertinent Poeticæ
Metamorphoses , quæ mutatas rerum
formas ingeniosè mentiuntur ; quibus
comminiscendis , ac describendis adeò
excelluit Ouidius , vt non aliundè quæ-
renda sint exempla .

His adde festiuissima Poetarum fig-
menta , qui velut extra se rapti Pro-
theos agunt , in varia rerum portenta
pro libito abeunt . Procul inde Lu-
ciani , & Apulei ludentes , ac rudentes
in

282 *De Descriptionibus* :
in Afinis. Ecce cantuunculam orditur
migrans in olorem Horatius. *Lib. 3.*
Carm.

Iam iam residunt cruribus asperæ
Pelles, & album mutor in alitem.

Supernè nascunturque læues

Per digitos, humerosque pennæ.

At si facilè Somatopœias inuenire
volueris, confugies ad Iconologiam
Cæsaris Ripæ, quem ducem habere
poteris ad rerum formas effingen-
das.

DE TOPOGRAPHIA.

CAPVT QVINTVM.

TOPOGRAPHIA est veri loci de-
scriptio. Desumitur à Causis, à
partium Distributione, & ab Adiunc-
tis locorum. Ita si velis Urbem de-
scribere, spectare poteris antiquam
illius originem, primosque Conditores;
situm, figuram, mœnium ambitum,
munimenta, vias, compita, fora,
sacras, & profanas, priuatas, & pu-
blicas ædes. Præterea ciuium frequen-
tiam, splendorem, opulentiam, mer-
ces, artes, equestrem, politicum, mi-
litaremque ordinem &c. Si Regiam
describas, occurrerit ædificij maiestas,
ad quod erigendum, ornandumque
cer-

certarunt artificum ingenia , & par
materiæ pretio elegantia formæ. Per-
curreſ atria , peristyliâ , conclauia ,
omnia signis, picturis, marmore, auro,
gemmaſque nitentia &c. Pro describen-
dis autem ædificijs legendus Vitruuius,
qui propria docebit vocabula ad Ar-
chitecturam ſpectantia .

Si quæ ſunt aliæ Locorum Descrip-
tiones , vel ad Topographiam refe-
runtur, vel ad rem noſtram non per-
tinent; vt Geographia , & Coſmogra-
phia; illa Terram , hæc Orbem vni-
uerſum describens , quas artium earum
profefſoribus , ac ſtudioſis relinqui-
mus .

EXEMPLA TOPOGRAPHIÆ .

*Hispania deſcripta,
& laudata .*

Ex Latino Pacato in Pan. Theod.

Tibi mater Hispania eſt , terris om-
nibus terra felicioꝝ , cui excolendæ ,
atque adeo ditandæ impenſius , quàm
cæteris gentibus ſupremus ille rerum
fabricatoꝝ indulſit , quæ nec Auſtrinis
obnoxia æſtibus , nec Arctoïſ ſubiecta
frigoribus media fouetur axis vtriuſ-
que temperie; quæ hinc Pyreneis mon-
ti-

tibus, illinc Oceani æstibus, inde Thyreni maris litoribus coronata naturæ solertis ingenio, velut alter orbis includitur. Adde tot egregias Ciuitates, adde culta, incultaque omnia, vel fructibus plena, vel gregibus: adde auriferorum opes fluminum, adde radiantium metalla gemmarum. Scio fabulas Poetarum auribus mulcendis repertas aliqua nonnullis gentibus attribuisse miracula, quæ dum sint vera, sint singula, nec iam excutio veritatem. Sint, vt scribitur, Gargara prouentu læta tritici, Meuania memoretur armento, Campania censeatur monte Gaurano, Lydia prædicetur amne Pactolo; dum Hispaniæ vni quidquid laudatur assurgat. Hæc durissimos milites, hæc expertissimos duces, hæc facundissimos oratores, hæc clarissimos vates parit; hæc iudicum mater, hæc Principum est. Hæc Traianum illum, hæc deinceps Hadrianum misit Imperio; huic te debet Imperium. Cedat his terris terra Cretenfis, parui Iouis gloriata cunabulis, & geminis Delos reptata Numinibus, & alumno Hercule nobiles Thebæ. Fidem constare nescimus auditis: Deum dedit Hispania, quem videmus.

Postrema hæc Emphasis omninò adulatoria est ex profana vetustatis licentia,

ta, cui facillimum fuit homines consecrare. Sed Iouis, ceterorumque inanium Deorum non maior diuinitas, quam Cæsaris.

ÆDES MAGNIFICÆ.

Ex Petro Firmiano in Gyge Gallo.

Amplissimæ erant, ut assentatorum turbam possent admittere, & maiestate ipsa testari dominorum potentiam. Porrectissimam aream, lectisque stratum lapidibus, ne quid inuenustum calcarent aduentantium vestigia, undique cingebat magnifici operis moles: hanc æquis interuallis distinctæ, ac variij laboris trecentæ columnæ exornabant: pleniores acceperat pars humilior, ut incumbentium ordinum pondus securius, ac decentius ferrent. Neque hic se totam exhauserat artificum industria: quippe structura crescente, veluti per gradus, simul procedebat elegantissimæ domus, ad regulas artis, non ad barbaræ voluptatis gustum, ordinatissima dignitas. Latior erat, quæ priori innitebatur, surgentis ædificij facies, & nobiliore diligentia, marmorumque frequentiori incrustatione spectabilis. Opus absolutebant lusus illi omnes in lapide, ac deliciæ artis, quas prima inuenit supra

pra cæteras Græciæ vrbes in edium cultu Corinthus luxurians. Vbi in atrium peruenisses, duodecim eximie proceritatis columnæ, magno emptæ, quidquid antea stuporem fecerat, delebant ex animo. Porphyreticæ erant; ex ære capitella, & bases, intermistis Heroum statuis, quas egregia arte nobiles sua etiam commendabat antiquitas.

H O R T U S.

Ex eodem in Seculi Genio.

Hortus erat in suburbijs amœnissimus, quem omni spectabilem, seu artis, seu naturæ varietate, nouus patris hæres Apollonius possidebat, studiorum consortio, & ipse nobis coniunctissimus. Illic non modò flores, qui apud nos colore, aut odoribus præstant; verum & ex peregrinis præcipui viscebantur, quos ad alieni soli patientiam adduxit nostræ ætatis diligentia. Neque minori studio vndique collectæ arbores, quotquot fructibus viles sunt, ex consilio in diuersa distributæ, vt non vnius partis tota esset fœcunditas. Plures tamen in viridarij ambitu muris affixæ opportuniori sole fruebantur, & fructuum maturæscientium colore pro-
uecto

ueto ad præsentio rem voluptatem, inuitabant intuentes. Non molles ex fronde porticus, non statuæ dispensatis per fistulas aquis manantes, pulcherri- mo loco deerant; non in multos passus ambulationes productæ, non deniq; ad solitudinem inter densissimas arbores furtiui recessus; ut siue confabulari vel- les, siue extra conspectum spatari, necessarijs curis sine teste intentior, dissimilis voluptas iucundissima succes- sione afficeret diuersa cupientem.

*AMOENISSIMÆ REGIONIS
PROSPECTVS.*

*Ex lo: Barclaio in Icone Anima-
rum.*

Engens planities aliquot suspensa-
colliculis, rursus montes in orbem
effusi neque citò castigabant oculos, ne-
que illos per immensum Cœlum spar-
gebant. Tameis latissima vbertate in
viciniam exundat, & ad radices mon-
tis redeuntibus in gyrum fluctibus in-
sulam penè molitur. Passim toto aluco
naues, & omnis generis onerariæ: ut
proximas quidem totas aspicerem, cæ-
terùm longiùs stantes, aut sub altiori
ripa, ex malis antennisque, tanquam
nudam, & brumalem syluam cognosce-

scerem. Nihil illa plaga viridius. Pascuorum utilitas eam frugibus abstulit; & vix alibi felicior in gramina terrarum luxuries. Priuatorum quoque fundos de more patrio perpetuæ fossæ, & pleræque in marginibus arbores sepiunt. Maximè vias publicas altissimæ populi à lateribus tuentur, vt de monte despicienti perpetua facies hortarum videatur, saltuumue factorum ad ambulationis voluptatem. Præcipua est tam varia viriditas, penè in diuersos colores distributa. Nam quæ longius absunt, velut cæcula incumbentis Cœli facies opacat: propiora densiore fronde in arboribus nigra sunt, vel humi tenui herbarum virore nitentia. Sed pulcherrimum spectaculum præbebat ipsa Vrbs, inter eximias Europæ celebrata, Londinum, innumeris domibus vix tamen populi sui capax. Quippe ad alteram Tamesis ripam latè effusum est, vicinisque annexum Oppidis, & penè continua ædificia per quatuor milliaria protendens. Per hoc spatium non priuatæ tantum domus, sed fana crebro fastigio eminent, & media Ciuitas tanquam umbone, ita præcipui templi mole distincta est.

Plinius iunior l. 4. epist. 17. Laurentinum villam suam exactissimè describit: aliam in ora Tuscorum l. 5. ep. 7.

Q. Cur-

*Q. Curtius steriles Ægypti solitudines l. 4.
 Felicem Arabiam l. 5. paulò inferius Ba-
 byloniam, illiusque penfiles hortos.*

DE TOPOTHESIA.

CAPVT SEXTVM.

TOPOTHESIA est ficti loci descrip-
 tio. Hæc tantum ad Fabulatores
 pertinet, ac Poetas, quibus mira feli-
 citas est, nulli visa tecta, templa, & ar-
 ces, moliendi; nouas etiam inuenien-
 di plagas, nulli notas Columbo. Eadem
 ratione, qua Topographia, tractatur;
 immò tantò magis excellit, quantò ma-
 gis effingit similia veris. Lucianus Som-
 niorum Insulam excogitauit, ibique
 Urbem, & Regiam Somni, *lib. 2. Ve-
 rarum Narrationum*. At eiusdem do-
 mum elegantissimè describit Ouidius
lib. 11. Metam. fab. 9.

Est propè Cimmerios longo spelun-
 ca recessu,

Mons cauus, ignaui domus, & pe-
 netralia somni:

Quò nunquam radijs oriens, me-
 diusue, cadensue

Phæbus adire potest. Nebulæ cali-
 gine mistæ

Exhalantur humo, dubiæque crepur-
 scula lucis.

N

Non

Non vigil ales ibi cristati cantibus
oris.

Euocat Auroram, nec voce silentia
rumpunt

Sollicitiue canes, canibusue sagacior
Anser;

Non fera, non pecudes, non moti
flamine rami,

Humanæ ve-sonum reddunt conui-
tia-linguæ.

Muta quies habitat. Saxo tamen
exit ab imo.

Riuus aquæ Lethes, per quem cum
murmure labens.

Inuitat somnos crepitantibus vnda
lapillis,

Ante fores antri foecunda papauera
florent,

Innumeræque herbæ, quarum de lac-
te soporem.

Nox legit, & spargit per opacas hu-
mida terras.

Ianua, ne verso stridorem cardine
reddat,

Nulla domo tota est; custos in limi-
ne nullus.

At medio thorus est hebeno sublimis
in antro.

Plumeus, vnicolor, pullo velamine
tectus,

Quo cubat ipse Deus, membris lan-
guore solutis.

Hunc

Hunc circa passim varias imitantia formas,

Somnia vana iacent, totidem quot
messis aristas,

Sylvæ gerit frondes, eiecit litus arenas.

Simile est somni Antrum apud Statium *lib. 10. Thebaidos*. Famæ domum adire si libeat, dux erit Ovidius *lib. 12. Metam. Fab. 2.* idem fugiendum Invidiæ rectum ostendet *lib. 2. Fab. 12.* si malis Regiam Solis inuisere, illam statim aperit *initia lib. 2.* Ad inania ditis Regna, hinc in Elysios campos te deducet Virgilius *lib. 6. Aeneidos*.

Claudianus ad Speluncam Temporis *Paneg. 2. de laudibus Stiliconis*. Tandem quoties per ignota loca mente peregrinari volueris, lege Poetas.

DE CHRONOGRAPHIA.

CAPVT SEPTIMVM.

CHRONOGRAPHIA est Descriptio temporum; ut Noctis, Auroræ, Hyemis, Æstatis, Adolescentiæ, Virilitatis &c.

Describuntur Tempora per eorum. Adiuncta, præcedentia, concomitantia, subsequenta, & per effecta. Si Veris ex. gr. Descriptio habenda sit, res-

picies primo præcedentia, elapsæ nuper hyemis horrorem, inclementiam cæli, squalorem aruorum; concreta gelu flumina, fœdos imbres, algidas pruinas, congestas niuibus niues, naturam omnem veluti senio confectam; quæ maioris argumenta euanescent, ubi primum serenam frontem exporrigit suauissima hæc anni iuuentus. Hinc ad concomitantia descendes; afflantes iam mitiores auras, dies puriori luce fulgentes, liquida fluentes vnda riuulos, pictas flosculis hortorum areolas, luxuriantia virenti gramine prata, sylvasque amœnissima frondium umbracula explicantes. His adde subsequencia; communem viuientium lætitiā, spes agricolarum excitatas, & datam colendis aruis alacrius operam; cū feliciter vernans annus largiorem messem promittit, fœcundæ iam Æstati, ac diuiti præludens Autumno, agrestiumque labores futuræ vbertatis expectatione solatur.

Sin verò Descriptionem ducere malis ab effectis, illa eadem Veri tanquam causæ adscribes, dicendo: meliorem hanc Anni partem deterfa hyemis tristitia squalentem instaurare naturam, serenitatem, ac amœnitatem reuocare, soluere gelida compede fluuios, arua floribus colorare, vestire gramine pra-

ta, frondibus arbores; ad argutissimos
concentus prouocare canoras aues, &
omne animantium gentis exhilarare.
Ita paucis Horatius.

Diffugere niues, redeunt iam grami-
na campis,

Arboribusque comæ.

Mutat terra vices, & decrefcentia
ripas

Flumina prætereunt.

Plerunque Chronographia cum alijs
Descriptionibus miscetur. Et humana-
rum quidem Ætatum Descriptio Æthio-
piciam ferè inuoluit. En exempla.

ADOLESCENTIA.

Ex D. Ambrosio de Interp. S. Iob.
l. p. cap. 7.

Hæc ætas magis ad vitium lubrica
esse consuevit. Habet enim pueritia in-
nocentiam, senectus prudentiam, ipsa
vicina adolescentiæ iuuentus bonæ exi-
stimationis intuitum, & verecundiam
delinquendi. Adolescentia sola est in-
ualida viribus, infirma consilijs, vitio
calens, fastidiosa monitoribus, illece-
brosa delicijs.

VIRILITAS.

Ex Io: Barcl. in Icone Animorum cap. I.

Excipit Iuuentutem flata ætas, ac virilis, media inter adolescentiæ præcipientia, pondusque senectutis. In hac adeo cum animo corpus viget, ut tunc demum verè hominem credideris, datamque in illorum annorum gratiam, quantacunque est mortalibus, vitam. Hic ingens corporum, & animorum mutatio; ut ciborum plerunque, ac voluptatum alius tunc delectus, ita mores alij, & in nouum efformatæ cupiditates. Robustus animus, & veluti ab adolescentiæ caligine emissus primùm solet de antea actis erroribus atroci censura iudicare, mirarique se tam improuidè potuisse peccare. Illinc statim vtilitas poenitentiae, & ruinas, quas iuuentus fecerat, emendantis sedulitas. Opum, honorumque præcipuus amor est, & quasi nunquam de vita decessuri, ita auidè ad illam subsidium, & ornamenta quærunt. Simulare amicitias, suisque desiderijs imperare non alij magis sciunt. Veram quoque fortitudinem habent, castigato impetu, neque extincto, quo ad iram, vindictamque adolescentia feruebat. Tunc denum.

VIS

vis integra, solersque iudicij, non incitata torrente iuventutis, non fessi corporis ægritudine laborans. Cauta illis vitia, ac plerunque nec Virtutem sine præmio colunt.

At cùm Temporis partes frequentissimè describantur minùs frequens occurret ipsius Temporis descriptio; nec tam facilè illius natura exprimi potest. Sintiosum hoc tamen, lubricumque monstrum, & ænigmati simile quoquo modo adumbrare conemur.

Tempus.

O Tempus tam vitæ nostræ intimum, tam idem infestum; tam præsens, tam fugax, tam labile, tam indefessum; rerum intereuntium parens idem, & decoctor, vorax citra fabulam Saturnus, qui quæ gignis absumis; cuius edacitatem nec subiecta dentibus marmora, vel deludunt, vel satiant. Quid vnquam hoc tempus est in tot partes diuisum, quarum primæ nunquam reditura cesserunt, succedentes in incerto futuri latent, præsentis notari vix possunt, cùm iam desinant esse, cùm primum esse dicuntur? Hoc tamen quidquid est fugitium, & anceps operosa dimensione secamus in horas, partimur in dies, distribuimus in menses, digerimus in annos, extendimus in ætates di-

latamus in secula. Sed hoc idem, quod tam longè, latèque diffundimus, quàm breuem sui nobis permittit vsuram? Si totam illius summam colligas, tot subductis rationibus, an quidquam tibi superest, quàm præceps momentum? Et metiri fortasse illud poterit humana solertia, nunquam morari. Clepsammi dijs, Clepsydrisque inclusum cum pulvere labitur, fluit cùm vndis: Sciaterico stylo affixum evanescit cum umbris, machinis illigatum vibratur cum rotis; nullusque adhuc Archimedes funibus, libramentis, ponderibus fugientis velocitatem retardauit. Age nouus Iosue refræna Solis equos, & cælestium orbium vertiginem siste, vt aliquam temporis moram iniicias. Mira loquimur, & naturæ viribus negata. Sola Virtus illius fugam, si non cohibet, occupat, & per momenta dilabens arripere festinat ad beatæ meritum æternitatis.

Prolixiorem aliam Temporis Descriptionem faciliùs desumes ab eiusdem effectis. Quis enim ignorat rerum humanarum vices, & clausam temporis finibus mortalium vitam, & euersas moles, vrbesque solo æquatas, & mutata Imperia, vixque superstitem magnarum rerum memoriam? omitto notissima similia, sagittas, yndas, auram,
fu-

fumum, quibus illius velocitas, leuitasque signatur. Et ne semper iniquum nobis Tempus accusemus, verti potest in illius laudem Descriptio, si quæ affert bona recenseantur. Nempe hoc idem maxima quæque sensim perficit, lenit aspera, meliora reducit, Virtutem, & Veritatem persæpe latebris merfas euocat in lucem &c. De his plura Ouidius *lib. 4. de Tristibus eleg. 5.*

*Tempore ruricolæ patiens sit taurus
aratri,*

*Præbet & incuruo colla premenda
iugo &c.*

Alia quoque ratione Tempus describere poteris, illius formam effingendo, sed exprimendis eiusdem proprietatibus, & effectis accommodatam; quauis Chronographia tunc in Somatopœiam vertetur; qualis hæc esset ad Pictorum fermè ingenium descripta.

Temporis imago.

Longæus hispidusque Senex discissum marmor infederat, nobilis ruinæ fragmentum. Egregij operis basis fuisse videbatur, magnis nominibus inscripta, quorum corruptis characteribus damna testabatur annorum; maculoso præterea situ, muscoque deformis. Ille tetrico, demissoque vultu sparsa rudera, fractisque fascibus confusas ligonibus secures fastidioso supercilio spectabat.

bat . Promissæ barbæ , crinisque canities , & frontis asperitas , & oculorum recessus , & pendentium genarum liuor , & retorrída cutis , totiusque corporis macies eam referebant ætatem , quæ filium habere Nestorem posset , quamquam in siccis , nervosisque membris tantum adhuc virium , vt prostrata Heroum cadauera superbo pede calcarer . Toto corpore syluescentes villi , & prominentes ex humeris grandiores alæ mixtum ex fera , & volucre monstrum effecerant . Dextra quasi vibrandam , falcem erexerat , nec cam , vel ætatis rubigine hebescentem , vel vsu detritam , sed integra , nitidaque acie minantem . Sinistram in subiectum horologium deflexerat ; & ne quis ambigere posset de schemate , porrecto indice legendam in saxo epigraphem ostendebat , ita semelam , vt hemistichium superesset & carmine

Tempus edax rerum .

*AVTVMNVS IN HYEMEM
VERGENS .*

Ex Seneca in Apocol. Claudij .

Iam Phæbus breuiore via contraxerat ortum

Lucis , & obscuri crescebant tempora somni :

Iamq;

Iamq; suum victrix augebat Cynthia
regnum ;

Et deformis hyems gratos carpebat
honores

Diuitis Autumni, visoque senescere
Baccho

Carpebat raras ferus vindemitor
vuas.

Auroræ, Vesperis, Noctis, aliorumq;
Temporum Descriptiones, vel nolenti
Poetæ obtrudent; quorum aliquos irri-
det Seneca, earum Descriptionum one-
ri libentiùs acquiescentes, vt non con-
tenti Ortus, & Occasus describere, etiam
medium diem inquietent.

DE PRAGMATOGRAPHIA.

CAPVT OCTAVVM.

P *PRAGMATOGRAPHIA est rei ,
seu facti descriptio ; cum scilicet id ,
quod factum fuit , aut fit , siue factum ,
faciendumue fingimus , ita omnibus co-
loribus pingimus , vt iam Auditorem ,
Lectoremue in theatrum traxisse videamur .* (a) Alij hanc Speciem Descriptio-
nis propriè Hypotyposim vocari ma-
lunt , Latine Demonstrationem .

Neque solùm hominum facta Prag-
matographia describit ; vt bella , trium-
phos,

a Carbo l. 1. de eloc. disp. 24., & lib. 4.
disp. 7. Rhetor Galli lib. 3. c. 28.

phos, conuiuia; sed & actiones, quæ fiunt à cæteris causis, vel animatis; vt belluarum ludos, & certamina; vel inanimatis; vt alluiones, procellas, terræmotus, incendia. Describuntur huiusmodi actiones per explicationem Circumstantium, per Distributionem, & per Adiuncta illa omnia, quæ numerauimus in Facti Amplificatione.

Præter actiones causarum, ea quoque describimus, quæ ab iisdem causis producuntur; siue Naturæ sint, vt flores, marmora, metalla, gemmæ, idque genus alia, anima, vel sensu carentia; siue sint Artis opera, vt simulacra, picturæ, aulæ, vasa, toreumata, bellicæ machinæ &c. In his describendis plurimum valent Loci à Partium enumeratione, ab Adiunctis, à Genere, & Specie, & à Causis. At nihil æquè proderit, ac nosse rerum proprietates, & vsus; adde (quod ante monui) Latinas voces, singulis explicandis accommodatas. Utile erit postremus vocabulorum Index Onomasticæ Amalthææ, ac Thesaurolinguae Latinae adiectus; & (si liceat) Nomenclator Octilinguis, omnium rerum propria nomina continens, digesta in classes, ab Authore damnati nominis olim collectus.

Harum omnium Descriptionum ad Pragmatographiam spectantium aliqua sub-

subdām exempla. Cæterum quascunque earum formas indagare, pluribusque singulas explicare exemplis immensa operis esset. Pro describendis futuris vide, quæ habes in figura Ominationis, & in loco à Consequentibus.

ACTIONES HOMINVM.

PVGNA.

Ex Latino Pacato in Pan. Theod.

Ecce lux tandem : omnis campus horrebat. Diuisi in cornua equites, leues ante signa velites, dispositæ manipulatim cohortes, & gradu pleno ferentes agmina legiones vniuersa latè quæ visus agi poterat, occupant. Nondum se virtus experiebatur : iam disciplina vincebat. At postquam intra coniectum teli acies vtraque promouit, & effusis hinc inde sagittarum nimbis res venit ad capulos; milites pristinae virtutis, Romani nominis, Imperatorum denique nemores causam publicam manu agere : hostes venditam operam, laceratam Italiam, spem in ferro reliquam cogitantes, gladiatoria desperatione pugnare, nec gradu cedere, sed vestigio stare, vel cadere. At ubi impulsæ acies, fronsque laxata, & fiducia in pedes versa est, ire præcipites, aut glomerando fugere, & se inuicem festinando

nando tardare : armati , inermes , integri , faucij , primi , postremique misceri : miles vrgere , eminus , cominus , gladijs , hastis punctim , cæsim ferire : alij poplitibus imminere , alij terga configere , aut quos cursu non poterant continere , iaculis occupare : arma , telaque , homines vita perempta , prona , supinaque corpora passim vel in aceruo iacere . Illi inutilibus , excisisque membris reliqua sui parte fugiebant : hi dolorem vulnorum sequebantur : isti mortes receptas in sylvas , & flumina deferebant : illi postremum spiritum in admiratione nominis tui , & sui ducis detestatione fundebant . Nullus finis cædendi , insequendique , nisi subtraxisset aliquando victoribus mors hostem , & nox diem .

**PUBLICA LÆTITIA PRINCIPE
VRBEM INGREDIENTE**

Ex eodem .

Nec pia hac mora cunctatiùs , vbi te affore nuntiatum , impulsis effusa portis *Ciuitas* , obuiam præuolauit , & vt est omne desiderium post spem impatientius , parùm credens paterè venienti , festinauit occurfare venturo . Fingit quidem , vt scimus , timor gaudium ; sed ita intimos mentis affectus proditor vultus enuntiat , vt in speculo frontium
imago

imago extet animorum. Velut illa ciuitas à longa obsidione respirans, quòd eam Tyrannus Alpibus obiacentem, tanquam belli limen attriuerat, tanta se, & tam simplici exultatione iactabat; vt inesse vera lætitia nimia videretur. Ferebant se obuiæ tripudiantium cateruæ: cuncta cantu, & crotalis personabant. Hic tibi triumphum chorus, ille contra Tyranno funebres Nænias, & carmen exequiale dicebat: hic perpetuum victis abitum, ille victoribus crebrum optabat aduentum. Iam quocunque tulisses gradum, sequi, circuncursare, præcedere, vias denique, quibus ferebaris, obstruere; nullus cuiquam sui, tuive respectus blandam tibi faciebat iniuriam. Quid ego referam pro mœnibus suis festum liberæ nobilitatis occursum? conspicuos veste niuea Senatores? reuerendos municipali purpura Flamines? insignes apicibus Sacerdote? Quid portas virentibus sertis coronatas? quid aulæis radiantes plateas, accensisque funalibus auctum diem? quid effusam in publicum turbam domorum, gratulantes annis senes, pueros tibi longam seruitutem vouentes, matres lætas, virginesque securas?

CONVIVVM.

Ex Petro Firmiano in Gyge Galle.

Abacum argentea supellex onerauerat, operosæque celaturæ, ac variæ capacitatis vasa, haud ipsi conuiuio necessaria proferebantur ad spectaculum.

Ministrorum grex, escarum præfector præcunte, non sine strepitu in voluptatis præludium primos cibos attulere; & iusculorum odore triclinium repletum est. Inter conuiuantes modicum primò silentium fuit; & vix epulis sua condimenta addere hilaritas inceperat, cum ad lautiores cibos prima mensa sublata est. Alteram animum strues ita repleuerant, vt etiam impedirent; nec pullorum iusta ætas expectabatur: ex ipsa penè matre educti immatura morte festinantem gulam incusabant, quòd ad promerendos sapores patientia defecisset. Sed in istis nouitas, & pretium placebant, non gustus; mensæque laus ingens erat, eorum, quæ nondum ad edentium commodum creuerant, obtulisse primitias inutiles. Succi succis additi, boleto- rumque aduocata in palati solatium dulcis perniciēs, ita naturam per omnia corruperant, vt se ipsa non agnosceret.

sceret. Nouum vanitatis ostentum ! sibi gula pyramides erexerat, à quibus tamen abstinere cogebatur, stomacho tot voluptatibus impare; vt solis penè oculis videretur conuiuium exhiberi. Ad triplices mensas nondum erubescbat superbia : otiosis iam dentibus quarta data est; & luxu crescente, nihil, quod cderent conuiuæ, sed solum, quod spectarent, habebant.

FVNVS VIRGINIS.

Ex eodem.

Procedunt ferales exequiæ, & præmissis, qui virga, & voce submouerent immodicè curiosos; statim vt se scindit tulit confertum vulgus, quæ patebat via, triginta virgines opertis vultibus in candida veste templum subeunt: singulis sua fax, quam & circumducti flores ornabant in symbolum pudoris; æqualibus spatijs diuidebantur ad longiorem pompam in incessu grauissimæ. Funebres puellas sequebatur Sacerdotum numerus ingens; hos proximè funus ipsum, in capsâ exhibitum cunctis, virginis corpus pretiosissimis induerant. Capilli de more nubentium sparsi vltimo ancillarum officio discriminabantur in annulos, & quia brevis
agri.

ægritudo puellares genas non exhausce-
rat, sub ipso pallore ita formam serua-
uerat vultus; vt mouere lacrymas vel
crudelissimis posset, & etiam post fata
placere spectantibus.

Patrem, & procum pari gressu seque-
batur nobilis affinitas: amplior ami-
corum numerus, maximèque eorum,
qui communiori charitate, nec atrata
veste lugubres, tamen sub modesto cul-
tu pompam auxerant. Silentes hos, bi-
nosque suis incedentes lineis, subito
tumultu excipiebat virorum, ac mu-
lierum promiscua multitudo, ex vulgi
genio, ipsiusque funeris conspectu, ne
acerbissimæ forti viderentur denegasse
suos gemitus, intemperanter claman-
tium.

*Facta oratorio stylo fusè descripta vi-
de inferius in tractatu de Narratione.*

ACTIONES ANIMANTIVM RATIONE CARENTIVM.

Formicarum labores.

Ex D. Hier. in vita Malchi.

Aspicio formicarum gregem angu-
sto calle feruere, ferre onera maiora,
quàm corpora. Aliæ herbarum quæ-
dam semina forcipe oris trahebant,
aliæ

aliæ egerebant humum de foueis, & aquarum meatus aggeribus excludebant. Illæ venturæ hyemis memores, ne madefacta humus in herbam horrea verteret, illata semina præcidebant. Hæ luctu celebri defuncta corpora deportabant; quodque magis mirum est, in tanto agmine egrediens non obstabat intranti; quin potius, si quam vidissent sub fascis onere concidisse, suppositis humeris adiuuabant. *Vide Plinium l. 11. cap. 30. historia nat.*

**LUSCINIARVM CANTVS,
EIVSQVE STVDIVM,
ET ÆMVLATIO.**

Ex Plin. l. 10. hist. nat. c. 29.



Luscinijs diebus, ac noctibus continuis quindecim garrulus sine intermissu cantus, densante se frondium germine, non in nouissimum digna miratu aue. Primùm tanta vox tam paruo in corpusculo; tam pertinax spiritus. Deinde in vna perfecta musicæ scientia modulatus editur sonus; & nunc continuo spiritu trahitur in longum, nunc variatur inflexo, nunc distinguitur conciso, copulatur intorto, promittitur reuocato, & infuscatur ex inopinato: interdum & secum ipse murmurat; ple-

plenus, grauis, acutus, creber, extensus, vbi visum est, vibrans, summus, medius, imus. Breuiterque omnia tam paruulis in faucibus, quæ tot exquisitis tibiæ tormentis ars hominum excogitauit: vt non sit dubium, hanc suauitatem præmonstratam efficaci auspicio, cùm in ore Stefichori cecinit infantis. Ac ne quis dubitet artis esse, plures singulis sunt cantus; nec iidem omnibus, sed sui cuique. Certant inter se, palamque animosa contentio est. Victa morte finit sæpe vitam, spiritu prius deficiente, quàm cantu. Meditantur aliæ iuniores, versusque, quos imitentur, accipiunt. Audit discipula intentione magna, & reddit: vicibus reticent. Intelligitur emendatæ correctio, & in docente quædam reprehensio.

Plures huiusmodi Descriptiones sufficit idem Plinius, vt Aranei textentis telam, Bombicis, Culicis, Apum; quarum etiam operosam vitam describit egregiè Quintilianus Declamatione 13. circa finem.



ACTIONES CAUSARVM NATV-
RALIVM IN ANIMARVM.

Tempestas.

Ex Io: Barclai Argenid. l. 4.

Nox media vertebatur, cùm à montibus ventus exortus est, qui inter nauium funes erectos ad malum primùm quidem sibilo ludens, mox suspensum mare extulit, adductisque nubibus abstulit cælum. Turbabantur subita festinatione nautarum officia, simul inter se clamore sublato simul vndis fracto strepitu nondum vacuas aures repentibus.

Atri fluctus, aut eruto liuentes sabulo, inter noctis horrorem cerni non poterant; nisi cùm ingenti fragore allisi velut accensam mutuo verbere aquam, instar scintillarum mittebant in altum, rursuque sorbebant. Solus ille spumæ attritus micabat in tenebris, qui saepe ominoso impetu superans obiecta latera in medio fulgebat nauigio. Intuta anchorarum mora erat, quia spatium nauibus negabant, quo aliquid indulgerent incumbenibus ventis. Alius deinde timor vrgebat, ne si vincula decissent, inter se implicatæ triremes
frap-

frangerentur . Tandem omne nautarum consilium tempestas præuertit : Nam nec corrigi cursus poterat , nec sisti nauigia . Ferri cœperunt, quæ ventus iubebat ; aliquid scilicet veli relinquentes ad antennam , quo naues perdisparēs fluctus librantibus ventis starent .

Similem apud Q. Curtium Tempestatis descriptionem inuenies lib. 4.

FLVMINIS EXUNDATIO.

Ex Plinio iuniori epist. 17. lib. 8.

Tiberis alueum excessit , & demissionibus ripis altè superfunditur . Quamquam fossa , quam prouidentissimus Imperator fecit , exhaustus premit valles , innatat campis, quæque planum solum , pro solo cernitur ; inde quæ solet flumina accipere , & permista deuchere , velut obuius retrò cogit , atque ita alienis aquis operit agros, quos ipse non tangit . Annio delicatissimus amnium, ideoque adiacentibus villis velut inuitatus , retentusque magna ex parte , nemora , quibus inumbratur & fregit , & rapuit : subruit montes , & decidentium mole pluribus locis clausus, dum admissum iter quærit, impulit tecta , ac se super ruinas euexit , atque extrulit .

Vi-

Viderunt hi, quos excelsioribus terris illa tempestas non deprehendit, alibi diuitum apparatus, & grauem supellectilem, alibi instrumenta ruris: ibi boves, aratra, rectores: hinc soluta, & libera armenta; atque inter hæc arborum truncos, aut villarum trabes, atque culmina, variè, latèque fluitantia.

*OPERA NATURÆ SENSU
CARENTIA.*

Magnes.

Obscurus hic, & prima fronte gregarius lapis cum nobilioribus gemmis de dignitate contendit, nosque docet iustam rerum æstimationem non esse ab exteriori specie sumendam. Rudis, opacus, ferrugineus, nihil intuentibus præfert, quod oculos mulceat, aut sollicitet luxum. Non illum pellucidus fulgor, non amœnitas colorum, non felices maculæ commendant: intus pretium habet, miris naturæ muneribus diues. Quàm enim mira est vis illa, qua fortissimum metallorum in suos trahit amplexus? An, ut in frigido scilicet latuit ignis, inditus magneti amor furtiuas inde faces iaculatur in ferrum? an ferro Martis ingenium est, suamque Venerem hinc sentit: quis potest-

tentibus adeò philtreis lapidem imbuunt, ut rigidam eam duritiem, & (a) *domitricem omnium materiam* domet? unde tam præsens illicium, ut oblitus ferociae suæ chalybs mitescat, & posito nativo pondere velit in sinum amantis? qua nunc flamma calet contumax in validissimos etiam ignes, ut statim obsequatur solo inuitatus aspectu? Neque tantum animari videtur ad motum, ut festinanter accurrat, sed etiam ad sensum, ut fruatur suauissimo tenentis consortio, constantissimè adhærens, ac suspendium pati malit, quàm diuelli. At illud multò præstantius, fusco lapidi, qui ex ima tellure defoditur, tantam esse cognationem cum cælo, assiduumque commercium; quippe memor, unde virtutem hauriat, se ad suum geniale fidus inuiolata fide conuertit. Mirentur alij Heliotropium, Lupinum, ac Loton circumagium Sole, quasi valde mirandum sit, à validissimi luminis calore mollia gramina inflecti. Quin potius miramur, durum lapidem, ac tam longè semotum, inter tot luces vnâ distinguere, à Boreali vsque cardine micantem, quam singulariter amet? Immo, ut suos in eam geminet amores, impertit ferro; atque ut scias quantum

intus

intus ardeat glaciali fidere, solo contractu argenti metallo insinuat. Quot ferreas acus attigit Magnes, vno velut afflatus instinctu, tot amantes in eundem scopum sagittas intendit. Quanta inde humanis rebus utilitas, siue diuidendæ sint Cœli plagæ, siue describendæ terrarum regiones, siue definienda horarum spatia, seu per immensum errantibus æquor sit certus ad destinata litora trames inueniendus? Cùm altissimo iactaris Oceano, vbi *nil nisi pontus & aer*, erudita Magnetis attritu acicula, nautis magistra est. Quauis fluctuet inter æstuantès vndas nauigium, quauis inclusa pyxide sui sideris conspectum pertinaciter quærit; cuius indicio docet, qui perflent venti; quæ à læua, quæ à dextra Syrtes, cautesue subsideant; quæ quantum insulæ distent; quæ in proximo continens; quò prora vertenda; vbi portus quærendus; denique muta ligula tibi totam nauigationem edisserit. Hæc priscis ignota seculis virtus tot recentioribus attulit rei nauticæ compendia, vt vel hac vna inelegans alioqui lapis gemmas omnes obscuret. Hunc itaque meritò Sideriten appellant; hoc est (vt ego interpretor) planè Sidereum, quasi deriuatum ab astris; & si liceat cum Poetis fabulari, qui pendula Cœlo

O

flu-

flumina affixere, de superi Erydaniglareis ad artium præsidium, ad humani generis commoda, in terras demissum.

Eiusdem Magnetis poeticam descriptionem elegantissimam vide apud Claudianum.

F E R R U M.

Ex Plin. lib. 33. cap. 14.

Proximè indicari debent metalla ferri, optimo, pessimoque vitæ instrumento. Siquidem hoc tellurem scindimus, ferimus arbusta, ponimus pomaria, vites squalore deciso annis omnibus cogimus iuuenescere. Hoc extruimus tecta, cædimus saxa, omnesq; ad alios vsus ferro utimur. Sed eodem ad bella, cædes, latrocinia, non cominus solum, sed etiam missili, volucrique nuno tormentis excusso, nunc læcertis, nunc verò pennato; quam sceleratissimam humani ingenij fraudem arbitror. Si quidem ut ocyus mors perueniret ad hominem, alitem illam fecimus, pennasq; ferro dedimus. Quamobrem culpe eius non nature fiat accepta.

Lapidum, gemmarum, metallorum descriptiones plurima occurrent, si Pliniana Historia Indicem percurras.

MA

MALVM PVNICVM.

Non vnum habes in malo punico fructum. Tot intus refertum granis aut oporotheca est, aut cellarium, incluso locuples Autumno. Asper, durusque cortex prasino colore, subrubente interdum coccino, in globum tumet; sed postrema parte desinit in acuminatam coronam, quasi Regnum inter poma designet. Vbi sensim maturitas accessit, suæ plerunque opulentiae non capax, dehiscit in partes, aperitque latentem in sinu thesaurum. Purpureos acinos confertim densatos tenuis membrana distinguit, quibus ex dulci, & acido gratissimus sapor; nec parcus, quanuis durior intus nucleo, succus; ut profuturum efflictim sitientibus ægris vinum satis abundè sufficiant. Cæterùm ubi discisso cortice patuit ille tot rubentium granorum aceruus, quædam gemmarum species oculos tenet, arboris felicitatem mirantes, quæ tot amethystos gignit, ac pyropos; ut natiuis diuitijs luculentius affluat pomum, quas tanto labore inquit auiditas humana.

GRANADILLA FLOS INDICVS.

Apagite hortorum fabulosa portenta
 (a) *Floros inscripti nomina Regum.*
 Aris, quàm profanis areolis digniorem
 folculum India dedit, æterni Regis
 hieroglyphico insignitum. Quid ni
 sacrum verè Symbolum Granadillam
 vocem, quæ cruciati pro nobis Dei me-
 moriam mysticis foliorum notis de-
 scribit, amœna pietate florentem? Ca-
 lycem in albentem calathum expan-
 dit, amethistinis fimbrijs coronatum,
 è cuius vmbilico attollitur trophæum
 diuini doloris. Hic & marmoreæ co-
 lumnæ scapum, & pendentia hinc inde
 flagella, rubentesque plagas, & insper-
 sum sanguine spineum sertum, & fer-
 rugineos clauos, harundinem, lan-
 ceam, Crucem, totam denique mira-
 beris, vno flore collectam, supellesti-
 lem pœnarum, quas exhaustit amantif-
 simus hominum Deus. Quis quæso fo-
 lia tam mirabili arte in tot instrumen-
 ta colorauit, ac flexit? Quo semine-
 natum putem hoc pium germen, qua
 satum manu, quo primùm solo excep-
 tum? Quis mihi memorat Aiæces, &
 Narcisos, & Lilia, Iunonis lacte pro-
 genita? Granadillam, vel beatorum
 misit

a *Virg. eccl. 3.*

misit Elysiū, vel irrigatus olim Cæ-
lestis agricolæ sudoribus hortus nouo
didicit florere mysterio, vel Iesu lan-
guentis osculo erudita tellus istud enixa
est angoris Emblemma. Certè voluit
artifex rerum, vt immemores animos
excitaret, extrema illa sui amoris ar-
gumenta vel inter olera virere. Ecce
delicate humuncio, qui rigidam Cru-
cem auersaris, illam Deus tuis delicijs
inserit in flore vernantem. Consere
tibi ad imaginem pristinæ felicitatis
amœnissimum Paradisum: vt ex ipso
voluptatis loco ad suas pœnas auocet
mentem, tibi pingit in Granadilla
Caluarium. Fruere luxurianti horto-
rum pompa: lege violas, cape rosas,
suæ

Ipse inbet mortis te meminisse.

Deus. Martial. l. 2. ep. 42.

*Quannīs Granadilla flosculi non sem-
per omnia illa referant instrumenta, defi-
ciente plerunque Cruce, vt notat P. Fer-
rarius de cultura florum lib. 2. cap. 11.
inuenti sunt tamen, qui totum explicant
postremi etiam doloris apparatus.*



*ARTIS OPERA.**ÆREM SIGNVM.**Ex Plin. iuniori epist. 6. lib. 3.*

Ex hæreditate, quæ mihi obuenit
 emi proximè Corinthium signum,
 modicum, quidem, sed festiuum, & ex-
 pressum, quantum ego sapio, qui for-
 tasse in omni re, in hac certè per quam
 exiguum sapio. Hoc tamen signum
 ego quoque intelligo; est enim nudum,
 nec aut vitia, si qua sunt, cælat, aut
 laudes parum ostentat. Effingit senem
 stantem: ossa, muscoli, nerui, venæ,
 rugæ etiam, ut spirantis apparent. Rari,
 & cedentes capilli, lata frons, contracta
 facies, exile collum: pendent lacerti,
 papillæ iacent, recessit venter. A tergo
 quoque eadem ætas; ut à tergo æs ipsum,
 quantum verus color indicat, vetus, &
 antiquum. Talia denique omnia, ut
 possint artificum etiam oculos tenere,
 delectare imperitorum; quod me quan-
 uis tirunculum sollicitauit ad emen-
 dum.

*AUTOMATA,**Seu mobiles icuncula.*

Quid non assequitur humanæ artis
 industria? Non vnus Promethei laus
 est

est æmulari naturæ ingenium, nec solum absolutissima membrorum omnium periodis corpora formare, sed motum etiam, aliaque vitæ munera impertiri. Vidi nuper festiuissimum recentioris Callicratidis opus; in quo tam scitè ludebant oscilla, ut sensum habere viderentur, ac mentem. In armarioli speciem modicum pegma surgebat, vndique inferiùs clausum, quo tegebantur intimæ artis arcana. Superne theatrum pandebatur, lucida septum crystallo, ut spectantium oculis peruium curiosas manus arceret. Planitiem referebat desinentem in syluam, sed herbidum in medio tumulum, in quo federat Orpheus admota pectori lyra. Circa illum Satyri, Fauni, Syluestres Nymphæ, agrestesque Dij, suo cultu insignes. In postrema pegmatis parte rimula clauim admittebat, qua disposita intus machinamenta intendebantur: hæc amoto deinde retinaculo laxata Chorum artificum rotatu regebant. Excutiebat protinus otium ligneus lyristes, motoque plectro circumstantem eam panegyrim, quasi pendentem à fidibus, ad saltationem agebat. Et verissimus quidem sonus audiebatur, certa lege modulatus: nam & musicam fecerat machinam faber, denticulatis per interualla rotarum.

axiculis, ærea fila, intus variè distenta
 pulsantibus. Nec minori arte fictitij
 saltatores mouebantur ad numerum;
 vt iam intueri liceret fabulosa Thraciæ
 lyræ portenta. Nunc orbem lentè me-
 tiri, ac remetiri; nunc citatiùs vrgere
 choream; modò cessante fidicine ab-
 rumpere; modò innouata modulatio-
 ne instaurare, mutatisque attemperare
 cantiunculis, velut earum metrum,
 vicesque sentirent. Exhibant interim
 delinitæ concentu ex intimo nemore
 feræ, atque è summis arborum ramis
 delapsuræ iam volucres alas explica-
 bant. Mira quælibet de Orpheo vestro
 fingite Poetarum ingenia. Quantum
 inanibus figmentis antecellit mirabile
 artis inuentum?

*SCRIPTORIVS PLUTEVS SIGNIS
 ORNATVS.*

Dignus nobili Musæo pluteus erat,
 ex ebano, & ebore tessellatus. Ærea
 signa, superinducto auro, sed magis
 arte pretiosa, scriptorium instrumen-
 tum elegantissimo schemate contine-
 bant. A dextra Pegasus Heliconiam
 rupem vngula fodiens Hippocrenem
 eliciebat, aquis vario errore labenti-
 bus, donec in alueum cogerentur, flo-
 rentibus ripis inclusum. His definitum
 mar-

marginibus atramentarium floridam ,
 fluuidamque venam scripturis felici
 omine promittebat . Pegasi dorsum
 presserat redimitus platano Genius ,
 qui tortile Amaltheæ cornu dextera
 sustinebat , demissis è summo labrò co-
 ronamentis exuberans . Graphiarium
 id erat , non aliunde sumendos cala-
 mos docens , quàm de Genij manu ,
 quo renuente reluctantes inuenies , &
 (a) *nihil inuita facies Minerva* . Taciturnus à læua Harpocrates labia digito
 comprimebat , & quasi commissa sibi
 arcana , vocemque tumularer , ceruice
 leuiter flexa incubuerat urnæ , à qua
 puluerarium vasculum promebatur .
 Signo suberat quadratum paribus oris
 loculamentum , in quo ductilis à fron-
 te arcula , referente sphingem man-
 brio , occultas notas , annulum cum
 gemma , ceramque sigillarem seruabat .
 Reliqua loculamenti latera Cadmi ,
 literarum inuentoris , fabulam mino-
 ribus anaglyptis expresserant . In plu-
 tei medio , quàm parieti proximius hæ-
 rebat , altior basis armatam Ægide , &
 hasta Palladem sustulerat , erecto su-
 pra cassidem gallinaceo gallo . Deæ
 versatiles oculi erant , quibus assidue ,
 decorèq; circumactis Musæo inuigilare
 videbatur ; moderante scilicet obtutus

O s ro

a Flor de Arte .

rotato horologio, quod latebat in basi. Exteriores horarum characteres muta ligula percurrerebat: æris tinnitum supplebat gallus, qui quassatis ad singulas horas alis, hiantequæ rostro illarum numerum indicabat, toties repetito nescio quo tenui sono, gallinaceum fermè cantum imitante. Ad imas basis radices noctua excubabat. Palladi sacra & eaque mobilis ad vsum cauo vertice lychnum excipiebat: vt literarijs lucubrationibus facem præferret ad nocturnas vigilias volucris nata, & perspicacior in vmbreis. Tam elegans, argutaque supellex eruditam Domini lautitiam testabatur.



Proxima Facti Descriptioni Narratio est, quam inter primas apud Rhetorem exercitationes collocat Fabius, & commendat, eamque docet ab Hypotyposi differre. Ornata quidem, & fusa Narratio cum Descriptione, immò etiam cum Amplificatione convenire videtur; inter quas tamen hoc discrimen est: quòd ex se Narratio eam tantum exigit Facti expositionem, qua legenti, audientique innotescat. Descriptio in illius Demonstrationem incumbit, ut explicatis Partibus, & Adiunctis, quasi pictum veniat sub oculos: Amplificatio in Facti exaggeratione versatur; ut appareat, quanta sit illius magnitudo, dignitas, turpitudine, atrocitas. Quare simplex Narratio prima ducit rei lineamenta; Descriptio superinductis coloribus effigiem exprimit; Amplificatio velut additis luminibus, & umbris efficit, ut quasi corporis membra, torique promineant. At simul unitæ mutuam sibi operam præstant, vnaque sæpe illustris, & ampla Narratio plures Descriptiones continet, atque Amplificationes.

*Quid sit Narratio, quotuplex,
& quæ illius Virtutes.*

CAPVT PRIMVM.



NARRATIO est rerum gestarum, vel ut gestarum expositio. Quæ Definitio docet ad Narrationem spectare; & verè gesta, & quæ gesta finguntur, vt mox videbimus.

Duplex Narratio est: alia, quæ certam sedem in partibus Orationis habet: alia, quæ in omnem Orationis partem, ac vsum venire potest. Prima dicitur Narratio Ciuilis, ad Forenses attinens Causas, quam Rhetoricis relinquimus, suo loco explicandam. Secunda, quæ ad hæc nostra Prælua pertinet, non alligata Ciuilibus Causis, multò liberior est, omniumque rerum expositiones complectitur. Illa igitur nunc ommissa, de hac agimus, quæ, Tullio teste, non inutiles cum exercitatione dicitur, & scribitur.

Tres sunt huius Narrationis species, *HISTORIA, ARGVMENTVM, & FABVLA.* (a)

HI-

a *Quintil. l. 2. cap. 4. ad Heren. lib. 1.
Cic. de Inuent. l. 1.*

HISTORIA est rerum verè gestarum expositio .

ARGUMENTVM, siue (vt loquitur Aphthonius) Poetica Narratio, est ficta res, quæ tamen fieri potuit; cuiusmodi sunt in scenis Dramata, & expressa ad veri similitudinem commenta Poetarum.

FABULA est ad veritatem significandam ficta Narratio; nam utcumque minimè vera, immò, & à forma veritatis remota ennarret, aliquam tamen illis figmentis veritatem insinuat, & morum doctrinam.

Ijs virtutibus præstare maximè Narratio debet ex Tullio. *In Part. Orat.*, quæ in reliquis ferè dicendi partibus commendantur; hoc est: vt sit Probabilis, Dilucida, Brevis, & Suavis.

Probabilis erit, si nihil contineat à communi opinione, nihil à personis, ac rebus alienum; denique nisi Narrator insaniat, vt *Delphinum sylvis appingat, fluctibus Aprum*. *Hor. de Arte Poet.*

Dilucidam efficit Elocutionis candor, & ordo narrandi; si non temerè misceantur ima summis, media primis.

Brevis erit Narratio, si non longius petatur, si non eadem repetat, si non minutioribus immoretur. Sat brevis

ea censeatur, in quo nihil otiosum est :
 Suauitatem affert elegantia styli, &
 varietas Figurarum ; vt inferiùs do-
 cebo.

Hæ verò Virtutes, quanuis maximè
 Historicæ Narrationi conueniant, quæ
 cæteris præstat, estque demum vera
 Narratio, eadem cæteris quoque sunt
 communes. Neque Fabulosæ sua pro-
 babilitate carere debent, quæ consistit
 in rerum conuenientia, & imitatione
 veri, vt egregiè docet ex Hermogene
 Priscianus. Mendacem quidem (ait)
 esse volunt Fabulam, sed ad vitam vti-
 lem, nec non & verisimilem. Est au-
 tem verisimilis, si res, quæ subiectis
 accidunt personis, aptè reddantur. Vt
 puta, pulchritudine aliquis certat :
 Pauo supponatur. Oportet alicui astu-
 tiam tribuere : Vulpecula est subijcien-
 da. Imitatores aliquos hominum vo-
 lumus ostendere : hinc Simijs erit locus.
 Etiam igitur in fictis Ethopœia, deco-
 rumque seruetur. Cæterùm hac vir-
 tute sublata & Argumenta, & Fabulæ
 non maioris erunt pretij, quàm nugæ
 aniles, & insanientium deliramenta.



*De Argumento, seu Narratione
Poetica.*

CAPVT SECVNDVM :

Poetici Argumenti leges hoc loco exactè præscribere mei muneris esse non arbitror, ne in alienos fines transiliam; cùm hoc ad artem Poeticam spectet, maioremque cum iudicij maturitate postulet rerum peritiam, quàm prima hæc ferant adolescentiæ studia; cui magis expediet ad styli exercitationem probatis aliorum inuentis inhærere, quàm noua proprio Marte moliri.

Neque verò ad solam prodijt oblectationem suauissimus hic ingenij fœtus, sed ad condimentum Sapientiæ, quam fictionum illecebris delinitam, austeriora fastidientibus animis blandiùs Poetæ propinarunt. His quoque recta inuolucris, & Religionis mysteria, & Philosophiæ arcana, quasi profanis abscondita vulgi conspectibus, oculatioribus tantum mentibus peruidenda reliquere. Argutis huiusmodi commentis utitur Epopœia, seu Heroica Poesis, vt vera illustrium virorum gesta nobiliùs exornet. Tragedia quoque, & Comœdia fictis euentibus

bus humanam vitam instituunt :

Adde sub figmentorum larvis latentes Poetas vitia liberius insectari, tuerique Virtutes, declinandaque illorum damna, premenda istarum vestigia elegantissimis Figuris adumbrare. Hinc Sirenes, quæ mollibus cantilenis ad mortem soporant; Circe, quæ veneficis poculis homines vertit in bruta, exitiales esse docent voluptatum blanditias. Immissæ in Phineum Harpiæ, Furiaë agitanter Orestem admonent imminere sceleri Diuinam ultionem; patrati criminis conscium animum conscientiaë stimulis cruciari, suosque secum circumferre tortores. Habes in Ænea pietatis, in Eurialo, ac Niso amicitiaë, in Penelope fidei, in Vlysse prudentiaë imitanda exempla. Idem alibi Eloquentiaë vires ostendit, ubi de Achil-
lis armis cum Aiace contendens *Fortis tulit arma disertus*. (a) Consule Natalis Comitum Mythologiam, qui Poeticas fabulas eruditissimis commentationibus illustravit, hisque inclusa Ethicæ, & Physicæ dogmata enucleauit.

Præter Poetas alij non defuere fictarum Narrationum artifices, ut Lucianus, Achilles Staius, Apuleius, & Petronius Arbiter: quanuis cautè legendi huiusmodi Fabulatores; cum plerique

aba

abutentes ingenio Satyram, & impudicitiam personis induerint, ut licentius baccharentur. Habes è recentioribus Io: Barclai Argenidem. Petri Firmiani Gygem, aliaque eiusdem, & similibus scriptorum opera, quæ sine damno integritatis figmentorum voluptate delectant.

Hæc noua fingendi libido à Græcis ad mentiendum natis in Latinos effluxit, seque sensim diffudit in aliarum Gentium linguas. Hinc tot vulgata soluta Oratione Poemata, apud Nostrates *Romanzi*, magna plerumque iactura temporis, nec minori morum exitio. Tu, si sapis, inanibus commentis, merisque styli lenocinijs blandientes paginas tineis legendas relinques. Quin si totum fabularum genus, quod solas aurium delicias proficitur, è sacrario suo (ut Macrobius docet) in nutricum cunas Sapiencia eliminat, quònam amandabit illecebrosa illarum inquinamenta, quæ mentibus insidiantur?

Vt verò ad Poeticum Argumentum redeam, vnum hoc iterum, iterumque moneo, seruandam in eo similitudinem veri; cauendumque, ne fingendi dulcedo in absurda rapiat, quæ personis, rebus, loco, temporique repugnet; quo in genere Scenicæ Actiones ex seculi fortassè genio non rarò peccant, quæ

quæ vt implicito euentuum nexu, & miranda Catastrophe spectatores oblectent, immaniora Sphingibus, & Chimeris portenta inducunt. Sed hæc alij viderint: nos enim nondum soccos induimus, & cothurnos.

De Fabula.

CAPVT TERTIVM.

FABVLA Græcè *APOLOGVS* à Poetis exorta è Musarum adytis in Scholas Philosophorum transijt ad morum magisterium, quod sine supercilio exercet; dum grauissimis monitis tanquam aliud agens instituit, ac ludendo emendat. Celeberrimus est Æsopi libellus, in quo festiuæ brutorum, hominumque confabulationes ad seria legentes erudiunt: quanuis primus similium Fabularum author Hesiodus Quintiliano videatur. *Instit. Orat. lib. 5. c. 11.*

Triplex Fabula est: *RATIONALIS, MORALIS, & MISTA.*

RATIONALIS dicitur, quæ hominum facta, & dicta effingit. Huius generis illa est apud Æsopum, in qua Fullo Carbonarij hospitium recusat.

MORALIS, quæ ratione carentium moribus utitur ad instituendam hominum vitam. Talis illa est, quæ Vulpem,
&

& Crocodilum inducit de nobilitate contendentes.

MISTA, quæ hominum, & irrationalium colloquia continet: qualis ea est, in qua captus à Furibus gallus gallinæus frustra veniam precatur.

Duæ sunt Fabulæ partes *NARRATIO*, & *ADMONITIO* *NARRATIO* est ipsius Fabulæ expositio. *ADMONITIO* est rei narrata ad rem subiectam accommodatio, seu explicatio sensus latentis in Fabula. Si hæc Admonitio præmittitur Narrationi, dicitur *PRÆFABULATIO*, seu *ANTEFABULATIO*; si subditur in fine, vocatur *AFFABULATIO*. En Æsopicum exemplum.

Narratio Fabula:

In cella quadam, melle effuso, muscæ aduolantes comedebant. Implicitis autem earum pedibus euolare non poterant. Cùm verò suffocarentur, dicebant. Miseræ nos, quia ob modicum cibum perimus.

Affabulatio.

Fabula significat, multis gulam multorum malorum esse causam.

Non lepida itaque solùm figmenta Fabulas commendant, sed insuper utilia

lia monita, quæ magnum afferunt moribus fructum. Hinc à Sapiantibus etiam, grauibque viris adhiberi consueuere. Et quanuis apud Oratores non frequentior sit earum vsus, non omnino tamen ab Oratione excludendus; plurimum enim delectant, auresq; recreant, serijs sestas; atque ad animos, popularium præsertim hominum, mouendos valent, & vim habent argumenti à simili. Vide Rhetorem Galli *lib. 4. c. 18.*

*De ratione contexenda Narrationis
cuiuscunque Facti.*

CAPVT QVARTVM.

Nvplici modo tractari potest Narratio cuiuscunque Facti. Primò familiari stylo, breuique, ac nuda illius expositione. Secundò diffusa, & ornata eiusdem explicatione. Hoc itaque secundo modo tractata Narratio est, quam tantopere Quintilianus. *Instit. Orat. lib. 2. cap. 4.* adolescentibus commendat, scribendi, ac dicendi tirocinijs perutilem; vt simplicem eam facti expositionem dilatare, ac exornare assuescant, quanta maxima possint adhibita diligentia. Materiam quoque inter initia esse mauult abunda-
tio

tiorem, atque ultra, quàm oporteat fuisse. Nam quanuis castigata Narratio, neque arida prorsus esse debeat, ac ieiuna, neque sinuosa, & accersitis Descriptionibus imitatione Poeticæ licentiæ lasciuens; in prima tamen ætate laudanda potius Oratio, quæ exuberet, quàm quæ sterile scat: facile quippe remedium est vbertatis, sterilia nullo labore vincuntur.

Variè quoque Narratio tractatur pro diuersitate materiæ: grauiorem enim stylum grauia, & seria desiderant; amoeniorem festiua, & iocosa.

Sed & alia narrandi ratio Historicis est, alia Poetis, alia Oratoribus.

Historici non vehemens adhibent, & arte Oratoria elaboratum dicendi genus; ac sincerum, & æquabiliter fluens, sine validiorum Figurarum vsu, ac motu animorum. Consilia tamen, & fines, & modos explicant, quibus res gestæ fuerunt; Conciones quoque, ac Descriptiones, cùm opus est, intermiscent.

Poetis omnem ingenij luxum in Narrationibus depromere (seruato tamen decoro) vt & in cæteris, licet.

Oratores pressius quidem facta exponunt; cùm vel simplici Narratione vtuntur ad docendum; vel cùm iam notum aliquod Factum arguto, vibra-
toque

toque stylo exornant potius, quàm narrant. Sed Narrationes, quas ad delectandum, seu ad illustrandam Orationem inducunt, vel ad affectus excitandos, pleniori vbertate fundunt, maioriq; instruunt verborum, ac sententiarum apparatu.

Memineris interim Narrationem Historicam à nobis dici non eam tantum, quæ historico stylo scribitur, sed quæ verum Factum ab Historia depromptum, quanvis Oratoria dicendi forma, exponit; sicuti Poeticam Narrationem eam dicimus, quæ Poeticum explicat argumentum, quanvis non adstricta numeris Oratione.

A quibus Locis Facti explicatio sumatur iam docuimus in eiusdem Amplificatione, ac Descriptione. Superest, ut aptiora quærantur Figurarum ornamenta. Ornatur itaque maximè cuiusque Facti Narratio Figuris Descriptionis, Sermocinationis, Suspensionis, Apostrophes, Communicationis, Dubitationis, & Exclamationis. Hinc Tullius. *In Partit. Orat.* Narrationem commendat: quæ habet admirationes, expectationes, exitus inopinatos, interpositos motus animorum, colloquia personarum, dolores, iracundias, metus, lætities, cupiditates; quæ omnia Figurarum illarum apta

tractatione præstantur.

His accedunt quædam constructionis Figuræ, quæ in Narrationibus magno sunt usus, ut *ENALLAGE*, & *ECLIPSIS*. *ENALLAGE*, cum ponitur Infinitivus pro Præterito imperfecto, ut. *Subornauerat seruos in virum perfida uxor. Ille nescius doli, securus VIVERE, sincerè cum illa VERSARI, nil CAVERE*, hoc est vivebat, versabatur, cauebat, vel Præsens pro Præterito, ut. *Ducebat ipse Rex antesignanos. Dum incautus SVBIT, saxo crus eius AFFLIGITVR*; innixus tamen telo nondum prioris vulneris obducta cicatrice inter primores *DIMICAT*. Quæ omnia Præterita per tempus Præsens efferuntur.

ECLIPSIS fit, cum prætermittitur aliqua Orationis particula, quæ ex consuetudine scriptorum subauditur, ut. *Hinc iurgium; mox & prælium*. Subintelligitur *ortum est*. Sic dicimus. *Hæc ille. Hætenus Tullius. Nec plura. suppresso verbo dixit*. Sæpius verbum substantivum omittitur; ut: *digna res visa, de qua vates consulerentur. Nihil imperium virtuti. Aut vincendum fortibus, aut moriendum*. Ita supprimitur verbum, à quo pendent Infinitivi, ut: *illi tollere ad Cælum manus; gratias agere superis; inexpectatam*

tam felicitatem sibi gratulari: omisso verbo COEPERVNT. Huiusmodi loquendi formulas in Historicorum lectione frequentes observabis. Plura de his Gallus in Rhetore lib. 3. cap. 10., & in Grammatica institutione lib. 2.

Quod attinet ad Narrationis dispositionem, non multis præceptionibus est opus; illius enim ordinem suggeret ipsa Facti series. Si exordiolo uti libuerit desumetur vel ab aliqua sententia, vel celebri adagio, siue à breui commendatione Virtutis, aut vituperatione Vitij, cuius exemplum in præsentī Facto emineat. Quandoque ab Antecedentibus, & Causis Facti; aliquando à Descriptione loci, seu temporis, quo res gesta est, siue personarum, ad quas pertinet. Cæterum Figurarum, & affectuum variatio, tum sparsa interdum pro rerum opportunitate acumina, & sententiæ in Clausulis condient Narrationem. Postremò graue aliquod dictum, seu Epiphonema coronidem imponet.

Fabula eadem fermè ratione disponitur, ac tractatur; at stylum amat remissiorem, vimque minorem & cultum Figurarum. Hominum quidem, & aliorum animantium, rerum etiam sensu carentium colloquia intexit, quæ maximè consona esse debent loquentium

tium naturæ. Quæ sint Fabulæ partes iam nosti.

De Argumento , seu Narratione Poetica vix quidquam aliud addendum superest , nisi quòd quanuis Oratione soluta scribatur , ex Poësis commercio aliquam cum eadem affinitatem redolet , amœnitate , ac luxu elocutionis ; non ea tamen licentia , quam pati Oratio non possit . Sed facilè ex vicinia illabitur audendi libertas ; quare mirum non est , si hanc secuti scribendi rationem non semel Thyrsus Caduceo commisceant , ac cæstro laborent . Audiendus omnino Quintilianus . *Lib. 1. cap. 9. Narratiunculas à Poëtis celebratas notitia causa , non Eloquentia , tractandas puto .*

NARRATIONVM EXEMPLA.

Historica Narratio .

Iustus & Pastor fratres , cùm adhuc pueri literis imbuerentur , proiectis in schola tabulis , spontè ad martyrium cucurrerunt . Et mox à Daciano Præsidente teneri iussi , & fustibus cædi , cùm se mutuis exhortationibus constantissimè roborarent , extra Ciuitatem perducti à carnifice iugulati sunt . *Ex Adonis Martyrol.*

Historia compendium hic habes. Nos idem factum magis diffusa, & ornata narratione illustrabimus.

PVERI HEROES.

Quorsum leues adolescentuli voluptatibus diffluentes animi vestri molli-
tiem excusatis ætate, quæ imbecillibus
adhuc vestigijs nimis arduum virtutis
iter inire non possit? Ecce tenelli He-
roes Iustus, & Pastor inter vitæ pri-
mordia fortiter, sanctèque gestis arri-
puere apicem gloriæ, vix terris nati, &
iam Cœlo maturi. Erant ambo nobi-
lium, proborumque parentum amores,
qui deriuatam in filios indolem suam
pietatis, morumque cultu, ac literarum
tirocinio liberaliter educabant. Sed
altiore progressu ita vicerè vota maio-
rum generosi pusiones, vt in ipsis ele-
mentorum rudimentis lauream me-
ruerint immortalem. In literarium lu-
dum maturè, quod moris erat, conue-
nerant; & iam expediuerant pugilla-
ria, vt scriptioni manus admouerent;
cùm ecce tristissimus nuntius affertur,
impio Daciani edicto, quotquot ado-
lere thura profanis Numinibus ab-
nuant, in vltimum capitis discrimen
vocari. Exarsit in lacteis illis pectori-
bus Religionis ardor, & sancta indi-
gna-

gnatione frementes pij fraterculi : er-
gone, inquirunt, sacrilegis aris liberam
cervicem flectere cogemur, & ligneos,
fictilesque Deos adorare? minatur ex-
trema Dacianus? præstat infontes ani-
mas in veræ Diuinitatis cultu profun-
dere, quàm iniquissimis viuere tempo-
ribus, cùm impietas regnat, & mon-
stris adhibendam venerationem edicit.
Hæc inter se collocuti scriptorio stylo,
tabellisque proiectis è schola se se prori-
piunt, Præsidis tribunal adituri. Sistite
pueri imbelles, quò properatis incauti?
quis vos impetus in ingens aufum im-
pellit maius viribus, & annis? Vos ne
pugnabitis in Tyranni ferociam, cuius
ne supercilium quidem ferre potest hæc
ætas? Vos recentes è sinu matris con-
uolatis in manus tortorum, & instru-
menta laniensæ pro crepundijs habetis?
Ah nondum vigent molles artus ad
pœnas. Differte in virile robur ista
consilia, sitque nunc satis agere fortia
voluisse. At firmior est in magnani-
mis puellis virtus, quàm ut vlllo terrore
valeat auocari. Cruentas Daciani ædes
impauidi subeunt, & se palam Chri-
stianæ veritatis cultores profitentur à
mendacibus, nefarijsque sacris abhor-
rentes; si digni supplicio censeantur,
qui de Diuina Religione rectè sentiant,
illuc se spontè gloriosissimi criminis

reos aduenisse , non inuitum sanguinem daturus . Ea res Præsidi renuntiata immitem illius animum vehementius affecerat, vt qui ægerrimè ferret, suam, & Cæsarum authoritatem, ac Romanorum Numinum reuerentiam ab illa etiã ætatula contemni . Sed puerilem eam esse leuitatem arbitratus, mitiori animaduersione castigandam, lictoribus mandat ; vt flagris audaculos plectant, facilè scilicet, vel perstricta summa cute, de sententia decessuros . Rapiuntur statim in agonem pusilli pietatis athletæ, nudantur, vincuntur, cæduntur . Illi ne tantillum inflecti ? veniam exorare ? petere saltem inducias ? lacrymulam saltem, vel gemitum edere ? ò inconcussam in delicatis corpusculis mentium firmitatem ! Serena fronte spectant inuicem, & solantur dolores suos æternæ recordatione mercedis ; quin etiã ad grauissimã quæque pro Christo ferenda se mutuis colloquijs accendunt . En quos in te sanctitas emittit è schola tirunculos Daciane . Quid iam statues in fortiolem tuis fascibus pueritiam ? an frustratis iam virgis ad securim confugies ? fremit, furit, bacchatur lymphato similis Præses, & ne debiliorem infirmis pupulis barbariem suam publico prodat supplicio ; clam iubet à

con-

conſpectu ciuium abductos iugulari. Eadem illi alacritate, qua dederant ſuſtibus membra, iugulum ferro præbuere. Ite victrices animulæ, immò animæ ingentes è corporum anguſtijs in immenſa Cœlorum ſpatia: vos enim terra non capit. O inferendos Heroum factis puellos, ò coronandam perenni lauro prætextam! Tumulo veſtro incidere liceat ſubiectam radiatis auro nominibus Ambroſij epigrammæ. *Nulla Dei Regno infirma ætas. In cap. 15. Luc.*

ALIA NARRATIO HISTORICA.

Gallienus, cùm quidam gemmas vitreas pro veris vendidiſſet eius vxori, atque illa re prodita vindicari vellet, ſurripi quaſi ad Leonem venditorem iuſſit. Deindè cauea caponem emittit: mirantibusque cunctis rem tam ridiculam per curionem edici iuſſit. Impoſturam fecit & paſſus eſt. *Ex Trebellio Poll. in Gallienis duobus.*

En ut paruis rem. totam Historicus abſoluit, illam ſummatim complexus, nempe contentus docere Lẽctorem. Sed Orator ad delectandum etiam inſtructus Tragicomicam iſtam actionem ſplendidiore, ac feſtiniore apparatu ita explicaret.

**FALLACIA FALLACI SUPPLI-
CIO MULTATA.**

Imperante Gallieno Romam adue-
nerat circumforaneus institor quidam,
ex illorum fæce, qui Armeniam, ac In-
diam barbara veste mentiuntur, & exo-
ticiis, plerunque Græcæ fidei, mercibus
inescare solent incautos. Istam felici
dolo coloratum vitrum in speciem,
gemmarum transfuderat, vt sagacissi-
mum etiam falleret oculorum iudi-
cium. Nec veritus est impudens homo
pariter, ac versutus, insinuare se in au-
lam, ibique mirabilem illam suarum
fraudum officinam explicare, inuitata
ad pretiosissimas nundinas Augusta.
Hæc dignam Cæsaris coniuge supellec-
tilem, adamantes, pyropos, elenchos
mercari se rata; non leuem prodegit
auri summam, laudante ingenium,
suum artifice, qui tam utilem Chy-
miam inuenisset, vt fracta vitrea com-
mutaret in aureos. At non diu latere
potuit tam insignis fallacia: peritorum
enim indicio postmodum constitit, pe-
regrinum mercatorem, vitriarium esse,
non gemmarium; totque pretiosissimos
lapillos tandem nitellas esse sine pretio
fulgurantes, picta mendacia, merasque
artis præstigias. Quàm grauitè tulcrit
fœ-

fœmina , princeps , superba , tantæ im-
 pensæ ludibrium , quas minas , quas di-
 ras effuderit , ipsi cogitate . Vix sui com-
 pos , erumpente in vultum iracundia , &
 penè verba intercipiente , rem protinus
 defert ad virum , seque fraudatam à vi-
 lissimo nebulone , immò contemptam
 impotenter exclamat : nisi citò citiùs
 iniuriam istam irrisus in vxore Cæsar
 acerrimè vindicet , iam thalami con-
 sortium , iam dignitatem Imperij ma-
 nifestè vilescere . Ita ne verò (inquit
 ille) ita ne , dilectissima coniux , tibi au-
 sus est imponere despiciatus humuncio ?
 luet mihi crede iustissimas pœnas , &
 memorando exemplo docebit , eam esse
 Gallieno seueritatem , qua sciat pro me-
 rito plectere nocentes . Agite lictores
 quærite , vincite , rapite in amphithea-
 trum scelestissimum caput . Dictum ,
 factum . Trahitur infelix in arenam ,
 statimque vulgatus per Urbem rumor ,
 captum iussu Cæsaris veteratorem obji-
 ci feris , densissimum populum ad spec-
 taculum cogit . Alij , qui causam obscu-
 riore adhuc fama nondum satis co-
 gnouerant , curiosiùs proximum quen-
 que de reo , de crimine percontari . Suis
 alij suffragijs non absoluerè solùm , sed
 commendare hominis industriam , qui
 ludificato muliebri luxu præmium me-
 ruisset . Alij contra pessimum fraudatam

torem execrari, & immanioribus proditorum pœnis addicere, clandestino latrocinio diutiùs impunè grassatum. Accessere plebæ pétulantix importuna dictéria, morituro inhumaniter insultantis. Conficiebatur interea miser expectati horrore supplicij: millies audire sibi visus infrementes feras, millies trepidis artubus earum morsus præsenferat; vixque sibi satis constabat, adhuc ne totus viueret, an semeso iam corpore inciperet mori. Certè crudeliùs ipsa morte mortis dilatio torquebat; nec minùs adstantium suspenderat animos tandiu vacans arena; quibus impatientia, & desiderium ex mora creuerant, quidquam solito atrociùs promittente. Quid ipsi demum euenisse putatis? Erupisse ne ad rei laniam maceratos inedia Marmaricos Leones? an recentes ex Hyrcania Tigrides, Pantheras, Hyænas, Manticoras? an aliquem è Scythia Gryphem, aut missum è Lybia portentum? Omnes ferarum, & monstrorum indices reuoluite; quidquid nouum, inauditum, inuisum mente concipite. Quàm præter morem, tam præter omnem opinionem est, quod audietis. Quid tandem! tandem (ò Comica Tragici spectaculi Catastrophe!) Tandem capus emmittitur è cauea, qui populo circumstrepente

penite deterritus, ubi excussis alis hac illac erravit, admonens glocitando incruentam se bestiam esse, recessit in latebras. Qui tunc elatus effusè cachi-
nantium sonus? quæ manuum, pedumque supplotio? qui promiscui clamores? donec facto per præconem silentio, admirantibus rei nouitatem Spectatoribus, hæc iubet Cæsar edici. Satis iam dedisse pœnarum, qui fallaciam fallacia luit. Par ita redditum pari, Abeat modò delusor illusus. *Imposturam fecit, & passus est.*

F A B U L Æ.

Pano, & Monedula.

Auibus Creaturis Regem Pano orabat, ut se ob pulchritudinem eligerent. Eligentibus autem eum omnibus monedula suscepto sermone ait: Sed si te regnante Aquila nos persequi aggressa fuerit, quomodo nobis opem feres?

Affabulatio.

Fabula significat Principes non modò propter pulchritudinem, sed & fortitudinem, & prudentiam eligi oportere.

Hactenus Æsopus, qui Philosophica breuitate fabulam proponit. Quamò amœnior hæc eadem erit oratore tractata?

AMBITVS PAVI CASTIGATVS.

Conuolauerant aues ad comitia, quibus nouum sibi Regem eligerent, vt narrat insignis fabulator Æsopus; nec pauci erant inter pennatos proceres candidati, qui supremum apicem ambirent. Pauus præ cæteris affectabat impensius. Is itaque palam captare suffragia, neque tantum circumire, prensare singulos, benignè compellare, palpare, rogare, obsequijs demereri, ac promissis; at superba etiam ostentatione de se plura gloriosius prædicare. Denique se Iunonis alitem esse, illamq; aeris dominam, hoc est Regni volantium: gratissimum utiq; fore, vt maxime decorum, Dearum Regina, si ex eius aula, immò de sinu sibi Principem asciscant. Cæterum quo animo ferendam iniuriam putent, si, quem illa in delicijs habeat, ipsi despexisse videantur, aliumque se posthabito, Regem præficient? quencunque verò sibi eligant, vllum ne posse in ea Prouincia, quæ Iunoniæ ditionis est, auersa Dea, feliciter dominari? Si adhuc ambigant, cuinam potissimum Principatus ille debeatur, ipsam consulant Naturam, quæ se vnum præ tota Volucrum gente ad Regiam maiestatem ele-

elegantius ornauit. Immò quæ (inquit) Regum purpura plumeo huic amiculo non inuideat? Quis vnquam Sydonius murex, quis acus Phrigij labor, quæ picturæ solertia, quis auri, gemmarumque fulgor Paui trabeam æquet, non ascitam, sed natiuam, & legitima hæreditate à maioribus ad posteros transmissam? Nec suus vertici deest honor; vt quisque intelligat, me natum esse ad Regnum. Hæc inter elata ceruice gradatim procedit in medium, longo firmate campum euerrens; tum Soli aduersus pennas circumnat in orbem, instar Iridis, variante colores luce, suauissimè rutilantem. Mirantur omnes diuitem volucris luxum, in quem vnum quidquid in metallis, quidquid in lapillis pretiosius nitet, quidquid amœnius floret in hortulis, natura prodegit; iamque venustissima specie ita perstrinxerat oculos intuentium Pauus, vt simpliciore aularum centuriæ illi deuouerent obsequium. Cum repentè annosior Monecula, non tam vitio ingentis garrulitatis, & conuitiandi licentia, quàm ineptissimæ ambitionis fastidio in tumidum Regni petitem insurgit. Heus, ait, venustissimè Volucrum antistes, quid splendido caudæ flabello ventilas auram Comitiorum? non pe-

niculo indigemus ad excutiendum pul-
verem è folio; nec enim video, quo-
nam vsu meliore spectare possit ista su-
pellex ad Regnum. Regem quærimus,
non spectabilem, sed fortem. Quid si
te sibi prælatum non ferens Aquila con-
temptum velit vlcisci, nobisque bellum
indicat? Illius ne aciem retundes ra-
diantibus hisce pigmentis? tumne pro-
derit in infestas vires agitare pennarum
lemniscos, nosque satis hæc mollis pom-
pa defendet? oculatissimum sanè Re-
gem habebimus, sed qui Argi oculos
reiecit in caudam. O vos leuissimæ
Volucres, si plumis desertis imperium.
Hæc Monedulæ sincera libertas mirum
est, quos in Comitijis motus exciuerit.
Euicit utique, vt ad saniora consilia
verterentur audientes, & multatus re-
pulsæ Pauus contracta iam plumarum
lacinia, cristatoque vertice demisso, di-
gnissimas lueret infani ambitus pœnas.

Affabulatio.

Audin superbissimè honorum cap-
tator, quem inconsulta sollicitat domi-
nandi libido, qui tam vacuus merito,
quàm turgidus fastu celsiores appetis
gradus? quid adeò tibi places, quid
te circumspicis, & velut auis Iunonia te
iactas? an ideo cæteris te præficiendum
putas, quod auro, gemmisque præfulges?

Ho-

Hominis integumenta sunt ista, atque idem, quod volucris plumæ, quæ fortunæ bona vocamus. Næ tu, si sua reperat, si te illa deplumer, nuda mouebis cornicula risum. Quæ tibi mentis acies, quæ animi præstantia, qui rerum usus, quæ in consilijs prudentia, quæ in arduis fortitudo? His excellere debet, qui ad aliorum regimen euehitur, ut publicæ incolumitati prospiciat, atque ita præsit, ut prosit. Pone itaque supercilium; quod si ambis imperia, tuis disce cupiditatibus imperare.

LEO, LUPVS, ET VVLVES.

Leo, cùm consenuisset, ægrotabat iacens in antro: accesserunt autem visitatura Regem, præter Vulpem, cætera animalia. Lupus igitur capta occasione accusabat apud Leonem Vulpem, quasi nihili facientem suum omnium dominum, & propterea neque ad visitationem profectam. Interim affuit & Vulpes, & vltima audiuit Lupi verba. Leo igitur contra eam infremuit, sed defensionis tempore petito, & quis, inquit, eorum, qui conuenerunt tantum profuit, quantum ego, quæ in omnem partem circuiui, & medicamentum pro te à medico quæsiui, & didici. Cùm autem Leo statim, ut me-

medicamentum diceret, imperasset, illa inquit: Si Lupo viuente excoriato ipsius calidam pellem indueris. Et Lupo iacente Vulpes ridens ait: Sic non oportet dominum ad maleuolentiam mouere, sed ad beneuolentiam.

Affabulatio.

Fabula significat eum, qui quotidie machinatur, in se ipsum laqueum vertere.

Hac apud Æsopum ex Græco versa simplex Fabula narratio est. Hanc eandem ex instituto nostro meliori cultu exornandam suspiciamus.

**LUPI MALIGNITAS SIBI
NOXIA.**

Vertitur sæpius in authorem malum, suisque plectitur liuor insidijs. Placet in rem istam celebrem Fabellam afferre. Oderat Vulpem acerbissimè Lupus; & quanuis antiquam simultatem nulla palàm offensa profiteretur, auerso tamen animo nocendi opportunitatem spectabat. Commodum euenit, vt senio, & morbo laborans in spelæo suo decumberet Rex ferarum. Illuc è tota vicinia confluebant cæteræ animantes, vel vt ambitioso famulatu captarent Principis gratiam, vel vt ægritudinis tedium confabulationibus leni-

lenirent, siue vt soluerent prædæ tributa; omnes certè vt obsequium domino testarentur. Vna distulerat officium callidior Vulpes, olim fortè alienis edocta cladibus, tutius esse præcedentium spectare vestigia, & eorum indicijs, quàm longi sint Leonis vngues, procul periculo metiri. (a) Obseruauerat hanc moram infensissimus Lupus, ratus inde aperiri sibi aditum ad perniciem Vulpi moliendam, si maligna interpretatione illam neglectæ maiestatis accusaret. Aderat quippe Leoni assiduus, factus ad aulæ ingenium versutissimus palpator, & artifex fraudum. Dum ergo languentem assentatorijs illecebris demulcet, meditatam ante calumniam blanda insinuatione illius auribus insufurrat. Gratulari se quidem constantissimam fidem eorum, qui effœtam optimi Regis ætatem adhuc sincerissimè colant: ast æquè dolere in communem hanc reuerentiam tam impudenter peccare contumacem feram de viliori sylvarum plebecula, tanto supremæ dignitatis contemptu. Stomachari se pridem vnus Vulpeculæ impudentiam, quæ infirmam Domini sui senectutem aspernetur. Cùm Aula quotidie conuen-

Ex alia eiusdem Æsopi Fabula de Leone sene, & Vulpe.

nientium frequentia ferueat, illam vnā ne limen quidem attigisse, nunquam dignatam mittere saltem, qui nomine suo decumbentem inuiseret, seque diutius cunctantem excusaret. Magnis videlicet distineri negotijs, vt segnibus rapinis intenta rura circumbeat, mapalibus insidietur, chor-tes expilet, hinc opiparē pasta in cubili suo stertat ad multam diem, vel grauem crapula stomachum suauissimis deambulationibus leuet. Non esse vltā ferendum, vt afflicta Principis valetudine petulanter exultet; nec dubium quin antea tacitē illius fastidiuerit imperium, cuius modo languorem tam apertē despiciat. Ne pessimo igitur exemplo dissimulata irruerentia serpat in plures, adhibendam seueritatem; vt omnes admoneat Vulpeculæ poena, senem etiam Leonem non impunē deludi. Nondum fraudulentam criminationem absoluerat accusator, cū adfuit repentē Vulpes; tū enim fortē adueniebat, & pendente vestigio accedens postrema de se Lupi murmura, & indignantis Leonis rugitus acceperat. Sed quis Vulpem doceat vulpinari? Velut insidiarum ignara interrita procedit, & in antri vestibulo procumbens Dominum suum Regem profusa obsequij significatione veneratur.

tur. Fremebat interim Leo, seque nunc inualidum haberi contemptui acerbè questus, iam toruum intuens aliquid meditari videbatur atrociùs minis. Tum illa submissa voce per summam eam clementiam, qua subiectis parcere solet, suppliciter exorat, ne se damnare velit inauditam; habere siquidem, quæ non solùm auertant omnem culpæ suspicionem, sed quæ sui Principis amantissimam ostendant. Facta dicendi facultate: Vereor, inquit, fortissimè Rex ferarum, ne de sero accessu meo ita Iudices iratus, vt damnabili veritas negligentia: at longè aliter postmodum senties, cum tarditatem istam intelliges tibi fuisse properatis aliorum officijs vtiliorem. Istuc maturiùs confluisse agmina inuisentium non ignoro: quis tamen eorum quidquam de tua incolumitate seriò cogitauit? Vna ego, cum primùm te aduersa valetudine laborare dolens audiui, sciscitata diligentèr ægritudinis causas, illius depellendæ rationem statui perquirendam. O quot lassata itineribus omnes, quos fama commendabat, artis medicæ peritiores consului. Quàm varia, & sæpe inter se pugnancia eorum responsa excepi, animo reuolui, diligentius exploravi. Pleraque implicita, plura periculosa, plurima inania, multa prolixæ, ac difficilis

cilis experientia. Vnum tandem propitio Æsculapio præsens, & efficax medicamentum inueni, quo si vtaris, illico sospes, vegetus, robustus in viridem iuventam, ne dum in pristinam salutem certò certius redibis. Ecquid adhuc (increpat Leo) quid adhuc improba moraris, nec statim aperis ægrotanti Domino felix medicina inuentum? Vnicum, subdit illa, remedium est viuenti Lupo detracta pellis, qua si calente adhuc languentes artus inuoluas, instaurato vitali calore in integras vires assurges. Vix ea, cum in Lupum irruit Leo, & frustra ululantem à summo vertice ad imos vngues deglubit; dum interim furtiuè ridet Vulpecula, & fruitur calumniatoris exitio.

Affabulatio.

Hunc habent exitum iniquorum artes, cum probis, ac prudentibus viris moliantur insidias. Suis ipsi machinationibus opprimuntur, ijs capiuntur, quos nexuerant, laqueis; in eisdem incidunt, quos tetenderant, casses, & Perilli fato suis, quæ conflauerant in alios, pereunt inuentis.

NARRATIO POETICA,

Funesti amantium errores:

Procris Cephali, egregij venatoris, amantissima coniux Auram ab eo sapius

pius in astu innocatam Nympham esse credens, cuius ille cupiditate flagraret, se in virgultis recondidit, ad novos viri amores explorandos. Cephalus moueri virgulta videns, feram latere arbitrans, emisso iaculo uxorem imprudens interfecit. Ex Ouidio lib. 7. Metam. fab. 28.

Mutuo animorum nexu Cephalum, & Procridem, ætate, ac forma florentes felicissimus iunxerat Hymeneus; neque in ea, quæ rara est, coniugij concordia quidquam decisse videbatur ad plenissimam vitæ tranquillitatem. Eadem utrique fides, idem castus pectorum ardor, ut nec Venerem Cephalus mallet; nec Procris Iouem. Sed hæc virum amabat impensius, & nimium amabat, sollicitis crebrò vexata timoribus, quibus vix vnquam carere solet ingens amor. Erat Cephalus egregius in paucis venator, & in sylvarum voluptatem spontè propensus cuius etiam studium accenderat vxoris munus, fatale iaculum, nunquam frustra vibratum in feras. Hac igitur venandi felicitate intemperantiùs vtens plurimam diei partem Dianæ curis impendebat. Non tam syluestrem coniugem Procris voluisset; à se diuelli toties dolens animæ dimidium suæ, quoties ille se se amantibus oculis eriperet; tandiu tristis,

stis, quandiu non videret delictum suum. Recrudescibat in dies hic dolor, maturius quotidie properante ad nemora viro, & iam anxiam mentem aliqua suspicio inuaserat, hæc sæpius reuoluentem. Quid sibi vult solertior ista Cephali vigilantia? Quid hæc tam frequens, tam proluxa venantio? iam ne tepuere maritales faces? iam thalamum recentis nuptæ fastidit inconstans amator, & mendaci obtentu fugit inuisam? Quàm parum à diuortio distat hæc fuga, quæ continuò dirimit commune consortium? immò vix equidem video, quid intersit inter viduam, & solam. At vehementius ille capitur sylvarum oblectamentis. Habet igitur aliquid Procride charius; atque vtinam ceruas tantum insectetur, & damas. Ea sanè est Cephali forma, vt placere potuerit Auroræ. Idem tamen Auroram constantissimè posthabuit vxori. O indignam prauis suspicionibus Fidem! malè de te meretur, qui malè de te metuit sincerus amor. Temerariam execror suspicionem, & indulgeo venatori venatrix. Dedi ego voluptatis irritamentum, attritum meis manibus, vtinam fortunatum semper, venabulum. Hoc vtere mi Cephale, quandiu libuerit: Quandiu libuerit à te patiar abesse, dum non absim à corde. Ita

secum varijs cogitationum fluctibus agebatur inter fiduciam, & metum; cum ecce nouus curarum author superuenit famulus agrestis. Dominam suam secretò is admonet, pulcherrimæ prædæ venatu Cephalum detineri. Nympham esse; vocarique Auram, quam deperit efflictim, & sequitur; nec se mentiri, vel falli testem auritum; sæpius quippè confabulantem audiuisse, inelleisque vocum blanditijs Auræ nomen iterantem. Orusticæ simplicitatis insaniam! Auram, quam Cephalus ad æstus leniendos inuocare consueuerat iuuenilibus cantilenis, Virginem aliquam esse rudis homo crediderat, syluis inerrantem. Hæsit velut afflata fulmine attonita mulier ad ea, quæ falsus index, vt rata, ne dum vera detulerat. Palluit, dirigit, iacuit propè animo destituta, donec suspirijs cordis angorem laxauit. Erupere subinde profusi fletus, tristesque in sortem suam querelæ, quibus tandem dolore satiato in mitiora diuertit. Non tam citò ferendam de viri crimine, in quod nondum inquisiuerit ipsa, sententiam: reuocari posse in dubium audita; nec adeò habenda pro certis, quæ stolidus verna nuntiauerat, vt Cephalum suum perfidiæ damnet, antequam præsens causam cognoscat. Rem itaque silentio pre-

premit, dilato in posteram diem iudicio; ut suspectos amores oculis ipsa suis exploret. Nec dum satis noctis umbras discusserant prima lucis exordia, cum surgit de more vigilantissimus venator, & in comitatus egreditur ad feras. Furtim subsequitur præcedentis vestigia non segnior Procris, & per eisdem calles in destinatam venationi syluam inobseruata dilabitur. Vallis erat amœnissimis hinc inde collibus inclusa, cæterum in longam diffusa planitiem, quâ patentibus aruis apricam, quâ spissis opacam arboribus, quâ sparsis fruticetis rariùs syluescentem. Hic Cephalus repetit labores suos, toties prospero successu, quoties insignè telum intorquet. Iam dies incaluerat, cum lassus prædator in molli gramine discubuit, vbi patula quercus explicauerat umbram. Ibi dum anhelum, vduumque pectus Æthesiarum flabellis aperit, remissiùs aspirantem auram solito carmine inuitat.

Aura veni, dilecta veni, miserata laborum,

Meque iuues, intresque sinus gratissima nostros;

Vtque facis, releuare velis, quibus vrimur, æstus.

Aura veni, expectata veni mihi magna voluptas.

Tu

Tu pellis curas ; tu me reficisque,
fouesque.

Tu facis , vt syluas , vt amem loca
sola , meoque

Spiritus iste tuus semper capiatur ab
ore.

Interpellauerat Cephali cantum nescio,
quod tenue murmur ; incertum , an ge-
mitus dolentis esset , an ludentis auræ
susurrus . Verè gemitus , & Procridis
erat , quæ frondentibus non procul
tectâ virgultis obseruauerat virum ; &
ambiguis decepta vocibus amatam .
Auram inuocantis , despectam se inani-
ter dolens altiùs interdum singultiebat .
Erigit se tacitus venator , auresque ,
& oculos illuc attentius aduertit ; cùm
frondibus crebro motu concussis feram
subesse opinatus , ineuitabile iaculum
vibrat . Ah quò tendis immite ferrum ?
quò cadis ictus infelix ? Tollit eiulatum
faucia mulier ; currit ad cognitam vo-
cem præceps , & amens funesto casu
Cephalus , & Procridem inuenit lan-
guida manu datum in propriam per-
niciem telum extrahentem è pectore .
Heu me perditum exclamat ! heu quam
refero tristissimi venatus prædam ! heu
spiculum nimium certa ferendi fide
vrentibus infidum ! Si peccare debue-
ras in Dominos , quid non potiùs hanc
dexteram violasti , ne se tanto scelere

temeraret ? Tu ne charissima coniux
 mea manu, tuo munere peris ? ò malè
 redditam tuis meritis gratiam ! ò inex-
 pectatam fati acerbicatem ! Dum hoc
 flebili quæstu inuoluntarium facinus
 excusabat iaculator infaustus, iacentem
 Procridem erexerat, scissisque vestibus
 ligauerat vulnus. Sed frustra sistere co-
 natur fugientem vitam cum sanguine,
 frustra semianimem solatur, miscensque
 verbis miserantibus lacrymas inutilem
 veniam rogat. Illa deficientibus sen-
 sim viribus cadens postremos halitus in
 voces cogit, atque hoc vnum precatur,
 per eximium amorem suum, abeunte
 spiritu adhuc manentem, qui se ad eam
 mortem adegerit, ne vnquam in tha-
 lamum suum Auram succedere patia-
 tur, æmulam sibi fatalem. Serò Ce-
 phalus errorem sensit : serò explicuit
sine corpore nomen, & leuiorem vento
 suspicionem : idque tantùm profuit,
 vt illa certior de viri fide mitiori dolo-
 re moreretur, ipse acerbior luctu fidis-
 simam coniugem fallente Aura extinc-
 tam deploraret.



Dicendi primordijs, quibus ætates nondum Rhetorem capientes instituuntur Chriam Quintilianus *lib. 1. cap. 9.* annumerat; quæ est primum quoddam specimen Orationis; Nec eam texere illi difficilè fuerit, qui iam nouerit amplificare sententiam à Locis infitis, & remotis, & Factum exornare. Quamobrem his iam cognitis pauca supersunt de Chriæ institutione cognoscenda.

Quid sit, & quoduplex Chria.

CAPVT PRIMVM.



CHRIA est, ad aliquod dictum, vel factum, vel utrumque simul explicandum, certis capitibus composita Oratio. Quod attinet ad vim nominis, Chria, Græcum vocabulum, apud Latinos usum, siue utilitatem significat.

Triples Chria est. Alia dicitur Verbalis, alia Actiua, alia Mistra.

CHRIA VERBALIS est, qua cuius Authoris sententiam explicat: ut illam ex Tullio pro Mil. Spes impu-

nitatis maxima est illecebra peccandi: aut illam Plinij lib 3. epist. 20. Multi famam, conscientiam pauci verentur.

ACT IV A est, quæ circa factum versatur. Huius argumentum esse posset illud Pompei Magni, qui Legatus in Asia interceptus à Rege Illyricorum, cum Senatus consilia prodere cogere-tur, ardenti lucernæ cremandum di-gitum præbuit. (a) Aut egregium Spu-rinæ facinus, qui eximie pulchritudi-nis adolescens, cum mira specie solici-taret fœminarum oculos, oris decorem sponte vulneribus confodit; ne violan-dæ pudicitie irritamentum esset. (b)

MIST A est, quæ factum, dictumque simul exornat. Tale est illud Anacreon-tis Poetæ, qui à Policrate Samiorum Tyranno quinque talentis donatus, cum duas noctes egisset insomnes, ac-ceptam pecuniam ad Policratem retu-lit: *odi munus (inquiens) quod vigilare me cogit.* Tale & illud Sigismundi Imperatoris, qui cum ferre non posset, se ab adulate supra modum euehi, similemque Dijs prædicari, putidam assentationem alapa repressit; cumque dolens adulator quæsisset; *cur me ca-dis Imperator? cur* (ille respondit) *me mor des?*

Quot

a *Ex Val. Max. l. 3. c. 3.*

b *Ex eodem l. 4. c. 5.*

*Quot , & quæ sint Chria Partes ,
seu Capita .*

CAPYT. SECVNDVM.

OCto sunt Chriæ Partes . Encomium , siue Laudatio , Paraphrasis , Causa , Contrarium , Simile . Exemplum , Testimonium veterum , & Epilogus .

ENCOMIUM est breue exordium , quod sumi solet à laudibus Authoris sententia , seu actionis , quam Chria suscipit exornandam . Laudes verò maxime propriæ esse debent , ac laudati meritis pares . Neque semper deducendum exordium puto à solius Authoris laudatione , sed quandoque à commendatione artis , scientiæ , siue virtutis , qua excelluit Author , vel ad quam sententia , siue actio spectat . Sic fiet , vt minùs arescant adolescentum ingenia , nec tam facilè repetant eiusdem Encomij cantilenam .

PARAPHRASIS, seu expositio, est clarior , & ornatior explanatio sententia , vel facti . Maximus hic vsus erit Expolitionis , ac Interpretationis ; Narrationis quoque , ac Descriptionis , vbi Chria sit Actiua , vel Mista .

CAVSA est ratio , qua sententiam ,
Q 2 vel

vel actionem assumptam probat . Hoc utique præcipuum est Chriæ caput , in quo vis maior sita est ; nec vna tantum ratio , at plures, si opus fuerit, afferendæ , atque amplificandæ .

CONTRARIUM est argumentum, ab oppositis deductum : ut si ad commendandum silentium , damna garrulitatis ostendas .

SIMILE est idonea similitudo , proposita rei explicanda conueniens .

EXEMPLVM est commemoratio aliquis facti , ad rem præsentem accommodati .

TESTIMONIUM est vetustioris cuiuspiam Authoris sententia , ad suscepti argumenti confirmationem adducta . Rationem tractandi Similitudines, Exempla, ac Testimonia veterum , horumque formulas habes in Locis .

EPILOGVS est brevis totius Chriæ conclusio , quæ fiet , paucis dicta colligendo , siue repetendo sententiam propositam, siue commendando actionem; vel exhortationem ad virtutem aliquam sectandam , aut vitium fugiendum .

Partium nexus , siue Transitiones ab vno Capite ad aliud suggeret ipsa materies , à qua deductæ opportuniore erunt , quàm transcriptæ à promptuario Formularum. Harum tamen exem-

pla si velis, consule Caput de Transitionibus post Figuras.

Octo illa Capita Chriæ præscripsit Aphthonius. Ast equidem non improbauerim, quod Gallo, *Rhet. l. 5. c. 16.* alijsque placet, qui docent non debere semper totidem Partibus constare Chriam, eandemque methodum sequi; sed potius numerum ordinemque Partium variandum. Quid enim refert, si Testimonium ex. gr. omittas, aut præmittas exemplo, aut cum Epilogo misceas? Immo, cum sit Chria Oratiunculæ species, multò laudabilius est eam variè contexere, quàm iisdem semper legibus vincere.

Interim tamen, ut communio rem viam insistamus, componendæ ad Aphthonianas leges Chriæ rationem re ipsa doceamus. Exornanda ergo sit illa Senecæ Tragici sententia.

Peiora iuvenes facile præcepta audiunt. In Thyeste Act. 2.

Initium de more desumi poterit ab Authoris commendatione, Senecam laudando, primis dignum subsellijs Poetam, qui non inanibus Musarum cantilenis animos emollit; quin Stoam locasse videtur in orchestra, & cothurnatam Philosophiam in theatrum induxisse: adeò cum tragici carminis grauitate præstantissimas coniunxit ple-

nasque sapientiæ magisterio sententiæ.
Et quanuis penè impediatur earum copia
delectum, illa tamen præ cæteris oc-
currit, instituendæ vitæ apprimè vti-
lis, & ad rem nostram aptissima.
Peiora iuuenes facile præcepta audiunt.
Hac enim admonemur cautè arcendam
esse à malorum irritamentis primam
ætatem, & ad recti, honestique studia
maturè flectendam.

Paraphrasis fiet per Expolitionem,
explicando procliuem in deterius iuue-
num indolem, & suo quasi pondere
præcipitem ad vitia; quorum vbi ma-
gistros, vel administratos inveniunt,
faciles illis adhibent aures, eorum natu
reguntur, voris obsecundant, vestigijs
inhærent.

Causa, seu ratio, cur peiora iuuenes
facile præcepta audiant, esse poterit;
quia feruidior iuuenum ætas impoten-
tius flagrat æstu cupiditatum, quibus
explendis libentissimè illi se dedunt;
atque ideo sui similes amant nequitie
suasores, & socios improbitatis. Qui
fastum, qui luxum, qui ludos, prauasq;
voluptates insinuant, hos in delicijs
habent; congerrones, & combibones
suos, vt fidissimos Achates, omniumq;
horarum homines amplectuntur; hos
tantum audiendos putant vitæ licentio-
nis authores.

Aliam

Aliam rationem suggeret imprudentia iuuentutis, quæ nondum vsu didicit infidam esse malorum societatem; cæca non videt, quot periculis pateat lubricus trames vitiorum; nec dum intelligit pretium virtutis; neque futura prospicit, breui præsentium fructu contenta.

A Contrario sententia confirmabitur, ostendendo, quàm difficiles se se iuuenes ijs præbeant, qui sanioribus monitis eos à prauis affectibus ad animi cultum, bonamque frugem reuocare nituntur. Eosne excitare contendis ad literarum amorem? surdis canere te puta. Ad studia pietatis inuitas? plumbeos esse iurabis. Temperantiam suades? te vt morosum, tetricique ingenij hominem auersantur &c.

Similitudo ab indomito equo ducetur, quem si solum habenis prouoces ad cursum, dicto citius paret, ac per devia, & auiâ summa pernicitate bacchatur; at si fræno coercere velis, & in rectum tramitem ducere, tum regiminis impatiens indocili ceruice reluctatur &c. non aliter iuuenes &c.

Exemplum dabit filius Salomonis Roboamus, qui spreta seniorum prudentia insanis æqualium suorum consilijs vsus, propè Regnum euertit, aut Nero, qui cùm sapientissimum insti-

tutorem haberet moralem Philosophum, posthabitis huius præceptis, libentiùs auscultabat nequissimos scelerum suorum fautores; quare vitij omnibus inquinatus optimam, quam de se spem fecerat initio Principatus, fœdè corripit, malo Imperij Romani fato, donec suis, sibi que inuisus, monstruosam vitam ferro præcidit.

Testimonium ab Horatio desumetur, à quo tam verè, quàm elegantèr describitur Iuuenis. (a)

Cereus in vitium flecti, monitoribus asper.

Cera utique mollior ad praua quæque facillimè flectitur, contumax ad recta.

Epilogus fieri poterit per Apostrophè ad Iuuenes, eos exhortando, ut ætati suæ meliùs consulant; & ne optimam perdant vitæ partem, improbos consiliarios eliminant, maiorumque prudentiam sequantur, utiliora suadentem.

Chriæ graphidem hìc habes: pleniora nunc dabo Exempla.



CHRIA

a De Arte Poetica.

CHRIA VERBALIS.

*Multò se ipsum, quàm hostem superare
operosius est.*

Ex Valerio Max. lib. 4. cap. 1.

Si quis est in amplissimo Historico-
rum ordine, qui de posteris æquè, ac
maioribus vtili apprimè styli opera
egregiè meritus dici possit, is vtique
arbitratu meo Valerius est Maximus,
qui clariora Veterum facta simul, &
dicta complexus, plurium historiarum
elegantissimam scripsit epitomen; spar-
sa enim in aliorum paginas, ac diffusa
ita collegit, vt sine longæ inquisitionis
labore ab vno statim excerpere brevis
lectio valeat, quod vix tandem in
pluribus inuenisset. Quanta verò in
tam varia eruditione iucunditas legen-
tem oblectat, vno velut intuitu mul-
tarum ætatum, multarum gentium
monumenta spectantem? Quæ Virtu-
tum, ac vitiorum imagines, ita expref-
sæ; vt horum turpitudine deterreat,
illarum decor, & gloria ad imitandum
accendat? Quæ vibrata identidem lu-
mina sententiarum, quibus non tam
historiam suam, quam lectoris animum
illustrat? Vnam seligere placet è pluri-
bus (elenchum puta ex Erythræo sinu

depromptum) aureis imprimendam
characteribus, ac Ethicæ foribus præ-
figendam. *Multò (inquit) se ipsum,*
quàm hostem superare operosius est.

Video quidem suboriri statim suspi-
cionem posse, ne audaciùs fortassè locu-
tus Valerius, mirabile paradoxum con-
cinnarit. Immò (dices) quid tanti ven-
dis Hyperbolem? an non vides philo-
sophantis Historici dictum ab homi-
num fide, ne dum à communi opinione
abhorrere? quis enim credat plus operis
habere pacatam animi disciplinam,
quàm ancipitem aleam belli? Miram
oppidò fateor prima fronte videri sen-
tentiam: at si me audis, quàm miram,
tam veram deprehendes, atque inter
selectiora Sapientum axiomata refe-
rendam. Ita est: rem acu tetigisti Va-
leri. Multò difficiliùs est sine armorum
strepitu debellare se ipsum, quàm
hostem armatum cruenta in acie pro-
fligare. Summus hic est virtutis apex,
hoc arduum opus, quod pauci strenuè
aggrediuntur, pauci admodum con-
stanter absoluunt; dum parta plenè vic-
toria in se valeant libero rationis im-
perio dominari. Hoc totos exigit ani-
mi nisus, hoc vigilentiam solertiam, assi-
duamque contentionem exposcit; ut
quisque se ipse maior in proprias cupi-
ditates acerrimè decertet, pugnaque
per-

pertinaei affatim subigar, ne victum extra eos fines rapiant. *Quos ultra, citraque nequit consistere rectum.* (a)

Quòd si vniuersum percurras hominum genus, multos vtique numerabis bellico robore præstantes, qui edomita sæpiùs hostili ferocia, iteratos triumphì honores meruerint; raros, vel nullos, qui de se aliquando integrè triumpharint: atque adeò intelliges, quantò grauiores difficultates habeat intestinum hoc hominis in eundem hominem bellum, quàm quod in alios irato Marte tractatur. Quid verò difficiliùs, quàm in eum hostem pugnare, qui sit intimus nobis, communemque nobiscum habere causam videatur? Quàm arduum ita supra te assurgere, vt etiam in te insurgas; cùmque sis vnus, & idem, alterum in te spectare, cuius iura tuearis, alterum, cuius peruicaciam infringas? Nempe cùm sit vnicuique nostrum inditus amor sui, durum cuique videtur, seria in eum bella exercere, quem non amare non potest. Noscendus ergo primum latens in nobis familiaris inimicus, apertisque simultatibus expugnandus. Nec vnus ille; sed multiplex, & versutus, ad vim æquè instructus, ac fraudem. Tot intus hostes habes, quot appetitus à ratione discordes. Cum his

Q 6

COR-

a Hor. 1. Serm. Sat. 1.

conspirant fœderati sensus, quorum ministerio dum Princeps animus vitur, perfidis irretitus obsequijs vel sponte cedit, vel rebellantibus seruis cadit imperio. Nec facile est fraudulentis tot affectuum insidias declinare, qui fidissimo famulatu rei tuæ studere se profitentur. Tuarum vindicem iniuriarum, tuæ dignitatis tutricem ira se prædicat. Fortunæ ministram, tuorumque custodem bonorum auaritia se iactat. Sollicita de procurandis tibi honoribus ambitio te mulcet. Ut omnibus excellas pro te feruet in æmulos inuidia. Gula, desidia, libido tibi vitæ commodæ, tibi suauissimas aucupantur voluptates. Quis tam blandis hostibus decernat non segniter irasci? Quid ni vel rigidos exarment Alcides, & à claua trahant ad colum? Pauci Vlysses illecebrofis adeò Sirenibus aures occludunt. Pauci tanto animi robore valent, ut in domestica hæc lenocinia sæuiant, ac edomitas cupiditates rationi cogant ancillari.

Longè aliter se habet, cum nos priuatus, vel publicus hostis laceffit ad arma; cum irritamur offensis, cum arcendæ à nostris finibus rapinæ, cum à tectis, ac templis auertendum incendium, & Reip. salus, communisque libertas à discrimine vindicanda. Tunc
vtrique.

utique omnes adhibentur vires iuxta ;
& artes. Tunc omnis ex armamentario
bellica supellex depromitur : tela , ma-
chinæ, tormenta, quæ cominus, & emi-
nus feriant , expediuntur in hostem ,
ferroque , & igne , & omnibus pugna-
tur elementis. Tunc in aduersantes
acies verissimis odijs res agitur , & du-
cum , militumque virtus generosam
quærit per tela , per vulnera victoriam.
Quid quòd præter eos , quos ad bella
vocat vel amor Patriæ , vel ardor glo-
riæ , plures etiam classicum inuitat ad
prædam , & strenuos auiditas facit ?
quàm multos ipsa necessitas, præsensque
periculum impellit , vt cùm districtos
vident in suum iugulum gladios,fortiùs
audeant ; vbi sentiunt aut vincendum
esse, aut moriendum ? ita si rem attentè
dispicias, eadem cupido, eadem ira,
quæ in nos implacabiles pugnant , no-
biscum pugnant in hostes.

Idem fermè nobis contingit , ac ijs,
qui fluuiatili nauigio vehuntur. Faci-
lis quidem illis est , & expedita , quan-
diu secundo amne vtuntur , immò pro-
perata , velox , præceptis etiam nauiga-
tio ; nec velis, aut remis citanda, quam
satis vrget rapidus aquarum cursus ,
decliui alueo labentium . At si retor-
quenda sit in fluctus aduersos navis ;
rudentibus, scaphis, machinis trahenda
est ;

est; contis, ac trudibus impellenda; tota lacertorum contentione certandum; & sæpè retardata, sæpiùs frustrata nautarum opera, dum relabuntur, dum vim instaurant, in reluctantis amnis contumaciam ægrè luctantes, vix aliquando ad optatum litus euadunt. Eadem propter ratione, cum tendimus in hostes, ad bella rapimur indole naturæ, quæ suadet infestis infestos esse; tueri, & repetere nostra; vim vi repellere; & illata damna vel inferentibus reddere; vel ultione solari. Cum verò pugnam nobis ipsis indicimus, tum nitimur in repugnantium affectuum torrentem, nosque victos faciliùs trahunt improbæ procliuitates, quàm vincantur à nobis. Hoc itaque forti viro dignissimum, sed rarum facinus, contra tot intimos obices ad virtutem eniti.

Quot iactat inclytos Duces Martialis gloria, qui validissimis hostibus sub iugum missis attamen laureata iacuerunt cupiditatum mancipia? Alexander ille domitor Asiæ, ille gentium terror, qui paterni Regni non clausus angustiis imperium extendit in Persas, Hyrcanos, & Indos, cuius armis laxandi fuerant rerum fines, nec vnus suffecerat orbis, non ne le temulentix, iræque furoribus turpissimè victum ingemuit? Vbinam Macedo inuicti pectoris robur?

bur? Vbinam ille animi vigor, quo per immensos terrarum tractus quæsiuisti, quos vinceret? In te habes, quæ vincas. Tot barbaris nationibus frænum iniecisti, rebellantem iracundiam frænare non potes; & quem nulli fregere conatus bellorum, ebrietas poculis debellat? Iam plùs animi, quàm corporis vulneribus castigatus diuinitatis opinionem dedisce; nec satis te magnum intellige, qui nondum te ipsum in libertatem asseruisti.

Nimirum quantumuis præclarum sit palmas numerare pares, ac pugnas, ac in deuictos populos longè, latèque dominari; oppressa tamen vitiorum iugo potentia triumphat, & vincitur; dominatur, & seruit. O quàm magnis homines erroribus tenentur (exclamare cum Seneca (a) liceat) qui ius domnandi trans maria cupiunt mittere, felicissimosque se iudicant, si multas per milites Prouincias obtinent, & nouas veteribus adiungunt, ignari quod sit illud ingens, paratumque Regnum. *Imperare sibi maximum imperium est.* Hanc à morum magistro sententiam haussisse videtur Lyricorum Princeps Horatius, cùm cecinit.

*Latiùs regnes, avidum domando
Spiritus, quàm si Lybiam remotis
Gadibus iungas, & uterque Pænus
Serviat uni.*

At quorsum aliundè suffragia emendicem? cùm Sapientissimi Regis confirmet autoritas, (a) *Viro forti patientem, & eum, qui dominatur animo suo urbium expugnatori præstare?*

Detumescite itaque superba capita, quorum omnis fortitudo in ferro est. Fortiùs pugnatur in virtutis acie, quàm Martis. Ita rectè censuit Valerius multò operosiùs esse superare se ipsum, quàm hostem. Quin si vos ad summa, & ardua impellit gloriæ, & imperij cupido, Severinum audite. (b)

Qui se volet esse potentem.

Animos domet ille feroces.

Alioquin suis affectibus imperare non posse, potentia non est.

CHRIA ACTIVA.

Innocentius IX. Pont. Max. Mortem ad consultationem adhibet.

Ex Ciacconio in Vitis Pontificum tom. 4.

Quantùm desipis profanæ Politicæ sagacitas, quæ arcana consilia, vel quæsis à Tacito, vel profunda machinatione

a. *Proem. 16.* b. *Seu. Boet. de Consol. Phil. l. 3. Metr. 5.*

ne scrutaris ! Non te ad aulam Tiberij, sed ad Sacri Principis penetrale, tanquam ad certioris prudentiæ scholam inuito ; vbi sine captiosis verborum ambagibus mors tacita magistra est. Hanc in grauioribus rerum momentis consulit Innocentius, hanc præ oculis habet, hanc figit in animo ; & ne vnquam ab animo, vnquam absit ab oculis, familiarem, ac domesticam in Vaticanum acciuit. Innocentius inquam, morum grauitate, doctrina, dignitate ter maximus, omni humana magnitudine maior, in hoc tam sublimi fastigio mortem adhibet consultricem.

Is in secretiori cubiculo geminas tabellas inuicem connexas, atque in speciem libri plicatiles collocauerat : in quarum altera nudam hominis caluam, in altera funebrem apparatus exprefferat imitata verissimam rerum formam pictura : Tales imagines in splendida supellectile, quæ Pontificium Conclauē deceret, veluti pretiosissima signa seruabat. Harum frequenti aspectu ad vitæ regimen utebatur, nihil decernere, nihil aggredi solitus, quin prius attentiore obtutu ex tristi earum silentio responsa captasset. Erat is utique vir acer ingenio, assiduusque studijs, & rerum vsu instructissimus. Ade-
rant illi Purpurati Senatus grauissima

capita, viri aderant omni literarum genere præstantes, aderant eruditæ lucubrationes, & fidissima scriptorum subsidia, à quibus lectitandis nunquam cum tanta curarum mole feriabatur. At sentiebat (vt verè est) Sapientissimus Pontifex, in rebus agendis prudentis esse respicere finem; nec aliundè sincera magis, & salutaria consilia, quàm à seria mortis meditatione hauriri.

Et certè seuerissimus viuientium pædagogus mors ipsa est, vitiatæ naturæ à clementissimo Iudice ad pœnam simul datus, ac disciplinam; vt lapsos in deterius mores castiget, & rebellantes hereditariæ culpæ sollicitatione cupiditates suo terrore compescat. An verò quisquam est, qui si mortalem se esse meminerit, atque hospitem interim, ac peregrinum degere in terris, non protinus ista fastidiat, quorum tam brevis, tam incerta possessio; quæ postmodum, nisi spontè dimittat, inuitus relinquet, in alias oras, æternaq; sedes euocandus? Quis est, qui si mentis aciem in sepulcrales umbras defigat, in se algere non sentiat libidinum æstus, deferuere iracundiam, auaritiam languere, stupere ambitum, frigere immoderatos intereuntium rerum appetitus, quæ cum instabilis vitæ fu-

ga pari passu labuntur ? Age quicumque es fortior Achille, Cæsare felicior, ditior Crasso, conijce oculos in funebrem urnam, & vide, quò mortalium factus, quò potentia decedat. Superstes è tam spectabili pompa cineris pugillus docet, quàm inania sint illa, quæ in tam leue soluuntur, exiguumque elementum. Hæc si tecum expendas, an non statim animum ea subit cogitatio, quæ te à præsentium amore ad futurorum curam detorqueat ? Quorsum (inquires) fugacissimis rapior oblectamentis ; cur tanti emo voluptates infidas ? quid putre corpusculum opiparè pasco, splendide vestio, delicijs foueo, propediem soluendum in sordes ? quid est, cur opibus congerendis insudem, quæ domino cuicumq; paratæ deserant abeuntem, nudumque relinquant in saxo ? Cur tantis laborum impendijs auram gloriolæ capto mox ad superstitem famæ rumusculum surdus in tumulto futurus ? quorsum hic aulæ, curiæ, forique strepitus, quorsum hæc ambita honorum supellex laurea, curulis, trabea, sceptrum, quæ statim puluisculus teget, vltimusque dies cum inglorijs vomeribus, marribusque miscebit ? Surge anime ad illa, in quæ morti ius nullum est. Desine falli brevisque fulgoris lampyridas consecrari. Despice non man-
sura

fura tecum lutulenta hæc impedimenta ; atque ita mortalia sint in vfu , vt sola æterna in pretio sint , & in voto . En quæ sana confilia mors infinuat , fi confultorem habeat , non incuriofis, auribus aufcultantem .

Sed heu quàm raros confultores , quàm paucos aufcultatores habet hæc morum præfentiffima moderatrix ! heu cæcas hominum mentes , tam denfa caligine laborantium ; vt inter circumftantes vndique mortis imagines mortalitatis obliti fe ipfos ignorent ! Quoties illud , atque vtinam non frustra , ingerendum eft . *Memento te hominem effe* ? Ita plerofque facinat fiue dulcedo voluptatum , fiue blandientis aura fortunæ , vt velut in firma fede beatitatis collocati teneri fe vel non fentiant , vel non meminerint communi lege naturæ . Hinc vbi animum inuafit hæc ineuitabilis fati obliuio , & ex obliuione nafcens infania , quid ni fe in omnem vitiorum licentiam remoto tam forti repagulo præceps effundat ? Quid eft quòd nullis clauditur finibus auida Tyrannis , vrbiumque direptiones , vaftationes agrorum , populorum clades , incendia , rapinas , excidia Regnorum vfurpat , ad potentiæ , & gloriæ incrementa ? quid quòd auri cupido diuina , humanaquæ iura conculcat , proferibit à com-

à commercijs fidem, à tribunalibus iustitiam, ab amicitia sinceritatem, à necessitudine pietatem? quid est quòd amplissimo terrarum ambitu vix capitur immanis, exlexque superbia, quòd turritis ædificijs Cœlo minatur, substructionibus immensis penè adimit ciuibus Patriam, latifundia violatis finitimum limitibus in Prouincias extendit? quid quòd intemperantia, & luxuries impudenter exultant, nulla integritatis, nulla honestatis reuerentia, vitæque spatijs, tanquam flagitiosissimis ferijs abutentes, enorme continuant Bacchanalium tripudium? Vndenam hæc tanta scelerum colluies, nisi ex oblitterata mortis memoria? quam qui prorsus ex animis deleuere, quid mirum est, si per nefas omne ad ea tantum inquirenda, & comparanda ferantur, quibus viuentes emineant, regnent, affluant, excellant, fruantur; velut æternùm victuri? Non alio sanè illicio, quàm vana spe immortalitatis versutissimus ille coluber primos nostri generis parentes in scelus induxit. Et quanuis exitialem fallaciam tandiu docuerit euentus, adhuc illam nobis obtrudit cæcitas nostra, nec satis declinamus antiquam fraudem, nisi statutam viuentibus irreuocabili sententia mortem frequenti meditatione consulamus;

Ma

Maximo itaque diuinæ providentiæ beneficio euenit, vt mors eadem, quæ fuit supplicium culpæ, fieret eadem culpæ remedium. Obiecta enim huius memoria feruentes impetus animi repressit, ne præscriptos legum margines transilierent. Vides ne quas tumido elemento compedes posuerit sapientissimus artifex rerum? Furentes illius ætus minutissimis compescuit arenis. Cùm ebullit immaniùs, cùm liuentes fluctus attollit, cùm vndas collidit vndis, cum validiori ventorum conflictu inhorrescit, iraque atrocior despumans finitimis terris naufragia minatur, vbi attingit arenosum litus, in se recedit, furoremque suum resorbet. Ita prorsus exæstnans humanarum cupiditatum pelagus tenuissimo cinere Diuina Sapientia marginauit. Cùm prauis motibus agitatus animus (a) *tanquam mare feruens insanit*, vt læthalem impingit in puluerem, *hic tumentes fluctus suos confringit*. (b)

Cur longæuius Eremitæ cultor Iacobus (c) post exactam in eo recessu maximam vitæ partem, iam canus, nondum securus, proprijs eruditus periculis viuum se condit in tumulto? Iactatus criminum procellis, naufragus,

ac

a Isa. 57. b Iob 48. 11.

c Ex Simeone Metaphras. 13. Iannarij.

ac propè demersus, denique ad hoc postremum litus, quanuis quassata rate, confugit. Hic tutissimum portum, hic fidam stationem inter albentes caluas inuenit; ac libidinum tempestates, quibus retundendis non ante suffecerat solitudinis austeritas, annosa virtus, ætas deuexa, sepulcri puluisculo refrænauit.

Noueras efficacem cineris nostri virtutem Sanctissime Pontifex Gregori, cui grauissimum addidisti sententiæ tuæ calculum; cùm *perfectam vitam mortis esse meditationem* docuisti. (a) Qui enim seriò se meminit mortalem, tanquam moriturus uiuit, ut moriens uiuat.

Supereft igitur, ut quicumque de rectè instituenda vita cogitat, Innocentium secutus, tetricam eam consulat, sed fidam indicem veritatis; à qua irretortam agendi normam percipiat. Suspecta siquidem, & fallacia esse possunt hominum consilia: mors nunquam consulentem fefellit.



CHRIA

L. 12. Moral.

CHRIA MISTA.

*Cornelia Gracchorum mater Campana
matrona filios ostendens: Hac,
inquit, ornamenta mea sunt.*

Ex Valerio Max. l. 4 c. 4.

Vtinam possem eximiam illam Zeu-
xidis artem assequi dicendo, qui Pene-
lopis mores pinxisse dicitur cum vul-
tu. Vtinam ita possem exquisitis elo-
quentiæ coloribus mentis vnà, fron-
tisque tuæ grauitatem dignè referre ò
sexus, & sanguinis, & Patriæ decus
Cornelia. Vellem equidem mollibus
hodie Gynæceis imaginem tuam osten-
tare pro speculo, cuius fortassè monitu
sagittata fœminea leuitas ab operoso
sui mundi cultu ad meliora studia ver-
teretur. Spectate hoc Romanæ virtu-
tis exemplar o matres; atque intelli-
ge non aurum, ac purpuram, non
pictam, gemmatamque vestem; sed
liberaliter institutam sobolem esse ve-
stræ dignitatis argumentum. Hoc vno
gloriabatur illa genere, & coniugio il-
lustris, moribus illustrior Cornelia: hoc
pretiosissimum esse docuit genitorum
ornamentum. Quod quanuis veteri fa-
ma, & historiæ commendatione no-
tissi-

cissimum audiuisse vos non semel , ac legisse opinor ; non inutile tamen fore puto , nec iniucundum in memoriam reuocare .

Romam diuerterat hospes Cornelie matrona . Campana hæc erat , atque de more gentis ad summum lautitiæ apicem luculenter instructa . Et nobiliori fortasse choragio tunc pompæ scenam ornauerat , quæ in amplissimo Urbis theatro spectari à Quiritibus mereretur . Cirrata , cristata , cerussata , delibuta vnguentis circum halante Seplasia patriam redolebat . Fluebat è collo in sinum nitidissimis vermiculatum lapillis aureum monile ; nec minori pretio radiabant aures , ac manus . Attalicam cycladem diues bacca distinxerat , cuius illa sinuosam laciniam testudineo gradu superbè thraens exigere , ne dum expectare , videbatur ab intuentibus obsequia . Ut verò gaudet muliebris ambitio se , suaque impensius iactare , præter opulentiam , quam veluti vulgarem mercem in omnium conspectum profuderat , hospitæ suæ lectioris thesauri arcana expandit . Hyacinthinas , & smaragdinas pigmentorum pyxides è myrothecijs depromit ; annulos è Dactyliothecis insignes , latiore pala solidis adamantibus fulgurantes : ex argenteis , eburneisque loculis armillas ,

torques, in aures, & inuidendas Cleopatrae margaritas. Iam abundè pretiosa ostentatione Corneliam lassauerat, dotalis apparatus diuitias, & missa in compendium patrimonium stomachantem veriùs, quàm mirantem; cùm illam Campana rogat: ecquid adhuc moretur gazam itidem suam referare, dignosque coniuge Gracchi, & filia Scipionis ornatus proferre, quos audissimis oculis expectet? Annuit illa, spondetque mox voti compotem plenissimè futuram. Sed grauioribus intentata curis prudens matrona longè aliò spectabat. Curiosam itaque sceminam diductis in diuersa sermonibus tandiu tenet, donec filij redeant à schola: tum accitos egregiæ, cultæque indolis puellorum coram hospita sistens: Iam ne thesauros (inquit) meos non vides? En opes, en elenchos, en ornamenta Cornelie. In amplissimis laribus pretiosius nihil habeo, charius nihil. O dignam Romanam heroinam vocem! o prudenter factum, dictumque sapienter! Ita lusit ambitiosæ mulieris importunitatem, & parentes admonuit, non à supellectilis pretio, non ab opulentia, & luxu; sed ab ingenua liberorum educatione gloriam esse querendam.

Enim verò leuis admodum ille fulgor est, qui ab auro, gemmisque venit,

ac perperam in his cumulandis laborant studia parentum; nisi enitantur, ut eorum, quos alunt, futuros rerum suarum, ac nominis hæredes, ingenia, & mores effulgeant. Nec aliunde certius familiæ decus; quàm si filios à vitæ limine instituendos paterna solertia suscipiat, prospiciatque, ut liberalibus disciplinis initientur, & in spem summæ Virtutis, ac dignitatis adolescant. Mollior enim illa ætas in omnem flexilis partem facile recipit quascunque imprimit institutio imagines, & altè servat impressas: quamobrem excultationis artibus pueritia ornatissimæ virilitati præludit, ut vernis floribus vinea sæcundam autumnitatem pollicetur. Quæ igitur illustrior, aut quæ utilior esse potest parentum cura, quàm quæ rudibus filiorum annis exornandis impenditur in securæ vitæ præsidium, ac decus? Infusa illa cum lacte pietas; tradita in crepundijs rudimenta virtutum, inchoatum in prætexta sapientiæ tirocinium, illa denique viros formant omni laude præstantes. An verò quidquam pulchrius in domestico splendore spectandum genitores habent, quàm vernantia hæc germina gloriæ; præsertim, si non alienæ tantum operæ debeant, sed culturam ipsi adhibeant suam? Quantumvis enim exquisita

eruditorum, grauiumque hominum, magisteria defudent in scholis, nihil æquè proficit ad filiorum indolem excolendam, ac si domi eos habeant institutores, quos natura suadente reuerentur, & amant. Infantes certè videmus, quanuis caligante inter incunabula ratione, iam parentum obseruare nutus, ab eorum ore pendere, ad minas, vel blanditias tenellos vultus effingere, & adhuc sermonis ignaros ad eorum tamen voces responsa conari. Nempe, vt in filiis iconem suam intuentur Patres, ita filij exemplaria sua spectant in Patribus, quæ posita quotidie ante oculos altius mentibus infigunt; vt morum æquè, ac membrorum paribus lineamentis se se ipsis conforment, quibus debere se sentiunt huius lucis vsuram. Prima itaque rectæ institutionis doctrina spectata est in genitoribus probitas, & virtus; quæ liberis ducem se præbet, ac sequaces faciliè trahit, vel certè degeneres esse non patitur. Ita iure lætari opere suo parentes possunt, suosque omnino sibi filios gratulari; si quorum corpora procrearunt, animos etiam generosa educatione formarint. At quantò præclariùs est, benè viuendi rationem dedisse, quàm vitam? quid gloriosius, quàm optimos Reipublicæ ciues,

ciues, integritate, consilio, sapientia, fortitudine præstantes non solum genuisse, sed fecisse, atque ideo meruisse non vnus tantum gentis, ac Patriæ patres appellari?

Non eam profectò gloriæ segetem, immò ne minimum quidem bonæ frugis expectent genitores à filiis, quorum pueritiam sine vlla culturæ industria syluescere, aut malignis vitiorum germinibus luxuriare patiuntur. Atque utinam huius ingenij homines complures non essent, Megarensium laborantes incuria, quos acriter Cynicus arguebat, pecora seruantes diligentius, quàm filios. Aliquos video ita sui muneris oblitos, ut vix recordentur se patres, nondum ab infantia dimissos pusiones, iam velut emancipatos, effræni libertate donare: plures totam in eo curam locare, ut diuites potius efficiant, quàm bonos: plerosque peruerso amore fouere in gremio deliciarum molles, insulos, ignauos. Quales denique viros futuròs putem tam infelicioibus vitæ auspicijs educatos? Quæ magna, quæ illustria de illis præsagiam, qui per fora, per compita, per tabernas, ac theatra vagi diem totam, paterfamilias scilicet indulgentia, leuissimis voluptatibus conterunt, nihil meditantés præter cupedias, & ludos? Qui

pulchelli, nitiduli, cincinnatuli, toti è capsula, ijdem tamen feroculi, Martes nimirum impuberes è Phrygia, ferro latus obarmant, spectarique ambiunt, ac timeri? qui parentibus non annuentibus tantùm, at festiuissimè plaudentibus, frequentius cum saltatriculis versantur, quàm cum musis; fritillum, & aleas acutiùs versare docti, quàm libros? Hos ne à matris blanditijs, à mensis, à choreis, à plumis gloria tandem recipiet in sinum? Hi ne familiæ, ne dum patriæ, vllum afferent incrementum honoris? Hos fortè amores suos genitores appellent, nunquam iustè ornamenta vocauerint; immò veriùs labe, nullo satis tegendas auro, diuque mansura socordix suæ simulacra.

Vtenim pictorum, sculptorumque præstantiam colligere solemus à tabulis, ac signis; ita patrum indolem conijcimus à filijs: nec fallaci plerunque coniectura; cùm instar monstri sit, si dissimiles vel nascantur, vel fiant. Quis enim tritissimum illud nesciat, non erumpere rosam è squilla? Stirpem flosculus probat, fructus arborem, vnio concham. Nec aliter Genitores liberi commendant; illi videlicet, in quibus impressa eorùm virtus elucet. Ad mutuas horum laudes omnium ore frequen-

quentius audies acciri Venusinum Pœtam , quasi locutum à tripode . (a)

*Fortes creantur fortibus; nec imbellem
feroces*

Progenerant Aquila Columbam .

Verum non sufficit Aquilæ Aquilinos genuisse pullos ; nisi luce magistra .

(b) *Naturam , vires , ingeniumque
probet .*

Neque satis est magnis alioquin viris suo sanguine satos recensere ; nisi eodem se dignos educatione perficiant . Gloriabatur Achille suo Peleus : at sapientissimos illi præceptores adhibuit Chironem , & Phænicem . Mirabatur magnanimum filium Philippus ; at eodem Philosophicis præceptis erudiendo Lycei principem accersivit . Latabatur Arcadio , & Honorio Theodosius , in quibus Imperij Romani spem geminam educabat : ast alteri selectum è sacrorum , doctorumque hominum flore magiltrum quæsiuit Arsenium ; alterum reptantem per scuta puerum

Inter laurigeros aluerunt castra triumphos . (c)

Ita consulere dignitati suæ cordatæ Patres ; vt æstimari possent à liberis , in quibus ipsi viuere ornatissimi laudibus

R 4

bus

a Hor. 4. Carm. od. 4.

b Claud. in Pref. in 3. Hon. Consul.

c Idem de 3. Hon. Conf.

bus viderentur. Adeò verum est, & quotidiano vsu compertum, quod in sacris habemus Oraculis. *Virum in filiis suis agnosci.* (a)

Quæ cum ita se habeant, certo certius liquet, institutos optimis disciplinis filios eximio esse Patribus ornamento; eorum proindè pueritiam sollicita cura colendam: vt iacta in primos annos virtutum semina, vbi maturior ætas accesserit, in vberissimam honoris messem assurgant.



DE EPISTOLIS CONSCRIBENDIS.

Ipsij consilium in Epistolica institutione sequor; cum mihi æquè propositum sit scripturis literas adolescentibus præire compendio (vt ille ait) ad vsum, non ad speciem; nec vt omnia, quæ ad rem, sed quæ in rem maximè, dicam. Quare missa faciam complura, quæ de Inuentione, Dispositione, Elocutione, deque tribus Causarum Generibus diffusè tractari ab aliquibus huc solent: quasi ab Oratione nihil Epistola differat, & huc omnia congerenda sint Rhetorum præcepta. Ex his igitur pauca vix delibabo: nam & si plura desideras, in hoc eodem libello suis locis inuenire potes; nec tam multa requiri sentio ad hæc initia scribendi; cum operosum nimis artificium non exigit Epistola; præsertim familiaris (cuius prima nobis cura est, & frequentior vsus) tantò laudabilior, quanto simplicior. Satis igitur mihi nunc fuerit incipientibus consulere; compendiarijs istis præceptionibus; quibus si nondum acquiescis, confugies ad opusculum P. D. Vincentij Galli, vel perutilem libellum Simonis Verepæi de conscribendis Epistolis; aut vberiorum aliorum doctrinam: quanuis absolu-

R 5

tissimam Epistolarum artem, arbitrato meo, non tam schola dabit, quam accedens annis prudentia, & præter literarum studia, rerum humanarum cognitio.

*Vnde dicta sit Epistola, quid sit,
& qua illius materia.*

CAPVT PRIMVM.



EPISTOLA, Græca vox, at pridem à Latinis communiter usurpata, idem significat, ac missoria, seu missa, (a) hinc diminutivum nomen *Epistolum* pro parua Epistola. A mittendo itaque dicta est, quòd ad absentes mittatur, cùm ideo Tullij testimonio inuenta fuerit, ut certiores faceremus absentes, (b) si quid esset, quod eos scire aut nostra, aut ipsorum interesset.

Latini *Literas* vocant, plurali semper numero; Poetæ singulari etiam vtuntur, Literamque pro Epistola ponunt; ita Ovidius. *De Tristibus lib. 3. eleg. 7.*

*Vade salutatum subito perarata
Perhillam*

Litera, sermonis fida ministra mei.

Prisci
a *Isid. lib. 7. Orig.* b *Cic. l. 2. Epist. 3.*

Prisci tabulas, tabellas, codicillos à materie appellauere; nam ante membranae, & chartæ vsum in dolatis ex ligno codicillis Epistolæ scribebantur: hinc earum latores Tabellarios vocauerunt. Eadem ratione Ceras pro Literis inuenies, ab illitis Cera pugillaribus, in quibus scribere mos erat.

Definitur *EPISTOLA* *absentis cum absente scripta quadam sermonis imago, qua vocis, ac lingua vicem gerit.* (a)

Epistolæ materia est quidquid in eiusdem argumentum sumitur, seu propositum scribenti thema. Ea itaque multiplex est, nec minus latè, quàm hæc vita, patet. In triplicem tamen Lipsius diuidit, Seriam, Doctam, Familiarem. Seria grauiora continet de statu rerum, de militia, de pace; quæque ad mores, & officia pertinent; vno verbo, quidquid paulò magis seriò scribimus.

Docta complectitur, quæ ad scientias, ad variam eruditionem, ac amœnorum literarum studia spectant.

Familiaris tangit res nostras, aut quæ circa nos sunt, & in assidua vita versantur; hæcque creberrima, & propria est Epistolæ materies; quanuis seria, & docta sæpiùs immisceatur, va-

R. 6

rium-

a Ex Demetrio de Elocut.

riumque sit illi plerunque, nec simplex argumentum.

Quot, & quæ sint Epistola partes.

CAPVT SECVNDVM.

EX Epistolæ partibus aliæ *CERTÆ* sunt, aliæ *INCERTÆ*.

CERTAS voco Epistolæ proprias, quæ semper eadem, aut penè eadem, quasi ex formula seruantur, eæque sunt: *SALVTATIO*, *VALEDICTIO*, *ADIECTIO LOCI*, ac *TEMPORIS*, quo data est Epistola, *SUBSCRIPTIO*, & *INSCRIPTIO EXTERIOR*, seu *SUPERSCRIPTIO*, hasque in sequenti capite explicabimus.

INCERTAS dico, quæ sunt Epistolæ, & Orationi communes, de quarum numero, ac ordine vel nihil, vel vix aliquid certi præscribi potest; cùm maximè libera sit Epistola; insuper varia pro diuersitate materiæ: nunc enim circa vnum occupatur, nunc vagatur in plura, modò breuior, modò prolixior. Aliquando simplex narratio est, vel expositio rei, de qua certiorem facimus amicum; quod sæpè in familiaribus contingit; quandoque aliqua argumentatione vtitur, ad rem probandam, suadendam, vel dissuadendam; quod

quod in ferijs, ac doctis euenit; tumque Oratiunculæ speciem imitari posse non negauerim, quæ constet Exordio, Narratione, Confirmatione, & Epilogo; dum has partes non tanta cura, & vbertate tractet, vt Declamatio potius videatur, quàm Epistola. Immò Demetrius Phalareus censuit longiores Literas, quæ Oratione assurgunt, quæ grauiora, quæ docta continent, operosas, lucernamque redolentes, Epistolæ naturam exuere, potiusque Præfationes esse dicendas, ac nimia prolixitate abire in volumen; quod ait Aristoteli ad Alexandrum, & Platoni, ad propinquos Dionis scribendo, usu venisse: quantum aliter senserint grauissimi Scriptores, qui serias, doctasque locutiones Epistolarum nomine vulgare.

Grauior igitur, & plenior Epistola enumeratis illis partibus constare potest.

Exordium est prima Epistolæ pars, quæ salutationem sequitur, & vel aperte, vel per insinuationem beneuolentiam capiat, aditumque aperit ad ea, quæ dicenda sunt; nisi aliquando præstet sine vlla præparatione ex abrupto exordiri. De Exordio, singulisque partibus Orationis vide, quæ in secunda parte tractantur.

Nar-

Narratio est totius Epistolæ summa, quæ illius argumentum explicat, & scribentis mentem.

Confirmatio opportunis rationibus utitur ad rem propositam confirmandam, finemque scribentis obtinendum; & si opus est, quæ obijci possent, per Confutationem refellit.

Epilogus est Epistolæ conclusio, quæ paucis verbis benevolentiam, vel obsequium testantibus, fieri solet; vel breviter dicta complectitur, & claudit. Demus exemplum.

Scribenda sit ad amicum, inuitis parentibus peregrinantem, Epistola hortatoria, qua illum reuoces in Patriam ad maiorum obsequium, & ad pristina studia recolenda.

Exordium ducere poteris à significatione constantissimi amoris, qui nulla minuitur distantia locorum; quin stimulis acrioribus animum urget, qui charissimi amici consuetudinem eò impatientius desiderat, quò diutius abest.

Hinc ad Narrationem descendes, explicando conceptum ex eius importuna peregrinatione mærorem, quem lenire nunc aliter nequeas, quàm confugiendo ad Literarum subsidium, quæ suppleant negata colloquia: has ideo a te mitti sinceræ benevolentix testes, quæ non characteres distantis pro res-
ponso

ponso expectent , sed reducis voces , & optatissimum aspectum : proinde , si te , immò se ipsum amet , rebusque suis consultum velit , reditum maturet in Patriam .

Pro Confirmatione rationes afferes , quibus regressum suadeas , quæ duci poterunt ex. gr. à consequentibus inopinatum eius abscessum ; cuiusmodi sunt communes domesticorum questus , amantissimæ genitricis lacrymæ , senioris patris angores , non secus , ac in misera orbitate , languentis : sollicitæ amicorum omnium curæ , qui pericula , & incommoda peregrinationum expendentes , finitri semper aliquid metuunt absenti . Quid enim non timendum incauto adolescentulo , qui rerum , locorumque ignarus per incognitas terras , alienasque gentes vagetur ? Quod si cætera salva sint , nihil ne faciendum putet ingenij detrimentum ? ita ne contemnat indolem suam , & egregiè susceptos in literarum studijs labores ? &c.

Si confutatione uti volueris , præuenies , quam afferre posset , speciosam excusationem : non esse videlicet , cur tibi memoret , sapientes , piosque viros , qui præcul à Patria peregrinam virtutem quæsierint . Summam sapientiam , summamque pietatem hoc ætatis esse ,

genitoribus obsequi, pendere à maiorum nutu, seque his tradere formandum.

Tandem Epilogo Epistolam claudes, adhibita deprecatione, qua enixè amicum obtesteris per mutuæ charitatis officia, per iura naturæ, per quidquid amicis, parentibus, Deo debeat, ut se suis, se sibi reddat.

Hæc dicta sint ex.gr. Sed ne putes hac semper methodo texendam Epistolam, eum, ut initio monui, non semper eandem partes habeat, nec certum ordinem seruet: immò ipsam rerum scribendarum dispositionem in Familiaribus Literis non sollicitè nimis curandam Cicerò ad Atticum, & Lipsius docuere, quandamque potiùs negligentia speciem laudari, quæ nullum præferat artificium; in Serijs, & Doctis magis de ordine satagendum; sed ita, ut oratoriam diligentiam non æquet.

De partibus Epistolæ proprijs.

CAPVT TERTIVM.

SALVTATIO ex veterum more præcedit, quæ tria continet. Primò scribentis, hinc illius, ad quem scribitur, nomen, & salutem; usitatis illis, vel similibus formulis. *Tullius Hortensio*
salu-

salutem. Hortensius Tullio suo salutem,
 vel S. P. D. hoc est *salutem plurimam*
dicat. Recentiores ordinem inuertere,
 scribentisque nomen secundo loco po-
 nunt : ex. gr. *Eruditissimo viro Iusto*
Lipſio Ericius Puteanus salutem, vel
felicitem. Quandoque nomen tan-
 tum præmittunt illius, ad quem datur
 Epistola ; in dandi casu ; siue proprijs
 nominibus ommissis, titulos tantum
 adhibent, & appellatiua honoris in
 vocandi casu : ut *Illustrissime Domi-*
ne : Excellentissime Princeps. Tum
 verò subscriptio necessariò addenda in
 Epistolæ fine, quæ nomen scribentis
 explicet.

VALEDICTIO claudit Epistolam
 vel simplici verbo *Vale*, quod solenne
 fuit antiquis ; vel huiusmodi alijs di-
 cendi modis : ex. gr. *Cura, ut valeas.*
Te, tuquo superi fortunent. *Te diu-*
tius ad publicam felicitatem Deus inco-
lunem seruet. *Diu, ac feliciter viue.*
patria decus, literarum præsidium.

Tullius epist. 2. lib. 14. ad uxorem, &
 filios ita clausit. *Valete desideria mea,*
valete.

Sæpe in postrema literarum clausula
 ex Christiane pietatis instituto nos ami-
 corum precibus commendamus, illisq;
 vicissim à Deo bona omnia precamur.

ADSCRIPTIO loci, ac temporis post
 Va.

his, quos exigit personæ gradus ex more nationum, ac temporum. Et quanuis intus Latine loquatur Epistola, exteriorem inscriptionem vernaculam esse malim, quam sine interprete intelligant tabellarij, ac serui.

De Stylo Epistolari.

CAPVT QVARTVM.

QUAM dispar Epistolis argumentum est, tam varia Elocutio. Generatim ea sit, quæ sincerum scribentis animum deceat, non tumida, non fucata, elegans tamen cum proprietate, puritate, & claritate. Venuitas præterea accedat, quæ gratissimas legenti Literas facit. Hæc verò non tam arte datur, quàm natura: cum enim diuersa sint hominum ingenia, quorum vix vlla expressior imago est, quàm Epistola; vt non eadem loquentibus gratia sermonis, ita nec idem scribentibus lepos. Iuuabit adagia, allusiones ad veterum dicta, vel facta, versiculos, argutasque sententias interdum inferere: iocos, & sales opportunè immiscere, quos animam, & vitam Epistolæ Lipsius appellat.

Longior Periodorum tractus euitandus: membrisque potius, & incisus utendum.

dum. Allegorica præterea phrasis addi-
cetur: parca, & pura oratio sit, neces-
saria verborum supellectile contenta;
nihilque habeat omnino, quod affec-
tationem, aut putidam assentationem
sapiat.

Cæterum accommodandus est ma-
teriæ stylus. Familiares, quæ de leuioribus agunt, quotidianis verbis texti docuit Cicero. *Lib. 9. Epist. fam. 21.*, quare in humili dicendi genere consistunt. Mediocri plerunque charactere vtuntur, quæ ad officia pertinent; vt, Commendatitiæ, Gratulatoriæ, Gratiæ agentes &c. Seriæ, quæ in magnis, grauibuscque versantur, & doctæ, ad sublimiùs etiam dicendi genus quandoque assurgunt.

Huc decencia spectat, quæ non rerum tantum, sed etiam personarum rationem habet. Quare cogitandum, quis, quid, ad quem scribat; nec eodem vtique sermone vtetur ad Principem, quo ad seruum. Ad amicos, domesticos, & æquales pressior erit, & remissior Epistola. Ad ignotos, ad maiores, ad Magnates ornatior erit, & vberior. Noris præterea daturus literas ad aliquem, quos adhibeas honorum titulos, pro dignitate personæ, regionumque, ac temporum usu. Prisca ætate nondum ambitio, & assentatio

tot appellationibus auxerat Vocabularium ; nunc multis , splendidisque nominibus & natalia distinguimus , & gradus. Multas præterea recentior urbanitas inuenit exprimendæ humanitatis, & obsequij tellandi formulas; atque ad captandam gratiam excogitata blandimenta. Vt in his nimium esse ridendæ fuerit leuitatis, ita prorsus abhorere à sæculi ritu inconsultæ imprudentiæ.

*De magnitudine, vel paruitate
Epistolæ.*

CAPVT QVINTVM.

DEterminatam mensuram Epistola non habet : certum tamen est illam utroque magnitudinis, vel paruitatis excessu fieri posse vitiosam. Si prolixitate peccet ; odiosa erit : si nimia breuitate, nisi familiaritas excuset, quandam rusticitatem redolebit, vel contemptum. Quid breuius monosyllabo Lacedæmonum responso ad Philippum Regem ? cui multa per longiores literas imperanti vnicam Syllabam *NON* rescripserunt ; sed grandioribus pictam characteribus, ut iustum Epistolæ spatium impleret? (a)an

non

a Ex Apophth, Pauli Man. l. 2.

non rigidus ille Laconismus fuit ingentis iniuriæ compendium? Licebit fortasse aliquando inter amicos ludere brevissimis Epistolijs; quale est illud Angeli Politiani lib. 7. *IACOBO MODESTO SVO.*

Doles, quòd non rescribam: dolere desine: iam rescribo. Vale.

Non multò longior; et multò suavior, est Epistola Tullij ad Basilium 16. l. 6.

Tibi gratulor: mihi gaudeo. Te amo: tuatueor. A te amari, & quid agas, quidque istic agatur, certior fieri volo. Vale.

Ecce, quàm multa paucis expediat; quod in Familiaribus fieri poterit, ac in temporis angustijs; ac non ubique aut laudanda hæc parcitas, aut ferenda; cùm servandum sit etiam in Epistolæ magnitudine Decorum. Huius autem mensuram ne versiculis, aut pagellæ marginibus definias. Illam dabit materiæ ratio, & prudentia scribentis. Omnium profectò calculis damnatur otiosa garrulitas, quæ ubique molesta, hìc maximè importuna est. Verùm castigata Epistolæ brevitās, & sincerus character non expectari, nedum exigi, ab adolescentibus debent; immò præstat quandam à primis annis affluere vbertatem, ac luxuriam, à qua

qua detrahi multa possint, donec exactam temperiem afferat ætas maturior.

Genera, & Species Epistolarum.

CAPVT SEXTVM.

SI Epistolarum distinctionem desumere velis à materia, circa quam versantur, breuissimè illas diuides cum Lipsio in *SERIAS*, *DOCTAS*, *FAMILIARES*: Siue cum Tullio *lib. 2. ep. 3. Fam. in NEGOTIALES*, *IOCO-SAS*, *SEVERAS*: breuiùs adhuc, si cum Manutio dixeris, alias *MORALES* esse, alias *NEGOTIALES*. At cum plures earum formæ sint, omnes ad tria Genera referri solent, quæ sunt quibuscunque Orationibus communia.

Triplex ergo est Epistolarum Genus: *DEMONSTRATIVVM*, *DELIBERATIVVM*, & *IVDICIALE*.

GENVS DEMONSTRATIVVM continet laudes, ac vituperationes, & quæque vel ad solam cognitionem, vel delectationem scribuntur, vt Narrationes, Descriptiones, ac Dissertationes, *DELIBERATIVVM* complectitur suasiones, ac Disuasiones: *IVDICIALE* Accusationes, ac Defensiones.

Vndenam hæc tria Genera argumenta deducant, in secunda parte docebitur.

mus. Pro familiaribus Epistolis non valdè laborandum, ad inueniendam materiam; cum hæc semper in promptu sit, ipsum videlicet earum argumentum, sine quo prius mente concepto ad scribendum nemo accedit. Pro Serijs, & Doctis quomodo paranda sit, & amplificando materies, non est, cur hic pluribus explicem; nisi fortè reuocare huc velim de Locis Oratorijs, ac de Amplificatione iam alibi dicta, & in Rhetoricis præceptionibus de Inuentione dicenda.

Quot, & quæ sint Epistolarum Species, non satis constat inter Artis magistros, qui complures eas esse docent, in iisdem tamen enumerandis dissentiunt. Sed omnes indagare longum esset, ac superuacaneum; cum sufficiat insigniores, frequentioresque nosse, atque ad hoc institutum nostrum aptiores, quales nunc subijcio ad singula genera spectantes.



Epistola Generis Demonstratiui.

CAPVT SEPTIMVM.

NVNTIATORIA, seu NARRATORIA est, qua certiore[m] facimus absentem de rebus gestis, siue priuatis, siue publicis; vel ad illius, vel ad nostram, aliorumue vtilitatem, seu etiam ad voluptatem, festiuumque literarum commercium. Hic referuntur *DESCRIPTIONES* ludorum, spectaculorum, conuiuiorum &c. In rebus describendis, ac explicandis ordo seruatus, earumque virtutum vsus, quas Narrationi maximè conuenire suo loco docuimus. Nihil cognitione dignum. Nuntiatoria Epistola omittat; præsertim, cum de re grauiori agitur, quam penitus cognoscere intersit, nec tamen leuiora prosequendo ineptiat, ac legentem lassat.

Ex Epistolis Tullij Familiaribus NARRATORIAS habes l. 1. 2. 4. l. 4. 12. l. 7. 26. lib. 10. 30. lib. 15. 4. DESCRIPTORIAM lib. 7. 1., & alibi alias: aliquas enim tantum excerpere volui, non omnes colligere.

Ex Epistolis Plinij NARRATORIAS lib. 1. 5. 12. lib. 2. 1. 6. 7. lib. 4. 11. lib. 7. 27. lib. 9. 33. 36. DESCRIPTO-
S
TO.

TORIAS lib. 2. 17. lib. 4. 30. lib. 5. 6. lib. 8. 8. 17. 20.

LAMENTATORIA, quæ flebilis, vel lacrymosa à Verepæo vocatur, ad Narratoriam referri potest : hac enim tristitia narramus, ut se dolor per Literas egerat, vel nostras, vel amicorum calamitates, iacturas, exilia, mortes deplorando.. *Huius generis sunt Cic. Epistola lib. 14.*

Plinij lib. 1. 12. lib. 5. 5. lib. 8. 16. 23.

GRATVLATORIA est, qua gaudium nostrum amico testamur, ob aliquod ipsius bonum, vel quod ad ipsum pertineat ; ut ob Principis gratiam, illustre coniugium, nouam Patris dignitatem, Fratris lauream, Filij natalem Gratulationem, ita temperabis, ut animo potius exire videatur, quàm calamo. Ostendes maiorem te à prosperis amici rebus, quàm ex tuis, percipere voluptatem ; nec debere fortunæ, quæ illi feliciter eueniant, cuius probitati, prudentiæ, doctrinæ omnia debeantur. Meliora denique in dies illi exoptabis, optima quæque promerenti.

GRATVLATORIÆ sunt Epistolæ *Tullij lib. 2. 8. lib. 3. 11. 12. lib. 15. 7. 8. 9.*

Plinij lib. 6. 26.

Huc pertinent **GRATVLATIONES** pro publica aliqua felicitate ; ut pro re-
lata victoria, vel reddita pace. Huius-
modi sunt mutæ Literæ, quibus in-

Re-

Redemptoris Natali Christianam lætiti-
am augemus.

GRATIAS AGENS ad accepti be-
neficij, vel muneris memorem, gratumque
animum significandum adhibetur. In
exaggerando itaque, laudandoque bene-
ficij versabitur, cui vel parem, si fieri
possit, gratiam referendam promittes,
vel illius magnitudine obrui te dices,
iam tot alijs nominibus obæratum, ut
iam sis impar soluendo, & videri coga-
ris ingratus; daturum te autem operam,
ut intelligat amicus, etsi vires defint,
quibus vicem rependas, non tibi deesse
benè consciam mentem, quæ summa
in te merita fideliter seruet. Quod si
non responderit votis euentus, nec ob-
tinuerit amicus, quæ optaueras, lauda-
bis tamen illius diligentiam, qua se-
studiosissimum rerum tuarum pluribus
confirmavit argumentis.

GRATIARVM ACTIONES conti-
nent Epist. Cic. lib. 3. 13. l. 10. 11. lib. 15. 11.

Plinij lib. 5. 2. lib. 9. 24.

OFFICIOSA est, qua operam no-
stram, vel præstamus, vel offerimus amico
ad ipsius, aliorumque subsidium. Hæc ve-
rò latissimè patet; omnes enim Episto-
las complectitur, quibus non solum
pollicemur quidquid est in nobis, sed
consolando, gratulando, monendo,
aliquo tandem fungimur amici officio.

Huius nota sunt Epist. Cic. l. 5. 8. l. 6. 10.

Plinij lib 4. 17.

OFFICIOSIS eas annumerauerim , quibus fausta renascentis anni exordia precamur . Tum quasi conuocatis ad consilium astris nouam amicis felicitatem ominamur ; & memorando , quantum illis debeamus , quanta sint eorum merita , ætatem auream , Nestorea secula , quasi seriò exoptamus , assentatorijs huiusmodi blanditijs , ex aulæ formulario depromptis , urbanè mentientes , quæ , si vsum excipias , lege plerunque validiorem , non pluris valent , quàm quæ

Aurea porrigitur Iani caryota

Calendis (a) :

IOCOS Aest, quæ ingenuis , facetisque salibus , inspergitur . Nec vnus Epistolæ species iocos admittit ; cùm in omnibus , præsertim Familiaribus , non tantùm locum , sed & laudem festiuitates habeant ; dum inter seria , vel tristitia non importunè inducantur . Tempestiue itaque tum moderatè adhibeantur ; atque ita , vt acumine delectent , non feriant , nilque referant petulantia , vel obscœnitatis . At neque cum omnibus eadem vsurpetur ludendi licentia .

locantur Epistola Tullij lib. 1. 10. l. 7. 12. 13. 16. l. 9. 18. 19. 20.

Pli

a Martial. l. 13. Epigra. 27.

Plinij lib. 1. 15. lib. 8. 7.

LAUDATORIA est, quæ in alicuius laudem scribitur, **VITUPERATIO-RIA**, quæ in vituperationem. Sed hæc nunquam stylum nostrum sollicitet, nisi, cum salua hominum fama, licebit vitij irasci. Repete quæ de Laudatione, ac Vituperatione diximus in tractatu de Amplificatione.

LAUDATORIÆ sunt ep. Cic. l. 9. 14.

Plinij lib. 1. 10. 14. 16. 17. 22. lib. 2. 3. l. 5. 17. lib. 6. 11.

VITUPERATORIÆ eiusdem Plinij lib. 2. 14. lib. 4. 2. 7. lib. 6. 2.

DEDICATORIA, seu **INVENC- PATORIA** Epistola illa est, qua nostras, aliorumque lucubrationes, vel typis edita in publicis Disputationibus Theoremata alicui dicamus. Alexander Tassonus, vir apprimè eruditus, sed festiuioris idem ingenij, pluribus contendit, nulli dedicandos esse libros in præfatione sui operis, quod inscribitur *Varietà dispensari*: quod quidem communi veterum, recentiorumque consuetudini repugnat, adeo ut nulli inscriptus liber censeatur pupillus sine tutore.

Dicari opera solent, vel præstantioribus amicis, vel Doctis, aut illustribus, ac Principibus Viris; ut nobis propitiemur eorum fauorem, paginasque nostras præclarissimis auspicijs fortunemus.

mus. In texenda Dedicatoria Epistola rationes afferemus, quæ nos mouerint ad inscriptionem illam tali tantoque Viro nuncupandam, eæque desumentur vel ab ipsius beneuolentia, ac humanitate, vel doctrinæ laude, vel summa dignitate, vt sui nominis merito accersere operi splendorem possit: vel ab eiusdem operis argumento; quòd si ex. gr. Poetica tractet, dicemus, credidisse nos, non ingrata fore illa Parnasi xeniola Musarum amantissimo ingenio; neque has alium sibi vindicem malle, longa consuetudine, prolixaque beneficentia obstrictas. Hinc nobis aditum ad huius laudes aperiemus, memorando gentilitios Heroes, & auitæ gloriæ monumenta, tum proprias Viri virtutes, honores, egregia munera, præclarè gesta recensendo. Sed cauendum, ne huiusmodi Epistola manifesta assentatione peccet; ne diffusa narratione sollicitet omnes maiorum manes, totamque ab origine Genealogiam retrahat; neque iam Dedicatoria sit, sed Historia. Quin illam potius laudauerim, quæ sensibus magis præstet, quàm verbis redundet; nec plurima dicat, sed maximè digna.

In Theorematum Nuncupatorijs impressa in eorum fronte Emblemata spectanda erunt; vt Fabulam, vel Historiam, quam referunt, in rem nostram deduc-

deducamus, quod in Disputationum etiam Præfationibus obseruari solet.

Claudetur Epistola optatissimum Viri patrocinium exorando, nosque ac nostra cum tenui munusculo offerendo, alijsque huiusmodi obsequij formulis ad illius gratiam demerendam.

Nuncupatoriæ Epistolæ exempla non multo labore quærenda erunt, cum statim in vestibulo cuiuslibet libri se offerant; satisque erit, si melioris notæ Scriptores præ oculis habeas.

DISPUTATORIA, quanquam a Demetrio non admittitur inter Epistolas, grauissimorum tamen Authorum usu, ac suffragio comprobata, Quæstiones, ac Dissertationes continet, siue ad sacram; siue ad profanam eruditionem pertinentes. Huius generis plurimas habent D. Augustinus, D. Hieronymus, & Seneca. Longiusculam, sed perutilem Plinius ad Cornelium Tacitum scribit, eaque est 20. *libri primi*; in qua pluribus differit de duplici dicendi genere, amplo, & copioso; breui, & circumscripto. Huic adde *Epist.* 17. l. 7., & 26. l. 9. Multas huiusmodi leges apud Iustum Lipsum, & Angelum Politianum. Hæ verò Disputationes, quanuis tractentur per Literas, non Epistolæ præceptis nituntur, sed Doctrinæ subsidijs.

Epistola Generis Deliberativi.

CAPVT OCTAVVM.

HORTATORIA est, qua excitamus amicum ad praeclaram rem aliquam suscipiendam, vel peragendam; idque fiet exponendo ipsius rei dignitatem, ac utilitatem, vel necessitatem, facultatem, iucunditatem. Ostendes profectura inde bona, vel si secus fiat, ventura damna. Reuocabis in memoriam exempla maiorum; communem de amici virtute expectationem, comparatam hactenus vitæ integritate, ac bene gestis laudem; proinde obsecrabis, ut egregiè cœptis insistat, ut audeat se digna, ut æqui, bonique faciat consilia sincerè amantis.

HORTATORIÆ sunt Epistola Cic. lib. 2. 4. lib. 4. 7. 9. l. 7. 6. lib. 10. 3. 5.

Plinij lib. 1. 3. lib. 2. 10. lib. 7. 1. lib. 9. 14.

DEHORTATORIA contraria Hortatoriæ est; quare eadem fermè ratione tractatur, ductis à contrario argumentis; à difficultate, ab incommodis, à turpitudine rei, à qua conamur amicum detertere.

HORTATORIÆ, ac **DEHORTATORIÆ**, finitiuæ sunt, **SVASORIA**, & **DISSVASORIA**, ut vix distinguantur;

tur ; cùm vnum hoc discrimen inter sit ; quòd *SVASIO* rationibus tantùm , & consilijs agit , *HORTATIO* authoritate , ac precibus hortantis , vt notat *Manutius in Epist. 1. Cic.*

CONSOLATORIA est scripta ad *maerentes doloris medela* , qua vix vlla sibi sæpius vendicat pietatis , & calami officium in tam vberi malorum segete , quibus affluit vita mortalis ; idcò frequentissimè consolatoribus egens vel in rerum iactura , vel in funerum luctu .

Consolandi ratio hæc erit ; vt primum nos affici vehementiùs alterius infelicitate profiteamur , hinc adducamus argumenta , quibus illius animum erigamus ; exhortando , vt strenuè aduersa ferat , quod fortem , sapientemque virum decet , suæq; virtutis meminerit , quæ sola potest fortunæ iras tolerantia eludere : vt enim *Tragicus* cecinit , *Vi- res pepulit , pondusque mali , Casus animo qui tulit æquo* : immò subiiciemus virtutem ipsam latere in prosperis , in tribus emicare : vnicuique propriam calamitatem tanquam artem assignari : varios esse hominum casus ; neminem malis immunem . Omnes , quandiu degunt in terris , in acie versari , vbi assiduè in dura , & aspera certandum . Ita statutum *Diuinæ Sapientiæ* consilio , cui nos , ac nostra committere debe-

S 5

mus ;

mus; nec aliunde certiora expectari posse subsidia; cum illius arbitrio cuncta voluantur; utque serenitati tempestas, ita procellæ malacia succedat.

Si mærentem in luctu solabimur, memorabimus extremam eam necessitatem, quam declinare nemini datum. Nascimur enim morituri; & frustra de eo dolemus, quod communi, & inuiolabili lege sancitum est. Surdam mortem non moueri querelis, nec reuocari lacrymis vitam. Mortui quoque laudes, sed veras eas, ac proprias, ad solamen adhibebimus, commendando virtutes, quibus immortale sibi promeruit nomen, non obnoxium letho. Accedunt validiora Christianæ Philosophiæ lenimenta, quæ piorum obitum quietem esse docet, exilij terminum, aditumque beatitudinis æternæ: proinde temperandum à luctu, immò potius illi gratulandum, qui ex huius vitæ fluctibus ad felicem adeo, securumque portum euaserit.

Lege grauissimum epistolam Sulpicii ad Ciceronem inter huius familiares 5. libri 4., qua eundem in filiæ Tuiliolæ morte consolatur. *Cic. 16. lib. 5. libri 6. 1., & 13.*

CONSOLATORIAS Epistolas elegantè pariter, ac pio stylo conscriptas habet D. Hieronymus *tom. 1. 3. ad He*

Heliodorum 29. *ad Theodorum* 34. *ad Iulianum*. Plurima suggerent ad leniendum in tristibus dolorem Seneca in Consolationibus ad Heluiam, ad Polybium, ad Marciam: Seuerinus Boetius de Consolatione Philosophiæ: Franciscus Petrarca de Remedijs vtriusque Fortunæ.

COMMENDATITIA est, quæ commendamus aliquem alteri. Commendatoriam alij appellant, quam vocem reiiciendam esse monuit Verepæus, Tullianoque vocabulo Commendatitiam esse dicendam. Perfectam commendationem tribus ferè partibus constare docet Paulus Manutius. *In Epist. 3. lib. 1. Famil. Cic.* Ut primò amicum eum esse doceamus, qui commendatur à nobis, dignumq; commendatione nostra, ob doctrinam, virtutem, nobilitatem, aliaue in eo laudanda. Et hæc quidem commendatæ personæ laudatio huiusmodi Epistolæ pars maxima est. Secundò ut æquitatem rei, de qua scribimus, exponamus; quæ honesta esse debet, illiusque, ad quem scribimus, dignitati, facultati, ac naturæ accommodata. Tertiò ut beneficij memorem eum, quem commendamus, nosque pariter fore spondeamus. Non his tamen partibus omnibus necesse est semper commendatio-

nem constare, vt colliges ab exemplis.

Cic. Epistola COMMENDATITIAE sunt lib. 1. 3. lib. 2. 13. lib. 6. 9. lib. 13. 1., & sequentes ferè omnes.

Plinij lib. 2. 9. 13. lib. 3. 2. lib. 5. 19.

PETITORIA est, qua consilium, auxilium, beneficium quarimus ab alio. Hæ sint petitionis leges: ne iusti, honestique fines transiliat, nec aliquid petat probo viro indignum. Moderata præterea sit, ac prudens; ne vel eum, ad quem confugimus, nimium grauet, aut illius vires excedat. Nostrium erit demonstrare, quàm necessarium sit illud, quod petimus, quàm vtile, honorificum, facile, reique assequendæ rationem indicare; adhibere denique preces, & gratum animum polliceri. Decorum maximè petitio seruet. Liberè à familiaribus, & æqualibus poscere licebit: maiores verecundè rogabimus; Principes supplicibus literis exorabimus.

PETITORIAE sunt Epistola Tullij lib. 3. 2. lib. 5. 12. lib. 13. 8. lib. 15. 13.

Epistola Generis Iudicialis.

CAPVT NONVM.

ACCVSATORIA, seu **EXPOSTULATORIA**, teste Manutio in epist. 1. Cic. cum **MONITORIA**, & **OBIUR-**

OBIURGATORIA conuenit; nisi quòd Admonitio lenis obiurgatio est; hæc verò acrior Admonitio; vtraque in Epistolis species Accusationis est.

Vtimur Accusatoria ad redarguendam aliquam amici culpam: vt negligentiam in soluendis promissis, tarditatem, vel intermissionem literarum. Sed meminerimus accusationem istam longè distare à seueritate iudiciorum, atque à dicaci censura abhorre. Omni proinde acerbitate, & contumelia careat; neque nimis acuat calamum, ne amantium iras excedat; vt liqueat beneuolentiæ magis, quàm indignationis esse. Placida potius, & ingeniosa sit, & aliqua amici laude, aliqua etiam excusatione temperetur. Quòd si quis dentata charta rem agere velit, bilemque atramento effundere, aliunde quærat nigræ succum loliginis; neminem enim ad Satyras erudio. Aculeatas literas, aceto, nigroque sale perfusas suis immiscuit Angelus Politianus lib. 12. ad Bartholomæum Scalam, qui pares ictus in Rhinocerotis nasum retorquere conatur. Ita exorta eruditione contentio acrioribus vicissim accusationibus sensim exarsit in pugnam; quod sapius euenire videmus, vbi potior amicitia est laus ingenij, quo qui velit cedere rarus erit.

EXPOSTVLATORIÆ sunt Epistolæ
Tullij lib. 2. 8. 10. lib. 3. 6. lib. 5. 7. l. 16. 26.

Plinij lib. 2. 2.

Accusatoriæ subijci **EXPROBATORIA** potest, sed hæc aliquantò seuerior, vt quæ scribitur in ingratos, qui beneficijs abutuntur, vel nullam referunt gratiam. Hæc parcè adhibenda, atque ita moderanda est, vt collati beneficij ostentationem non præferat, neque nos illius pœnituisse videatur. Talis est Epist. *Cic. lib. 5. 5.*

EXCVSATORIA præcedenti respondet: hac enim illa diluimus, de quibus accusamur; vel crimen à nobis, si liceat, remouendo, vel attenuando, idoneaque afferendo rei rationes, & culpam in angustias temporum, in occupationes, aliasue difficultates reijciendo. Quandòque magis laudabile fuerit, quidquid in nobis est culpæ (vbi tamen expedire prudenter videbimus) ingenuè fateri, veniamque ab amico rogare, ac maiorem in posterum promittere solertiam, quæ compenset errata, neglectiq; officij iuspicionem aboleat.

EXCVSATORIÆ sunt Epistolæ *Cic. lib. 1. 1. lib. 2. 16. lib. 5. 20 lib. 11 13.*

DEFENSORIA cum **EXCVSATORIA** conuenit, nisi differre ideo velis, quòd illa sit Excusatio aliorum, hæc Defensio sui. Idem de **DEPRECA-**

CATORIA dicendum, quæ demum Excusatio est, criminis confessionem, ac extenuationem cum veniæ petitione coniungens. **DEPRECATORIA** est Epistola Plinij 21. lib. 9.

APOLOGETICAM quoque ab **EXCVSATORIA** Verepæus, non distinguit. Thesaurus eas tantum dicendas sentit Apologeticas, quibus docti viri opera sua vindicant ab eorum censuris, quos in eosdem exciuerit aut liuor, aut æmulatio Doctrinæ (a) Plures Apologeticas habet D. Hieronymus in *Epistolis tom. 2.*

Notiores, præstantioresque collegi Epistolarum formas, ad quarum aliquam ceteras, quotquot occurrent, faciliè reuocabis. At neque singulis pertractandis exactiora tradidi præcepta; quòd hæc à Rhetoricæ officina petenda sint: neque suas singulis Responsiones censui subiiciendas; cum hæ tandem à missis Epistolis pendeant, à quibus paratam habent materiem. Earum tamen ordinem necessariò sequi non debere Lipsius docet. *Instit. Epist. c. 6.*, adeò vt non distinctè semper ad capita respondeamus; sed vt vilius, atque hoc, illudue in mentem, aut in calamum venit: nisi fortè alicuius facti

se-

a *Lib. 4. cap. 9. dell' Arte delle lettere Missive..*

series, aut rei grauitas, quæ per partes dilucidè expedienda sit, eiusdem ordinis necessitatem afferre videatur. Denique scito, præ omnibus præceptis profuturam optimorum Scriptorum lectionem: quamobrem etiam, atque etiam hortor, vt assiduè, diligenterq; peruoluas Epistolas Tullij, & suauissimas Plinij iunioris.

Formula Epistolarum.

CAPVT DECIMVM.

QVi scribendas primò Literas agrediuntur, hæcere maximè circa Exordia solent; quam difficultatem vt emolliam, aliquot eorum exempla propono. Addo Responsionum, & Clausularum formulas, plerasque ex Tullio; vt habeas, quæ imiteris, &, si libet, excerpas; dum memineris, videndum esse, quid, cui loco, magis conueniat.

Formula Exordiorum.

Peto à te ne me putes obliuione tui rariùs ad te scribere, quàm solebam, sed aut grauitate valetudinis, qua tamen iam paululum videor leuari, aut quòd absim ab vrbe, vt, qui ad te proficiscantur, scire non possim. *Cic. lib. 6. Epist. 2.*

Non

Non sum ausus Saluio nostro nihil ad te literarum dare : nec mehercule habebam , quid scriberem ; nisi te à me mirabiliter amari : de quo etiam nihil scribente me te non dubitare certò scio . *Lib. 9. 10.*

Puto te iam supputdere ; cùm hæc te tertia Epistola ante oppresserit , quàm tu schedulam , aut literam . Sed non urgeo : longiores enim expectabo , vel potiùs exigam . *Lib. 15. 16.*

Non scribentis diligentia , sed dictantis temeritate longum ad te silentium rumpo , offerens tibi nudam officij voluntatem . Extemporalis est Epistola , absque ordine sensuum , sine lenocinio , & compositione verborum ; vt totum in illa amicum , nihil de Oratore reperias . In procinctu effusam putes , & abire cupienti ingestum viaticum . *Ex Epist. D. Hieronymi 34 tom. 1. ad Iulianum.*

Conatus persæpe sum scribere aliquid ad te vir clarissime ; quo tibi meus animus , studiumque , & voluntas innotescerent . Verùm nescio qui semper ingenuus , dixerim , an rusticus , obstitit pudor ; vt qui nec me tibi satis notum sciebam , & virtutis fortunæque tuæ quodam quasi fulgore deterrebar . Sed impetrauit à me tandem qualescunque has literas vel mei officij ratio , vel tua
hu-

humanitatis opinio. *Angeli Politiani*
lib. 20. Ep. 3.

Inuitatio ad scribendum.

Olim nullas mihi Epistolas mittis.
 Nihil est, inquis, quod scribam. At
 hoc ipsum scribe, nihil esse quod scri-
 bas; vel solum illud vnde incipere prio-
 res solabant. *Si vales, bene est; ego va-*
leo. Hoc mihi sufficit; est enim maxi-
 mum. Ludere me putas? seridò peto.
 Fac sciam, quid agas, quod sine solici-
 tudine summa nescire non possum.
Plin. lib. 1. epist. 11. Huiusmodi est 2.
lib. 2. & 17. lib. 3.

Responsionum Exordia.

Legi tuas literas, quibus ad me scribis
 gratum tibi esse, quòd crebrò certior
 per me fias de omnibus rebus, & meam
 erga te benevolentiam facilè perspicias:
 quorum alterum mihi, vt te plurimum
 diligam, fecere necesse est, si volo is
 esse, quem tu me esse voluisti; alterum
 facio libenter, vt quoniam interuallo
 locorum, & temporum disiuncti su-
 mus, per literas tecum quàm sæpissi-
 me colloquar. *Cic. lib. 1. ep. 7.*

Quanquam me nomine negligentia
 suspectum tibi esse doleo, tamen non
 tam mihi molestum fuit accusari abs te
 officium meum, quàm iucundum re-
 quiri; præsertim cùm in quo accusabar,
 culpa vacarem; in quo autem deside-
 rare

rare te significabas meas literas, præferres perspectum mihi quidem, sed tamen dulcem, & optatum amorem tuum. *Lib. 2. 1.*

Accipio excusationem tuam, qua usus es, cur sæpius ad me literas vno exemplo dedisses; sed accipio ex ea parte, quatenus aut negligentia, aut improbitate eorum, qui Epistolas accipiant, fieri scribis, ne ad nos perferantur. Illam partem excusationis, qua te scribis orationis paupertate (sic enim appellas) iisdem verbis Epistolas sæpius mittere, nec agnosco, nec probo. *Lib. 4. 4.*

Quanquam ipsa consolatio literarum tuarum mihi gratissima est, declarat enim summam benevolentiam coniunctam pari prudentia: tamen illum fructum ex ijs literis vel maximum cepi; quod te præclare res humanas contemnentem, & optimè contra fortunam paratum, armatumque cognoui. *Lib. 5. 13.*

Delectauerunt me literæ tuæ, in quibus primùm amaui amorem tuum, qui te ad scribendum incitauit. *Lib. 9. 16.*

Immortales ago tibi gratias, agamq; dum viuam; nam relaturum me affirmare non possum; tantis enim tuis officijs non videor mihi respondere posse; nisi fortè, ut tu grauissimè, disertissimèque scripsisti, ita sensurus es, ut me referre gratiam putes, cum memoria tenebo. *Lib. 10. 11.*

Quan-

Quamquam gratiarum actionem à te non desiderabam ; cum te re ipsa , atque animo scirem esse gratissimum : tamen (fatendum est enim) fuit ea mihi periucunda : sic enim vidi quasi ea , quæ oculis cernuntur , me à te amari . *Lib. 10. 19.*

Variè affecerunt me literæ tuæ , nam partim læta , partim tristitia continebant .

Plin. lib. 5. 9.

Brevissima Responsiones.

Eadem Epistola & studere te , & non studere significat . Ænigmata loquor . Ita planè ; donec distinctius , quid sentio enuntiem . Negat enim te studere , sed est tam polita , quæ nisi à studente non potest scribi : aut tu es super omnes beatus , si talia per desidiam , & otium perficis . Vale . *Plin. lib. 7. 13.*

Contemni te putas , quòd non rescribo . Contemnerem , si rescriberem . Quos enim contemno , respondere his audeo vel occupatus ; tibi nec otiosus . Vale . *Angeli Politiani lib. 7. ubi & perbreues alia .*

Clausula Epistolarum .

Hæc ad te scripsi liberiùs fretus conscientia officij mei , benevolentiaque , quam à me certo iudicio susceptam , quoad tu voles , conseruabo . *Cic. lib. 3. 7.*

Hæc igitur tibi erunt curæ , quemadmodum ostendis , meq; totum , & mea , & meos commendatos habebis . *Lib. 3. 9.*

Ego

Ego quæ te velle, quæque ad te, & ad tuos pertinere arbitrabor, omnia studiosè diligenterque curabo: quæ cum faciam beneuolentiam tuam erga me imitabor, merita non assequar. *Lib.6.4.*

Hoc tantum significandum putauis; ut potiùs amorem tibi ostenderem meum, quàm ostentarem prudentiam; interea quæ ad dignitatem tuam pertinere arbitrabor, studiosè, diligenterque curabo. *Lib.10.3.*

A me autem, cum paulum otij nacti erimus, vberiores literas expectato. Da operam, ut valeas. Hoc mihi gratius nihil facere potes. *Lib.11.29.*

Hæc tibi scripsi; quia æquum erat pro amore mutuo, non solùm omnia mea facta, dictaque, verùm etiam consilia cognoscere. *Plin. lib.1.5.*

Tullium saluta verbis nostris.

Nos Sulpicio de meliore nota commenda.

Apud amicos tu fac pomenclatorem agas, ac singulis ex me nominatim salutem dicito.

Amicos omnes, sed in primis Lentulū nostrū iubebis à me plurimū saluere.

Ticinum proficiscens ad Conturbernales olim nostros salutem meo nomine perferas rogo.

Collegas à me nominatim salutabis.

Liuiο, multis animi, fortunæque do-
tibus

tibus ornatissimo adolescenti precaberis à me salutem plurimam, & felicem studiorum successum.

Si quid ad Antonium literarum dederis, accuratissimam illi salutationem meo nomine adscribas velim.

*De Calendis, Nonis, & Idibus, quibus,
ex Veterum more notantur
in Epistolis dies.*

CAPVT VLTIMVM.

SCio quidem hæc ad Grammaticos pertinere : malui tamen seruire commodi tuo, quàm omittere aliunde à te quærenda, quæ hic maximè veniunt in vsum.

Diuisere Veteres Mensẽ in *CALENDAS, NONAS, & IDVS*. De horum nominum origine varia sententia est. (a) Aliqui dictas putant *Calendas* à colendo; quod maximè colerent Antiqui cuiusque Mensis initia, *Nonas* à Nundinis, quæ his diebus celebrabantur : *idus* ab edendo; quòd epularum dies essent. Alij *Kalendas* per *K* scribendas censent, deriuatas à verbo Græco *Kalo*, quod idem sonat, ac vocare : quòd ea die *Populus* à Pontifice conuocari soleret : *Nonas* ita dictas, quòd inter

a *Isidorus de Origine nominum l. 5. c. 33.*

ter eas & Idus nouem dies numerentur: Idus ab antiquo verbo Iduare, quod significat diuidere; cum quasi diuidant mensem in duas partes. At curiosius aliàs ista quærere vacabit.

Calendæ sunt prima die cuiusq; mensis: Nonæ Die quinta: Idus die decima tertia. Excipiuntur quatuor menses, Martius, Maius, Iulius, & October, qui Nonas habent die septima, Idus die decima quinta: Quæ comprehensa carminibus facilius memoriæ mandabis.

Primum quenque diem Mensis dixere Calendas:

Quintus dat Nonas: Decimus dat tertius Idus.

Octobris verò, Maij, Ianuarij, Iulij Septima lux Nonas, Idus quindena reportat.

Primo igitur die Mensis dicitur **CALENDIS**; die, in quem incidunt Nonæ, **NONIS**, in quem incidunt Idus, **IDIBVS**. Die, qui antecedit Calendas, Nonas, Idus, dicitur: *pridie Calendas; pridie Nonas, pridie Idus.*

Post Calendas, hoc est post primum diem mensis vsque ad Nonas, dies denominantur à Nonis, hoc pacto. Incipe numerare à die, quem designare volueris, ad Nonas; computando tamen, & diem designandum, & ipsum Nonarum diem: tum inuentum numerum offer

esser in Ablatio, addito Accusatio
NONAS ex. gr. Dandæ sint literæ die
 secundo Ianuarij: enumera ab hoc die
 ad Nonas; hoc est ad diem quintum,
 connumerando & secundum, & quin-
 tum diem, inuenies quatuor dies esse:
 dices ergo *Quarto Nonas Ianuarij*. At
 si designare volueris secundum diem
 alicuius ex quatuor exceptis mensibus,
 qui Nonas habent die septimo; nume-
 rabis à secundo die ad septimum, tunc-
 que dices *Sexto Nonas Martij*, vel *Maij*,
Iulij, vel *Octobris*.

Post Nonas dies denominantur ab
 Idibus eadem seruata numerandi ratio-
 ne. Sic die sexto Decembris dices: *Oc-
 tavo Idus Decembris*; die nono Maij
 dices *Septimo Idus Maij*.

Post Idus dies denominantur à Calen-
 dis sequentis mensis, eodem modo sup-
 putando. Sic die decimoquarto Decem-
 bris dices: *Decimonono Calendas Ianna-
 rij*. Die decimosexto Octobris dices:
Decimoseptimo Calendas Nouembris.

At ne contingat error in numerando,
 scire debes, quot diebus singuli menses
 constent; quod sequentia carmina do-
 cebunt.

*Iunius, Aprilis, September tumque
 Nouember*

*Ter denos numerant: reliquis super-
 additur vnus.*

*Februus at breuior bis denis constat,
& octo.*

*His vnum adiungit Biffextus quilibet
Annus.*

Aduerte igitur breuissimum omnium mensium Februarium, qui tantum vigintiocto dies habet, Intercalari anno recurrente, vno augeri, habereque vigintinouem. Semper tamen post Idus, hoc est die decimaquarta, dicitur *Decimosexto Calendas Martij*, hinc *decimoquinto, decimoquarto, decimotertio &c.* hoc vno discrimine, quod si fuerit annus Intercalaris, bis dicitur *Sexto Calendas Martij*; hoc est die vigesima quarta, & vigesima quinta; vnde ortum Biffexti nomen.

Vt verò scias quotus quisque mensis dies sit, denominatus à Nonis, Idibus, Calendis, hæc obserua. Si dies denominatur à Nonis, vel Idibus; vide, quo numero notetur, & quantum is distet ab ipsis Nonis, vel Idibus, vnoque superaddito propositi diei numerum inuenies. Do exemplum. Data est Epistola *Quarto Nonas Augusti* 4. à 5. (in quem incidunt Nonæ) vno distat: huic alterum adde, 2. fient. Secundo ergo die mensis scripta fuit Epistola. Data est *Sexto Idus Septembris*, quæ cadunt in diem 13. A 6. ad 13. numerantur 7. adde vnum, erunt 8. Octauus igitur.

igitur Augusti dies designatur. Eadem ratio seruetur, si dies denominetur à Calendis sequentis mensis: at vbi superius vnum addideras, duo adiunges. Ex. gr. Scriptæ sunt Literæ 10. Calendas Octobris. A 10. ad 30. (tot enim diebus constat September, ad quem dies ille pertinet, quanuis denominatus à Calendis sequentis Octobris.) A 10. inquam ad 30. 20. numerantur: adijce duo, iam erunt 22. Vigesimo ergo secundo Septembris die scriptæ Literæ fuerunt.

Superest, vt aliquos dicendi modos explicem huc pertinentes. *Tertio Nonas, quinto Idus, sexto Calendas &c.* idem significat, ac tertio die ante Nonas, quinto die ante Idus, sexto die ante Calendas. Aliquando apud Tullium, & alios inuenies. *Ad quartum Nonas, ad decimum tertium Calendas &c.* idem est, ac quarto Nonas, decimo-tertio Calendas. Item Nonas, Idus, Calendas *Ianuarias, Februarias, Martias &c.* hoc est Ianuarij, Februarij, Martij &c. Inter mensium quoque nomina *Quintilem* pro Iulio, *Sextilem* pro Augusto leges.

Has breues regulas proderit memoria tenere; ne semper confugiendum sit ad tabulas Calendarij, pluribus typorum erroribus obnoxias.

IN.



INDEX R E R V M,

Quæ in prima parte conti-
nentur.

A	<i>Diuncta.</i>	158
	<i>Alea vituperatio.</i>	235
	<i>Alexander Philippo patri com- paratus.</i>	68
	<i>Allegoria.</i>	26
	<i>Amplificatio.</i>	123
	<i>Amplificationis praxis.</i>	195
	<i>Anagrammata.</i>	136
	<i>Annominatio. 29. V. Alliteratio.</i>	136
	<i>Antecedentia, & Consequentia.</i>	164
	<i>Antiphrasis.</i>	33
	<i>Antonomasia.</i>	23
	<i>Apostrophe.</i>	72
	<i>Apostrophe ad gulam.</i>	209
	<i>ad Aleatorem.</i>	238
	<i>Argumentum Poeticum. V. Narratio Poetica.</i>	
	<i>Authores citandi formula.</i>	192
B	<i>Ellnarum Descriptiones. 255.</i>	262.
	306.	307
C	<i>Alenda, Nona, & Idus.</i>	431
	<i>Catachresis.</i>	24
	<i>Cause.</i>	175
	<i>Cephalis, & Procridis funesti errores.</i>	314
	<i>Chria. 361. Eius partes.</i>	363
	<i>Exemplum Chria Verbalis.</i>	369
	<i>Actina. 376. Mistæ.</i>	384
	T	2
	Chro.	

Chronographia.	291
Compar seu Isocolon.	40
Comparatio.	184
In Comparatione, qua Paria dicantur, qua Maiora, qua Minora. ibidem.	
Communicatio.	48
Complexio.	37
Concessio.	44
Conduplicatio.	37
Congeries.	63
Coniunctio.	38
Coniugata.	138
Contradicentia.	155
Contraria.	154
Contrapositum.	67
Conuersio.	37
Correctio.	50
Corrector aliorum vitijſ careat.	43
Culpam Protoparentis conſequentia.	169
D efinitio.	129
Definitio Historia. 133. Oris huma- ni. ibidem.	
Dei Definitio per Negationem.	132
Laudatio.	228
Deprecatio.	76
Descriptio.	55. 251
Descriptiones varia. Amnis.	56
Anus ad ſpeculum inſanientis.	268
Aleis ludentium.	236
Adoleſcentia. 293. Aedum.	285
Automatum, ſeu mobilium icuncula- rum.	381

<i>Casi exercitus.</i>	56.	<i>Carduelis.</i>	264
<i>Conuiuij.</i>	304.	<i>Elephantis.</i>	262
<i>Ferri.</i>	314.	<i>Fluminis exundantis.</i>	310
<i>Fœmina,</i>		<i>recentiori luxu ornata.</i>	259
<i>Formicarum laborantium.</i>	306.	<i>Funeris.</i>	305
<i>Granadilla floris.</i>			316
<i>Hispania.</i>	283.	<i>Hominis.</i>	129. 130. 179
<i>Horti.</i>			286
<i>Inconstantis ingenij hominum.</i>			273
<i>Irascentium.</i>			218
<i>Laetitia publica in Principis aduentu.</i>			302
<i>Literati studiosique Viri.</i>	256.	<i>Lusciniarum canentium.</i>	307
<i>Magnetis.</i>	311.	<i>Mali Punici.</i>	315
<i>Matrona Campana.</i>			385
<i>Philippi Macedonis.</i>	275.	<i>Philosophia.</i>	278.
		<i>Plutei scriptorij signis ornati.</i>	320.
		<i>Principis Bellatoris.</i>	258.
		<i>Pugna.</i>	301
<i>Regionis amœna.</i>	287.	<i>Senis vegeti.</i>	141.
		<i>Simij.</i>	262.
		<i>Simulacri ærei.</i>	318
		<i>Supellectilis pretiosa.</i>	178
<i>Tempestatis.</i>	309.	<i>Temporis.</i>	295. 297
<i>Veris.</i>	292.	<i>Virilitatis.</i>	294
<i>Descriptiones Poetica.</i>			
<i>Anari senis.</i>	276.	<i>Augusta Sponsa.</i>	57
<i>Autumni.</i>			298
<i>Domus somni.</i>	287.	<i>Famis.</i>	288
<i>Tiberis.</i>	ibidem.		
<i>Deprecatio.</i>			76

Diminutio, seu Extenuatio.	242
Dissimilitudo.	150
Dissolutio Figura Verborum.	38
Distributio Figura sententiarum.	64
Distributionis varia species, earumque ad amplificationem usus.	201
Diuites Paulo Anachoreta comparati.	153
Dubitatio.	47
Efecta.	181
Elocutio quid sit, & qua illius virtu- tes.	3
Eloquentia definita à Tullio.	2
Emphasis.	70
Enumeratio partium.	139
Epiphonema.	71
Epistola quid sit. 395. Illius partes. 396 Stylus. 403. Magnitudo. 405. Gene- ra, & species Epistolarum. 407. For- mula Epistolares.	424
Ethopœia.	265
Exclamatio.	75
Exemplum.	188
Expositio.	60
Fabula.	330
Fabularum exempla.	33
Facti Amplificatio. 221. Descriptio.	299
Narratio.	323
Fallacia fallaci supplicio multata.	342
Fastus, & luxus Principum.	152
Felicitatem omnes desiderant.	198
Fictio quid sit.	189
Fides inter tot hominum vitia inueniri non	

non potest.

145

Figura quid, & quotuplex sit.

35

Figura Verborum.

37

Figura Sententiarum.

41

Figurarum Latina, & Græca Nomina.

85

Filij rectè instituti sunt ornamenta Parentum.

384

Fortuna prospera nocentior aduersa.

158

Fortuna, ac virtutum Theodosij contentio.

80

G Enus.

142

G Gloria merces virtutis.

180

Gradatio.

86

Gula quodlibet elementum vexat.

206

H Ominis definitio.

129. 130

H Hyperbaton.

33

Hyperbole.

30

I Gnis Prosopopœia.

211

I Impossibile.

68

Imprecatio.

76

Incrementum.

62

Interrogatio.

42

Interpretatio.

57

Interpunctio periodi partes distinguens.

pag.

98

Ira vitiorum omnium teterrimum.

217

Ira effecta.

220

Ironia.

31

Iuvenes peiora faciliè præcepta audiunt.

pag.

365

L atina lingua etates.	7
Laus, & vituperatio.	226
Laus Eloquentia. <u>182.</u> Hispania.	<u>283</u>
Mortis.	<u>183</u>
Philosophia. <u>182.</u> Poetica Artis.	<u>144</u>
Principis. <u>163.</u> D. Vittoria Martyris.	231
Seneca Tragici. 365. Valerij Maximi.	369
Leonis Imperatoris facinus exaggeratum, & exprobatum.	221
Licentia.	51
Locorum definitio, ac divisio.	<u>127</u>
Loci intrinseci à pag. <u>129.</u> ad 190. Extrinseci. <u>190.</u>	<u>192</u>
Loci adiunctum scelus auget.	163
Loci descriptio. <u>182.</u> , & seq.	
Loci malignitas sibi noxia.	<u>350</u>
M aximus Tyrannus Theodosio comparatus.	<u>156</u>
Metalepsis.	<u>26</u>
Metaphora.	<u>12</u>
Metaphorica translationes ab artibus.	<u>14</u>
Metonymia.	<u>22</u>
Mors ab Innocentio IX. ad consultationem adhibita.	376
Morum doctrina ceteris disciplinis prestantior.	<u>45</u>
N arratio, eiusque virtutes. <u>324.</u> Illius texenda ratio. <u>332.</u> Exempla. <u>337</u>	
Narratio Poetica. <u>327.</u> Huius exemplum.	354

Narrationis, Descriptionis, & Amplificationis discrimen.	323
Notatio.	134
Numerus Oratorius.	112
O Minatio.	77
O Onomatopœia.	24
O Opposita.	154
P Aradoxum.	69
P Parricidij atrocitas.	145
P Pauli ambitus <u>castigatus</u> .	346
P Pauper securus.	215
P Periodus.	96
P Periodi implendæ ratio.	106
P Periodica Orationis usus.	119
P Periphrasis.	29
P Pragmatographia.	299
P Preoccupatio.	53
P Præteritio.	65
P Principis, quæ vera gloria. 62. Beneficentia.	168
P Privantia.	155
P Prosopographia.	254
P Prosopopœia.	78
P Pueri Heroes iustus, & Pastor.	338
R Ector aliorum Medico comparatus.	149
R Relativa.	155
R Repetitio.	37
R Repugnantia.	172
R Reticentia.	78
S Celera furia sunt, quæ torquent sceleratos.	61

<i>Sermocinatio.</i>	81
<i>Similitudo.</i>	146
<i>Similiter cadens, & desinens.</i>	40
<i>Somatopœia.</i>	277
<i>Species.</i>	142
<i>Subiectio.</i>	43
<i>Superbia inuisa.</i>	71
<i>Sustentatio.</i>	46
<i>Synecdoche.</i>	20
T <i>Empus descriptum.</i>	295. 297
<i>Topographia.</i>	282
<i>Topothesia.</i>	289
<i>Traiectio, seu traductio.</i>	38
<i>Transitiones.</i>	89
<i>Tropus quid sit. II. Quotuplex.</i>	12
V <i>Erborum copia, & delectus.</i>	5
<i>Vincere se ipsum difficilius, quam hostem.</i>	369
<i>Virtus, & doctrina virum perficiunt.</i>	54
<i>Virtus voluptati comparata.</i>	157
<i>Virtus vera, quæ sit.</i>	131
<i>Vitiorum enumeratio.</i>	145. 146. 203
<i>Vita humana infelicitas.</i>	179
<i>Vitam prauis cupiditatibus, ac inanibus studijs ipsi facimus breuem.</i>	203
<i>Wimperatio.</i>	226. 234

FINIS.

